


Xtidxcoob Dios ni
biädinä dad Jesucrist



New Testament in Zapotec, Mitla (MX:zaw:Zapotec, Mitla)

Xtidxcoob Dios ni biädnä dad Jesucrist

New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
5cff1274-8dc3-5398-a94d-f6033bb363c9

Contents

San Mateo	1
San Marcos	55
San Lucas	89
San Juan	146
Hechos	187
Romanos	241
1 Corintios	262
2 Corintios	282
Gálatas	295
Efesios	302
Filipenses	309
Colosenses	314
1 Tesalonicenses	319
2 Tesalonicenses	323
1 Timoteo	326
2 Timoteo	332
Tito	336
Filemón	339
Hebreos	340
Santiago	356
1 Pedro	362
2 Pedro	368
1 Juan	372
2 Juan	378
3 Juan	379
Judas	380
Apocalipsis	382

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

¹ Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

² Abraham gujc xtd Isaac, Isaac gujc xtd Jacob, Jacob gujc xtd Judá con rebejtzní. ³ Judá con Tamar gujc xczajzn Fares con Zara. Fares gujc xtd Esrom, Esrom gujc xtd Aram. ⁴ Aram gujc xtd Aminadab. Aminadab gujc xtd Naasón. Naasón gujc xtd Salmón. ⁵ Salmón con Rahab gujc xczajzn Booz. Booz con Rut gujc xczajzn Obed. Obed gujc xtd Isaí. ⁶ Isaí gujc xtd reii David. David con nani gujc cháäl Urías gujc xczajzn Salomón.

⁷ Salomón gujc xtd Roboam. Roboam gujc xtd Abías. Abías gujc xtd Asa. ⁸ Asa gujc xtd Josafat. Josafat gujc xtd Joram. Joram gujc xtd Uzías. ⁹ Uzías gujc xtd Jotam. Jotam gujc xtd Acáz. Acáz gujc xtd Ezequías. ¹⁰ Ezequías gujc xtd Manasés. Manasés gujc xtd Amón. Amón gujc xtd Josías. ¹¹ Josías gujc xtd Jeconías con rebetzní cheni huij reben Israel pres lo guedx Babilonia.

¹² Che gudejd huij rebejnğa pres Babilonia, dxejc guyu' xi'n Jeconías, Salatiel. Salatiel gujc xtd Zorobabel. ¹³ Zorobabel gujc xtd Abiud. Abiud gujc xtd Eliaquim. Eliaquim gujc xtd Azor. ¹⁴ Azor gujc xtd Sadoc. Sadoc gujc xtd Aquim. Aquim gujc xtd Eliud. ¹⁵ Eliud gujc xtd Eleazar. Eleazar gujc xtd Matán. Matán gujc xtd Jacob. ¹⁶ Jacob gujc xtd José cháäl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajnlí toAbram cheni gubajnlíza toreii David. Tzudajza rexagdoo najc reni gudejd cheni gubajnlí toDavid cheni huijli reben Israel pres Babilonia. Stzudaj rexagdoo najc reni gudejd cheni birilireni pres Babilonia che gojllí Crist.

Cheni gojl Jesucrist

(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchnaani José ni gac cháälni. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni. ¹⁹ José com najcni te beñsa'c, di rlajzní nuro'nni Marii nez loj rebejn te niacbeereni, ni'c bejnni xhigab Guñonxhiga'tzní Marii. ²⁰ Xhigabga cayujnni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxan xten Dios. ²¹ Che gaal xi'nni cuälajluni Jesús sa'csi laani guslaani rexpejnni lo rextojlreni.

²² Guiraa redee gujc si'c te guzojb diidx ni gunii tej ni bacuaa xtidx Dios. Räjpni:

²³ Suu te dxapxteeb báz, sajł te xingaanni nani guirilaj: Emanuel, (lajni säloj Dios nabajñ con nuure).

²⁴ Che gubajñ José lo bacal, bejnni si'cni räjp xangl Dad lojni. Cua'ni Marii gujc cháälni. ²⁵ Luxh dñi niembeeni si'c cháälni dxejli cheni gudejd gojl xingangalojni ni gulälajni Jesús.

2

Che biädhuii reben nanduxh ni laa remagos lojni

¹Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujñ rebennajn ni najc remagos, siäädreni nejz cadro rliejn gubijdx, bidzujñreni guedx Jerusalén. ²Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxlínu, ni'cni siopdonnuni.

³Che biejn diajg reii Herodes diidxga, guyuduxhni yärsia' nájza guiraa reben Jerusalén. ⁴Dxejcti batie'ni guiraa rebixhojzro ni rnibee loj rebixhojz, nájza guiraa renani rulúi xleii Moisés lo rebejn te gunabdiidxni lojreni:

—¿Caro gaal Crist?

⁵Laareni räjpreni:

—Nen guedx Belén xten guedx Judea sa'csi si'c gunii niguui ni bacuaa xtidx Dios che räjpni:

⁶Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guejdxre guirii tej nani guinibee, te ni ga'p rexpenä Israel.

⁷Dxejcti guredx-xhiga'tz Herodes remagos te gunabdiidxni gucti biri-caj bajl nani bahuiireni. ⁸Dxejcti baxhalñireni guedx Belén, räjpni lojreni:

—Colchäjä ro'c, colñabdiidxsa'c xcuent biuuxga te che abidxältuni jiädniitu loä te nájza narä chagañäni.

⁹Che biejn diajgreni xtidx reii, sä'tireni. Bajl nani bahuiireni lagajc lajdxreni laltis niñdni lojreni. Che bidzujñlireni cadro yu' bázga, dxejcro guzobdxi bajlga. ¹⁰Che bahuii remagos loj bajlga, rbalazduxhreni.

¹¹Si'c bidzujñreni. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcälñasa'creni bazalajzreni oor, nájza yaal nájza yalnejh. ¹²Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're nájza xnanni, huinäreni Egipto. Ro'c guläjäz che guiniäli lojlu. Siguuil Herodes biuxe're sa'csi rlaizni ju'tnini.

¹⁴Dxejc huistiegajc José, cua'ni biuxe're nájza xnanni, lagajc yäälga biriireni, siireni nez Egipto. ¹⁵Ro'c guyu'reni cheni gujtlí Herodes. Guiraa dee guzajc te guzobj diidx ni bacuaa niguui ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶Che guchee Herodes abasguee remagosni, bidxecheduxhni. Gu-nibeeni guet guiraa rebiuxniguui ni yu' tio'p ijz nájza rebiuxe' ni yu' guxiiru dxej, guideb nen guedx Belén nájza reguejdx ni re' gabiga, si'cti redxej ni räjp remagos lojni. ¹⁷Dxejc guzobj diidx ni bacuaa Jeremías ni gunii xtidx Dios che räjpni:

¹⁸Biejn xse' bejn nen guedx Ramá, te yälhuinduxh, te yälrbexdij, yälrbexneñ:

laa Raquel ni roon yejc rexi'nni.

Naaddini jiäjl lajzni sa'csi agujt rexi'nni.

¹⁹Cheni gujt Herodes, dxejc lo te bacal huiluiloj xangl Dios loj José nen Egipto. ²⁰Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlaiz ju't biuxe're.

²¹Dxejcti huistie José, cua'ni biuxe' näjza xnanni. Gubi'reni Israel. ²²Luxh che biejn diajgni rnibee Arquelao guejdx Judea lacuaa Herodes, xtdani, bidxejbni nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³Dxejc biädläjnzeni nen guejdx ni laa Nazare't te si'c guzojb diidx ni bacuaa niguii ni gunii xtidx Dios cheni räjpni: “Sirilajni nazaren.”

3

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn. 1:19-28)

¹Nen redxejga biääd Juan Bautist lo reyubijdz xten guedx Judea, ro'c cagulijdxni, ²cayäjpni:

—Colgusiechlaiztu rextoljtu sa'csi xcälrnibee Dios abidzungajxhni.

³Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴Najcw Juan xquichlajd cameii. Naliib te duguijd xque'ni. Rajwni guxa't näjza dzujn xten baseerguijxh. ⁵Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadiajgteni xtiidxni. ⁶Che ruxhobdojlreni xtojlreni, rutiobnis Juanreni ro' gueu Jordán.

⁷Che bahuiini siääd xhidajl reben guidoo ni najc refarisee näjza ni najc resaducee, rlaizreni gutiobnisniren, räjpni lojreni:

—La'tu benguidxduxh, najctu si'c bäl. ¿Chu balijdxtu guxuñtu loj xcälrndex'ch Dios ni siääd? ⁸Colguibañsa'c si'cni nungäjl te fiipac rebejn guliipac abasiechlaiztu. ⁹Na'c litis guntu xhigab naatu: “iNi nurnu najcnu rexagdo toAbram!” Rniliä lojtu, sajx xca' Dios reguijre gunni gacreni rexin' toAbram. ¹⁰Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹Narä guliicani rustiobnisä con nis si'c te seen cheni abasiechlaiztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. ¹²Aca'ni xhi cojn gusiani triuu xtenni te chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejx par tejpas.

Che gurobnis Jesús

(Mr. 1:9-11; Lc. 3:21-22)

¹³Dxejc birii Jesús nez Galilee, bidzujn ro' gueu Jordán cadre yu' Juan te gutiobnis Juanni. ¹⁴Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

¹⁵Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlaiz Dios gac.

Dxejctiru batiobnis Juan Jesús.

¹⁶Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädýajt Sprit Dxañ xten Dios si'c te palom, biäjtni lojni. ¹⁷Dxejc xhaguibaali bieññ diajgreni te xse' ni räjp:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz

(Mr. 1:12-13; Lc. 4:1-13)

¹Dxejc beññ Sprit Dxañ xten Dios huij Jesús nez lo reyubijdz te nejzga nuhual beññxab Jesús.

²Che gulujx bacua'n Jesús tiuu gubijdx, tiuu guxhijñ, gulaanni. ³Sas biääd beññxab lojni, räjpni:

—Palga guliilu Xi'n Dioslu, gunibee gac reguijre yätxtiil.

⁴Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yälxtiil guibajñ rebejñ; sibajñzani con guiraa diidx nani rnii Dios.”

⁵Dxejcti huinä beññxab Jesús guedx Jerusalén. Gulä'pnini jiaa yejc xques guidoro. Dxejcru räjp beññxab lojni:

⁶—Palga Xi'n Dios luj, bitiäjs lo yujli, sa'csi scree caj loj rexquijtz Dios: Sinibee Dios rexanglñi ga'preni luj; siliäsreni luj con ñaareni didi gacnaj ni'lu lo reguijga.

⁷Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸Stee huält huinä beññxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälñasa'creni.

⁹Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰Dxejcti räjp Jesús lojni:

—¡Huij nez rec beññxab! Scree caj loj rexquijtz Dios: “Dad Xtioslislu ganlu; lojtisni chulu.”

¹¹Dxejcti gubicaj beññxab loj Jesús. Dxejc biääd rexangl Dios biädhuiireni Jesús.

Gusloj Jesús cayujñ xtzuunni

(Mr. 1:14-15; Lc. 4:14-15)

¹²Che bieññ diajg Jesús yu' Juan neññ ladzguiib, huijni nez Galilee.

¹³Dxejcti gudejdñi guedx Nasare't, huiläjzñi guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴Si'c gujc te guzojb diidx ni bacuaa Isaías ni gunii xtidx Dios:

¹⁵Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejñ nani di gac rexpen Israel.

¹⁶Rebejñ nani rbäjz neññ te yälkäy abahuiireni te bajlga, luxh bajlga basaniñ xcäriejñ renani nabajñ lo xcälrdxejb, lo xpalaa yälgujt.

¹⁷Dxejcli gusloj caguliidx Jesús, räjpni:

—Colgusiejchlajztu, colguxhobdojl te guibañsa'ctu sa'csi abidzungajxh xcälñribee Dios.

Che gurejdx Jesús tajp xpejñni

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bājł, ni'c cacuaarenı guijxh lo nisdoo. ¹⁹ Dxejcti rājł Jesús lojreni:

—Coltanajł narä. Naj riniaaztu bājł, niluxh narä gunä cuedxtu rebejn.

²⁰ Lagajc dxejc basa'nreni xquijxhreni te sanajłreni laani.

²¹ Che gudejdreni ro'c, bahuini loj stio'p niguii, Jacob con bejtzni Juan. Yu'reni nen te barcw con xtdreni, ni laa Zebedeo cayunsa'creni guijxh. Dxejc gurejdx Jesúsreni. ²² Lagajc dxejc basa'nreni barcw nājza xtdreni te sanajłreni Jesús.

Caguluii Jesús xhidajł bejn

(Lc. 6:17-19)

²³ Sasajti Jesús guideb nez región xten Galilee, caguluiini nen tejga rexquidooreni. Cagusule'ni redidxcoob xten xcälřnibee Dios. Cagusia-jczani guiraa yälřacxhuu ni rajc rebejn guejdxga, guiraa yälgujdx. ²⁴ Biejn diajg reben Siria diidx xcuent ni cayujł Jesús. Sas biädñäreni guiraa rebenřacxhuu ni cayajc guiraloj yälgujdx, yälñayan; guiraa reni rajc yejcreni, guiraa reni rajc malyälgujdx, reni rajc yälguidxbej, guiraarenı abixu'n tiejxhreni. Dxejcti basiajł Jesús rebejnğa. ²⁵ Xhidalduxh ben Galilee huinajłni, nāj reben reguedx Decápolis, nājza reben guedx Jerusalén, nājza reben Judea nājza rebejn ni tre' stelaad gueu Jordán.

5

Yejc te dajł baliidx Jesucrist rebejn

¹ Che bahuini Jesús loj reben xhidajł, huä'pni yejc te dajł. Dxejcti gubig rexpejnıni ni gurejdxni lojni. ² Dxejc gusloj caguluii Jesús reni'c, scree rājłni:

Rebejn ni sibaalajł

(Lc. 6:20-23)

³ —Sibaalajł rebejn nani nanchee rquinduxhreni xcälřracnāj Dios, sa'csi laarenı nungājłreni xcälřnibee Dios.

⁴ 'Sibaalajł rebejn nani rac-huin lajzreni xcuent rextojłreni, sa'csi sudzucaj Dios xtojłreni, susiälłni lajzreni.

⁵ 'Sibaalajł rebejn nani nadolajł nani rłajł guntis si'cni rnibee Dios, sa'csi sacnāj Diosreni lo xcälřnabajłreni lo guedxliujre.

⁶ 'Sibaalajł rebejn ni nastoocanu rliaanreni, riojłreni, sa'csi rłajzreni guibańsa'ctisreni nez loj Dios, sa'csi sudeed Dios lojreni guiraa ni rñiabreni.

⁷ 'Sibaalajł rebejn nani rulasajł sa'reni, sa'csi sulasajłzza Diosreni.

⁸ 'Sibaalajł rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ 'Sibaalajł rebejn nani ruscuedxılajł sabejnreni, sa'csi laarenı sirılajłreni rexi'n Dios.

¹⁰ 'Sibaalajł rebejn nani rusutijł lajzreni che rusacsı bejnreni sa'csi nabańsa'creni nez loj Dios, sa'csi xtenreni najc xcälřnibee Dios xhaguibaa.

¹¹ 'Colřpaalajłtu che gusacsı bejntu tilñajłreni la'tu, guiniireni guiraloj didx-xhii xcuent xtidxä. ¹² Colguibaalajł, colbalajł sa'csi xhaguibaali sunidduxh Dios xcuent xtzauuntu. Sigajcza basacsıreni reniguii ni gubajł galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Răjpzani:

—La'tu najctu si'c sejd lo guedxliujre. Palga di sejd gac nadzujuj, ¿xho gacsacni nadzujuj? ¿Xhi gun bejn̄ni dxejc? Susălreni sejdga detz yu', sulăj bejn̄ yejcn̄i.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jiăuuni nen̄ te caj. Maazru huen soobni jiaa nen̄ te gandilieer te gusănijni loj guiraa rebejn̄ ni tre' nen̄ yu'. ¹⁶ Xcălnabaŋsa'ctu najc si'c te bajl loj reben̄ guedxliuj. Suhuiireni xtzunsa'ctu dxejc siliă'preni xpala'n xtdadu ni yu' xhaguibaa.

Ruluii Jesús xcuent leii

¹⁷ Răjpzani:

—Na'c guntu xhigab siădgudzucaă leii xten toMoisés, niclaza rediidx ni baluii redad ni gunii xtidx Dios. Xhet siăddzucaădini, nară siălă te guluiăpacni si'cni najcni. ¹⁸ Rniliăpac, dxejli che ni nitloj guibaa năjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlajz gusaan te diidx nani caj loj leii, mase te didxbăzni, luxh ruluiini gun bejn̄ si'c, laani guxiduxh sajcn̄i lajdx Dios guibaa. Niluxh renani rucuadiajg xtidx leii, luxh rujnpacreni si'cni caj lo leii, ruluiizani leii, beŋsacduxh gacni lajdx Dios guibaa. ²⁰ Ni'cni rniă lojtu, palga ditu gusa'cru xtzun Dios, ditu guibaŋsa'cru loj reni najn xcuent xleii toMoisés, năjza loj reben̄ guidoo ni laa farisee, dipactu jiu' lajdx Dios xhaguibaa.

Ruluii Jesús xcuent yălr̄dxe'ch

(Lc. 12:57-59)

²¹ Răjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinărenini lo guxhtis te jiăuuni nen̄ latzguiib.” ²² Niluxh nară rniă chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni găb lo sa'ni: “ben̄nayăllajz” sidejdni loj yălguxhtis xten Dios, sijni gabijl cadro cayejc guiboduxh.

²³ 'Che sanălu gojn guidoo te gusa'n̄luni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiălxgaa diidx con sa'lu, dxejcti guibi'lu te gac gusa'n̄lu gojn xtenlu.

²⁵ 'Palga yu' chu rdxe'ch lojlu, basquejn basiălj diidx con laani lagajc cheni sasanăjluni lonezyuj te di guteedni luj lo juejz. Luxh juejz suteedni luj loj reguixhagj te gusăureni luj nen̄ latzguiib. ²⁶ Rniliăpac lojlu: “Dilu guirii ro'c palga dilu cue'c guiralii meel nani guiniabni lojlu.”

Ruluii Jesús xcuent yălr̄rusguee sa'ni

²⁷ Răjpzani:

—Abiejn diajgtu guniireni galoo: “Na'c guesnăjtu gunaa nani di gac chăăltu.” ²⁸ Nară rniă, chutis te nani fii loj te gunaa dxejcti guisia' lajzni gunaaga, abejnni dojl̄ nen̄ lastooni. ²⁹ Palga balojlu ladbee rujn rujnlu dojl̄, gulăăni basălni te laad sa'csi hueenru gunijtl̄ te balojlu quela chăă guideb tiejxhlu gabijl. ³⁰ Palga ŋaalu ladbee rujn rujnlu dojl̄, batiu'ni sa'csi hueenru gunijtl̄ te ŋaalu quela chăă guideb tiejxhlu gabijl.

Rului Jesús xcuent yäl'ru'o'n chääl bejn

(Mt. 19:9; Mr. 10:11-12; Lc. 16:18)

³¹ Räj pzani:

—Abiejn diajgtu guniireni galoo: “Chutis niguii ni rlajz guro'n chääl ni, nanabtis gudeedni te guijt z nani rnii abaro'nni chääl ni.” ³² Narä rniä, niguii nani guro'n chääl ni niluxh xhet dojldi bejn chääl ni, niguiiga sujn gun chääl ni yäl'gubejxh, niluxh chutis ni guchnaa gunaaga sujnzani yäl'gubejxh.

Rului Jesús xcuent che ria'n diidx

³³ Räj pzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiir, ³⁶ niclaza por lagajc bituiyejclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitisl: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸ Räj pzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rlajz tilnäjl te xca'ni xcamangwlu, badeedza näj xsa'cwlu lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniblaa xhi guiniblaani lojlu na'c gudxojnluni lojni, na'c gäblu: “Xhetini.”

⁴³ Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” ⁴⁴ Narä rniä lojtu, colchanälajz rebejn ni rdxe'ch lojtu. Benle' yejz reni rgue lojlu. Colyejn dxunsa'c loj renani rdxe'ch lojtu. Colcuedjdx, colnab loj Dios xcuent rebejn nani rdxagdiyltu, rusacsireni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riabj niguig lo rebensa'c sigajcza lo rebenguijdx. ⁴⁶ Palga la'tu chanälajz lagajctis rebejn nani rinälajz la'tu, xhi gaan guntu dxejz? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: “Xchan”, lagajctis loj resa'tu, xhini'c rujntu ni najc hueenru lo chutis bejn? xLa et sigajcdiza rujn rebejn nani di gumbee Dios? ⁴⁸ Colyajc bensa'c si'c ni najc xtadtu ni yu' xhaguibaa.

6

Rului Jesús xho gudeedni gojn

¹ Räj pzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, näjza lad nezyuj. Rujnsireni si'c te ruhuii

rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtaclu ni cahuii nani bejnlx xhiga'tz, sacnäjni luj nez loj rebejn.

Rului Jesucrist xho cueedx, guiniabni lo Dios
(Lc. 11:2-4)

⁵ Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni neñ reyu' cadre riel xtidx Dios, näja guiraa resquiin, näja nez ronejz te ruhuii rebejn xho rujnreni. Rniliäpac, acua'reni gaan xtenreni. ⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtaclu ni yu' xhaguibaa. Dxejcti xtaclu ni cahuii xhi rujnlu xhiga'tz, sacnäjni luj nez loj rebejn.

⁷ Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbée Dios. Naaren i sa'csi sanuutis rniireni xhidajl diidx balti huält, siejn diajg Dios. ⁸ Na'c guntu sigajc ni rujnreni, sa'csi anajn xtaclu xhini'c rquiintu che guiniabtuni lojni. ⁹ Ni'cni scree colguinii lo Dios:

Xtaclu ni yu' xhaguibaa dxan najc lajlu.

¹⁰ Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu'nnu sa' ni rdaunu guira dxej.

¹² Basiäjl lajzlu redojl xtennu si'c riäjl lajznu redojl xten rebejn ni rujn dojl loonu.

¹³ Na'c gusaanlu jiaabnu xhigabguijdx,

basläa nuure lo dojl,

sa'csi xten guejblu najc yälrnibee, yäl nadip näja yälrdimbicha' par tejpas. Sugacni si'c.

¹⁴ Palga la'tu gusiäjl lajzlu redojl ni rujn rebejn lojtu, xtaclu ni yu' xhaguibaa susiäjlza lajzni rextojltu. ¹⁵ Palga ditu gusiäjl lajzlu redojl ni rujn rebejn lojtu, sigajcza xtaclu ni yu' xhaguibaa di lajzni jiäjlza rextojltu.

Rului Jesús xho gucua'n bejn

¹⁶ Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. ¹⁷ Niluxh la'tu, che rucua'ntu, colcuñ yejctu, colquib lojtu ¹⁸ te na'c gacbee rebejn cagucua'ntu, xtaclistu suhuii cagucuanxhiga'tztu. Xtaclu ni cahuii xhi cayunxhiga'tztu suniidxni xhi xca'tu nez loj rebejn.

Yäl nasa'c ni yu' xhaguibaa
(Lc. 12:33-34)

¹⁹ Räjpzani:

—Na'c gapdajntu yäl nasa'c lo guedxliujre cadre rajw reman o rbihtiejn xhixtentu, niluxh richu' gubaan roliz bejn te rbajnreni. ²⁰ Hueenru ga'ptu xcäl nasa'ctu xhaguibaa cadre di reman gauu, diza rexhixtentu cuibhtiejn, diza regubaan jiu' te cuanreni. ²¹ Sa'csi cadre yu' xcäl nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²² Răjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacăjy, ni'cni palga bajl nani yu' tiejxhtu dini gusanij, ðlinacăiboo najc guidebtu!

²⁴ 'Nicla te bejn di gacdi gun dzuun loj tio'p lam tejsi junt, sa'csi sibălazni tejni laga sanălajzni steeni. Digacdi guntu xtzuun Dios palga caguilitistu xcălnasa'ctu lo guedxliujre.

²⁵ 'Ni'cni rniă lojtu, na'c chutu yărsia' por xcălnabajntu, xhicha gautu, xhicha yătu, niclaza naatu xhicha lajd gajcwtu. Yălnabajn sajcru lo yălrăjw, luxh sajcru tiejxhtu lo xhajbtu. ²⁶ Colhuii remane' ni rtajt xhaguibaa. Direni cue'c binij, dizareni guilia' găjl, dizareni cuchee xhi gaureni nen yu', luxh xtadtu ni yu' xhaguibaa rudeedni xhi rajwreni. ĸLaa xhet sajcdirutu loj remane'ga, ä? ²⁷ ĸChu tej la'tu sa'csi ru'tu yărsia' sajç tiobrutu ste bo'c jiaaru?

²⁸ 'ĸXhicuent runduxhtu xhigab xcuent xhajbtu? ĸColhuii reguii ni tre' nesiăt! ĸXho roobreni? ĸXho rialreni? Direni gun dzuun, dizareni guzaa xhajbreni. ²⁹ Nară rniă lojtu, nicla rei Salomón guideb najcwni rexhabsa'c xtenni di nisiuchee si'c rsiuchee tej reguiiga. ³⁰ Palga Dios rujn rajc rcuaan ni yu' nesiăt ni rial nadxej luxh guixee ahuejcreni, ĸxhixh dini gunduxhru par la'tu, bejn nani guxii rililaj? ³¹ Ni'cni na'c chutu yărsia' guntu xhigab: “ĸXhicha guidaunu, xhicha guidunnu, xhicha gacwnu?” ³² Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Colquixgaa yălrnibee xten Dios năjza yălnabansa'c si'cni rrajz Dios dxejç sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riăăd dxej con dxej.

7

Na'c cubeetu sa'tu

(Lc. 6:37-38, 41-42)

¹ Răjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiehxhtu lo bejn, si'cna sutiexh Dios lojtu. ³ ĸXhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ĸXhicuent găblu lo sa'lu, nădoŋnu cuăă guijxh ni yu' nen balojlu, luxh dilu fii loj yagro ni yu' nen balojlu? ⁵ Benguijdx ni rusguee, gulăxgaa yagro ni yu' balojlu te gac fisa'clu te cuăălu guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bă'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbălazreni cossa'c najcreni si'c cuch ni rulăj yejç xhitis xhi cos.

Colnab, colquuil, colgusejç rolă'

(Lc. 11:9-13; 6:31)

⁷ Răjpzani:

—Colnab lo Dios te guniidxni nani rniabtu. Colquuilni te guidxäjltuni. Colnii rolä', te guixalni jiu'tu. ⁸Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhazareni lojni.

⁹'La yu' chu tejtü che guiniab xi'nni te yätxtiil, alga gudeedni te guij, ä? ¹⁰O palga guiniabni te la' bälj, ä la sudeedni te bälj? ¹¹Palga la'tu ni najc ben guijdx rajc rudeedtu cossa'c loj xi'ntu, aticaxh xtadtü ni yu' xhaguibaa. Laani suniidxni cossa'c loj renani guiniabni lojni.

¹²'Ni'cni guira'ti cos ni rlanjtu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yälñabajñ najc däa

(Lc. 13:24)

¹³'Coljiu' nez rolä' nani najc däa, sa'csi gulajg najc rolä', gulajg najcza nezyuj nani rinä bejn lo yälrunij, luxh xhidajlreni riu' nejzga. ¹⁴Sa'csi däa najc rolä', dääza najc nezyuj nani rinä bejn nez loj yälñabajñ, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga

(Lc. 6:43-44)

¹⁵Räjpzani:

—Colñatiro rebejn nani rlanjg gusguee la'tu. Rniisireni rusule'reni xtidx Dios. Rluüsi nadolajzreni si'c te xiil, niluxh direni gac. Alga si'c loob najc reni, rutie'chreni bejn si'c re'ch xiil che riädchu' loob lojreni. ¹⁶Dzuun nani rujnreni sujñ gumbeeturen. Anajntu di uub xcaj lo reyaguejch, diza iigw xcaj lo guechbiojb. ¹⁷Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. ¹⁸Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹Guiraa reyajg nani di ninexhsa'c xcaj lojni, nanab guidinni te checni. ²⁰Sigajcza sajg gumbeetu beñsa'c sa'csi rujnreni dzunsa'c.

Xhet guiraadi bejn jiu' lo xcälñnibee Dios

(Lc. 13:25-27)

²¹Räjpzani:

—Xhet guiraadi renani rnii, “Dad, Dad”, jiu' lo xcälñnibee Dios xhaguibaa. Ganaxtis renani rujñ si'cni rlanj Xtadä ni yu' xhaguibaa. ²²Sidzujñ dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebendxab, con lajzalu biennu remilagwr.” ²³Dxej säpä lojreni: “Dina gumbeä la'tu. Colbicaj loä beñlatsiaj.”

Tio'p cimient

(Lc. 6:47-49; Mr. 1:22)

²⁴Räjpzani:

—Chutis nani rucua diajg diidx nani canä, luxh ruzoob xtidxä, laani najc si'c te beñsin nani basoob rolijzni yej te guilaj. ²⁵Che biajb nisguij, biäjt nis gueuu, gubi' bej, bidinreni yej yu'ga sas di yu'ga niajb sa'csi sojbni yej guilajga. ²⁶Nani rieñ diajg ni xtidxä, luxh dini guzoob xtidxä najc si'c te beñ guyalajz nani basoob rolijzni lo yujxh. ²⁷Che biajb nisguij, biäjt nis gueuu, gubi' beduxh bidinreni yec yu'ga. Dxej ligurebä'n yu'ga. Lacti xhiroob banijñ bejñga.

²⁸ Che gulujx gunii Jesús rediidxga, lacti bidxeloj rebejn rediidx ni baluini, ²⁹ sa'csi baluini rebejn si'cpac te nani rnibee, xhet si'c ruluiidi rebejn ni najn leii.

8

Rusiajc Jesús te bejn ni ral tiejxhni

(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejn huinajlni. ² Dxejcti biääd te benracxhuu ni ral tiejxhni nez loj Jesús. Bazuxhijbni, räjpni:

—Dad, palga rlajzlu, sajg gusiajclu narä.

³ Dxejcti basгаа Jesús naani, gudajnni dade'ga con naani, räjpni:

—Rlazä jiajclu. Siajc tiejxhlu.

Lagajc dxejc gubicağ guejdx ni ral tiejxhni. ⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

Rusiajc Jesús te xmos capitán roman

(Lc. 7:1-10)

⁵ Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diağ Jesús si'c, bidxeloduxhni, räjpni loj renani siädnağlni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajl benzijt nez ladjiaa, nez ladjiaät, te jiädcaenäjreni Abram, Isaac, Jacoob lajdx Dios xhaguibaa. ¹² Luxh reben Israel nani niajc xi'n Dios sijreni te laad lo yälkäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolizlu. Sigajcni huililajzlu, sigajcza gacni.

Dxejc lagajc orga biajc xmosni.

Rusiajc Jesús xnansueegr Pedr

(Mr. 1:29-31; Lc. 4:38-39)

¹⁴ Che bidzujn Jesús roliz Pedr, bahuini naga' xnansueegr Pedr, cayacxhuuni, yu'ni xliaa. ¹⁵ Dxejc gudajntis Jesús naani, birigajcni xliaaga. Dxejcti huistie nane'ga, gusloğ cagudeedni xhi gau Jesús.

Rusiajc Jesús xhidajl ben racxhuu

(Mr. 1:32-34; Lc. 4:40-41)

¹⁶ Che biu' guxhijn, biädnäreni loj Jesús xhidajl bejn ni yu' rebendxab lostooreni; con xtiidxni gunibeeni birii guiraa rebendxabga. Basiajczani guiraa reben racxhuu. ¹⁷ Si'c bejn te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcälnayannu.

*Reni rlajz ninajl Jesús**(Lc. 9:57-62)*

¹⁸ Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpejn pacni stelaad ro' nis. ¹⁹ Dxejcti biääd te benñajn loj Jesús, räjpni:

—Mastr, sisiaäza cadrotis chäálu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹ Stee rexpejn pacni räjp lojni:

—Dad, basaan chaxgaä ladxä te chacuatzá xtadä.

²² Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni bendojl.

*Basiacdxl Jesús te beduxh**(Mr. 4:35-41; Lc. 8:22-25)*

²³ Che biu' Jesús nen barcw, biu'za rexpejn pacni lagajc nenga. ²⁴ Dxejc huäjs te bedonduxh lo nisdoo. Lirusiääzni barcw nen nisdoo. Luxh Jesús nagayejsni. ²⁵ Dxejcti huij rexpejn pacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni.

²⁷ Dxejc bidxeloduxh rexpejn pacni, räjpreni:

—¿Chuni'c najc niguiire? ¡Ahuilaa xho rucuadiajg bej näjza nisdoo xtiidxn!

*Rebendxab ni yu' lajdx regadarenos**(Mr. 5:1-20; Lc. 8:26-39)*

²⁸ Che bidzujñ Jesús stelaad nisdoo cadro najc lajdx regadarenos, tio'p bejn ni yu' bendxab lastooreni biädchaglojreni Jesús. Rebejn ga riireni nen rebaa, nialazduxhrene, ni'cni rut rajcdi rdejñ nezyujga. ²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galñi xornu, ä?

³⁰ Nez te laad, zijte' cadro suga'reni, cayajp bejn xhidaltro cuch.

³¹ Dxejcti gunab rebendxabga loj Jesús, räjpreni:

—Palga cuäálu nuure, basaan jiu'nu nen recuchre.

³² Dxejcti räjp Jesús:

—Colchäj.

Dxejcti biriireni nen lastoo redade'ga, huichu'reni nen recuchga. Dxejcti guiragajc recuchga caguxunreni, huitejbreni ro' te guilaj, biääzreni nen nisdoo, gujttireni nen nis.

³³ Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajcreni näjza ni guzajc redade' ni guyu' rebendxab lastooreni. ³⁴ Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzn lajdxreni.

9

Basiajc Jesús te bejn nani abixu'n tiejxhni

(Mr. 2:1-12; Lc. 5:17-26)

¹ Dxejcti biu' Jesús nen barcw. Gudejdni stelaad ro' nis te bidzujnⁿⁱ lajdxni. ² Ro'c biädnäreni lojni te bejn nani abixu'n naani, ni'ni. Naga'ni lo te da'. Che bahuui Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubica^j rextojllu.

³ Dxejcti gatii ben^{naj}n ni rului xlei Moisés cayujnreni xhigab ensilaareni, caniyaj dee Dios con rextiidxni. ⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx nen lastootu? ⁵ ¿Con ni najc guyasiru? Guiniä lo te bejn: “Agubica^j rextojllu”, o guiniä lo te bejn: “Huistie, guzaj.” ⁶ Dec gunä te gacheetu Xi'n Dios ni gujc Niguii räjp yäl^{rn}nibee lo guedxliujre te gudzucajni dojl.

Dxejcti räjpni loj benracxhuuga:

—Huistie, cua' xta'lu, huij rolijzlu.

⁷ Dxejcti huistie benracxhuuga, siini rolijzni. ⁸ Che bahuui rebejn lojni, bidxeloduxhreni, gulä'preni xpala'n Dios, ni badeed yäl^{rn}nibeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajⁿⁱ benracxhuu, sä'tini. Dxejc bahuuii loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiral^{oj}. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiral^{oj}, ni najc rebejn ni di gac xpen Israel, gurejzaren^{oj} lo mex näj Jesús näjza reni najc rexpejn^{pacni}. ¹¹ Che bahuui reben guidoo, ni laa refarisee, xhi cayujn Jesús, räjpreni loj rexpejn^{pac} Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiⁱⁿ chu gusiajⁿⁱ, niluxh rebejn racxhuu ni'c rquiinreni chu gusiajⁿⁱreni. ¹³ Colchäj te colchaseed xhi säloj diidxre ni caj loj reguijtz: “Yäl^{rn}ulasajz rlazä, dina rlazä guniidxtu guidxaa loä.” Sa'csi narä dina niädtedxä reben^{sa}'c, narä siädtedxä reben^{doj} te gusiechlajzreni.

Gunabdiidxreni xcuent yäl^{rn}rucua'n

(Mr. 2:18-22; Lc. 5:33-39)

¹⁴ Dxejcti biääd rexpejn^{pac} Juan loj Jesús räjpreni:

—Nuure con refarisee rcua'nnu xhidäl huält, ¿xhicuent di rexpejn^{pac}lu gucia'n, ä?

¹⁵ Räjp Jesús lojreni:

—Che ruch^{naa} te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, saj^c xhiroobru cadro biräjsga. ¹⁷ Niclaza

gac guida' bincoob neŋ reguidbiejw, sa'csi reguidbiejw siräjsni dxejc sixe' bin, sinijtzta reguijdga. Ni'cni nanab guida' bincoob neŋ reguidcoobza, te si'c nicla tejreni di nit.

Xindxa'p Jairo näjza gunaa nani gudajn xhajn Jesús

(Mr. 5:21-43; Lc. 8:40-56)

¹⁸ La! ni caniini rediidxga, biääd te dade' ni rnibee neŋ guidoo xten rexpelj Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub naalu yejcnj te guibanšacni.

¹⁹ Dxejcti huisu Jesús, sanäni Jairo. Näj rexpejnšpacni sanajlrenini.

²⁰ Luxh guyu' te gunaracxhuu nani agujc tzubitio'p ijj cayajcni yälguidxbäi. Bidzujn ni nez dejtž Jesús, gudajnni ro' xhajbni, ²¹ sa'csi bejn ni xhigab neŋ lastooni: “Palga sajč canätis ro' xhajbni, siacä.”

²² Dxejc gubiré Jesús bahuini loj gunaaga, dxejc räjpni:

—Gulecdxilajzlu xindxa'pä. Yälrililajz xtenlu abasiajclu.

Luxh lagajc dxejc bjaic gunaaga.

²³ Cheni biu' Jesús roliz dade' nani rnibee neŋ xquidoo rexpelj Israel, bahuini rebejn ni rol bizej näjza xhidajl rebejn ni cabedxa' cayoon, li te biejj cayajc, dxejc ²⁴ räjpni loj rebejnğa:

—Colguibicaj. Nagayejstis dxa'pga, gajdni guet.

Dxejc rebejnğa alga ruxhiznäjn Jesús. ²⁵ Cheni abirii rebejn neŋ yu', biu' Jesús, gunaazni naa dxape', dxejc huistie dxape'ga. ²⁶ Dxejcti bire'ch diidxga guiraa neŋ reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl tio'p bejn ni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸ Che bidzujn Jesús cadro caya'nni, gubigreni lojni. Dxejcti gunabdi-idx Jesús lojreni, räjpni:

—¿La rililajztu sajč gunä ni rniabtu?

Redade'ga basejc diidx, räjpreni:

—Sajč gunluni, Dad.

²⁹ Dxejcti gudajnni balojreni, räjpni:

—Sugacni si'cpacni rililajztu.

³⁰ Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neŋ reguejdxga.

Basnii Jesús te gop

³² Che biriireni cadro bjaic baloj rebejnğa, biääd sgaii bejn biädnäreni te gop loj Jesús. Yu' xprit beŋdxab neŋ lastoo bejnğa. ³³ Che barilaagw Jesús xprit beŋdxab neŋ lastoo beŋgopga, guslogajcni caniini. Rdxeloduxh rebejn räjpreni:

—Gajdpacnu guihuii sa' redzuunre lajdx rexpelj Israel.

³⁴ Dxejc rebejn guidoo ni najc refarisee, räjpreni:

—Rbääni rexpriti beŋdxab con yälrnibee xten beŋdxabro.

Rulaslajz Jesús rebejn

³⁵ Gudejd Jesús guiraa reguedxro näjza reguedxbäz, basule'ni xtidx Dios neŋ reguidoo xten rexpelj Israel. Basääbni diidx xten xcälrnibee

Dios. Basiajczani guiraloj yälracxhuu, guiraloj yälguijdx ni rajc bejn nen reguejdxga. ³⁶ Che bahuini loj reben xhidajl biaduxhni rebejnğa sa'csi rdebya' lajzreni, rac-huin lajzreni, najceni si'c najc rexiil nani di ga'p baxtoor. ³⁷ Dxejcti räjpni loj rexpejnpacni:

—Guliipac xhidalduxh ben guedxliuj di gan xtidxä, luxh guxii najc reni guluireni; najcni si'c gäjł ni agojł guilia', niluxh ruti mos ni guilia'ni. ³⁸ Colnab lo Dad nani najc xtenni guedxliujre te guxhałni rebejn ni sajc guluu reben guedxliujre, gacreni si'c mos ni rlia' gäjł.

10

Gule Jesús guitzubitio'p rexpejnpacni
(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejnpacni, badeedni yälrnibee lojreni te gurilaagwreni rexpriti bendxab lastoo bejn nájza te gusiajcreni guiraloj yälguijdx nájza yälracxhuu.

² Laj reguitzubitio'p rexpejnni ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob; ³ Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo; ⁴ Simón, te bejn ni yu' loj recananita; Judas Iscariote, nani bateed Jesús ladznäa rebejn nani rdxe'ch lojni.

Baxhal Jesús rexpejnpacni gutie'chreni diidx
(Mr. 6:7-13; Lc. 9:1-6)

⁵ Guitzubitio'p rebejnre baxhal Jesús. Baliidxnirenini räjpni:
—Na'c chäätu nez cad yu' rebejn ni di gumbée Dios. Na'c jiu'tu lajdx reben samaritan. ⁶ Colchäxgaa lo rexpejn Israel nani aguniyt nen dojl. ⁷ Colchäj, colzäbdiidx lo rebejn, colye'tz lojreni xcälrnibee Dios abidzungenjxh. ⁸ Colgusiajc ben racxhuu, colgusiajc tiejxh rebejn ni ral guejch tiejxhreni, colguspajñ bengut. Colgurilaagw xpriti bendxab lastoo rebejn. Ligaj cua'tu yälrnibee, ligajza colyejn dzuun.

⁹ Räjpzani:

—Na'c chanātu oor, niclaza pla't, niclaza coobr nen xdobdäjltu, ¹⁰ niclaza guijxh na'c chanātu lo nejz. Na'cza chanātu tio'p xhajbtu, nicla gura'ch, nicla baston sa'csi bejn ni rujn dzuun nungäjł xca'ni xhi gauni.

¹¹ Räjpzani:

—Che guidzujntu xhitis te guedxro, xhitis te guedxbäz, colquiił te bensa'c. Rolijztisni coljia'n dxejli ni jiunejztu guejdxga. ¹² Cheni jiu'tu nen yu', colnii xtidx Dios lo rebejnğa. ¹³ Palga najczeni bejn ni numbee Dios, sujia'n yälrbexilajz loj rebejnğa. Niluxh palga direni gac bensa'c, naaddireni xca'reni xtidx Dios, suguibi' yälrbexilajzga lojtu, coljiunejz ro'c. ¹⁴ Palga direni gusaan jiu'tu rolizzeni, palga di rlaizzeni gucuadi-ajgreni xtiidxtu, dxejc coljiunejz roliz bejnğa, o coljiunejz guejdxga, dxejc colcuijb guxhu ni'tu si'c te seen gulälazreni xtidx Dios. ¹⁵ Rniliäpac lojtu, dxej ni gun Dios xcälguixhtisni, te yälguixhtisoru gun Dios rebejnğa, quela yälguixhtis ni gujc reben guedx Sodoma näj Gomorra.

Yälrusacsı ni siääd

¹⁶ Räjpzani:

—iColhuiire! Narä suxhalä la'tu si'c xile' nez loj reloob, ni'cni colgacnasinduxh si'c najc te bäl, colyajcza nadolajz si'c te palom. ¹⁷ Colnatiro rebejn sa'csi suteedreni la'tu ladznäa rexcuxhtisreni, siguijnzarenini la'tu

neṇ xquidooreni. ¹⁸ Sināzareni la'tu nez loj regubier, nez loj rereii xcuent rextidxä, te gusule'tu xtidxä nez lojreni nājza nez loj rebejn nani di gumbee Dios. ¹⁹ Cheni chanāreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu oṛga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' neṇ lastootu, laani guinii neṇ lastootu.

²¹ 'Luxh rebejn suteedreni lagajc bejtzreni ladznāa reni ju'treni. Redad suteedreni lagajc xi'nreni, rexi'n bejn sidxe'chzareni lo xcuzajnneni te ju't bejn xcuzajnneni. ²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yālnabajn par tejpas. ²³ Che guirinajlreni la'tu te gusacsireni la'tu neṇ te guejdx, colguxun ro'c, colchāj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiāād Xi'n Dios ni gujc Niguii.

²⁴ 'Di te bejn ni casieedgaj beṇroru lo xmastrni, diza te mos gac beṇroru lo xlamni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbālalajreni Beelzebú nani rnibee beṇdxab, xho direni cuālajza Beelzebú rexi'nni, ä?

Chuni'c nanab guidxiejbni

(Lc. 12:2-9)

²⁶ Rājzani:

—Ni'cni na'c guidxiejbtu rebejn, sa'csi anajntu xheti te cos ni niāuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni. ²⁷ Diidx nani rniā lojtu guxhijn, colguiniini che nianij lo guedxliuj. Rediidx nani rniā chigaj rodiajgtu, colguiniini dip, jiaali colzuj, guredxa' te jiejn. ²⁸ Na'c guidxiejbtu renani rugu't bejn, sa'csi direni gun gaan ju'treni xaim bejn. Colguidxiejbru nani rugu't tiehx bejn nājza xaim bejn neṇ gabijl.

²⁹ '¿La di bejn guto' tio'p manbāz ni rutaajt por te centaab, ä? Luxh rachee Xtadnu ni yu' xhaguibaa che riajb tejni lo yuj. ³⁰ Nājza rexquidxejclu nagab tebgajreni. ³¹ Ni'cni rniā na'c guidxiejbtu; sajcrutu lo te chinaa manbāz ni rutaajt.

Renani rusule' xtidx Jesucrist nez loj rebejn

(Lc. 12:8-9)

³² Rājzani:

—Chutis renani rusule' xtidxä nez loj rebejn, narā siniāza xcuentni nez loj xtadā ni yu' xhaguibaa. ³³ Guiraa renani di gusule' xtidxä nez loj rebejn, sigajcza narā dina guiniā xcuentni nez loj xtadā ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Rājzani:

—Na'c guntu xhigab siādnāā yālrbexilajz lo rebejn guedxliujre, xhet yālcuedxidi ni siādnāā, yālrdxagdiļ siādnāā. ³⁵ Narā siādnāā yālrdxagdiļ te bi'n con xtadni; te dxa'p con xnanni; te gulijzni con xnansueegrni. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanāljzru xtadni, xnanni, luxh narā dini chanāljz, digacdi gacni xpeñā; nani sanāljzru xingaanni o xindxa'pni, di gacdiza gacni xpeñā. ³⁸ Nani di guu xcrujzni, nalajznu tedni trabajw, jiādnajlni narā, di gacdi gacni xpeñā. ³⁹ Nani guidxāl xcālnabajnni lo guedxliujre, sunitni

yäl₁nabaj₁ xhaguibaa. Luxh nani gunij₁t xcäl₁nabaj₁ni lo guedxliuj₁re xcuent rextidxä, sidxäl₁ni yäl₁naba₁sa'c xhaguibaa.

Gaan nani xca'ni
(Mr. 9:41)

⁴⁰ Räj₁pzani:

—Nani guniid₁x roliz₁ni jia'ntu, runiid₁xzani roliz₁ni jia'nä; luxh nani ruscuää₁z narä roliz₁ni, roliz₁ni ruscuää₁zzani Gueb Dios nani baxha₁ narä. ⁴¹ Nani guscuää₁z te nigui₁ ni rnii xtid₁x Dios roliz₁ni sa'csi baxha₁ Dios nigui₁ga, sica'za bej₁nga lagaj₁c gaan ni xca' nigui₁ ni rnii xtid₁x Dios. Nani guscuää₁z te be₁sa'c roliz₁ni sa'csi be₁sa'cni, sica'zani lagaj₁c gaan ni xca' be₁sa'cga. ⁴² Chutis nani gudeed mase te xhijgtis nis niäl₁ij₁ xcuentä lo rebixue're, rniliäp₁ac lojtu, direni gunij₁t, sica'pacreni nani nungäj₁l xca'reni.

11

Renani baxha₁ Juan Bautist loj Jesús
(Lc. 7:18-35)

¹ Che guluj₁x baluii Jesús rexpej₁pacni xho gunreni dzuun, dxejcti biriini ro'c te saluiini, chasule'ni diid₁x lajdx rexpej₁pacni.

² Juan yu' ne₁n latzguiib. Che bie₁jn diajgni xhi cayuj₁n Jesús, baxha₁ni tio'p xpej₁pacni ³ te huinabdiid₁xreni:

—¿La luj₁ ni najc Crist ni jiää₁d, ä?, o ¿la silää₁znu chu stee bej₁n?

⁴ Dxejcti badzu' Jesús diid₁xre räj₁pni:

—Colchäj₁, colye'tz loj Juan recos nani riej₁n diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiajreni, reni ra₁l tiejxhni, abiaj₁c tiejxhreni; reni di jien diajg, ariej₁n diajgreni; rebengut, ahuäj₁zreni, guba₁nsacreni. Dxejcti loj rebej₁n proob nani cabäj₁z xcäl₁racnä₁j Dios cagusule'reni xtid₁x Dios ni rusläa bej₁n ne₁n dojl. ⁶ Chicbaa renani di jieed narä.

⁷ Cheni sii rebej₁nga gusloj Jesús canii loj rebej₁n xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej₁, ä?

⁸ ¿Xhini'c huihuiitu? ¿Te bej₁n ni sucheduxh, ä? Ni najntu rebej₁n nani sucheduxh rbäjzreni roliz₁z rerei. ⁹ La'tu ¿xhicuent huijtu ro'c? ¿Te fiitu te nigui₁ ni rnii xtid₁x Dios, ä? O'n. Rniliä lojtu, luxh dini gac bej₁ntis ni rnii xtid₁x Dios; be₁nroruni. ¹⁰ Laa Juan nani rusä't ni bacuaa lo reguijtz cadro caj scree:

Narä suxha₁ä te nigui₁ nani guinii xtid₁xä nez lojlu;

laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te be₁nsacduxh loj Dios si'c ni najc Juan Bautist. Niluxh bej₁n nani najc be₁n huinru lo xcäl₁rnibee Dios xhaguibaa, bej₁nga maazru sajcnii loj Juan.

¹² 'Cheni gucli dxej ni gusloj rusule' Juan Bautist diid₁x najli, yu'duxh reni rlaizpac jiu'reni lo xcäl₁rnibee Dios ni yu' xhaguibaa con yäl₁rdxe'ch, sas reni nadxecha' rlaizreni cuäxuuni xcäl₁rnibee Dios. ¹³ Guiraa reniguii ni gunni xtid₁x Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴ Palga rlaiztu chalilajztu, lagajc Juan najc Elías, nigui₁ xten Dios nani bia'n diid₁x jiää₁d. ¹⁵ Nani sobdiajg diid₁x, gucuadiajgni.

¹⁶ '¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo gui cadro rdo', rbejdxreni lo sa'reni, ¹⁷ rniireni: "Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon." ¹⁸ Sa'csi che biääd Juan dini niajw dizani niä', luxh räjp rebejn najcni te xpejn beñdxab. ¹⁹ Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätejzani bin, najcni xamigw rebeñdojl näjza reniguii ni ruquijx xcuent reyuj ni rajx lo gubier." Luxh loj rebejn ni najc xpejn Dios yuduxh xcälñajn Dios, ni'cni baxhañni guiro'p rebejnre.

*Reguejdx gualajz
(Lc. 10:13-15)*

²⁰ Dxejcti gusloj Jesús gudilñajni rebeñguejdx cadro benduxhni remilaagwr, sa'csi naaddireni gusiechlajzreni xtojłreni, sanuutis nabajñreni neñ dojl. Dxejcti räjpni:

²¹ —jGunatiru guedx Corazín! jGunatiro guedx Betsaida! Paru neñ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojłreni, cadxejli niajcwreni neñ godx, nidääb cobdäj yejcreni. ²² Luxh rniä lojtu: che guidzujñ dxej ni gun Dios xcälguhtisni, sidejdrotu castigw loj rebejn ni guläjz guedx Tiro näjza guedx Sidón. ²³ Luj guedx Capernaum di gunlu xhigab chäslu xhaguibaa; jäjt neñ baa jiajblu, sa'csi paru neñ guedx Sodoma niajc sa' remilaagwr nani gujc guedx lajdxlu, pet najli tresijc guejdxga. ²⁴ Luxh rniä lojtu, dxej ni gun Dios xcälguhtisni, trabajwduxhru tedtu loj rebejn Sodoma.

*Coltaa loä, te gusilajztu
(Lc. 10:21-22)*

²⁵ Laa dxejcnä räjp Jesús:

—Rliä'pä xpala'nlü Xtadä, Dad xten xhaguibaa näjza guedxliuj, sa'csi bacua'tzlu recosre lo rebeññajn, lo rebejn ni racbee, te baluiiluni loj rebeñnadolajz ni najc si'c biuxbäz. ²⁶ O'n. Guliini, Xtadä, sa'csi rujñlu xhigab si'c najc hueen gacni.

²⁷ 'Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni. ²⁸ Coltaa loä guiraatu nani abadxajg, nani rsina', narä sunidxä yälrusilajz lojtu. ²⁹ Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä beññayedxlaiz neñ lastoä, ni'cni sidxäl xaimtu yälrusilajz. ³⁰ Sa'csi guyasi najc xtzunä ni ruluiätu, dizani gac naganduxh.

12

*Rutie' rexpejn Jesús triuu dxej ni rusilajzreni
(Mr. 2:23-28; Lc. 6:1-5)*

¹ Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwrenini. ² Che bahuü rebeñ guidoo ni laa farisee, räjpreni loj Jesús:

—Ahuii xho rujñ rexpejn pacu dzuun nani di nungäjl gunreni dxej nani rusilajz bejn.

³ Luxh laani räjpni lojreni:

—¿La gajdtu goḷ xhi caj loj reguijtz xcuent ni bejn toDavid che gu-lannäjni rexpeljni, ä? ⁴ Biu'reni xquidoo Dios, gudajwreni yätxtiil nani di nungäjl gauni, nicla laani, niclaza rebejn nani sanäni, sa'csi yätxtiilga rebixhojztis rajwni. ⁵ O ¿la gajdtu goḷ lo reguijtz xten leii cadro caj xcuent rebixhojz, ä? Laareni riu'reni nen reguidoo dxej ni rusilajz bejn, rujnreni xtzuunreni niluxh xhet doḷdi rujnreni. ⁶ Narä rniä lojtu, ree suga' tej nani saj cru loj guidoo. ⁷ Paru niacheetu xhi säloj dee: “Yälru laslajz rlažä, xhet yälrejtdi guidxaa”, ditu nucuquij redee ni xhet bejndi. ⁸ Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani

(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni. ¹⁰ Ro'c suga' te bejn ni gubijdz te naani. Luxh sa'csi caguiilreni xho gucuquijreni Jesús, gusloj canabdiidxreni lojni, räjpreni:

—¿La rusaan leii gusiaj cni beṇracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni nen bisie che gal dxej ni rusilajz bejn, ¿xhixh dini cuää xiilga nen bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliini, dxejc biajc naani, gujcni tebloy si'c najc stelaad naani.

¹⁴ Dxejcti birii rebeṇ guidoo ni laa farisee, bachagsa'zaren i te bia'nreni diidx ju'treni Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebeṇracxhuu. ¹⁶ Dxejc räjpni lojreni:

—Na'cpac gäbreni chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tılñä bejn, dizani cuedxa'; rudza jieṇdi diajgni xse'ni lad nezyuj.

²⁰ Dini qui'ch nicla te niṇt ni cabiejc, dizani gusu i te duxiil ni cayujn guxh, dxejli che gunni gaan guinibeeni yälguxhtis.

²¹ Lajtisni sustioob lastoo rebeṇ ni digac xpejn Israel.

Rucuquijreni Jesús rajpni yälrnibee xten beṇdxab

(Mr. 3:19-30; Lc. 11:14-23; 12:10)

²² Dxejcti biädñäreni loj Jesús te bejn ni di fii, dizani guinii, yu' te beṇdxab lastooni. Dxejcti basiajc Jesúsni, te gujc guniini, te gujca bahuini. ²³ Guiraa rebejn bidxelojreni, räjpreni:

—¿Xhaa laa Xi'n toDavidni, ä?

²⁴ Che biejn diajg rebeṇ guidoo ni laa farisee rediidxga, räjpreni:

—Bejnre rbää rebeṇdxab con yälrnibee xten Beelzebú ni rnibee loj rebeṇdxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridiñä sa'reni, sinitlojreni. ²⁶ Sigajcza

palga bendxab rbää sabendxabni, silia' sa'reni, dxejc ¿xho gac chanuu xcälrnibeereni? ²⁷ Palga narä rbää rebendxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. ²⁸ Palga narä rbää rebendxab con Xpřit xten Dios, guliipacni abidzujn xcälrnibee Dios lojtu.

²⁹ 'Bahulaare. ¿Xho gac jiu' te bejn cuan rolijz te bendaan, xho gac cuanni xhixten bejnga, palga dini gulibxgaani bendaanga? Che abiliib bejnga, sajcuanni rexhixten bejnga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajcuansiäjl lajzni xtebtis yälrniyaj Sprıt Dxan xten Dios di Dios gusiäjl lajzni. ³² Chutis ni guinii xhi te diidx yälrniyaj Xi'n Dios ni gujc Niguii sajcuansiäjl lajzni, luxh chutis ni guiniyaj Sprıt Dxan xten Dios, di Dios gusiäjl lajzni, nicla lo guedxliujre, niclaza xhaguibaa.

Sajcu gumbleetu bejn xcuent diidx ni rniireni

(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najcu ninejxh ni rcac lojni. ³⁴ Sa' la'tu benguijdx ni najcu si'c te bäl niälasduxh, ¿xho gac guiniitu te didxsa'c?, ni ro' bejn rniitis rexhigab ni yu' neñ lastoo bejn. ³⁵ Te beñsa'c rniini didxsa'c, sa'csi ganax xhigabsa'c yu' neñ lastooni, te benguijdx rniitisni cosguijdx sa'csi ganax xhigabguijdx yu' neñ lastooni. ³⁶ Narä rniäza, guiraa redidxguijdx nani rni bejn sudeerreni cuent lo Dios cheni gunni yälguxhtis, ³⁷ sa'csi lagajc rextiidxlu sujn guinii Dios najclu beñsa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen

(Mr. 8:12; Lc. 11:29-32)

³⁸ Dxejcti rebejn ni ruluii xlei to Moisés näjza reben guidoo ni laa farisee, räjpreni loj Jesús:

—Mastr, nuurnu rlaiznu guihuinu te seen; bejn te milagwr te finuni.

³⁹ Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni guni xtidx Dios. ⁴⁰ Sa'csi lagajcu si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguii neñ lastoo guedxliuj choñ dxej, choñza yääl. ⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojlni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza reiñ xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiagñi reyälñajn xten Salomón, luxh nani yu' lojtu naj nanduxhruni loj Salomón.

Te sprıtdxuudx ni rbisac

(Lc. 11:24-26)

⁴³ Räjpzani:

—Cheni rii te sprıtdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴ Dxejcti rujñni xhigab, naani, guibisac cadro biriä. Cheni rbisacni ro'c, rdzujñni si'c rdzujñ

te bejn nen te yu' ni naya nen, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadxuudxru lojni te jädläznäjrenini nen lastoo bejnga. Dxejcti rxhinduxhru bejnga lojni gujcnj galoo. Sigajcza gac rebejn ni tre' lo guedxliujre naj.

Xnan Jesús con rebejtzni
(Mr. 3:31-35; Lc. 8:19-21)

⁴⁶ La! ni caninäjni rebejn, bidzujn xnanni con rebejtzni, suga'reni rolä' rlajzreni guiniireni lojni. ⁴⁷ Dxejcti biäd tej ni räjp loj Jesús:

—Xnanlu näjza rebejtzlu suga' rolä' rlajzreni guinäjäreni luj.

⁴⁸ Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani naani nez loj rexpejnpacni, räjpni:

—¡Redee najc xnanä redeeza najc rebetzä! ⁵⁰ Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij
(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn bire' cadro suga'ni, sas biu'ni nen te barcw, ro'c gurejni. Dxejcti rebejn gurej nez lo plaii. ³ Dxejc gusloj caguluui Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. ⁴ La! ni cabe'cni binij yu' binij ni bitejb gajxh nez ro' nesuij, biäd remane' ni rutajt, sas gudajwreni binijga. ⁵ Yu' binij ni bitejb nez nen reguij cadro guxii yu' yuj. Gulengajc binijga sa'csi direni nibej jäät nen yuj. ⁶ Che birii gubijdx, bigolreni sa'csi xhetiza xlobaani, dxejc gubijdzni. ⁷ Yu'za binij ni bitejb nen reguejch. Che guroob reguejchga, dini nusaan niroob regäje', gubijdztireni. ⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

Xhi pajr najc recuent xten Jesús
(Mr. 4:10-12; Lc. 8:9-10)

¹⁰ Dxejcti gubig rexpejnpacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹ Dxejcti badzu' Jesús diidx rajpni lojreni:

—Sacnäj Dios la'tu te gacheetu recos xhiga'tz xten xcälrnibee Dios xhaguibaa, luxh laareni digacdi gacheerenini. ¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet raceedireni. ¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpacktu, niluxh xhetliidi gacheetu,
sidxelojpacktu, niluxh ditu fii.

¹⁵ Sa'csi gualajz rebejnre, lastooreni najc si'c te guij,
di diajgreni jiejn,
luxh niäuzä balojreni, didi fisa'creni con balojreni,

didi jiejnza diajgreni, didi gacbeeza lastooreni,
didi gusiejch lajzreni guibi'reni loä te gusiaca lastooreni.

¹⁶ 'La'tu colguibalaznäj balojtu sa'csi rhuisa'ctu, riensa'cza diajgtu.
¹⁷ Rniliäpac, xhidajl redade' ni gunii xtidx Dios, näjza xhidajl beñsa'c
rlazduxh nuhuii sa' recos ni cahuiitu, luxh direni nuhuiini, rlajzreni
niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸ 'Colcuadiajg xhi säloj xcuent bejn nani rbe'c binij. ¹⁹ Rebejn nani
rucuadiajg diidx xten xcäl'nibee Dios, niluxh direni gacbeeni, najcreni
si'c najc binij nani bitejb nez ro' nesyuj; riääd beñdxab rudzucajni
rediidx nani biu' neñ lastooni. ²⁰ Rebinij nani bitejb nez neñ reguij,
najc si'c rebejn nani rucuadiajg diidx, gustli rca'reni diidxga, ²¹ luxh
guxii yu' xlobaani, direni sutijp. Che rdejdreñi trabajw, che rdxe'ch
bejn lojreni, sa'csi rucuadiajgreni xtidx Dios, rusiejch lajzreni, rbälazni
diidxga. ²² Rebinij nani gurej neñ reyaguejch säloj rebejn nani rucua-
diajg rextidx Dios rujnrureni te gunreni dzuun te ga'preni yäl'nasa'c ni
yu' lo guedxliujre. Dxejcti rexcäl'nasa'c xten guedxliujre rusgueereni.
Guiraa recosre rutau lo xtidx Dios neñ lastoo rebejnre, dini gusaan gac
te cosechsa'c neñ lastoo rebejnre. ²³ Dxejc rebinij nani rtejb lo reyusa'c,
ni'c najc si'c rebejn nani rucuadiajg xtidx Dios, nani racbee diidxga, nani
rutie'ru sa'reni te racxhidajlreni. Yu' bejn ni najc si'c binij ni gujc te
gayuu; yu' bejn ni najc si'c binij ni gujc gayojn; yu'za bejn ni najc si'c binij
ni gujc galbitzuu.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcäl'nibee Dios xhaguibaa najc si'c te bejn nani gule'c ganax triusa'c
lo xyujni. ²⁵ Lañ nagaguejs bejnğa, biääd te bejn nani rdxe'ch lajz loj
xpaxhuaan binijğa, biädle'cni bedz cuanguejch lo xtriuu bejnğa, dxe-
jcti sääni. ²⁶ Cheni gulejn triuuga, birii doj lojni, dxejc biricaj näjza
cuanguejch ro'c. ²⁷ Dxejcti räjp remos lo xlamreni; “Dad, ɿla et ganax
triusa'c di gule'clu, ä? ɿcaxh bazaj cuanguejchre?” ²⁸ Räjp xlamreni:
“Te bejn ni rdxechlajz loä biädle'cchani.” Dxejcti gunabdiidx rexmosni
räjpreni: “ɿla rlajz guejblu cholädxa'nu recuanguejchga, ä?” ²⁹ Dxejc
räjp xlamreni: “Na'c, sa'csi che guiliäädxtu cuanguejchga, nägajcza triuu
guiliäädxtu. ³⁰ Colsaan tiobreni tebloy. Che guire' cose'ch, dxejc guinibea
remos gutiexgaareni cuanguejch, guliibrenini gacni ters, dxejcti checni.
Dxejcti sajç gutie'reni triuu chucheeni neñ yu'.”

Xcuent bedz muxhtas

(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcäl'nibee Dios xhaguibaa najcni si'c te bedz muxhtas nani cue'c te
bejn lo xyujni. ³² Gulii bejdzga najc baze'ru loj guiraa rebejdz, per che
roob yajgga, rajcni guroobru loj guiralii recuaan, rajcni te yagro, luxh
riääd remane' ni rutajt riäadyujn xpitiääzreni lo xajcw yajgga.

Xcuent levaduur

(Lc. 13:20-21)

³³ Bijzani stee cuentre, räjpni:

—Xcäl̄rnibee Dios xhaguibaa najc si'c levaduur nani rugu'ch te gunaa lo choṇ mediid arin, dxejc ni'c rusaguijni guideb cojbgā.

Xhicuent baluii Jesús ganaxtis con cuent

(Mr. 4:33-34)

³⁴ Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejn̄ni te guzobj xtidx dade' ni guni xtidx Dios che bacuaani lo reguijtz, räjpni:

Suiyā diidx con recuent,

suiyā diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch nen̄ triuu

³⁶ Dxejcti basadiidx Jesús rebejn, biu'tini nen̄ yu' cadro bire' rexpejn̄pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn̄ nani rbe'c retriusa'c, najc Xi'n Dios ni gujc Niguii; ³⁸ loniaaga najc guedxliuj; retriusa'c najc rebejn̄ nani najc xpejn̄ Dios, nani rucua-diagj xtiidxni; recuanguejchga najc rebejn̄ ni najc xpejn̄ bendxab. ³⁹ Bejn̄ nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl̄ Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhal̄ rexangl̄ni te jiädgutie'reni, te jiädlääreni lo xcäl̄rnibeeni guiraa renani rujn̄ riajb bejn̄ nen̄ dojl̄, näjza reni rujn̄ cosguijdx. ⁴² Susäl̄reni rebejnga nen̄ te or̄ cadro cayecduxh. Ro'c sonduxhreni, sauya'reni läjyreni. ⁴³ Dxejcti rebensa'c sidimbicha'reni si'c gubijdx lo xcäl̄rnibee Xtadreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räjpszani:

—Si'cza xcäl̄rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl̄ te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjpszani:

—Xcäl̄rnibee Dios xhaguibaa najcza si'c najc te dad rapduxh nani caguiil perlsa'c te siini. ⁴⁶ Che bidxäl̄ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bāj̄l

⁴⁷ Räjpszani:

—Xcäl̄rnibee Dios xhaguibaa najcza si'c te guijxh ni rusäl̄ bejn̄ lo nis te rniaazreni guiraloj cuaa bāj̄l. ⁴⁸ Cheni agudxajni, rbäärenini nez ro' nisdoo, te ro'c rbereni loj rebāj̄l. Rebāj̄l ni najc hueen rucheeni nen̄ te dxijm; nani di gac hueen rusäl̄renini te laad. ⁴⁹ Si'cza gac che gac fis guedxliuj; sirii rexangl̄ Dios te sudzucajreni rebenguijdx lo rebensa'c. ⁵⁰ Dxejcti susäl̄reni rebenguijdx nen̄ te or̄ cadro cayecduxh; ro'c sonduxhreni, sauya'reni läjyreni.

Te beṇ rajp

⁵¹ Dxejcti gunabdiidx Jesús lojreni, räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

⁵² Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xh-aguibaa, najcni si'c te lam nani rajc rbää lo rexcäl'nasa'cni recos ni nacoob, najza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni. ⁵⁴ Huijni lagajc la-jdxni. Ro'c gusloj caguluiini nen xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl'najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. ⁵⁶ Luxh rebisiajnri rbäzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc nen redxejga Herodes, ni laaza tetrarca, biejn diajgni diidx xcuent ni cayujn Jesús. ² Dxejc räjpni lo rexmosni:

—Dee najc Juan Bautist. Pet agubañsacni lo rebengut, ni'cni rajpni yälrnibee te rujnni remilagwr.

³ Si'c gunii Herodes sa'csi laani basäuuni Juan nen latzguiib. Niluxh gunibeeni biliibni con caden nen latzguiib xcuent Herodías, ni gujc chääl bejtzni Felipe. ⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regelnejdx. Luxh sa'csi bidxaglazduxh Herodes baya'ni, ⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸ Dxejcti gunaaga, abalijdx xnannini, räjpni lo Herodes:

—Loj te platón baniidx bitiuwejc Juan Bautist.

⁹ Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' wejc Juan Bautist nen latzguiib. ¹¹ Sas biädnäreni wejcn lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujn rexpejn Juan sanäreni togoolga te huicua'tzrenini. Dxejru huija'nreni diidx loj Jesús.

Bayaan Jesús gaii mıl bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni nen te barcw huijni stee laad nez lo reyubijdz. Che gucbee rebejn caro sääni, huina-jlreni Jesús lo yuj. Guiraa nen reguejdxga biriireni. ¹⁴ Che birii Jesús

neñ barcw, bahuini loj xhidalduxh bejn, dxejc balazlajznireni, basiajnci rebejn nani racxhuu. ¹⁵ Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjł rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjł, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajł. ²⁰ Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹ Renani gudajw najcreni si'cti gaii mił niguii, xhet näjdi reguanaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²² Sas gunibee Jesús biu' rexpejn pacni neñ barcw te ganidreni tedreni stee lad nis lałni casadiidxni rebejn. ²³ Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojł guxhijn, ro'c sugaxteb Jesús. ²⁴ Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadro sääreni. ²⁵ Rsildooru gubig Jesús, bidzujnni lojreni, siädsajni lo nisdoo. ²⁶ Che bahuu rexpejn pacni siädsajni lo nisdoo, bidxejbreni, räjpreni:

—Colhuu te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nistre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. ³⁰ Che bahuu Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yälřililajz. ¿Xhicuent guctio'p lajzlu?

³² Che huä'preni neñ barcw, guläzgajc bej. ³³ Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx Genesare't

(Mr. 6:53-56)

³⁴ Che gudejdreni lo nis, bidzujnni nez lo reyuj xten Genesare't. ³⁵ Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

15

Nani ruxhiṇ bejṇ

(Mr. 7:1-23)

¹ Dxejcti gubig gaii rebejṇ nani ruluii leii nājza rebejṇ guidoo ni laa farisee. Siäädreni guedx Jerusalén, räjpreni loj Jesús:

² —¿Xhicuent di rexpejṇpacu loj xcostrumbr rebengool? ¿Xhicuent direni gusoob yälrdiib ṇaaren che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumburtu. ⁴ Dios gunibeeni xho guntu che räjpni: “Gojp xpala'n xtaclu, xnanlu”, nājza “Nani guiniyaj lo xtaclu o loj xnnani, suguetni.” ⁵ Luxh la'tu rniitu sajc gäb chutis bejṇ loj xtaclu o loj xnnani: “Digacdi gacnäätu sa'csi guiraa ni rapä abadedäni lo Dios.” ⁶ Luxh chutis ni guinii si'c, xhetru nanabdi gacnäjni xtaclu o xnnani. Si'c ni cabälaztu rextidx Dios te gac chanuutu rexcostumburtu. ⁷ ¡Bejṇ ni rusguee najctu! Laaca gunii Isaías, bejṇ nani gunii xtidx Dios xcuenttu cheni räjpni:

⁸ Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹ Xliä'si rajṇreni narä, sa'csi ruluiireni si'c xtidxä reyälṇnibee xten reben guedxliuj.

¹⁰ Dxejcti gurejdxni rebejṇ, räjpni lojreni:

—Colcuadiajg, colyabee. ¹¹ Nani riu' ro' bejṇ di guxhiṇ bejṇga, sanga nani rii ro' bejṇga ni'cni ruxhiṇ bejṇga.

¹² Dxejcti rexpejṇpacni gubig lojni, räjpreni:

—¿La najṇlu bidxe'ch rebejṇ farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtaclä ni yu' xhaguibaa nusuj siliädxa'ni guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beṇ lotiä'p guluii canejz chää stee lotiä'p, guiro'preni sitejbreni neṇ te gueed.

¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La nājza la'tu ditu gacbee, ä? ¹⁷ ¿La ditu gacbee guiraa ni rajw bejṇ ru' xque'ni, dxejcti che rdejdn xque'ni, abigo'ṇni? ¹⁸ Niluxh diidx nani rii ro' bejṇ, neṇ lastoo bejṇ riini; dee ni ruxhiṇ bejṇ. ¹⁹ Sa'csi neṇ lastoo bejṇ rii rexhigabguijdx xten rebejṇ ni rugu't sa'ni; xten rebejṇ ni rusguee gunaa; xten rebejṇ ni rusguee chää sa'ni; xten rebejṇ ni rbajn; xten rebejṇ ni rnii didxxhii lo sa'ni; xtenza rebejṇ ni rutijl sa'ni. ²⁰ Laa sa' recosre ni ruxhiṇ bejṇ. Che dini gusoob recostumbr xte yälrdiib ṇaani, di ni'c guxhiṇ bejṇ.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro nājza Sidón. ²² Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab las-tooni, niluxh cagusacsíduhnini.

²³ Xhet räjpdi Jesús lojni. Dxejcti biädnaabduh rexpejṇpacni lojni, räjpreni:

—Barilaagw gunaare, didi rbedxa'ni siädnajlmi luj.

²⁴ Dxejcti räjp Jesús lojni:

—Dios baxhal narä lojtis xpen Israel nani agunijt nen dojl.

²⁵ Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtiil rexi'nni gusäl'nini lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcäl'rililajzlu. Sugac si'cni rlajzlu.

Lagajc dxejc bjaic xindxa'pni.

Basiajc Jesús xhidal bej racxhuu

²⁹ Birii Jesús ro'c gudejdni nez ro'c nisdoo ni laa Galilee. Huäpgajcni yejc te dajn, ro'c gurejni. ³⁰ Xhidajl bejn bidzujn cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidalro bej racxhuu, bidzunäjärenini nez loj Jesús. Dxejcti basiajcnireni. ³¹ Ni'cni lacti bidxeloduxh reben xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen Israel.

Badeed Jesús xhi gudajw tajp mil bejn

(Mr. 8:1-10)

³² Gurejdx Jesús rexpejnpacni räjpni lojreni:

—Riaä rebejnre sa'csi agujc chon dxej yunäjreni narä luxh xhet ca'direni gaureni. Di rlazä guxhaläreni jiireni rolijzreni palga gajdreni gau didi guidxajgreni lo nezyuj.

³³ Dxejcti räjp rexpejnpacni lojni:

—¿Xho guidxälnu xhi gau reben xhidajlre nez lo reyubijzre cadre rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn lo yuj. ³⁶ Dxejc cua' Jesús guigajdz yätxtiilga näjza rebäjl, badeedni xquixtios lo Dios dxejc gula'ni reyätxtiilga näjza rebäjlga badeednireni loj rexpejnpacni. Dxejcti laareni gudisreni yätxtiilga con rebäjlga lo rebejn xhidajlga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni. ³⁸ Renani gudajwga najc si'cti tajp mil bejn, niluxh xhet näjdi regunaa niclaza rebuiux bigab. ³⁹ Dxejcti basadiidx Jesús rebejn, biu'tini nen barcw te gudejdni lo nisdoo nez región xten Magdala.

16

Reben guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

¹ Refarisee näjza resaducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagusgueesireni, sa'csi rlajzreni guiga' Jesús. ² Dxejc badzu' Jesús diidxe räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³ Che rajl rsil rniitu: “Elaadi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseeni ni rien xhaguibaa, luxh ditu gumbee xhi säloj reseeni xcuent redxejre, nalajznu recos ni cayajc. ⁴ Reben guidxre, reben guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejn pacni stelaad nisdoo biäl-lajzreni ninäreni yätxtiil.

⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.” ⁸ Luxh guchee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinduxh najc xcärlililajztu! ⁹ ¿La gajdtu gachee? ¿La diza lajztu guinaj che gudisä gaii yätxtiil gudajw gaii mıl bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap mıl bejn, ä? ¿Bal dxijmni batie'tu? ¹¹ ¿Xhicuent ditu gachee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxejcrju gucheereni dini niäjp: “Colnati levaduur xten yätxtiil.” Laani caniini: “Colnaáti yälrlului xten refarisee näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³ Che bidzujñ Jesús región xten Cesarea xten guedx Filipo, gunabdiidx Jesús loj rexpejn pacni, räjpni:

—¿Chu naj rebejn nacä narä Xi'n Dios ni gujc Niguii?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxe, räjpni:

—Chicbaalu, Simón Pedr, xi'n Jonás, sa'csi xhet bejñdi baluii dee lojlu, Xtadätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlú guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrbinee lojlu te gulijdxlu rebejn nani ahuiililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn pacni laani najc Guejb Crist.

Gunii Jesús xho guetni

(Mr. 8:31–9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejn pacni, guniini lojreni xho nanabpac chääni guedx Jerusalén te ro'c tedni trabajwduxh

ladzṇaa rebengool xten guidoo, ladzṇaa rebixhojz, nājza rebejn ni najn xleii Moisés. Guniizani sugu'trenini, niluxh ni riojn dxej sibaṇsacni lo rebengut.

²² Dxejcti huinā Pedr Jesús te laad, gusloj cadilṇājnini, rājpni:

—¡Gacnāj Dioslu, Dad! ¡Gurniālojlu gaclu si'c!

²³ Dxejc gubiré Jesús, rājpni lo Pedr:

—¡Gubicaj loā beṇḍxab! Na'c rusiejytislu loā. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti rājp Jesús loj rexpejnṇacni:

—Palga yu' chu tejtū rlaṇz guirinaṇl narā, sucuālazni lagajc laani, sug-uuni xcrujzni, nalajznu tedni trabajw, sujiādnajlṇi narā. ²⁵ Sa'csi nani rlaṇz gunni gaan xcālnabajnṇi, sunijtnini. Luxh nani runijt xcālnabajnṇi por narā, sidxālṇi xcālnabajnṇi par tejpas. ²⁶ Sa'csi xhi gaan gun te bejn palga ga'pni guideb guedxliuj, luxh nit xaimni lo Dios, ā? o ɿla yu' xhi gudeed bejn te siini xaimni? ²⁷ Sa'csi narā Xi'n Dios ni gujc Niguii siālā lo yālrdimbicha' xten Xtaḍā con rexanglṇi, dxejcti siguixā tebgaj bejn si'ctis ni gujc xtzuunni. ²⁸ Rniliāpac lojtu, loj reni tre' ree naj, yu'reni di guet dxejli ni fixgaareni jiālā narā Xi'n Dios ni gujc Niguii lo xcālṇmibeā.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinā Jesús Pedr, Jacoboob, con Juan betz Jacoboob, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbāj si'c te bajl. ³ Dxejc bahuigajcreni loj Moisés nājza loj Elías, cayujyreni diidx con Jesús. ⁴ Dxejcti rājp Pedr loj Jesús:

—Dad, ¡huenduxh suga'nu ree! Palga rlaṇzlu, sajc jiennu chon yuguijxh, tejni gac xten guejblu, steeni gac xten Moisés, steeni gac xten Elías.

⁵ Laṇi canii Pedr, biājt te za ni rdimbicha' guideb gabireni; neṇ zaga biejn te xse' ni rājp:

—Dee najc xi'nā ni sanālazā, ruspaduxhni lazā, colcuadiagj xtiidxnṇi.

⁶ Che biejn diaṇj rexpejnṇac Jesús diidxga, bazuxhijbreni, basajbreni lojreni lo yuj, bidxebduxhreni. ⁷ Dxejcti gubig Jesús lojreni, batzuubni ṇaani yejcreni, rājpni:

—Colchasulii, na'c rdxejbṭu.

⁸ Che gulās lojreni, lojtis Jesús bahuiireni, rutru suganājdini.

⁹ Cheni sayājtreni yejc dajnga, gunibee Jesús lojreni, rājpni:

—Rutlojdi gāṭtu xhini'c bahuiitu dxejli ni guibaṇsacā narā Xi'n Dios ni gujc Niguii lo rebengut.

¹⁰ Dxejcti gunabdiidx rexpejnṇacni lojni:

—Xhicuent rnii rebejn ni najn xleii Moisés ganid Elías nanab jiāād, ā?

¹¹ Badzu' Jesús diidxre, rājpni:

—Guliini siādxgaa Elías, laani gunsa'cni guira'ti, ¹² niluxh narā rniā lojtu, abiāād Elías, di rebejn nienbeeni, luxh bennājrenini si'ctis ni rlaṇzreni, basacsíduxhrenini. Sigajcza gunnājreni narā Xi'n Dios ni gujc Niguii, susacsíduxhreni narā.

¹³ Dxejcti gucbee rexpejnṇacni caniini xcuent Juan Bautist.

Jesús basiajc te biuux ni guyu' xpej beṇḍxab

(Mr. 9:14-29; Lc. 9:37-43)

¹⁴ Cheni bidzujñreni cadro tre' xhidajl bejn, gubig te bejn lojni bazux-hijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduhx yälguijdxgani, yu' huält rtejbni lo guiboo yu' huält rtejbni lo nis. ¹⁶ Biädnääni loj rexpejñpacu, luxh di niajcdi nusajcneni.

¹⁷ Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

¹⁸ Dxejcti gudilñaj Jesús beñdxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guninäj rexpejñpacni Jesús te laad, gunabdiidxreni räjpreni:

—¿Xhicuent di niajcdi nibäänu beñdxab nen lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicañ ro'c, gudejd stelaad”, luxh sibicaj dajnga. Palga rililajzpacu, xhetliidi yu' ni di gacdi guntu. ²¹ Niluxh sa' beñdxabre, dini guirii palga ditu guiniabduhx lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lalni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladznäa rebendojl te gusacsíreni narä. ²³ Niluxh sugu'treni narä, dxejc ni riojn dxej sibansacä lo rebeñgut.

Che bieñ diajgreni diidxga, guc-huinduxh lajzreni.

Gudijxni impuest xten guidoo

²⁴ Che bidzujñ Jesús näjza rexpejñpacni guedx Capernaum, biääd rebeñ ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr nen yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebeñ ni rnibee lo guedxliure? ¿Chuni'c rguijx reimpuest, recuyo't? ¿Reben lajdxreni o rebenzajt?

²⁶ Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quixni. ²⁷ Luxh te di guidxe'chreni, huij ro' nisdoo, bacuaa ansuel, guläa bäl ni guiniazxgaalu. Ro' bälga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcní gubig rexpejñpac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejcti gurejdx Jesús te biuxbäz, bazujnini nez galäireni, ³ dxejc räjpni:

—Rniliäpac lojtu, palga ditu gusiechljaztu, palga ditu gac nadolajz si'c te biuxbäz, ditu jiu' lajdx Dios xhaguibaa. ⁴ Ni'cni chutis bejn nani gac nadolajz si'c biuxe're, laani gac ni sajru lajdx Dios xhaguibaa. ⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezgw jiajbni nen dojl

(Mr. 9:42-48; Lc. 17:1-2)

⁶ Räjzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ 'Palga ni'lu o ñaalu gun jiajblu lo dojl, batiu'ni. Hueenru jiu'lu lo xcälñabajn Dios nitiujnglu o natiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas. ⁹ Palga te balojlu rujn riajblu lo dojl, gulääni. Hueenru jiu'lu lo xcälñabee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

Xcuent xiil ni gunijt

(Lc. 15:3-7)

¹⁰ Räjzaza Jesús lojreni:

—Colñatiro, andi cuälaztu rebejn ni najc si'c biuxbäzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Niguii biääd te guslaani rebejn nani agunijt nen dojl.

¹² Räjzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' nen gurajl te chatiilni xile' ni gunijt, ä? ¹³ Luxh palga guidxälmi xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexil nani di ninijt. ¹⁴ Sigajcza Xtadnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbäzre.

Xho gunnäjlu bejtzlu

(Lc. 17:3)

¹⁵ Räjzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejn lojlu. Palga saru gucuadiajgni xtiidxlu, abiäj lajztu. ¹⁶ Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnga, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnga, luxh dizani jiu xtiidxreni, nen guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliäpac lojtu, guiraa yälguxhtis xten bejn ni di gusiechljaz xtojlni ni guntu lo guedxliuj, si'c jia'nni xhaguibaa; guiraa redojl nani gusiäj lajztu lo guedxliuj sa'csi basiechljaz bendojlga, si'cza jia'nni xhaguibaa.

¹⁹ Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni

ni rniabtu lojni. ²⁰ Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäi rebejnğa.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjl lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayonbidzuu huält, nalajznu si'ctiza huält basiäjl lajzlu.

Xcuent tio'p bejn ni nazäab meel

²³ 'Xcälrnibee Dios xhaguibaa najc si'c te reii ni rlajz gunni cuent lac nazäab rexmosni lojni. ²⁴ Agusloj cayujnni xcuentni chela bidzunñajreni te mos ni nazäab balti mil lojni. ²⁵ Luxh mosre xhet rajpdini te quixni rexti'nni, ni'c gunibee reii guido'ni si'c sclav, nájza cháälñi, nájza rexi'nni, nágajcza guiralii xhixtenni, te gaxh xti'nni. ²⁶ Dxejcti mosga bazuxhijbni loj xlamñi, gunabduxhni lojni, räjpni: “Guläzsijc tiop-choñ dxej, Dad, te gac quixä xti'nä.” ²⁷ Dxejcti lamga balazlajzni xmosni, badzucajni guiraa ni nazäab mosga lojni, baslaanini. ²⁸ Cheni birii mosga rolizj xlamñi, bidxaagni stee samosni ni nazäab bale'si beex lojni. Gunaaznini, baxhiya'ni yejnñi, dxejc räjpni: “Gudijxga ni nazääblu loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni nen latzguiib te bejnñi gaan gudijxni guiraa ni nazäabni. ³¹ Cheni bahuii sgaii mos xhini'c bejnñi, gucnaduxhlaizreni, huiye'tzreni lo xlamreni xhi huiyejnñi. ³² Dxejcti gurejdx xlamreni mosga, räjpni lojni: “¡Mos guijdx! Narä badzucaä di'n ni nazääblu loä, sa'csi gunabduxhlu loä. ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazäabni lo xlamñi.

³⁵ Baluux Jesús cuentga, räjpni:

—Sigajcza gunnäj Xtaďä ni yu' xhaguibaa guiraa rebejn ni di gusiälajzpac guiraa redojl ni rujn resa'ni lojni.

19

Jesús ruluii xcuent yälru'ro'n sa'ni

(Mr. 10:1-12; Lc. 16:18)

¹ Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán. ² Xhidajl bejn birinajlñi, ro'c basiajcnii rebenracxhuu, ³ dxejc gubig refarisee lojni, rlajzreni gusguesireni Jesús ni'c räjpreni lojni:

—¿La sajc gu'ro'n te niguii cháälñi che rlajztisni, ä?

⁴ Badzu' Jesús diidxre lojreni, räjpni:

—¿La gajdту goļ lo reguijtz nani bacuaa to Moisés cadre caj xho benchee Dios bejn galooli: “Niguii nájza gunaa bencheenireni”? ⁵ Guniiiza Moisés: “Ni'cni gusaan niguii xtadni con xnanni te xca'ni cháälñi, dxejc dirureni gac tio'p, tejtis bejn najcreni.” ⁶ Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo cháälñi te si'c gac gu'ro'nni gunaaga, ä?

⁸ Răjp Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujcní. ⁹ Luxh rniä lojtu, niguii nani gusaan chäälni, luxh xhet dojlđi bennäj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰ Dxejc răjp rexpejn pacni lojni:

—Palga si'c najc xcuent niguii con chäälni, hueenru na'c guchnaani.

¹¹ Jesús răjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcăriensa'c ni'ctis racbee. ¹² Yu' xhicuent digacdi guchnaa niguii: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhin sabejnreni; yu'zarení digacdi guchnaareni sa'csi rlajzreni gunreni xtzuuntis Dios. Nani rajc raceeni rediidxre, sugacbeenireni.

Biädnäreni rebiuux loj Jesús

(Mr. 10:13-16; Lc. 18:15-17)

¹³ Dxejcti biädnäreni rebiuxe' loj Jesús te gudzuubni naani yejcreni, guiniabni lo Dios xcuentreni. Luxh rexpejn pacni gudilnäj rebejn ni siädnä rebiuxe'ga. ¹⁴ Dxejc răjp Jesús lojreni:

—Colgusaan guibig rebiuxe' loä, na'c gudxojntureni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni naani yejc rebiuxe', biunejzni ro'c.

Te beñ ni rajp guninäj Jesús

(Mr. 10:17-31; Lc. 18:18-30)

¹⁶ Dxejc biääd te bi'n lo Jesús, gunabdiidxni lojni; răjpni:

—Mastr sa'c, ¿xhini'c nanab gunä te xca'ä yäl nabajn lo Dios par tejpas?

¹⁷ Dxejc răjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlajzlu xca'lu yäl nabajn lo Dios, bazoob rextidx Dios ni caj lo xleii Moisés.

¹⁸ Dxejcti răjp bi'nga lojni:

—¿Xhi rediidxga?

Dxejc răjp Jesús lojni:

—Na'c ju'tlu, na'c guesnäjlú bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx xladlu con xnanlu, huinälajz sa'lu si'cni sanälajzlu lagajc luj.

²⁰ Dxejcti răjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

²¹ Dxejc răjp Jesús lojni:

—Palga rlajzlu gaclu beñsa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaä te jiädnaillu narä.

²² Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

²³ Sas Jesús răjp loj rexpejn pacni:

—Rniliäpac lojtu, naganduxh jiu' te beñ rajp loj xcälrnibee Dios.

²⁴ Rnisacä lojtu, guyasiru ted te cameii neñ baloj te guux; naganduxhru jiu' te beñ ni rajp lo xcälrnibee Dios.

²⁵ Che biejn diajg rexpejn pacni rediidxre, bidxeloduxhreni, dxejc can-abdiidx loj sa'reni:

—¿Chuni'c sajc jiu' lo xcäl'nibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliäpac lojtu, la'tu ni biädnaajltu narä, che guscobä guiraa recos cheni cueä narä, Xi'n Dios ni gujc Niguui, lo yagxhil cadro guinibeä lo guiraa reben guedxliuj, la'tu ni siädnaajltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel. ²⁹ Luxh guiraa rebejn ni basa'n rolijzni o rebejtzni, o rebisiajnni, o xtadni, o xnanni, o chäälmi, o xi'nni, o rexhujni, te siädnaajlmi narä, rebejnğa sajp te gayuu huält locni gojpni, nägajc ga'preni xcäl'nabajn Dios par tejpas. ³⁰ Rebejn nani rchalo najcreni beñroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räjpszani:

—Xcäl'nibee Dios najc si'c te bejn ni najc baxhuaan xten te renchro. Rsildooru biriini te satilni mos gun dzuun lo xyujni, lo reyaguub. ² Che bidxälmi gaii mos, bachaagni diidx. Bia'nreni diidx quixnireni te denaar tebdxej cade tej remosga. Dxejc baxhañnireni loj xyujni sayujnreni dzuun. ³ Birisacni, satilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guui. ⁴ Räjpni lojreni: “Näjza la'tu colchayujn dzuun lo xyuä. Narä siguixä si'cni riäjł xca'tu.” Sä'ti rebejnğa lo dzuun. ⁵ Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnğa. ⁶ Dxejc si'cti rcagaii birisacni, huijni lo guui. Ro'c bidxälmi sgaii bejn ni xhet cayujndireni, suga'sireni nez lo guui. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räjpreni lojni: “Sa'csi rut siädtiildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.” ⁸ Che biu' guxhijn, räjp lam lo mos ni rnibee remos: “Gurejdx remos te quixxlureni. Gudix-xgaa reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yälñanlaa.” ¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmela? ¿O rdxechlajzlu loä sa'csi nacä hueen, ä?” ¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni
(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladznäa reni rnibee lo rebixhojz, näjza lo rebejn ni najn lei. Laareni sinibeereni guetä. ¹⁹ Suteedreni narä ladznäa rebenzajt te cubeereni narä quiinreni narä, dxejc gucuaareni narä lo cruiz. Luxh ni riojn dxej, sibañsacä loj rebeñgut.

Ni gunab xnan Jacoob näjza Juan
(Mr. 10:35-45)

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazux-hijbni nez loj Jesús, te gunabni lo Jesús. ²¹ Gunabdiidx Jesús lojni:

—¿Xhini'c rlaizlu?

Räjp gunaaga lojni:

—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbägwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yälrsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Gulipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtaä ni yu' xhaguibaa alaguleni rebeñga.

²⁴ Che biejn diajg stzuu rexpejn pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzajt, rnibeereni rebeñga si'c xlamreni. Luxh reni najc rebenro lojreni runnäjreni rebeñga si'ctis ni rlaizreni. ²⁶ Et si'cni gunditu la'tu loj rebejn. Chutis rlaiz gac benro lojt, nanab gunni dzuun gacnäjni guiraliitu si'c te mos. ²⁷ Luxh chutis tejt ni rlaiz guiliä'p xpala'nni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yälñabajn xtenni te gudijxni baslaani xhidal bejn ni yu' lo dojl.

Jesús rusiajc tio'p lotiä'p
(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn sanajlni. ³⁰ Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnäj rebejnreni, te gusauren ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlaiztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹ Cheni Siäddzungajxhrenei guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn pacni, ² räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxheci, coltanäni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴ Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶ Dxejcti huij rexpejn pacni, bejnreni si'c gunibee Jesús gunreni.

⁷ Biädnäreni burga näjza burbäz xi'nni. Gudixhrenei xhajbreni detz burbäzga, dxejc gubijb Jesús burbäzga. ⁸ Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhrenei rebalajg lo nez yuj cadro ted Jesús. ⁹ Rebejn ni nijd, näjza reni siääd dejtznı gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús neñ guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹ Yu'zarenı räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús neñ guidoro xten Dios, gulääni guiraa rebejn ni caguto' näjza rebejn ni casii. Barexhätıni remex xten reni ruchaa meel xten rebejn, näjza reyagxhil xten reni ruto' repalom. ¹³ Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbajdx, yälrniab loj Dios.” Niluxh la'tu abejntuni xpiliäa gubaan.

¹⁴ Lagajc neñ guideooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuii reni rnıbee loj rebixhojz, näjza reni najn leiı remilagwr ni bejn Jesús, luxh biejnza diajgreni xho cabedxa' rebıuxe' canıireni: “Rliä'pnu xpala'nlu Xi'n toreiı David”, bidxe'ch rebixhojzga. ¹⁶ Dxejc räjprenı loj Jesús:

—¿La riejn diajglu xhi canıireni, ä?

Badzu' Jesús diidxre lojrenı räjpni:

—O'n, riejn diagäni. ¿La gadtu gol lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu gol rebıuux näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxäl'ni, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejn'pacni, bidxelo-duxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzpacu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäi nisdoo”, si'c gacni. ²² Guiraa ni guiniabtu loj Dios, palga chalilajzpacu, suniidxnini.

Xcäl'rnibee Jesús

(Mr. 11:27-33; Lc. 20:1-8)

²³ Dxejcti biu' Jesús nen guidoro, dxejc laḷ ni caguluiini rebejn' gubig reni rnibee loj rebixhojz näjza rebengool, gunabdiidxreni lojni:

—¿Xhi yäl'rnibee rajplu ni'cni rajc rujnlu recosre? ¿Chuni'c baniidx yäl'rnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yäl'gunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yäl'rnibee te runä recosre.

²⁵ ¿Chuni'c gunibee gutiobnis Juan ni rutiobnis? ¿La Dios o la ben guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶ Palga jie'tznu bejn' guedxliuj gunibeeni, dxejc sixa't rebejn' yejcnu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl'rnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadro care' uub.”

²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtaadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, ¿chuni'c bejn' si'cni rlazj xtaadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcäl'rnibee Dios, ³² sa'csi Juan ni rutiobnis biädluini la'tu

xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ 'iColcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcnj te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhal baxhuaanga gaii xmosni loj xyujni te chaxiireni cose'ch ni riäjl xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhalsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ 'Dxejcti bejn baxhuaanga xhigab: "Maazru huen guxhalä xi'nä; su-cuadiajgrureni xtiidxni." ³⁸ Cheni bahuiireni lo xi'n baxhuaan xten yujga, bejnreni xhigab: "Deeni jiannäj yujre; do'o guigu'tnuni te jiannäänun yujre." ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjl xca'ni che gal guire' cose'chga.

⁴² Dxejcti räjp Jesús lojreni:

—¿La gajdtu gol lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga gudixhnini squin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴³ 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjl xca' xcälrnibee Dios, nalajznu renani chalilajzpac xtiidxni.

⁴⁴ Luxh xcuent guijga: nani jiajb lo guijga, silia'ni, per nani guitejb guijga yejcni, li siujyni, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesús, gucheereni cagusä'tni lagajc laareni. ⁴⁶ Rlajzreni nini-aazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yälruhnaa

¹ Guslosac canii Jesús lojreni con recuent, räjpni:

² —Xcälrnibee Dios najc si'c te reii ni bejn te sa' te guchnaa xi'nni.

³ Baxhalni rexmosni te saxiireni regelnejdx chääreni sa', niluxh rebejnre di rlajzdireni. ⁴ Dxejc baxhalsacni rexmosni, räjpni: "Colye'tz loj reni abidon, agujc comiid. ¡Abagutä balti gonsa'c, gonguro! Anachee guira'ti yälrajw. Coltaa." ⁵ Niluxh reni abidonga di niu xtiidxreni. Tejñi sahuui rexyujni, steeni sää lo rexnegosni, ⁶ dxejcti sgaii reni niajc biooz

gunaazreni rexmos reii, basacsíreni remosga, sas bagu'trenini. ⁷ Che biejn diajg reiiga, bidxe'chduxhni, baxhałni rexsoldaadni te sagu'treni guiraa rebenguijdxga, te saze'czareni guejdx cadro rbäjzreni. ⁸ Dxejcti räjpi loj rexmosni: "Guiraa dee anacchee, di nungäjł jiäädru reni abidon. ⁹ Colchäj, pues, lo resquii lo nezyuj, colcuejdx chutis bejn ni guidxaagtistu." ¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc benhueen te gudxaj rolizj reiiga.

¹¹ 'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. ¹² Dxejc räjpi reii lojni: "Xamigwä, ¿xho bejnlu biu'lu ree luxh xhet xhablanijdilu najcwlu?" Dxitis sobga' bejnğa, xhet rniidini. ¹³ Dxejc räjpi reii loj rexmosni: "Colguliib ni'ni näjza naani, colsäłni detzyu' cadro nacäjy te ro'c gonduxhni chubejli reläjyni." ¹⁴ Sa'csi xhidajł najc reni bidon luxh guxii najc reni bibe.

La sajci quiixni impuest

(Mr. 12:13-17; Lc. 20:20-26)

¹⁵ Dxejcti sii refarisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhałreni gaii xpejnreni näjza gaii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni rebejn, sa'csi dilu cue bejn ni sajcro lo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc guchee Jesús xhet laadi xhigab cayujnreni neñ lastooreni, dxejc räjpi lojreni:

—¿Benguijdx! ¿Xhicuent rlajztu guquiiłtu narä? ¹⁹ Colguluii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, räjpi:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjpi Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibaṇsac rebejn

(Mr. 12:18-27; Lc. 20:27-40)

²³ Lagajc dxejga bidzujñ gaii reni laa saducee, reni di chalilajz sibaṇsac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachṇaa, luxh ruti xi'nni che guetni, riäjł guchṇaa bejtzni biuudga te chu xi'nreni xcuent bejtzni.

²⁵ Mbaj. Loonu yu' gajdz niguii ni najc bejtz sa'reni. Betzgoolga bachṇaa, dxejc gujtni, luxh di xi'nni niu'. Basa'nni chääłni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, näjza gunaaga gujt.

²⁸ Che guibaṇsac rebejnğa lo rebengut, ¿chu tej lo rebejtzga gac chääłpac gunaaga, ni guiraareni bachṇaareni gunaaga?

²⁹ Dxejcti badzu' Jesús diidxre lojreni, räjpi:

—Et laadi rujntu xhigab sa'csi ditu gacbee xtidx Dios niclaza xcuent xcäl'ribee Dios. ³⁰ Ni che guibajñ rebengut, diru yäl'ruchnaa chu, diruza bejñ gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹ Dxejc xcuent yäl'rbañsac loj rebengut, ðla gajdtu gol reguijtz ni bacuaa toMoisés che räjp Dios xcuent retoxtdagoldoonu: ³² “Narä nacä Xtios Abram, Xtios Isaac, näjza Xtios Jacoob”, ä? Dios di gac Xtios bengut, Xtioſtis rebejñ ni nabajñ najcni.

³³ Che biejn diajg rebejñ xtidx Jesús, bidxeloduxhrene diidx ni ruluiini.

Diidx ni maazru sajç

(Mr. 12:28-34)

³⁴ Che guchbee refarisee basäu Jesús ro' resaducee, bidojpreni, bachaa-greni diidx. ³⁵ Dxejc tejreni nani najñ leii, rlaizni guquiliñi Jesús ni'c gunabdiidxni lojni räjpni:

³⁶ —Maſtr, ðxhi diidx ni gunibee Dios sajçru lojreni çaj lo leii?

³⁷ Räjp Jesús lojreni:

—Nani rnii ſcree: “Huinälajz Dad Xtioſlu guideb laſtoolu, guideb xaimlu, näjza guidebgajç xcäriejñlu.” ³⁸ Diidxre ni gunibee Dios najç ni sajçru, luxh ganidni ſiädni loj rextidx Dios. ³⁹ Ni ro'pga ſigajçza najcni: “Huinälajz reſa'lu ſigajç ni ſanälajzlu lagajç luj.” ⁴⁰ Guiro'p remandamientre nanab te guzoob bejñ guiraa rediidx ni bacuaa toMoisés näjza ni bacuaa redade' nani gunii xtidx Dios.

¿Chu xi'n najç Criſt?

(Mr. 12:35-37; Lc. 20:41-44)

⁴¹ Lañi tre' refarisee, gunabdiidx Jesús lojreni, räjpni:

⁴² —¿Xhi rujntu xhigab xcuent Criſt? ¿Chu xi'n najcni?

Räjpreni lojni:

—Laani najç xajç toDavid.

⁴³ Räjp Jesús lojreni:

—¿Xhicuent räjp David “Xtaä” lojni che baſanij Sprit Dxan xten Dios laſtooni? Ni'c bacuaa toDavid rediidxre:

⁴⁴ Dad Dios räjp lo Xtaä,

gurej xladbeä lañ ni gudzugä guiraa reni rdxe'ch lojlu ladzñi'lu.

⁴⁵ Pałga lagajç David rnii: “Dad” lojni, ðxho mood najcni xi'nni?

⁴⁶ Dxejc rut gujçdi badzu' nicla te diidx lojni, luxh dxejliga rutru gojçdi xhi diidx niniabdiidxruren i lojni.

23

Rucuaquij Jesús refarisee näjza rebejñ nani najñ leii

(Mr. 12:38-40; Lc. 11:37-54; 20:45-47)

¹ Dxejc räjp Jesús loj rebeñ xhidaalga näjza loj rexpejñpacni:

² —Rebejñ ni najñ leii näjza refarisee räjp yäl'najñ te gusule'reni xleii Moisés. ³ Ni'cni cołguzoob guiraa rextiidxreni, na'c guntu sa' recos ni rujñreni, sa'csi laaren i rnüireni xhini'c guntu, dxejçti lagajç laaren i direni gun ni rnibeeren i guntu. ⁴ Rnibeeren i gun rebejñ cos naganduxh ni najç ſi'c te cargw naduxh ni di gac guu bejñ, per laaren i nicla con te bicueñaaren i direni guſniibni. ⁵ Guiraa recos ni rujñreni, rujñrenini te fiitiſ rebejñ. Rçaglałjzreni rçaj lo cuajſreni näjza roxhajgwreni rçaje' cadro yu' tla' guijtz ni çaj xtidx Dios lojni. Ruſtioolzaren i xi' xhajbreni. ⁶ Rlałjzreni ganidreni tedreni lo mex che gał te lañi; rlałjzreni çuereni lo

rebancw ni suga' delant neñ reguidobáz. ⁷ Sigajcza rlanjzeni guchagro' bejn naareni nez lo guii, guiniiza rebejn "Mastr" lojreni.

⁸ Na'c gusaantu guini' rebejn "Mastr" lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu "Xtadä" loj te beñ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu "Mastr" sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc beñroru loj resa'ni. ¹² Sa'csi chutis ni rchaloni najcni beñro lo sa'ni, ni'c sustuiyá lojni, chutis ni najc nadolajz loj Dios, ni'c sunäni beñro lo sa'ni.

¹³ 'iProobzatu remastr xten leii nájzatu refarisee, najctu benguijdx! Sa'csi rudxoju'ntu jiu' rebejn loj xcäl'mibee Dios. Lagajc la'tu ditu jiu' luxh dizatu gusaan jiu' rebejn ni rlanj jiu'.

¹⁴ 'iProobzatu remastr xten leii nájzatu refarisee, najctu benguijdx! Sa'csi rudzucajtu rolijz renanbiuud la'si cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵ 'iProobzatu remastr xten leii nájzatu refarisee, najctu benguijdx! Zijt rijtu lo renezyuj nájza lo nisdoo te guntu gaan guchaa mase tejtis bejn xmoodni te gañni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

¹⁶ 'iProobzatu, najctu si'c lotiä'p, rlanjtu guluiitu nezyuj! La'tu ni rnii palga te bejn guiniliipac xtiidxni guzá'tni guidoro, xhet sajcdi xtiidxni. Palga guiniliipacni guzá'tni oor ni yu' neñ guidoo, dxejc sii rniliini dxejc nungäj guzoobni xtiidxni. ¹⁷ iBeñ nayääl, beñlotiä'p! iXhini'c sajcrú? iLa oor la guidoro ni rundxan oorga? ¹⁸ Rniizatu: "Palga te bejn guiniliipacni guzá'tni lo bacuug ni yu' neñ guidoro, di xcuentdi xtiidxni. Luxh palga yu' chu guiniliipac guzá'tni gojn ni dzuub lo bacuug, dxejc sii rniliipacni dxejc nungäj guzoobni xtiidxni." ¹⁹ iBeñ nayääl, beñ lotiä'p! iXhini'c sajcrú? iLa gojn o la bacuug nani rundxan gojnga, ä? ²⁰ Nani ruzä't lo bacuug che rniliipacni, et ganaxdi lo bacuug ruzä'tni, nájza guiraa ni tre' lo bacuug ruzä'tni. ²¹ Ni ruzä't guidoro che rniliipacni, et ganaxdi guidoro ruzä'tni, nájza Dios ni rbájza neñ guidoro ruzä'tni. ²² Sigajcza ni ruzä't guibaa che rniliipacni caguzä'tzani yagxhilo xten Dios nájza lagajc Dios ni sobga' ro'c.

²³ 'iProobzatu remastr xten leii nájzatu refarisee, najctu benguijdx! Bedzxtiil, anis nájza comiñ ni rajptu, rudeedtu lo Dios tej tantga yejc cade te tzuu, niluxh ditu jiu' ni sajcrú lo xtidx Dios, cadre caj xcuent yäl'nabanya, yäl'rulazlajz, nájza yäl'riliilajz. Deeza ni riäjlpac guntu la' ni cayujnzatu steega. ²⁴ iLa'tu, lotiä'p ni rlanj guluii nezyuj! Riutu rediidx ni guxii saj, niluxh rediidx ni sacduxh ditu jiuni, najctu si'c bejn ni rbää te rex lo xpla'tni dxejcru räjmní te cameii.

²⁵ 'iProobzatu remastr xten leii nájzatu refarisee, najctu benguijdx! Ru-siatu detz bas nájza pla't luxh neñni najc-dxuudx. Sigajcza la'tu ri-uduxhtu recostumbr, luxh lastootu guidxa yäl'gubaan nájza yäl'rdxe'chlajz. ²⁶ Farisee ni najc lotiä'p: gudibxgaa neñ bas nájza neñ pla't, dxejc náj dejtzní sajc naya.

²⁷ 'iProobzatu remastr xten leii nájzatu refarisee, najctu benguijdx! Sa'csi najctu si'c rebaa ni nacchesa'c; nolbäjreni, saru rluini, luxh neñreni guidxa dzujt xte bengut nájza bäl'yudx. ²⁸ Sigajcza najctu la'tu. Saru rujn lojtu, rchalo rebejn najctu beñsa'c, niluxh lastootu guidxa yäl'rusguee nájza yäl'guyalajz.

²⁹ 'iProobzatu remastr xten leii nájza refarisee, najctu benguijdx! Runcheetu xpaa redade' ni gunii xtidx Dios galoo, rusucheetzatu ro' xpaa rebejn ni gujc beńsa'c, ³⁰ dxejc rniitu: "Paru nibajńnu neń redxej ni gubajń retoxtdagoldoonu dinu niacnáj reni bagu't redade' ni gunii xtidx Dios." ³¹ Lagajc con rediidxre rcájptu najctu rexajg renani bagu't redade' nani gunii xtidx Dios. ³² iColguscuááz guntu sa' recos ni guláxtiej retoxtdagoldootu!

³³ 'iLa'tu ni najc si'c bál, la'tu ni najc si'c te bitiááz guidxa bálńialajz! iXho guntu te na'c cháātu gabijl par tejpas? ³⁴ Ni'cni, guxhalá rexpená ni guinii xtidxá, nájza beńnajń, nájza mastr. Luxh yu'reni sugu'ttu sucuaaturení lo cruiz; yu'zarení siguijntu neń reguidobáz, sirinajlturení guejdx por guejdx. ³⁵ Si'cza yejctu jiajb xtiejn guiraa rebennadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu neń guidoro gajxh lo bacuug. ³⁶ Rniliápac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷ Rájpa Jesús:

—Jerusalén, Jerusalén! Xpejnlu rugu't redade' ni rnii xtidx Dios, ru-cuaazarení guij yejc rebejn ni ruxhal Dios te gusule'reni xtiidxni lojtu. iBalti huált rlazá nutie'á la'tu si'cni rutie' guidco'c rexquidbázni neń xhigani, per ditu nicájb! ³⁸ Colhuui xho jianxteb xquidootu cuálazrenini. ³⁹ Rnixgaá lojtu, naj dirutu fii loá, dxejli che guiniitu: "Benle' Dios nani siáád xcuentni."

24

Jesús rájp sibijl guidoro

(Mr. 13:1-2; Lc. 21:5-6)

¹ Birii Jesús neń guidoro te asiini, dxejc gubig rexpejn pacni lojni, gusloj caguluiireni reyuduxhga lojni. ² Dxejc rájp Jesús lojreni:

—iLa ruhuiitu guiraa reyu're? Rniliápac nicla tej guij di jia'n yejc sa'ni ree; guiragajc reyu're sibijl.

Cos ni guluiloj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biáád rexpejn pacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. iXhi seen guluiloj ameer jiáádlu nájza che ameer nitloj guedxliuj?

⁴ Dxejc rájp Jesús lojreni:

—iColńatiro te rut gusgueedi la'tu! ⁵ Sa'csi su' xhidajl reni jiáád, naarení: "Nará nacá Crist", luxh susgueerení xhidajl bejn. ⁶ Siejn diajgtu xcuent cadro cayajc guer, nájza xcuent cadro rlajz chu guer, na'c guidxejbtu sa'csi si'c nungájł gac, niluxh gajd galdi nitloj guedxliuj. ⁷ Sa'csi siájs te naciń sidilńajńi stee naciń; te yálrnibee sujn guer con stee yálrnibee, luxh su' gubijn, su' yálguijdx, su'za xuduxh xhidajł lajt. ⁸ Luxh guiraa redee cuáxtiejtis retrabajwduxh ni churu chu.

⁹ 'Dxejc guteedreni la'tu ladzńaa rebendojl te gusacsíreni la'tu, te gugu'tzarení la'tu, luxh guiraa rebejn sidxe'ch lojtu sa'csi sanálajztu nará.

¹⁰ Neń redxejga, xhidajlreni sibálaz xcálřililajzreni, sidxe'ch lo sa'reni,

suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yälñabajn par tejpas. ¹⁴ Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

¹⁵ 'Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni goł dee sug-acbeeni nani rołni, ¹⁶ dxejc renani rbäjz lo guedx Judea, suguxunreni gucuatxlojreni nen dajn. ¹⁷ Bejn ni niä'p yejc xyu'ni dxejga di gald jiäjtnei te chalääni xhixtenni nen xyu'ni; ¹⁸ bejn nani cayujn dzuun lo niaa, na'c guibi'ni niclaza chaxhiini xhajbni. ¹⁹ ;Proobza regunaa ni nuxi'n, näjza reni cagusiä' bāz nen redxejga! ²⁰ Colñabduxh loj Dios xhet nendi redxej ni cayacnalduxhdi nanab guxunditu, niclaza dxej che rusilajz bejn. ²¹ Sa'csi su' trabajwduxh nen redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, nicla tej bejn di laa. Luxh sutiu' Dios yejc redxejga sa'csi rinälajzni reni aguleni.

²³ 'Nen redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni. ²⁴ Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgue-duxhreni rebejn, niluxh rlajzreni gusgueezareni rebejn ni agule Dios, ni rililajz xtiidxni. ²⁵ Agunixgaa lojtu xhini'c gac. ²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' nen yu're”, na'c chalilajztuni. ²⁷ Sa'csi si'cni guideb xhaguibaa rien che rdinya' ladjiaa näjza ladjiatli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. ²⁸ Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii

(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa re trabajwduxh, sicäy lo gubijdx, diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz nen guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälñibee näjza yälrdimbichaduxh. ³¹ Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'Colguiseed ni ruluii yajg iigw! Che naren renaani che cabääni be'n, asiääd bāi curex, ³³ sigajcza cheni fiitu cayajc guiraa recosre, sacheetu asiädgajxh fis, rolä'li abidzujnni. ³⁴ Rniliäpac lojtu, guiraa redee sajc lal ni nabajn gaii rebejn ni suga' ree naj. ³⁵ Guibaa näjza guedxliuj sinitlej, niluxh xtidxä di nitloj.

³⁶ 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc nen redxej che gubajn toNoé, si'cza gac che jiälä Xi'n Dios ni gujc Niguii. ³⁸ Nen redxe galoo, cheni gajd nisguiduxhga jiajb,

rebejn ni nabajn dxejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé nen barcwro. ³⁹ Direni niacbee xtiidxni; cheni biäädli nisguiduxh ni sanä guiraareni dxej cru gucbeereni. Sigajcza gacni che jiälsacä narä Xi'n Dios ni gujc Niguui. ⁴⁰ Nen redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni col̄susiñ, sa'csi ditu gan xhi dxej jiääd Dad xtentu. ⁴³ Col̄ganchee, paru niacbee baxhuaan xten yu' cor yääl niääd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni. ⁴⁴ Ni'cni col̄susiñza la'tu, sa'csi siääd Xi'n Dios ni gujc Niguui lagajc or ni ditu gun xhigab jiäädni.

Xcuent te mossä'c näjza te mosguijdx

(Lc. 12:41-48)

⁴⁵ '¿Chuni'c najc mossä'c ni ruzoob diidx, ni basannäj xlam̄ni rebejn ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn xtuunni che guidzujn xlam̄ni. ⁴⁷ Rniliäpac lojtu, lam̄ga susa'nni sa' mosga te fini guiraa xhixtenni. ⁴⁸ Dxejc palga mosga di gusoob xtidx xlam̄ni, gunni xhigab: "Sacladuxh guibi' xlam̄ä", ⁴⁹ dxejc guisloj cagusacsíni resamosni, guislojni gaunäjni, yänäjni rebengu. ⁵⁰ Dxejc sidzujn xlam̄ni dxej che dini gun xhigab jiäädni, luxh or ni dini gan guidzujn. ⁵¹ Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

25

Xcuent tzuu gunaa

¹ Räjpa Jesús:

—Pues xcäl̄rni bee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayäälga sanäreni xcandilreni, niluxh direni nica' sijl se't. ⁴ Niluxh reni nasinga sanäreni sijl se't te guze'creni nen xcandilreni. ⁵ Sa'csi bi'nga di nidzungaj, gunaaz bacal̄ regunadxa'pga, gudiejstireni. ⁶ Dxejc si'cti garol yääl, biejn te xse' ni räjpa: "Bi'n asiääd, col̄chäj, col̄chachaglojni." ⁷ Guiraa regunaare huistieguxunreni, dxejc bensa'creni xcandilreni, te cuaguijreni. ⁸ Dxejc guigaii regunayääl räjpreni loj reni nasin: "Col̄gunidxlaa te bo'c se't gusanijnu xcandilnu, sa'csi arlajzni jiuiini." ⁹ Dxejcti regunanasin räjpa lojreni: "Digacdini, dxejc dini gal̄ nicla par nu-urnu nicla par la'tu. Col̄chäj cadro ruto'reni se't col̄chazii xse'ttu." ¹⁰ Lal̄ni sasi guigaii regunaa-nayäälga se't, bidzujn bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujn regunayäälga, räjpreni: "Dad, Dad, baxhal ro lä'." ¹² Dxejc räjpmi lojreni: "Rniliäpac lojtu, dina gumbleātu."

¹³ Dxejc Jesús räjpa lojreni:

—Col̄susiñza, sa'csi ditu gan nicla xhi dxej nicla xhi or siääd Xi'n Dios ni gujc Niguui.

Xcuent lam̄ ni badeed meel

¹⁴ 'Xcäl̄rni bee Dios xhaguibaa najc si'c te bejn ni agojl guirii chääni zijt te biał. Gurejdxni rexmosni, badeedni meel lojreni.

¹⁵ 'Lo tejni badeedni si'cti gaii mīl meel, lo steeni badeedni si'cti tio'p mīl, dxejc steeni cua' te mīl. Loj tejgani badeedni si'cti ni rujnni xhigab

sajc gunnäjreni dzuun, dxejcti biriini xpiajni. ¹⁶ Ni cua' gaii mi̯ meel bejn te dzunro, bejn ni gaan sgaii mi̯ meel. ¹⁷ Sigajcza ni cua' tio'p mi̯ meel, bejn ni gaan stio'p mi̯. ¹⁸ Dxejcti ni cua' te mi̯ meel, huicua'tzni xmeel xlamni nen te gueed ni gudäänni lo yuj.

¹⁹ 'Gudejdti balti bäii, dxejc gubi xlam remosga, bejn ni cuent loj guiraareni. ²⁰ Che bidzujn ni cua' gaii mi̯ meel, bidzunäjni sgaii mi̯ meel ni bejn ni gaan, räjpni loj xlamni: "Dad, baniidx guejblu gaii mi̯ loä. Aree sgaii mi̯ meel ni benä gaan." ²¹ Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos báz, naj sunidxä guinibeelu xhiroobru. Biu' loä, bibalaznäjä narä." ²² Che bidzujn ni cua' tio'p mi̯ meelga, räjpni loj xlamni: "Baniidx guejblu tio'p mi̯ meel loä, aree stio'p mi̯ meel ni benä gaan." ²³ Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbáz, naj sunidxä guinibeelu xhiroobru. Biu' loä, bibalaznäjä narä." ²⁴ Che bidzujn mos ni cua' te mi̯ meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadro dilu nibe'c binij, rutojpszalu cadro dilu nutie'ch binij. ²⁵ Ni'cni bidxebä, huicua'tzä xmeellu nen yuj. Niluxh axh aree xmeellu." ²⁶ Dxejc räjp xlamni lojni: "iMos guijdz, mos ploj! Najnlu rca'ä cose'ch cadro dina nibe'cä binij, rutopä cadro dina nutie'chä binij. ²⁷ Riäjl nisa'nlu xmelä nen te bancw te che nibi'ä nicasacä xmelä con xi'nni ni niujni gaan." ²⁸ Dxejc räjpni loj reni suga' ro'c: "Colgudzucaj te mi̯ meel ni ca'ni colgudeedni loj ni rajp tzuu mi̯ meel. ²⁹ Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni." ³⁰ Dxejc räjpni: "Colca' mosre ni xhet sajcdi, colguzäl ni lo yäl nacäjä, cadro chu yäl ronduxh, näjza yälrajw reläjä bejn."

Yälguxhtis xten reguejdx

³¹ 'Che jiädsac Xi'n Dios ni gujc Niguui con yälrdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni. ³² Dxejc sidojp nez lojni guiraa reben guedxliuj. Dxejc sibi ni lojreni, silia'ni sa'reni si'c rujn te baxtoor cheni rbeni rexii loj redxib, te rlia'reni loj sa'reni. ³³ Suzujni rexii xladbeeni dxejc redxib xladbäjägwini. ³⁴ Dxejc säjb rei loj reni suga' xladbeeni: "Coltaa, la'tu ni benle' Xtäda. Coljiu' lo yälrnibee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadro bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä." ³⁷ Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te benzijt, baniidxnu cadro bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu nen latzguiib, biophuiinu lojlu?" ⁴⁰ Dxejc reiiga säjb lojreni: "Rniliäpac lojtu, xhitis xhi bejntu loj te rexpenä ni nni xtidxä mase proobreni, lagajc loä bejntu recosga."

⁴¹ 'Dxejc säjpszani loj reni suga' ladbäjägwini: "Colguibicaj loä, benguijdx, colchä lo balduxh ni cayejc par tejpas ni cayejc par bendxab ni rnibee näjza rexpendxabni. ⁴² Sa'csi gulanä, luxh ditu nuniidx xhi niaüä; biolä, per ditu nuniidx xhi niä'ä; ⁴³ cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä,

guyu'äza neṇ latzguiib, niluxh ditu niädhuii loä." ⁴⁴ Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te beṇzajt, o cayäädx xhajblu, o cayacxhuulu, o yu'lu neṇ latzguiib, luxh dinu ni-acnäjl'u?" ⁴⁵ Dxejc säjb reiiga lojreni: "Rniliäpac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj." ⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcälṇabajn Dios par tejpas.

26

Bejnreni xhigab xho guiniaazreni Jesús

(Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpejnṇpacni:

² —Anajntu stio'p dxejtis cayäädx gac lanij ni laa pascw. Luxh sutee-dreni narä, Xi'n Niguui ladzṇaa reni gucuaa narä lo cruiz.

³ Dxejc bidojp rebejn ni rnibee rebixhojz, näjza remastr xten leii, näjza rebeṇgool lo rexpejn Israel. Lo xle' Caifás, ni rnibee loj rebixhojz, bidojpreni. ⁴ Ro'c bachaagreni diidx xho guiniaazreni Jesús con yälrusguee, te ju'trenini. ⁵ Luxh räjpreni lo sa'reni:

—Na'c jiennuni neṇ redxe lanij, te di gun rebejn bieiduxh.

Te gunaa ni biädñä perfum

(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcni che ral tiejxhni, ⁷ ro'c gubig te gunaa lojni, ca'ni te vasguij ni laa onix, guidxani te perfum ni saj melro. Che sobga' Jesús lo mex, bachajni perfum yejc Jesús. ⁸ Che bahuii rexpejnṇpacni xhi cayujnni, bidxe'chreni, gusloj cayäjpreni:

—¿Xhicuent casälxlia'ni perfumga? ⁹ Perfumre niajc nido'ni, nirii xhidajl meel lojni te niacnäjni rebeṇproob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäitu gunaare? Ni te coshueen najc dee nani bejnni loä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴ Dxejc lo retzubitio'p rexpenṇpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladzṇaatu?

Dxejc badeedreni galbitzuu melpla't lojni. ¹⁶ Dxjecli caguiil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpejnṇpacni loj Jesús, räjpreni lojni:

—¿Caro rlaizlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchāj lo guejdx rolijz te dade', colye'tz lojni: “Si'c naj Dad mastr: Asiāddzungajxh xorni, ni'cni rolijzlu gaunājni rexpejn̄ni xchej lanipascw.”

¹⁹ Bejnti rexpejn̄pacni si'cni gunibee Jesús gac, bazucheereni xchej xten pascw.

²⁰ Che biu' guxhijn̄, sobga' Jesús lo mex con retzubitio'p xpejn̄pacni.

²¹ Lał ni cayajwreni rājpni lojreni:

—Rniliā lojtu, yu' tejt̄u ni guto' narā.

²² Dxejc guc-huinduxh lajzreni, rājpreni lojni:

—Dad, ¿andi narāni?

²³ Dxejcti rājp Jesús lojreni:

—Ni gaunāj narā neñ tejtis pla't, laa ni'cni guto' narā. ²⁴ Xi'n Dios ni gujc Niguii saj̄c si'ctis ni cał loj guiłtz xten Dios, per gunatiro bejn̄ ni guto'ni. Huenru na'c niajl̄ bejnga.

²⁵ Dxejcti gunii Judas, ni caguto' Jesús, rājpni:

—Mastr, ¿andi narāni?

Jesús rājp lojni:

—O'n, lujni.

²⁶ Lał ni sobga'reni cayajwreni, gulās Jesús yāt̄xtiil, badeedni xquixtios lo Dios, dxejcti gula'nini, badeednini loj rexpejn̄pacni, rājpni:

—Coltajw; dee najc si'c tiexhā.

²⁷ Dxejc gulāsni te vas, badeedni xquixtios lo Dios, dxejcti badeednini loj rexpejn̄pacni, rājpni:

—Guiraatu colyā', ²⁸ sa'csi dee najc si'c xtienā; ni'cni riannāā la'tu te didxcoob, luxh rejn̄re sixe'ni xcuent xhidajl̄ bejn̄ te guslaanireni neñ dojl̄.

²⁹ Luxh rniā lojtu, diruna yā'ā nis nani rii yejc uub, dxejlini yānāsacātu lo xcāl̄rnibee Dios, Xtađā.

Rājp Jesús sibālaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bil̄reni te dij, biriireni, sääreni lo dajn ni laa Oliib. ³¹ Dxejc rājp Jesús lojreni:

—Guiragajctu sactio'p lajz̄tu xcuentā, susa'ntu narā naguxhijn̄ sa'csi lo reguiłtz xten Dios cał scree: “Sugu'treni baxtoor dxejc sire'ch rexiil.”

³² Dxejc chen̄i guibañsacā lo rebengut, ganidā cha'ā región Galilee, dxejcti jiādnajltu narā.

³³ Dxejc rājp Pedr loj Jesús:

—Masque guiraareni cuālazlu, narā dina cuālazālu.

³⁴ Dxejc rājp Jesús lojni:

—Rniliāpac lojlu, lagajc guxhijn̄re, nicla gajd guidgail̄ cuedxa', luxh luj alagulālazlu narā choñ huālt.

³⁵ Rājp Pedr loj Jesús:

—Masque riājl̄ guetnāālu, dina cuālazālu.

Dxejc sigajcza gunii guiraa rexpejn̄pacni.

Gurejdx-gunab Jesús loj Dios neñ Getsemaní

(Mr. 14:32-42; Lc. 22:39-46)

³⁶ Dxejcti bidzuj̄n Jesús nājza rexpejn̄pacni te lajt̄ ni laa Getsemaní, rājpni lojreni:

—Colcuésijc ree lał ni cuedx-guiniabā lo Dios.

³⁷ Dxejc sanāni Pedr nājza guiro'p xi'n Zebedeo, luxh gusloj cayachuinduxh lajz̄ni, cayu'zani yārsiaduxh. ³⁸ Dxejc rājpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhibni dxejc basajb lojni lo yujli, gusloj cabledx-canabni lo Dios:

—Xtadä, palga sajcní, basanlaa tedcaj trabajwduxhre ni tedä, te na'c tedäni. Xhet si'cdi ni rlazä gacni; si'cpacni rlajzlu gac, si'c gacni.

⁴⁰ Dxejcti gubi'ni cadro suga' guichon rexpejnpacni, che bidzujn ni ro'c, nagayejsreni. Räjpní lo Pedr:

—¿La di niajcdi nutie'chtu bacal lojtu nicla tebor, ä? ⁴¹ Colguibajn, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, räjpní:

—Xtadä, palga digacdi tedcaj tedä trabajwre, sugacni si'ctis ni rlajzlu gacni.

⁴³ Dxejc gubisacni, bidxäl ni rexpejnpacni, nagayejsreni sa'csi yuduxh bacal lojreni. ⁴⁴ Basaannireni, dxejc säsaacni, gurejdx-gunabni lo Dios ni riojn huält, gunisacni lagajc rediidx ni guniini galoo. ⁴⁵ Dxejc huijni cadro suga' rexpejnpacni, räjpní lojreni:

—¡Naj sii, colguejs, colgusilajz! Abidzujn or ni gutedreni Xi'n Dios ni gujc Niguii ladznäa reben dojl. ⁴⁶ ¡Colchastie, colcho', colhuii! Asiääd nani guted narä ladznäa reben dojl.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

⁴⁷ Lalni canii Jesús bidzujn Judas, nani najc tej retzubitio'p xpejnpacni. Bidzunäjni xhidalduxh bejn ni ca' espaad, ni ca' garo't, najcreni xpejn reni rnibee rebixhojz, näjza xpejn rebengool xten rexpejn Israel. ⁴⁸ Judas, ni bato' Jesús, abadedxgaani te seen lojreni räjpní:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpní:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

⁵¹ Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajca guiniabä lo Xtadä, luxh laani suxhalgajcni gayonbitzubitio'p mül xanglni gacnäy narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäj gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädnaü spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiäü nen guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade'ni ni gunii xtidx Dios.

Dxejcti guiraa rexpejnpacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujñreni cadro abidojñ guiraa rebejñ nani rului leiñ nájza rebengool xten xpejñ Israel. ⁵⁸ Dxejcti zit-zijt biädñajl Pedr rebejñga, bidzujñlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nñi te fiini xhini'c gac.

⁵⁹ Reni rnibee rebixhojz, nájza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejñ, guniireni xhidajl didx-xhii xcuent Jesús. Dxejcti bidzujñ tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajç gutzulä guidoro xten Dios, sajçza gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajñ. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guebñu naj si'c. Niluxh empac rniä lojtu, desde ñajli suhuiitu cueä narä Xi'n Dios ni gujç Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—¡Niguiire aguniyajni Dios con xtiidxni! ¿Xhiru testiigw rquiinnu? Abiejñ diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—¡Abiga'ni! Riäjñ guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Lañ ni cayajc reni'c, Pedr sobga' lole'. Dxejc gubig te dxape' ni rujñ dzuun ro'c, räjpni lojni:

—Nájza luj cuansanäjlu Jesús, ni siädä nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujñ dzuun ro'c. Dxape're räjp loj reni suga' ro'c:

—Nájza dade're cuansanäj Jesús ni siädä Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; nájza luj najclu te xpejñni; huenliisi riejñ diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgaii. ⁷⁵ Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa',

choŋ huält alaguniilu dilu gumbée narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpejn Israel bia'nreni diidx xho gunreni ju'treni Jesús.

² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴ Räjpnj:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neŋ guidoro, biriitini ro'c. Sas huijni, baliibni te duu guejnni, gojlni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre neŋ caj gojn sa'csi najcni xcuent xtiejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt. ⁸ Ni'cni najli rniireni yujga: “Yurejn”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel saj bejnga. ¹⁰ Con meelga guziireni yuj lo bejn ni runchee guejs, sigacni gunibee xtdnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹² La'ni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38–19:16)

¹⁵ Neŋ redxe lanij rajpreni costumbr ruslaa Pila't tej bejn ni cue rebejn loj reni yu' neŋ latzgüib. ¹⁶ Neŋ redxejga guyu' te bejn ni sääb xtiidxni ni laa Barrabás. ¹⁷ Cheni tre' guiraarenini ro'c, gunabdiidx Pila't lojreni:

—¿Chuni'c rlaiztu guslaä, la suslaä Barrabás o Jesús ni laa Crist?

¹⁸ Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹ La'ni sobga' Pila't lo yajgxhiil cadro rujnni yälguxhtis, baxha' chäälai diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunix-calä xcuentni.

²⁰ Niluxh rebixhojz ni rnibee näjza rebengool baquuilreni rebejn te gunabreni laa Barrabás, näjza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaä?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

²⁵ Dxejc guiraa rebejnnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudijnreni Jesús dxejc bateednini ladznäa rebejn te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. ²⁸ Dxejc gulääreni xhajbni, bashuajcwrenini te lad xnäa. ²⁹ Dxejc bencheereni te coron guejch, basälrenini yejcn, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

³⁰ Sas batiobxhejnreni lojni, cua'reni yabixijlga te ni'c batiäjlreni yejcn. ³¹ Che gulujx baxhiznäjrenini, gulääreni lad xnäa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

³² Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruzj Jesús.

³³ Che bidzujnreni te lajt ni laa Gólgota, nani säloj: dan Calabeer, ³⁴ ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

³⁵ Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios. ³⁶ Gurejtireni ro'c, gusloj canäjreni Jesús. ³⁷ Yejc cruzjga bacuaareni te guijt con letro. Lo guijtza rcay xhini'c najc xtojñ nani cayejt. Lo guijtza caj: “Dee najc Jesús reii xten rexpejn Israel.”

³⁸ Näjza tio'p gubaan cuaj lo stio'p cruzj con laani. Tejñi cuaj lo te cruzj xladbee Jesús, steeni cuaj xladbäjgwni. ³⁹ Luxh renani sadejd nejzga guniyajreni Jesús, cagusniibreni yejcreni, ⁴⁰ cayäjpreni lojni:

—¡Ja'ä! Luj ni nutiexhlu guidoo, luxh choñtis dxej niunchesacluni; palga gulii najclu Xi'n Dios, biäjt loj cruzjga.

⁴¹ Nájza rebixhojz ni rnibee, náj remastr xten leii, baxhiznäjrenini räjpreni loj sa'reni:

⁴² —Baslaani xhidajl bejn, xhoxh di gacdi guslaani lagajc laani. Palga najcni rei xten rexpejn Israel, sujiäjtni lo crujz nanaj te chalilajznu xtiidxni. ⁴³ Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recrujz sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäjy guideb guedxliuj läidxej hasta rcachon gudxej. ⁴⁶ Si'cti rcachon gudxej guredxa' Jesús dipduxh, räjpmi:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpmi si'c, räjpreni:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagrga ro' Jesús. ⁴⁹ Dxejc reni tre' ro'c räjpmi:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpriitni. ⁵¹ Lagajc orga biräsa' ladro ni zääb neñ guidoro, gujcní tio'p la' jiaali hasta lo yuj. Gujc te xuro, sas gusuj bej reguiro. ⁵² Dxejc gubicaj reguij ni niäuu ro' rebaa, luxh gubansac xhidajl xpejn Dios ni gujt aguc xchej. ⁵³ Dxejcti, che huäjs Jesús lo rebeñgut, biriireni neñ baa, baluilojreni lo xhidajl bejn ni rbäjz guedx Jerusalén.

⁵⁴ Dxejc capitán xten resoldaad nájza resoldaad ni canäj Jesús, che bahuiireni xuduxh nájza guiraa recos ni gujc ro'c, bidxejbreñi, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädñajl Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen, steeni najc Marii xnan Jacoob nájza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujñ te beñrajpmi ni siääd guedx Arimatea; laani José. Nájza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejbnini nen te bariadya, ⁶⁰ huitixhnini nen xpaapacni. Nacoob baaga, gojnni bidäänni cua'te te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen nájza stee Marii nez loj baa, bahuiireni biga'tzni.

Xhi räjpmi resoldaad ni cuanäj xpaa Jesús

⁶² Che gudejd dxej xten ni gulec-cheereni lanij, bara yääl bidojpmi rebixhojz ni rnibee nájza rebeñpmi ni laa refarisee, bidzujñreni loj Pila't, ⁶³ räjpreni lojni:

—Dad, banaj laaznu xhi räjpmi bejn ni rusgueere. Räjpmi: “Che ted chon dxej sibansacni loj rebeñgut.” ⁶⁴ Ni'c baxhal chu chacanäj ro' baaga dxejli guisa' chon dxej, te di chää rexpejñpacni chaläärenini tiejxhni,

dxejc gäbreni loj rebejn: “Agubansacni loj rebengut.” Yälrusgueega sajc cuentruru loj ni gujc ganid.

⁶⁵ Räj̄p Pila't lojreni:

—La'tu rajtu te cuaa soldaad; colchäj, basäutu'tz ro' baaga si'ctis ni sajc guntu.

⁶⁶ Dxejcti sääreni, basäutu'tzreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzuj̄n Marii Magdalen näjza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc räj̄p guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj. ⁶ Rutini ree sa'csi agubansacni sigajc ni najni. Coltahuii cadro gojtni. ⁷ Colguxuñ, colchaye'tz loj rexpejnpacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejnpac Jesús. ⁹ Chela bidxaagreni Jesús lo nejz, räj̄pni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojnrenini. ¹⁰ Dxejc räj̄pni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

Rediidx ni räj̄p resoldaad

¹¹ Lalni sää regunaaga, bidzuj̄n gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zareni con reben̄gool te bia'nreni diidx gudeedreni xhiroob meel lo resoldaad, ¹³ räj̄preni lojreni:

—Scree colye'tz lo rebejn: “Lal ni nagayesnu, canäjnu ro' baa, biääd rexpejnpac Jesús guläxhiga'tzreni tiejxhni.” ¹⁴ Palga jiendiajg gubernadoor dee, siohuiinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räj̄p rebixhojz. Luxh si'c bire'ch diidx loj guiraa rexpen̄ Israel. Najli canisijcreni si'c.

Baxhal Jesús rexpejnpacni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejnpac Jesús lo región Galilee, lo dajn cadro bia'n Jesús diidx guidxaagnireni. ¹⁷ Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räj̄pni:

—Arapä guiraa yälrnibee xhaguibaa näjza lo guedxliuj. ¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios.

²⁰ Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluii Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios. ² Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä, ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyunsä'c xnezyuj Dad, colslüi rexnezyulajzni.”

⁴ Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajczeni, te jia xtojläreni. ⁵ Riädcuadiajg xhidajläreni rbäjz Judea, näjza reni rbäjz guedx Jerusalén. Dxejcti cheni ruxhobdojläreni lo Dios, rustiobnis Juanreni neñ gueu Jordán.

⁶ Xhajb Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäsergusijxh. ⁷ Caguluiini re-bejn, räpgajcni:

—Detzä siääd tej nani sajcrü loä, nani nicla di nungäjl surloä, cuää xcura'chni. ⁸ Narä abatiobnisä la'tu con nis, biädla laani guxhaläni Sprit Dhan xten Dios te cuääzni neñ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcrü batiobnis Juan Jesús neñ gueu Jordán. ¹⁰ Che birii Jesús neñ nis, bahuiini bixal guibaa. siädäjt Sprit Dhan xten Dios yejcni si'c te palom. ¹¹ Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dhan xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcrü biääd reangl xten Dios, biädhuiirenini.

Gusloj Jesús xtzuumni

(Mt. 4:12-17; Lc. 4:14-15)

¹⁴ Basäläreni Juan neñ latzgüiib. Dxejcti huij Jesús nez Galilee, huiluini xtidx Dios. ¹⁵ Dxejc räjp Jesús:

—Abidzujñ dxej, luxh yälñibee xten Dios abidzujñ gajxh. Colsiejch lajztu, colchalilajz xtidx Dios.

Gurejdx Jesús tajp bejn ni rniaaz bäj

(Mt. 4:18-22; Lc. 5:1-11)

¹⁶ Sasajti Jesús nez ro' ni xten Galilee, che bahuiini lo Simón näjza loj Andrés bejtz Simón. Cazäläreni xquijxhreni lo nis, sa'csi rniaazreni bäj.

¹⁷ Dxejc räjp Jesús lojreni:

—Coltanajl narä, te gunä cueedxtu bejn lacuaa ni guiniaaztu bäjl.

¹⁸ Lagajc dxejc basa'nreni rexquijxhreni, sanätirenini.

¹⁹ Dxejc gusaj Jesús sche'n, sas bahuini loj Jacoob näj Juan, rexi'n Zebedeo. Cayunsa'creni xquijxhreni neñ xcanuureni. ²⁰ Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmoseni, sanätirenini Jesús.

Te bejn nani guyu' beñdxab neñ lastooni

(Lc. 4:31-37)

²¹ Bidzujntireni guedx Capernaum. Dxejcru sabd, dxej ni rusilajz rexpene Israel, biu' Jesús neñ guidobäz xten rexpene Israel. Dxejcti baluii Jesús rebejn ni tre' ro'c. ²² Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. ²³ Neñ xquidobäzreni yu' te bejn yu' te beñdxab neñ lastooni. Beñdxabga guredxa', räjpni:

²⁴ —Jesús, ni siääd Nazare't, xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñdxan ni siääd lo Dios.

²⁵ Dxejcti gudidxa' Jesús lo beñdxabga, räjpni lojni:

—Basäuu ro'lu, birii neñ lastoo niguiire.

²⁶ Sas beñdxabga batienguij niguiiga, luxh cabedxa'ni biriini neñ lastoo niguiiga. ²⁷ Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeñdxab, luxh ruzoobreni xtiidxni.

²⁸ Di niaclaa guchee rebejn guideb nez Galilee xhi rujn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹ Che biriireni xquidobäz rexpejn Israel, huiinä Jesús Jacoob näj Juan rolizj Simón näjza Andrés. ³⁰ Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

³¹ Dxejcti gubig Jesús lojni, gunaazni naani, guläsnini; lagajc dxejc biriini xliaa. Dxejc gusloj cayunireni.

Xhidajl beñracxhuu basiajc Jesús che huääz gubijdx

(Mt. 8:16-17; Lc. 4:40-41)

³² Che huääz gubijdx, luxh abiu' guxhijn, biädnäreni guiraa rebeñracxhuu loj Jesús, näjza renani yu' beñdxab neñ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälgujdx. Niluxh gulääzani xhidajl beñdxab, niluxh dini nusaan ninii rebeñdxabga, sa'csi najnreni chu najcni.

Baluii Jesús nez Galilee

(Lc. 4:42-44)

³⁵ Che bara yääl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilreni Jesús. ³⁷ Che bidxälrenini, räjpreni lojni:

—Guiraa rebejn caguillu.

³⁸ Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neñ reguidobäz xten rexpejn Israel. Gunibeezani birii rebeñdxab neñ lastoo xhidajl rebejn.

Basiajc Jesús te bejn ni raĵ tiejxhni

(Mt. 8:1-4; Lc. 5:12-16)

⁴⁰ Gubig te beŭracxhuu ni raĵ tiejxhni loj Jesús, bazuxhijbni. Dxejcti rājpni lojni:

—Narä nanä sajc gusiajclu narä palga rlajzlu.

⁴¹ Balaslajc Jesús beŭracxhuuga, gunaazni űaani, räpgajcni:

—Rlazä ĵiajclu. Biajc űaj.

⁴² Cheni guniini scree, biacgajc beŭracxhuuga. ⁴³ Dxejcti gulunejz Jesús bejnğa. Per räpġgaani lojni:

⁴⁴ —Ahuire, rutlojdi guiniilu dee. Huiluii tiejxhlu lo bixhojz. Bad-edgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

⁴⁵ Dxejc säa bejnğa. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz řii rebejn, siädhuiireni Jesús.

2

Basiajc Jesús te bejn ni di guniib

(Mt. 9:1-8; Lc. 5:17-26)

¹ Che agudejd balti dxej, biusac Jesús neŭ guedx Capernaum. Dxejcti biejn diajg rebejn arbājn. ² Bidopgajc xhidalduxh bejn. Gudxaj neŭ yu'. Nicla rolä' di niajĵ nisiujreni. Dxejcti caguluii Jesús xtidx Dios lo rebejn. ³ Dxejcti bidzujĵ tajp bejn, nuureni te bejn ni digacti guiniib; siädnärenini lo Jesús. ⁴ Luxh di niajcdi nidzujĵreni cadro suga' Jesús, sa'csi yu' xhidajĵ bejn ro'c. Ni'c baxhalreni yejc yu' nejb cadro sujni. Dxejcru cadro baxhalreni basiäjtreni da' ni naga' beŭracxhuuga lojni. ⁵ Che bahuui Jesús rililajzreni, dxejc rājpni loj beŭracxhuuga:

—Xi'nä, agubicaj rextojĵlu.

⁶ Sas gaii bejn ni ruluii leii ni sobga' ro'c bejnreni xhigab neŭ lastooreni, naareni: ⁷ “Ĵhicuent rñii niguiire scree? Caniyajni Dios; rut rajcdi rudzucaj dojl. ĵDioſti rajc rudzucaj dojl!” ⁸ Dxejcti gucbegajc Jesús xhi xhigab cayujnreni. Dxejc rājpni lojreni:

—Ĵhicuent rujntu xhigab si'c neŭ lastootu? ⁹ ĴLa guyasiru gābni loj beŭracxhuure: “Agubicaj rextojĵlu”, o la gābni: “Huistie, cua' xta'lu, gusaj”?

¹⁰ Baj űaj, te gantu rajc rudzucaj Xi'n Dios, nani gujc Niguii, dojl lo guedxliujre, canä loj beŭracxhuure:

¹¹ —Lojlu rniä, ĵHuistie, cua' xta'lu, huij rolijzlu!

¹² Lagajc dxejc huistie beŭracxhuuga, gulāzni xta'ni, biriini ro'c nez loj guiraareni. Ni'cni bidxelo guiraareni. Dxejc gulā'preni xpala'n Dios, rājpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³ Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. ¹⁴ Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc rājp Jesús lojni:

—Gudanajĵ narä.

Sas huisuni, sanajltini Jesús.

¹⁵ Dxejc sobga' Jesús cayajwni rolijz Leví. Luxh sobganāj Jesús xhidajĵ reni rusquijx, nājza rebendojl ni di chasanāj leii, nājza rexpejn pacni,

lo mex. Xhidajlreni tre', luxh sanajlreni Jesús. ¹⁶ Dxej cru rebejn ni ruluu leii naj refarisee, che bahuiireni cayaunājni renani rusquijx nājza rebeḅdojl, rājpreni loj rexpejn pac Jesús:

—¿Xhicuent rhenāj xmastrtu reni rusquijx nāj rebeḅdojl, luxh raunājniren, rānājniren?

¹⁷ Che biejn diajg Jesús xhi caniireni, rājpni lojreni:

—Renani nadip nadaan di guiquin doctoor, per reni racxhuu rquuin doctoor. Dina niādtedxā rebeḅsa'c, biādtedxā rebeḅdojl, te gusiech lajzreni.

Gunabdiidxreni loj Jesús xcuent yālruca'n

(Mt. 9:14-17; Lc. 5:33-39)

¹⁸ Cagucua'n rexpejn Juan nāj rexpejn refarisee, renani najc rebeḅguidoo loj guedx Israel. Dxej biāād gaii bejn loj Jesús, gunabdiidxreni lojni rājpreni:

—¿Xhicuent cagucua'n rexpejn Juan nāj rexpejn refarisee luxh rexpejn pac lu di gucua'n?

¹⁹ Dxejcti rājp Jesús lojreni:

—¿La rucua'n rebejn ni rdoḅ chāā cadro ru' yālruchnaa che meer suga' bi'n? Che meer suga' bi'n lojreni, direni gucua'n. ²⁰ Per sidzujn dxej sibicaj bi'n lojreni, dxejcti sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiājzni ladyuxga, dxejcti xhiroobruni rājs. ²² Rutza rusāldi bin ni gajd guilaj neḅ guidyux ni abigaa. Sa'csi bin ni gajd guilajga sutiājzni guijdga che guilajni, luxh sinijt binga nājza guijdga. Ni'cni nanab gusāl'ni bincoob neḅ guidcoobza.

Batojp rebejn ni rinajl Jesús triuu sabd

(Mt. 12:1-8; Lc. 6:1-5)

²³ Te sabd, dxejcti ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni calāādx dojl lo triuu. ²⁴ Dxejcti rājp refarisee, renani najc rebeḅguidoo loj guedx Israel, loj Jesús:

—Arniā, ¿xhicuent rujn rexpejn pac lu dzuun ni di guchaag gunni neḅ dxejcti ni rusilajznu, ā?

²⁵ Dxejcti rājp Jesús lojreni:

—¿La gajdtu goj nani bejn toDavid te huālt, laani nāj resa'ni, ā? Che biāādx xhi gauureni, gulaanreni. ²⁶ Biu' David neḅ xyu' Dios cheni guyu' toAbiatar loj Dios. Abiatar saj cru loj rebixhojz ni guyu' neḅ xquidoo rexpejn Israel. Dxejcti gudajw toDavid reyāttxtiil ni dzuub ro'c. Badeedzanini gudajw rebejn ni yunājni. Luxh rebixhojztis rajc rajw yāttxtiilga.

²⁷ Rājpza Jesús lojreni:

—Dios bejn dxe sabd sa'csi najnni naquuin pac gusilajz bejn. Dini niujn sabd te gapda bejn. ²⁸ Ni'cni narā, Xi'n Dios ni gujc Niguii, nājza sabd rnibeā.

3

Niguii ni nabijdz te naani

(Mt. 12:9-14; Lc. 6:6-11)

¹ Biu' Jesús stehuālt neḅ xquidobāz rexpejn Israel. Ro'c yu' te niguii nani nabijdz te naani. ² Niluxh ro'c cagula'tz rebejn Jesús don la susiajcti

niguiiga sabd, dxej ni rusilajz rexpejn Israel, sa'csi rlaizreni cue'creni xquejni loj nani rnibee rexpē Israel. ³ Dxej räjp Jesús lo niguii nani nabidz naani:

—Huistie, guzuj galäiire.

⁴ Dxejcti gunabdidxgajcni loj gaii rebejnğa, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yälñabajn, o la sugu'tni?

Luxh laareni biacdxireni. ⁵ Dxej nadxe'ch bahuui Jesús lojreni, luxh guc-huin lajzni, sa'csi guc najd lajzreni. Dxej räjp Jesús loj niguiiga:

—Baslii naalu.

Dxejcti basliini naani. Biajctini. ⁶ Dxejcru biunejz refarisee. Guslogajczeni caguchaagreni diidx con reni nadxaag Herodes, te don xho ju'treni Jesús.

Xhidajl bejn bire'ro'nis

⁷ Jesús näja rexpejn pacni sääreni ro'nis, luxh xhidajl bejn Galilee birinajlni. ⁸ Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejz stelaad gueu Jordán, biriizaren nez guedx Tiro, näj nez guedx Sidón, biädhuiireni loj Jesús. ⁹ Ni'cni räjp Jesús loj rexpejn pacni quuilreni te canuu, te na'c gutää rebenxhidaalga. ¹⁰ Abasiajc Jesús xhidajl beñracxhuu, ni'cni guiraasi beñracxhuu caxa't lojni, te canrenini te jiajcreni. ¹¹ Niluxh che rhuui rebenxhab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreni chu najcni.

Gule Jesús tzubitiop bejn lojreni rinajlni

(Mt. 10:1-4; Lc. 6:12-16)

¹³ Birii Jesús sääni lo te dalje' cadro gurejdxni renani rlaizni cueni. Gubigtireni lojni. ¹⁴ Dxejcti guleni tzubitiop'reni te sanäjreni laani, te guxhalniren chaluireni xtidx Dios; ¹⁵ te ga'preni yälñibee te gusiajcreni beñracxhuu, te cuääzaren rebenxhab. ¹⁶ Retzubitiop bejn ni gule Jesús najc: Simón, ni gulälajzani Pedr. ¹⁷ Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸ Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, ¹⁹ näj Judas Iscariot, ni bato' Jesús lojreni rdexchlaiz lojni. Sä'tireni rolijz te dade'.

Yälñiyaj loj Sprit Dxan xte Dios

(Mt. 12:22-32; Lc. 11:14-23; 12:10)

²⁰ Dxej bidopsac rebenxhidaalga; nicla niajc niaunäj Jesús rexpejn pacni. ²¹ Che biejn diajg resa' Jesús dee, biädxhiirenini, sa'csi naareni, yejcni cayajc.

²² Rebejn ni ruluii leiü ni birii guedx Jerusalén bidzujnza lo Jesús, dxej räjpreni:

—Beelzebú, nani rnibee rebenxhab, yu' neñ lastoo niguiire. Niluxh nani rnibee rebenxhab rudeed yälñibee lo Jesús te cuääni beñxhab.

²³ Dxej gurejdx Jesús rebejnğa, bijyni te cuent ni ruluii lojreni, räjpni:

—¿Xho gurilaagw beñxhab lagajc sabendxabni? ²⁴ Palga rebejn xten te yälñibee la'reni, luxh tiññaj te cuaani ste cuaaga, di yälñibeega chu xchej. ²⁵ Palga te famil rdilñaj lagajc sa'ni, di familga chu xchej. ²⁶ Palga beñxhab

nani rnibee tiġnāj lagajc laani, di xcāl̄rnibeeni chu xchej, sa'csi ni'c gun luuxni.

²⁷ 'Rut gacdi jiu' roliż te niguidaani, cuanni xhixhtenni, palga dini gulibxgaani, si'tis sajc cuanni xhixhtenni.

²⁸ 'Rniliāpac lojtu guiraa dojl̄ nājza yāl̄rniyaj xten rebejn sajc jia. ²⁹ Nani guiniyaj Sprit Dxan xten Dios, digacdi guibicaj rextol̄ni, anuutisni xtoj̄l̄ni par tejpas.

³⁰ Rājpni si'c sa'csi caniireni yu' beṇḍxab neṇ lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹ Dxejcu bidzuj̄n xnan Jesús, nāj rebetzhuinni. Direni niu', bax-haltisreni chu huitedxni. ³² Rebejn ni sobga' gabi Jesús rājpreni lojni:

—Xnanlu nāj rebejtzlu suga' ro lā', caguilreni luj.

³³ Dxejcti rājp Jesús lojreni:

—¿Chu reni'c najc xnanā nāj rebetzā?

³⁴ Bahuigajcni loj renani sobga' gabini, dxejc rājpni lojreni:

—Redee najc xnanā, rebetzā. ³⁵ Chutis ni rujn ni rlaż Dios, ni'c najc betzā, bisianā, nājza xnanā.

4

Xcuent niguīi ni sale'c binij

(Mt. 13:1-23; Lc. 8:4-15)

¹ Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús neṇ te canuu ni suga' ro' nisga. Dxejcti gurejni neṇga, biāād guiraa bejn bia'ntireni ro' nis. ² Dxejc baluiinireni guiraloj, ganax cuent ni ruluīi guniini. Che caguluiini, rājpni lojreni:

³ —Gucuadiajgtu dee. Guyu' te niguīi. Biriini sale'cni binij. ⁴ Che guslojni cabe'cni, yu' lajt biajb binijga cuā' nezyuj. Sas biāād reman xhaguibaa, gudajwreni binijga. ⁵ Stee lajt biajb binijga neṇ guī cadro xheti xhidajl yuj. Binijga gulengajcni, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubijdx, bigol̄ni, gubijdzitini. ⁷ Stee lajt biajb binijga neṇ yaguejch. Dxejcti biroob reyaguejchga, luxh bejnreni balaa loj binijga, ni'cni gujcnī ganax bil̄i. ⁸ Per stee lajtga biajb binij lo yusa'c. Gulejn reyājlga, guroobreni, gucsa'creni. Yu'reni cuaj galbitzuu xob, yu'reni cuaj gayoj̄n xob, yu'zarenī cuaj tegayuu xob.

⁹ Dxejc rājpni lojreni:

—Chutis ni rlaż guisieed, sucuadiajgni.

¹⁰ Che asii xhidajl bejn, rebejn nani suga' gajxh cadro suganāj Jesús guitzubitio'p xpejnpacni gunabdiidx lo Jesús xhi sāloj cuentre. ¹¹ Dxejc rājp Jesús:

—Dios abejn gacheetu te gantu xho najc yāl̄xhiga'tz xten xcāl̄rnibee Dios nani najc xhiga'tz nājli. Niluxh lo ste'ca bejn con cuenttis rniā guiraa recosre, ¹² te mase cahuiireni direni gumbee, te mase cayiejn diajgreni, direni gabee. Scree gacni, te na'c gusiejch lajzreni, te na'c guibicaj xtoj̄l̄reni.

¹³ Rājpzani lojreni:

—¿La ditu gabee cuentre? ¿Xhochā gacheetu xhidajlru cuent?

¹⁴ Niguīire nani sale'c binij najc si'c te nani ruluīi xtidx Dios. ¹⁵ Yu' bejn ni najc si'c binij ni biajb cuā' nezyuj: riejn diajgreni xtidx Dios

nani ruluii bejn. Dxejc che jiejn diajgreni xtidx Dios, riääd Satanás rbägaicni xtidx Dios ni yu' neñ lastooreni. ¹⁶ Yu'za rebejn ni najc si'c binij ni biajb neñ reguij, renani che jiejn diajgreni xtidx Dios, rbaa lajzreni rca'reni diidxga. ¹⁷ Niluxh direni nisiudzu'tz, sa'csi guxii huilii lajzreni. Che rdejdreri trabajw o che rusacsí bejnreni xcuent xtidx Dios, rusaanreni xtidx Dios. ¹⁸ Yu'zarení najc si'c binij ni biajb neñ yaguejch, riejn diajgreni xtidx Dios, ¹⁹ dxejc che ru'rureni yärsia' xcuent recos guedxliujre, rsia' lajzreni ga'preni meel, rlajzreni ga'prureni guiraloj recos, dxejc riu' redee neñ lastooreni, rusäuuni lo xtidx Dios, xlia'si biejn diajgreni xtidx Dios. ²⁰ Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx
(Lc. 8:16-18)

²¹ Răjpza Jesús lojreni:

—¿La riädnätu te bajl te suuni dejtz te alm, o neñ te loon, ä? ¿La xhet nanabdi suuni jiaa te guzanijni, ä? ²² Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rlajz guisieed, sucuadiagñi.

²⁴ Răjpza Jesús lojreni:

—Colyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yälñajn, lojreni sudeedru Dios yälñajn. Luxh renani xhetru rusäldi loj xhigabreni, sudzucaj Dios yälñajn nani rajpreni.

Xcuent binij ni roob

²⁶ Guniiiza Jesús lojreni:

—Yälñabee xten Dios najc si'c rsiajc te niguii che rbe'cni binij lo yuj, ²⁷ dxejc yääl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajñ yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' neñ dojga. ²⁹ Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpni.

Xcuent bedz muxhtas
(Mt. 13:31-32; Lc. 13:18-19)

³⁰ Răjpza Jesús:

—¿Xhini'c najc si'c najc xcälñabee Dios? ¿Xhi te cuent guiniinu te guilui-inuni? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpałaani.

Si'c baluii Jesús ganax con cuent
(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. ³⁴ Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

Rusiadxi Jesús bej näj nisdoo
(Mt. 8:23-27; Lc. 8:22-25)

³⁵ Lagajc gudxejga räjpni loj rexpejnpacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús nen canuu cadro sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis nen canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajcreni lojni:

—Dad mastr, ħla dila jiu siääznu nen nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini. ⁴⁰ Räjp Jesús loj rexpejnpacni:

—ĤXhicuent cadxebduxhtu? ĤLa ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:

—ĤChucha dee ni rnibee bej con nis, luxh ruzoobreni xtiidxni?

5

Nigui Gadara ni yu' bendxab nen lastooni

(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara. ² Si'ctis ni birii Jesús nen canuu, biädgajc te niguii lojni ni birii nen rebiliää cadro rga'tz beḡgut. Yu' bendxab nen lastoo niguiiga. ³ Rbäjzni nen rebiliääga luxh rut rajcdi rucuaduuni, nicla con cadenguuib. ⁴ Xhidajl huält agacbacuaduureni ni', naa niguiiga con cadenguuib, luxh litis batiuugni recadenguibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni nen redajn, nen rebiliää, luxh cagutiugni tiejxhni con reguij. ⁶ Che bahuini loj Jesús zijtru, baxunni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—ĤXhicuent siäädlu loä, Jesús, Xi'n Dios ni yu' jiara? Rniabä lojlu nez loj Dios na'c gusacsilu narä.

⁸ Sa'csi agac cayäjb Jesús lojni:

—Luj, bendxab, birii nen lastoo niguiiga.

⁹ Dxejcti gunabdiidx Jesús räjpni:

—ĤChu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

¹⁰ Sanuutis canabni lo Jesús na'c guxhalni rebendxabga ste'ca guejdx.

¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab rebendxabga loj Jesús, räjpreni:

—Baxhal nuure loj recuchre te jiu'nu nen lastooreni.

¹³ Dxejcti basaan Jesúsreni. Biriiti rebendxabga nen niguiiga, dxejc biu'reni nen lastoo recuchga. Yu' si'cti tiop mił cuch ro'c. Baxun recuchga, dxejc birolreni ro' guilaj, bitejbreni nen nis, gujttireni nen nisga.

¹⁴ Renani cayajp recuchga baxunreni, huiyeiireni diidxga nen guejdx, näjza loniaa. Dxejc biääd bejn biädhuii nani gujc ro'c. ¹⁵ Che bidzujnreni cadro suga' Jesús, bahuireni loj niguii nani guyu' rebendxabga nen lastooni. Sobga'ni ro'c, najcwni xhajbni luxh nasa'c yejcn. Niguiire najc nani guyu' bendxab ni laa Legión nen lastooni. Bidxejbti rebejn nani bahuini lojni. ¹⁶ Dxejcru rebejn ni bahuini xhi gujc ro', huiyeiireni diidx xho guzajc niguiire nani guyu' bendxab nen galoo, näjza nani guzajc recuch. ¹⁷ Dxejc gusloj canabreni loj Jesús jiunejzni.

18 Che biu' Jesús nen canuu, niguii nani guyu' bendxab nen lastooni gunabni loj Jesús, räjpni:

—Huinä narä.

19 Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

20 Sä'ti niguiiga, gusloj cayujyni diidx nen reguejdx xten Decápolis xho bennäj Jesúsni. Guiraa rebejn bidxeloj.

Xindxa'p Jairo näjza gunaa ni bahual xhajn Jesús
(Mt. 9:18-26; Lc. 8:40-56)

21 Che bidzun^{sac} Jesús stelaad ro' nisga nen canuu, bidzujn xhidalduxh bejn cadre suga'ni. Bia'nti Jesús ro' nisga. 22 Dxejcru biääd te niguii nani laa Jairo, ni rnibee nen xquidobáz rexpen Israel. Che bahuiini loj Jesús, bazuxhijbni lojni. 23 Canabpacni lojni, räjpni:

—Xindxapä'ä acayejt. Gudaa, guzujlu naalu yejcn, te jiajcn, te guibajni.

24 Sanäti Jesús bejnga. Xhidajl bejn sanajlni, luxh cagutäärenini. 25 Loj rebenxhidaalga yu' te gunaa ni agujc tzubitio'p ijj racxhuuni yälguidxbäii. 26 Agudedduxhni trabajw, abahuii xhidajl doctoorni. Xlia'si abanijtnei guiraa nani rajpni, luxh xhet racnäjdini, alga rxuuruni. 27 Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb nen rebejn, bahualni xhajn Jesús. 28 Cayujnni xhigab, naani: “Palga narä falä xhajtisni, siacä.” 29 Lagajc dxejc guläz caxe' xtiejn, gucbeeza tiejxhni abirii xcälracxhuuni. 30 Gucbegajc Jesús yu' chu abasiajcn. Gubiregajcn nen rebenxhidaalga, räjpni:

—¿Chuni'c bahual xhabä?

31 Dxejcru räjp rexpejn^{sac} pacni lojni:

—Rhuilu benxhidaal cagutäalu, luxh naalu: “¿Chuni'c bahual xhabä?”

32 Sas cahuii Jesús nez ree, nez rec, te fini loj nani bahualni. 33 Dxejc bidxejb gunaare, racsejsni, sa'csi gucbeeni xhini'c gujcn. Dxejc biäädni, bazuxhijbni loj Jesús, räbliini loj Jesús guira'ti ni bejn. 34 Dxejc räjp Jesús lojni:

—Xindxapä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

35 Canisijc Jesús si'c che bidzujn renani birii rolijz dade' ni rnibee nen xquidobáz rexpejn Israel. Räjpreni:

—Agujt xindxape'lu. ¿Xhicuent rusieedrulu Dad mastr?

36 Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

37 Luxh dini nusaanru nij chu ninäni, Pedrtis näj Jacoob näjza Juan bejtni. 38 Che bidzujnni rolijz dade'ga, bahuii Jesús biey ni cayujn rebejn ni rbedxa' roon. 39 Biu'tini räjpni:

—¿Xhicuent rujntu si'c? Gajd dxape're guet. Nagayejssini.

40 Alga baxhiznäjrenini. Dxejc gunibee Jesús birii guiraa rebejnga. Dxejcti huinäni xcuzejn dxape'ga con renani sanäni. Biu'reni cadre naga' dxape're. 41 Gunaazni naa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

42 Dxejcti huistiegajc dxape'. Tzubitio'p ijj yu' dxape'ga. Bidxeloduxh rebejn ni bahuii guläs Jesús dxape'ga. 43 Dxejc balijdx Jesús reni te

rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't
(Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanāzani rexpejn pacni. ² Che bidzujn sabd, dxej nani rusilajz rexpejn Israel, gusloj caguluiini neñ xquidobāz rexpejn Israel. Bidxeloj xhidajl bejn nani biejn diajg rextiidxni, rājpreni:

—¿Caro bisieed niguiire guiraa recosre? ¿Xhi yālnajnre cua'ni ni'c rajc rujnni rextzunduxh Dios con ñaani? ³ ¿La xhet laadi carpinteer, xi'n Marii, bejtz Jacob, nāj José, nāj Judas, nājza Simón dee, ä? ¿La xhet reedi rbājz rebisianhuinni?

Luxh bidxechlajzreni lojni. ⁴ Dxejc rājp Jesús lojreni:

—Catis rināljazreni te ni rnii xtidx Dios. Lajdxtisni, lagajc loj resa'ni, rolizjtisni, ro'c rut rināljazdini.

⁵ Luxh di niajcdi niujn Jesús xhidajl milaagwr ro'c. Tiopchontis beñracxhuu basiajcnii, bazujni ñaani yejcreni. ⁶ Bidxelo Jesús sa'csi di lajzreni nilii. Caguluiitini neñ guiraa reguejdx' ni ria'n gajxh nejzga.

Baxhal Jesús tzubutio'p bejn ni rinajlni chaluiireni xtidx Dios
(Mt. 10:5-15; Lc. 9:1-6)

⁷ Dxejcru gurejdxni guitzubutio'p xpejn pacni. Gusloj caguxhañi tiopgajreni; badeedzani yālnibee lojreni te guinibeereni loj rebeñdxab. ⁸ Gunibeeni xhet chanādireni lo nejz, ganaxhtis te yajg te sanājreni. Di nungājñl chanāreni nicla bisiuud, nicla yātxtiil, niclaza meel neñ dobdājñl. ⁹ Nungājñza xcaj gura'ch ni'reni, nāgajc ga'preni tejtis gamangw, xhet tio'pdini. ¹⁰ Dxejcti rājpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹ Palga yu' te guejdx cadro direni gusaan jiu'tu luxh di rñajzreni cuadiajgreni diidx ni sanātu, colñii guejdxga, colñuijb guxhuj ni'tu si'c te seen te gacbeereni xhet laadi bejnreni. Rñiliāpac lojtu, guxiiru trabajw ted rebeñ Sodoma nāj rebeñ Gomorra quela rebejn ni yu' guejdx cadro direni gusaan jiu'tu.

¹² Dxejc biriireni, sääreni. Cayābgajceni nanabpac gusiejch lajz rebejn. ¹³ Gulääzarenii xhidajl beñdxab dxejcti gudääbreni se't yejc xhidajl beñracxhuu, luxh biajcreni.

Xcālgujt Juan ni rutiobnis
(Mt. 14:1-12; Lc. 9:7-9)

¹⁴ Herodes najc nani rñibee dxejc. Biejn diajgni xpala'n Jesús, sa'csi guiralii rebejn calā'p xpala'nni. Dxejc rājp Herodes:

—Juan nani rutiobnis ahuājs loj rebengut, ni'c rajc rujnni remilagwre.

¹⁵ Sgaili bejn rājp:

—Laa Elías ni gunii xtidx Diosni.

Sgailireni rājp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

¹⁶ Che biejn diajg Herodes si'c, rājpni:

—Laa Juan dee, nani gunibeā biru' yejcnii, luxh ñaj agubañsacni loj rebengut.

¹⁷ Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcäl'nasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chääl'ni. ¹⁸ Räj p Juan loj Herodes:

—Xhet laadi rbäznäjlu chääl bejtzlu.

¹⁹ Ni'cni rdxechlajz Herodías loj Juan, luxh rlajzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni be'nsa'c, be'ndxan najc Juan, ni'cni dini nusaan niujn Herodías latsiajni. Mase dini gachesa'c ni rnii Juan, rucuadiagsa'cni xtiidxni. ²¹ Niluxh guyu' xmood Herodías. Che gojl laj Herodes, bayaanni rexpejn ni rnibee, näjza rebejn nani sajcz nez región Galilee. ²² Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes näjza rexpioozni baya' gunaaga, xindxa'p Herodías. Dxejc räj p Herodes lo gunaaga:

—Gunab ni rlajztislu loä, narä sunidxäni.

²³ Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini nen yu', huiye'tzni loj xnanni, räj pni:

—¿Xhini'c guiniabä lojni?

Dxejc räj p xnanni lojni:

—Gunab yejc Juan ni rutiobnis lojni.

²⁵ Huigajcni loj rei, sas gunabni lojni, räj pni:

—Rlazä gunidxgajclu loä yejc Juan ni rutiobnis. Nen te pla't baniidx yejcn.

²⁶ Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlajzni nudxojnni nani gunab gunaaga lojni. ²⁷ Baxhalgajc rei te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen latzguiib, biädñätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejn pac Juan si'c, biädläsreni togoolga. Dxejcti bacua'tzrenini nen te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni näjza ni baluiireni. ³¹ Dxejc räj p Jesús lojreni:

—Coltaa, xtebnu cho'nnu cadre rut rbäjzdi, guisilaaznu tudxe'n.

Räj p Jesús si'c sa'csi yu' xhidajl bejn ni sää, ni siääd, nicla gal gauureni. ³² Dxejcti sääreni nen te canuu cadre rut rbäjzdi. ³³ Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujnreni loj Jesús näjza rexpejn pacni, dxejcti bidojpreni lojni. ³⁴ Birii Jesús nen canuu, bahuiini loj be'nxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl gudxej, gubig rexpejn pacni lojni, räj preni:

—Rut rbäjzdi ree, luxh agudxej naj. ³⁶ Baxhal rebejn te chääreni lo reguejdx, näjza re'ench, te chasiireni yätxtiil gauureni sa'csi xheti xhi gauureni ree.

³⁷ Dxejc räj p Jesús lojreni:

—La'tu coldeed xhi gauureni.

Dxejc räj preni loj Jesús:

—¿Xhixh sajl tiop gayuu meel yätxtiil chosiinu gauu guiraa rebenxhidajlre?

³⁸ Dxejcti räjp Jesús lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, näjza tiop bājł.

³⁹ Dxejcru gunibee Jesús räjpreni loj guiraa rebejn:

—Colcujc xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga näjza guiro'p bājłga, bahuuii xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bājł, badeednini loj rexpejn pacni te badeedrenini loj guiraa rebenxhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm guidxadoo yätxtiil näjza bājł ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejn pacni neñ canuu, chāgajcreni Betsaida, ni tre' dejtz nis stelaad, lałni cagusadiidxni rebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijñ, yu' rexpejn pacni neñ canuu galäi nis lał ni suga' Jesús xtebni ro' nis. ⁴⁸ Dxejcti bahuui Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rłajzni ninijdni lojreni. ⁴⁹ Dxejc che bahuuiireni sasaj Jesús loj nis, naareni pet te beñmalni, ni'c guredxa'reni. ⁵⁰ Guiraareni bahuuiireni lojni, bidxebduxhrene. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdx bej, luxh laareni bidxeloduxhrene, ⁵² sa'csi direni niacbee xhini'c bennāj Jesús reyätxtiil. Guc najd lajzreni, ni'c direni niacbee.

Basiajc Jesús rebenracxhuu neñ guedx Genesare't

(Mt. 14:34-36)

⁵³ Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojt siädnärene beñracxhuu loj Jesús, naga' rebenracxhuuga lo da'. Cadrotis riejñ diajgreni yu' Jesús riädnärene beñracxhuu. ⁵⁶ Niluxh cadrotis rij Jesús, neñ reguedxbāz, neñ reguedxro, näjza loj rerench, rguixhrene bebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajñ xhajb Jesús.

7

Nani runijt lastoo bejn

(Mt. 15:1-20)

¹ Dxejcti refarisee, renani najc beñguidoo loj guedx Israel, näjza gaii rebejn ni ruluii lei, renani birii Jerusalén, bidojpreni loj Jesús. ² Bahuuiireni cayajw gaii rexpejn pac Jesús, luxh canii rebejn nacdXuudx naareni (dee säloj direni quiiñ naareni si'ctis ni rdiib naa reben lajdxrene). Ni'cni

guniyajreni rexpejn^{pac} Jesús. ³ (Guiraa rebejn xten Israel, nájza re-farisee, sasanáj nani baluii rebengool ni yu' guedx Israelreni. Direni gauu palga direni quuib ^{na}areni balti huált. ⁴ Che rbi'reni rijreni lo guii, rguibsa'creni ^{na}areni, lojreni, ni'reni, dxejcti radj rajwreni. Niluxh guyu' xhidajl costumbr ni sasanájrureni, luxh yu' mood rguuibreni rextrastreni nájza rexplooreni, nájza rextrastguiibreni, nájza rexloonreni.) ⁵ Dxejc gunabdiidx refarisee nájza rebejn ni ruluii leii loj Jesús, rájpreni:

—¿Xhicuent di rexpejn^{pac}lu gun si'cni baluii rebengool, niluxh rajwreni guideb nacd^{xuudx} ^{na}areni?

⁶ Dxejcti gunii Jesús lojreni ráj^{pni}:

—¡Beñ guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanálajz narä con rextiidxni,
niluxh lastooreni zitro suga' loä.

⁷ Xlia'si ruzuxhijbreni, sa'csi direni chanálajz narä.

Ruluiireni si'c xtiid^{xpac} Dios nani rnii rebejn.

⁸ Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹ Ráj^{pza} Jesús lojreni:

—Rusa'ntu xtidx Dios te risanájtu recostumbr xtentu. ¹⁰ Sa'csi ráj^p Moisés: “Huínálajz xtdadlu con xnanlu.” Ráj^pzani: “Sujut^{pact}u nani gudzubde yejc xtdadni o yejc xnnani.” ¹¹ Niluxh la'tu rniitu saj^c gäb bejn loj xtdadni o loj xnnani: “Dina gapä xhi cojn gacnäälü” (nani säloj, abadedä guira'ti loj Dios). ¹² La'tu ditu gusaan gunru bejn por xtdadni nicla por xnnani. ¹³ Si'c rbälaztu xtidx Dios, te sasanájtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc ráj^{pni} loj guiraareni:

—Colcuadiajg, col^{yac}bee xtidxä. ¹⁵ Rexhicos yälrajw ni rajw bejn, dini gunij^t bejn^{ga}, rediidx ni ^{rii} neñ lastoo bejn, nájza recos ni rujn bejn, ni'c runij^t bejn^{ga}. ¹⁶ Pal yu' chu rlajz guisieed, sucuadiajgni.

¹⁷ Dxejcti gula'reni loj reben^{xhidaal}, biu'reni neñ yu'. Dxejc gunabdiidx rexpejn^{pac}ni loj Jesús xhi säloj cuent ni guniini. ¹⁸ Basejc Jesús diidx lojreni, ráj^{pni}:

—¿La nájza la'tu xheti xcäriejntu? ¿La di'tu gacbee xhitis yälrajw nani riu' neñ bejn digacdi gunij^tni lastoo bejn, ä? ¹⁹ Sa'csi dini jiu' neñ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰ Dxejc ráj^{pni}:

—Rediidx ni ^{rii} neñ lastoo bejn, nájza recos ni rujn bejn, ni'c sii runij^t lastoo bejn. ²¹ Sa'csi neñ lastoo rebejn ^{rii} rexhigabguijdx, nájza yälresnäj chääl sa'ni, yälresnäj ni xhet najcdi chäälⁿⁱ, yäl^{ru}gu't sa'ni, ²² yäl^{gubaan}, yälrlajzni ga'pni xhixhten bejn, yällatsiaj, yäl^{rus}gueeni, yäl xheti xtujy lojni, yälrdxechlajz, yäl^{rud}zubde sa'ni, yäl^{naye}chlajzni, yäl^{guya}lalajz. ²³ Guiraa reyällatsiajre neñ lastoo bejn ^{rii}ireni, luxh reni'csi runij^t bejn.

Tej guna Sirofenicia ni bililajz xtidx Jesús

(Mt. 15:21-28)

²⁴ Dxejc biriini ro'c, sääni nez guedx Tiro nájza nez Sidón. Ro'c bia'nni neñ te yu' sa'csi di rlajzni niacbee rebejn caro yu'ni, niluxh di najcdi niuxhiga'tztisni. ²⁵ Biengajc diajg te gunaa ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhijbni lo

Jesús. ²⁶ Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejc räjp Jesús lojni:

—Basaan gauwgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Nájza rebäcuae' ni suga' neñ mex rajw nani rtejb ro' rebiuux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii beñdxab neñ lastoo xindxape'lu.

³⁰ Luxh che bidzujn gunaare rolijzni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

Basiajc Jesús te beñgop

³¹ Dxejcru birii Jesús stehuält lo rexyuj guedx Tiro, gudejdni nez Sidón nájza rexyuj Decápolis. Bidzujntini ro' nis xten Galilee. ³² Biädnä gaii beñ te niguii ni nacua't diajgni lo Jesús. Digacdiza guinisa'c niguiiga. Biädnabreni lo Jesús nusujni naani yejc niguiiga. ³³ Dxejcti badzucajnini loj rebejn. Baquitzgajcni rebicuenaani nen diajgni, dxejcru batiobxhejn, gudajntini lujdxni. ³⁴ Bahuiini xhaguibaa, bazaa lajzni, dxejc räjpni: —¡Efata! —nani säloj bixal.

³⁵ Dxejcru bixalgajc rediajgni, gubangajc lujdxni, gunisa'cni. ³⁶ Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga. ³⁷ Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

8

Bayaan Jesús tajp mil bejn

(Mt. 15:32-39)

¹ Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejnpacni ni rinajlni, räjpni lojreni:

² —Rulazlazä rebejnre, sa'csi naj rajc choñ dxej tre'reni loä, luxh xhet yu'di gauureni. ³ Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siäädreni.

⁴ Dxejcru räjp rexpejnpacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdzisni.

⁶ Gunibee Jesús gurej rebeñxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejnpacni te guteedrenini loj rebeñxhidaal. Bateedtireni yätxtiilga lo rebeñxhidaalga. ⁷ Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebeñxhidaalga. ⁸ Dxejc gudajwreni, gudxaj xque'reni. Dxejc batojp rexpejnpac Jesús gajdz dxijm reyätxtiil näj rebäj l dxuc ni bia'n. ⁹ Niluxh renani gudajwga najcreni si'cti tajp mil bejn. Dxejcti basadiidxnireni.

¹⁰ Biunägajc Jesús rexpejnpacni neñ canuu, biäädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹ Biääd refarisee, renani najc rebenguidoo loj guedx Israel, guslojreni cayeinäreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduor xten refarisee

(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu. ¹⁵ Cagulijdx Jesús rexpejn pacni, räjpni lojreni:

—Colsusin, colnati levaduor xten refarisee, colnatiza levaduor xten Herodes. (Nalajznu, xtiidxreni najc si'c levaduor.)

¹⁶ Dxejcti cayeinä sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajt lastootu? ¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che gula'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpreni lojni:

—Tzubitio'pni.

²⁰ —Che gula'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²² Bidzunnäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³ Dxejc gunaaenzi naa lotiä'pga, guläänini neñ guejdx. Che batiobxhejnne neñ rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuilu, ä?

²⁴ Luxh che bahuu bejnga räjpni:

—Rhuiä sasaj rebejn, luxh si'c yajg rhuiä lojreni.

²⁵ Basusac Jesús naani yejc rebaloj bejnga. Dxejc bejn Jesús bahuu bejnga. Biajctini, zijtru gujc bahuisa'cni lo guiraa rebejn. ²⁶ Dxejcti baxhal Jesúsni rolijzni, räjpni:

—Basquejn, huijga rolijzlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷ Birinä Jesús rexpejn pacni lo reguejdx ni ria'n nez Cesarea xten Filipino. Lalni sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹ Dxejcti gusloj Jesús caguluiini rexpejnpacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guibañsacä lo rebengut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuini loj rexpejnpacni. Dxejc gudilñajni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴ Dxejc gurejdxni rebenxhidaal con reni najc xpejnpacni, räjpni lojreni:

—Palga yu' chu rlajz gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo cruzj, sujiädñajni narä. ³⁵ Sa'csi nani rlajz guslaa xcälñabajñni, sunijtni xcälñabajñni. Luxh nani runijt xcälñabajñni xcälñasa'c narä, xcälñasa'c xtidxä, siliaapac xcälñabajñni. ³⁶ Xlia' ga'p bejn guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn te guibaññajni Dios. ³⁸ Nani guituinäj narä con rextidxä naj, cheni najc rebejn beñdoj, narä, Xi'n Dios nani gujc Niguii, situinääzani che jiädñää reangl xten Dios che jiälää lo xcälrdimbicha' Xtaä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälrnibee Dios.

Gubixhlo Jesús garenca

(Mt. 17:1-13; Lc. 9:28-36)

² Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhreni. ⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸ Che batzuré lojreni, bahuireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuireni, guibanxgaasi Xi'n Dios nani gujc Niguui lo rebengut.

¹⁰ Basälcheereni rediidxre neñ lastooreni. Dxejcu canabdiidx lo sa'reni xhicha säloj guibanxgacni lo rebengut. ¹¹ Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiädxgaa Elías?

¹² Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijt xcuent Xi'n Dios ni gujc Niguui, sidejdni traba-jwduxh, rutza jiudini? ¹³ Luxh narä rniä lojtu, abiääd Elías, luxh bennäjrenini si'tctis ni rlanjreni, si'cpac ni caj loj guijt ni rusule' xcuentni.

Basiajc Jesús te biuux ni guyu' bendxab neñ lastooni

(Mt. 17:14-21; Lc. 9:37-43)

¹⁴ Che asiäädreni cadro tre' sgaii rexpejn pac Jesús, bahuireni loj xhidalro bejn ni tre' lojreni, luxh cayeinäj rebejn ni ruluui leiireni. ¹⁵ Che bahuui guiraa rebejn loj Jesús, bidxeloduxhreni, baxunreni, huiye'tzreni xchan lojni. ¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beñxhidaalga, räjpni:

—Dad, ree siädnää xi'nä lojlu, yu' bendxab neñ lastooni, nani rujn najcnii gop. ¹⁸ Cheni rniaaznini, rutienta'ni xi'nä, luxh riduxh bitzun ro'ni, nájza rauya'ni ro'ni, luxh cabijdzni. Aräpä loj rexpejn pacu cuääreni bendxabga, niluxh di niajcdi nibäärenini.

¹⁹ Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'a lojtu te chalilajztu? ¿Gucli gusieedtu narä? ¡Coltanäni loä!

²⁰ Dxejc biädnäreni biuuxga lojni. Che bahuui bendxab lo Jesús, bas-nijni bi'nga, basälta'tinini lo yuj. Sädiidxni, luxh carii bitzun ro'ni.

²¹ Gunabdiidx Jesús loj xtdadni:

—¿Gucli rajcni si'c?

Dxejc räjp dade'ga:

—Che gujclini biuxbáz. ²² Balti huält rusälñini lo guiboo nájza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtdad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuui Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii neñ lastoo bi'nga. Na'cru chulu neñ lastooni.

²⁶ Dxejcru guredxa' bendxabga, luxh basnibzejsni bi'nga, dxejcru biri-
ini neñ lastooni. Astoo te bengut bia'n bi'nga ro'c. Xhidajl rebejn räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga. ²⁸ Dxejcti che abiu' Jesús neñ yu', gunabdiidx rexpejn pacni lojni:

—¿Xhicuent di niajcdi nibäänu bendxabga?

²⁹ Dxejc räjp Jesús lojreni:

—Di gacdi cuäätu sa' bendxabre palga ditu cuedx-guinab lo Dios, palga ditu gucuanxgaa.

Gunisac Jesús xho guetni

(Mt. 17:22-23; Lc. 9:43-45)

³⁰ Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, ³¹ sa'csi caguluiini rexpejnpacni. Cayäjpni lojreni: “Xi'n Dios ni gujc Niguii sidejdni ladznäa rebejn, niluxh sugu'trenini. Che guiza' choñ dxej gujtni, sibajnni stehuält.” ³² Niluxh laareni direni niacbee xhini'c guniini, bidxejbzareni niniabdiidxreni lojni.

¿Chuni'c sajcru?

(Mt. 18:1-5; Lc. 9:46-48)

³³ Bidzujntireni Capernaum. Che biu'ni neñ yu' räjpni lojreni:

—¿Xhini'c cagusiejytu lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni. ³⁵ Sas gurej Jesús, dxejc gurejdxni guitzubitio'p xpejnpacni, räjpni lojreni:

—Palga yu' chu rlajz gasajcru lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbäz, huinänini galäiireni. Dxejc gudääzni bi-uxbäzga, räjpni lojreni:

³⁷ —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtdä nani baxhal narä racnäjni.

Nani di guiniyaj nuunu, xladnu yu'ni

(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bejn ni rbää bendxab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxojntu gunni si'c sa'csi bejn nani rujn milagwr con xcälrnibee laä digacdi guiniyagajcni narä. ⁴⁰ Nani di guidxagdiñ nuunu, xladnu yu'ni. ⁴¹ Rniliäpac lojtu, chutis ni guniidx te bas nis lojtu sa'csi najctu xpejnpac Crist, siguijx Diosni xcuent nani bejn.

Nani rujn jiajb bejn lo dojl

(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä neñ dojl, sugal te guimolin vejnni dxejcti gucuaarenini lo nisdoo. ⁴³ Palga tej ñaalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p ñaalu gusälreni luj gabijl, loj bajl ni di jiuii, ⁴⁴ cadro diza xpisiujgreni guet, diza bajl jiuii. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chäälü gabijl, lo bajl ni di jiuii, ⁴⁶ cadro di xpisiujgreni guet, diza bajl jiuii. ⁴⁷ Luxh palga tej balojlu gun gunlu dojl, gulääni: hueenru chäälü cadro rnibee Dios natiä'p lojlu quela sojb guiro'p balojlu chäälü gabijl, ⁴⁸ cadro di xpisiujgreni guet, diza bajl jiuii.

⁴⁹ 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. ⁵⁰ Hueen najc sejd, luxh

palga agudejd yäl'nadzij yejcnj, ¿xho guntu te gacsacni nadzij? Colyajc nadzij la'tu, colguibaññäsa'c sa'tu.

10

Baluii Jesús xcuent rälrurō'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea näjza nez ro' gueu Jordán ste-laad. Ro'c bidojp xhidajl bejn lojni stehuält, sas guslosacni caguluiinireni si'ctis ni ruluiinireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

³ Dxejc laani bazejcnj diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitz gusaan chäälni che guro'n nini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej beñ guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznäjni chäälni. ⁸ Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. ⁹ Na'c gudzucay bejn lo sa bejn nani abachaag Dios lo sa'ni.

¹⁰ Che biu'reni neñ yu' gunabdiidxsac rexpejñpacni lojni xcuent rediidxre. ¹¹ Dxejc räjpni lojreni:

—Chutis niguii ni gusaan chäälni, sas guchñaani ste'cani, rujnni dojl.

¹² Niluxh palga gunaa guro'n chäälni sas guchñaani ste'ca niguii, rujnzani dojl.

Gunab Jesús gunle' Dios yejc rebiuxbáz

(Mt. 19:13-15; Lc. 18:15-17)

¹³ Biädnäza rebejn biuxbáz lojni te gutzuub Jesús ñaani yejcreni, sas gudidxa' rexpejñpacni lojreni. ¹⁴ Che bahuii Jesús xhi cayujñ rexpejñpacni, bidxe'chni räjpni lojreni:

—Colsaan jiääd rebiuxbáz loä. Na'c gudxojntureni, sa'csi xcälñibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlajz jiu' lo xcälñibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälñibee Dios.

¹⁶ Dxejcti gudäáz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús

(Mt. 19:16-30; Lc. 18:18-30)

¹⁷ Che birii Jesús loj xnejzni, ruxuñ te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beñsa'c, ¿xhini'c gunä te xca'ä yälñabajñ par tejpas?

¹⁸ Sas räjp Jesús lojni:

—¿Xhicuent rniilu loä beñsa'c? Tejtisni najc beñsa'c; Diostis najc beñsa'c.

¹⁹ Najnlu xhini'c gunibee Dios gunni: “Na'c guesnäjl chäälni sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexpejnpacni:

—Naganduxh jiu' rebejn nani yu'duxh xhixtenni lo xcälrnibee Dios.

²⁴ Dxejc bidxelo rexpejnpacni che biejn diajgreni rextiidxni. Dxejc räjp Jesús lojreni stehuält:

—¡Aiitu xi'nä!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxhrenei, räjpreni lojni:

—¿Chuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi guslaa sabejn, Diostis rajc ruslaa bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajtlu lu.

²⁹ Dxejc räjp Jesús:

—Rniliäpac lojtu, chutis nani cuälaz rolijzni, rebejtni, rebisiajn, xtdni, xnanni, chääl, rexi'nni, rexyujni, xcäl'nasa'c narä, näjza xcäl'nasa'c xtidx Dios, ³⁰ sica'ni lo guedxliujre te gayuu huält xhidajlru. Sica'ni rolijzni, rebejtni, rebisiajn, xnanni, rexi'nni, rexyujni. Sisi-unajlrenini naj, dxejc xhaguibaa sica'ni yäl'nabajn par tejpas. ³¹ Xhidajl rebejn nani saj c lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcreni.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcu sasaj Jesús, nijdni lo rexpejnpacni sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejnpacni lo rebejn, gusloj cayäjpni lojreni guira'ti nani sacni. ³³ Räjp Jesús:

—Sionnu Jerusalén, luxh narä, Xi'n Dios nani gujc Niguii, sid-edä ladznäa rebixhojz nani rnibee näjza rebejn ni ruluu lei. Luxh sinibeereni guetä. Suteedreni narä lo rebenzajt nani digac xpejn Israel. ³⁴ Suxhisnäjnreni narä, siguijnreni narä, sutiobxhejnzareni loä, dxejcu sugutreni narä. Che riojn dxej sibansacä.

Gunab Jacobo näjza Juan te yäl'nasa'c

(Mt. 20:20-28)

³⁵ Dxejcti gubig Jacobo näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlajztu gunä xcuent la'tu?

³⁷ Räjpreni:

—Cue tejnu cuä'lu ladbee, xteenu cue cuä'lu ladbärgw che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajc yātu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

³⁹ Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yātu nani yä'ä, luxh guirobnistu si'cni guirobnisä narä.

⁴⁰ Te cue tejtū ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacoob näjza loj Juan.

⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxagljaz gasajcrueni lo rebejn. Luxh rebejn ni sajc rnibeduxhreni lo rebejn. ⁴³ Xhet si'cdi guntu la'tu. Chutis nani rlajz gasajcru lojtu, riäjl gacni mos lojtu. ⁴⁴ Luxh chutis la'tu nani rlajz gasajcru, riäjl gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quiixni con xcälñabajñni te laa xhidajl bejn lo dojl.

Basiajc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejn pacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas ro'ca xhablajzni gudixhni, huisuliini, biäädtni lo Jesús. ⁵¹ Dxejc räjp Jesús lojni:

—Naja', ¿xhini'c rlajzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuini. Sanajltini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujñreni gajxh Jerusalén, gudejdreni nen reguedx Betfagé näjza nen guedx Betania nez cuä' dajne' ni laa dan Oliib. Baxhal Jesús tiop xpejn pacni, ² räjpni lojreni:

—Colchäjä guedxe' ni ria'n nez lojtu. Che guidzujntu ro' guejdxga, sidxältu te bure' ni caduu. Gajd bejn cuibni. Colxhecn, coltanägajcni. ³ Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejn ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejnğa si'cni räjp Jesús lojreni gäbreni. Basangajc rebejnğa sanäreni bure'ga. ⁷ Dxejcru biädnäreni bure'ga loj Jesús. Badzu-ubreni xhablajzreni dejtz bure'ga. Gubijbti Jesús bure'ga. ⁸ Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhañi nani siääd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuui Jesús guira'ti ni cayajc nenga, sanäni guitzubitio'p xpejn pacni, sääreni Betania sa'csi agudxej.

Batzubde Jesús yeje te yagiigw ni xhet cajdi lojni

(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús, ¹³ bahuuii zijt sojb te yag iigw caj balajg lojni. Sas gubigni, bahuuii don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn pacni.

Gulää Jesús renani ruto' näj renani rsii nen guidoo

(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujnreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guidoo. Niluxh batiejxhni rexme renani ruchaa meel, näjza reyagxhil xten renani ruto' paloom.

¹⁶ Diruni nusaan nidednäjreni xhicos nez nen guidoo. ¹⁷ Dxejc caguluinireni, räpgajcni lojreni:

—¿La et screedi caj loj guiijt? “Xyu'ä sirilaj yu' cadre rninab guiraa rebejn guedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten lei biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxelox rextidx Jesús. ¹⁹ Che biu' guxhijn, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰ Che bara yääl gudejdreni, bahuuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuui yagiigw nani batzubdelu yejcn, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rninajtuni, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajztu, colsiäjlza lajztu, te näjza Xtadtu nani yu' xhaguibaa gusiäjlza rextojltu. ²⁶ Palga ditu gusiäjl lajztu con resa'tu, diza Xtadtu nani yu' xhaguibaa gusiäjl lajzni rextojltu.

Yäl̄rnibee xten Jesús

(Mt. 21:23-27; Lc. 20:1-8)

²⁷ Sas bidzuṣsacreni guedx Jerusalén. Laḷ ni sasaj Jesús nen guidoro, rebixhojz nani rnibee, nájza rebejn ni ruluii lei, nájza reguxhtis gubig lojni. ²⁸ Rájpreni lojni:

—¿Xhi yäl̄rnibee rajplu, ni'c rujnlu redzuunre? ¿Chu baniidx yäl̄rnibee rujnlu redzuunre?

²⁹ Dxejc rájp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yäl̄rnibeere rapä ni'c runä redzuunre. ³⁰ ¿Chu baxhaḷ Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, rájpreni:

—Palga jie'tznu “Dios”, naani “¿Xhicuent ditu nililajz xtiidxni?” ³² Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, rájpreni loj Jesús:

—Dinu guidon.

Sas rájp Jesús lojreni:

—Dizana guiniä xhi yäl̄rnibeere rapä runä redzuunre.

12

Te xcuent rebenquijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluii, rájpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadro jiä't uubga. Dxejcti bejnni te yu' jiaa, te ro'c cue nani ga'p lo xyujni.

² Badedlaatinini loj gaii bejn, sä'tini zijt. ³ Che bidzujn xpäii uub, baxhaḷ baxhuaan uubga te xmosni loj rebejn ni rbäzlaa ro'c, te xca'ni uub nani riäjl xca' bejnga. ⁴ Dxejc rebejn ni rbäzlaa ro'c gunaazreni mosga, gudijncrenini, luxh bazejncrenini siini ganaxni. ⁵ Dxejcru baxhaḷ baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. ⁶ Dxejc baxhaḷ bejnga stee mos, dxejc bagu'trenini. Baxhaḷni xhidajlrurenini. Gaii gudilguijdxreni, sgaiini bagu'treni.

⁷ Yu'za tejtis xi'nni, luxh sanälajznini. Por lult nájza xi'nni baxhaḷni, naani: “Siucareni xi'nä.” ⁸ Dxejc rebejn nani rbäzlaa ro'c rájp loj sa'reni: “Dee najc laa ni jiannäj ree. Coltaa, guigu'tnuni, te xca'nu yujre.” ⁹ Sas gunaazrenini, bagu'trenini. Guläätirenini lo yujga.

¹⁰ ¿Xhicha gun baxhuaan yaguubga rebejnre? Siäädni luxh sugu'tni rebejnre, dxejcti gudeedni yujga loj ste'ca bejn.

¹¹ ¿La gajdtu goḷ guijtzi ni rnii scree?

Guij nani guläcaj renani runchee yu', ni'c agujc maestr ni guzuj galoo.

¹² Dad xtenu bejn scree, cos sacduxhni nezlojnu.

¹³ Dxejc rlaiz reguxhtis nani bacuadiajg cuentre niniaaz Jesús, sa'csi gubeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhalreni gaii xpejn refarisee nájza gaii xpejn Herodes loj Jesús te gula'tzreni don xho gac guiniaazreni Jesús. ¹⁴ Dxejcti biäädreni, räjpreni lojni:

—Dad, nadonnu luj najclu te bejn ni nrilii. Par luj guiraasi bejn sajctebløj, sa'csi dilu fii la sajcte bejn o la xhet sajcdi bejn. Luj ruluiipaclu xhini'c rlaiz Dios gun bejn. ¿La laaca quix bejn reimpuest lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Coltanä te meelga loä, te fiä lojni.

¹⁶ Badeedtireni te meel lojni, dxejcte räjpni lojreni:

—¿Chu yejcte caj lojni, chu laj caj lojni?

Dxejcte räjpni:

—Xten César.

¹⁷ Dxejcte räjp Jesús lojreni:

—Coldeed nani najcte xten César loj César; coldeedza nani najcte xten Dios loj Dios.

Bascheløjni rebejnğa con xtiidxni.

Yälrniabdiidx xcuente yälrbaṣacni lo rebeṅgut

(Mt. 22:23-33; Lc. 20:27-40)

¹⁸ Sas biädhuui resaducee loj Jesús. Resaducee najcte rebejn nani nrui di rebeṅgut guibaṣac. Dxejcte gunabdiidxreni lojni, räjpni:

¹⁹ —Dad, xleii Moisés rului loonu, palga guete niguui luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. ²⁰ Guyu' gajdz niguui, bejtz najceni. Sas cua' niguigalooga chäälni. Che gujtni ruti xi'nni. ²¹ Dxejcte cua' ni rojpğa gunaaga. Che gujtni, rut gajcdi xi'nni. Si'cza gusajcte ni riojnğa. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcte gujtzğa gunaaga. ²³ Guigajdzreni guläznäjreni gunaare. Cheni guibaṣacreni lo rebeṅgut, ¿chu chääl gacni?

²⁴ Dxejcte bazejcte Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguui lo guijtz, dizatu gumbee yälrnibee xten Dios. ²⁵ Che guibaṣacreni loj rebeṅgut, direni guchnaa, rutza gudeedtireni te guchnaareni. Niluxh sajcreni si'c najcte rexangl Dios nani yu' xhaguibaa. ²⁶ Palga canabdiidxtu la rbaṣac rebeṅgut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: “Narä nacä Xtios Abraham, Xtios Isaac, Xtios Jacoob.” ²⁷ Palga Dios najcte Xtios rebejnre, direni gac beṅgut, nabaṇnäjreni Dios. Et laadi najcte xhigabtu.

Yälrnibee ni sajcru

(Mt. 22:34-40)

²⁸ Dxejcru bidzujn tej rebejn ni najn lei, biejn diajnı xhi caniireni, biejnza diajnı laaca gunii Jesús lojreni. Dxejcte gunabdiidxni loj Jesús:

—¿Xhi mandamiente sajcru lo guiraareni?

²⁹ Dxejcte räjp Jesús lojni:

—Mandamiente nani sajcru loj guiraareni najcte dee: “Bacuadiaj luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, naj xaimlu, naj guideb xcäriejnlu, nájza guideb xcälñadiplajzlu.” ³¹ Sigajcte najcte mandamiente ni rojpğa: “Huñälajz

sabejnlu si'ctis sanälajzlu lagaĵc luj.” Redee najc remandamient nani sajcru loj guiraareni.

³² Dxejcti räjp bejnga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. ³³ Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcäl'nadiplajzni, luxh chanälajzni resabejnni sigajc laani. Redee sajcru loj ni rujn bejn che rudeedreni gojn lo Dios.

³⁴ Che bahuui Jesús laaca guniini, räjpni lojni:

—Guxii cayäädx te jiu'lu loj xcäl'rnibee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús nen guidoro, räjpni:

—¿Xho mood rnii rebejn ni najn leii Crist najc xi'n David? ³⁶ Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagaĵc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lalni caguseedni rebejn, räjpni lojreni:

—Colsusin, na'c gu'chtu loj rebejn ni ruluii leii. Laareni rlaĵz sanäj reladsiool xtenreni. Rdxaglaĵzreni rnii bejn lojreni nez lo reguii.

³⁹ Rlaĵzzareni cuerani cadro rbej renani sajcru nen reguidoo näjza cadro ru' relanij. ⁴⁰ Rudzucajzareni xhixten rebiuud, rniizareni xhidalduxh diidx che rol'reni le', te rusäuureni loj rebejn. Castigwroru gac redee.

Gojn xten te biud proob

(Lc. 21:1-4)

⁴¹ Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga.

⁴² Che biäd te biud proob, basäl'ni tiop melbäz ni sajz si'cti tej centaab.

⁴³ Dxejcru gurejdx Jesús rexejnpacni, räjpni lojreni:

—Rniliäpac lojtu, biud proobre basäl xhidajlru lo guiraa renani basäl nen cajre, ⁴⁴ sa'csi guiraareni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

13

Gunii Jesús sibijl guidoo

(Mt. 24:1-2; Lc. 21:5-6)

¹ Cheni sariireni nen guidoro, räjp tej rexejnpacni lojni:

—Dad, bahuui lacti reguij, lacti reyu'.

² Dxejcti räjp Jesús lojni:

—¿La rhuiilu loj reyu're? Nicla tej guij diĵia'n dzuub yejc sa'ni, guirali-ireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dalje' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr nāj Jacoob nājza Juan nājza Andrés lojni, rājpreni:

⁴ —Gunii loonu, ¿guc gac dee? ¿Xhi guihuiinu te gacbeenu asiāddzungajxh soob guiraa rediidxre?

⁵ Dxejcti gusloj gunii Jesús lojreni, rājpni:

—Colhuii, te rut gusgueedi la'tu, ⁶ sa'csi xhidalduxh bejn jāād con laā, gābreni: “Narā nacā Crist”, luxh rniisireni si'c, susguezareni xhidajl bejn.

⁷ 'Che jiejn diajgtu yu' guer nāj yālnadxeeb xten guer, na'c guidxejbtu. Nanabpac gacni; et dxejcdi nitloj guedxliuj. ⁸ Sājs naciōn yejc sanacionni, nāj yālnibee yejc sayālnibeeni. Xhidajl lajt sajc xu, siliaanza bejn, luxh sājs rebejn yejc sa'ni. Redee najc ni guisloj guidxejb, gachuinza lajzni.

⁹ 'Dxejc la'tu col̄susin sa'csi suteedreni la'tu ladznāa reguxhtis, siguijnzareni la'tu nen reguidoo. Sacrejdxtu lo regubieer nājza loj rereii xcālnasa'c narā, te si'c gac guiniitu xtidxā lojreni. ¹⁰ Nanabpac guirechx-gaa xtidx Dios loj guiraa reben guedxliuj. ¹¹ Che guiniaazreni la'tu, che chanāreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jāājtis yejcti dxejc, sa'csi xhet la'ditu ni guinii, Sprit Dxaan xten Dios ni guinii. ¹² Luxh suto' bejn lagajc bejtzni te guet bejtzni. Suto'za dad lagajc xi'nni. Sājs rebiiux yejc rexcusajnni te guet reguzajnga. ¹³ Sidxechlajz guiraa rebejn lojtu sa'csi najctu xpenā; nani ted guiraa retrabajwre, ni'c gudeed Dios xcālnabajnni.

¹⁴ 'Che fiitu loj nani najc yālr̄dxechlajz, nani najc yālr̄unitloj, nani gunii Daniel ni gunii xtidx Dios. Che fiitu nani suga' cadro di nunyāj̄l suuni, dxejcti suguxun renani yu' nez Judea chāāreni nez nen redajn. (Nani goļ̄ guijtze sugacbeenini.) ¹⁵ Bejn nani suga' yejc yu' na'c jāājt̄ni jiu'ni nen te yu' xca'ni gaii xhixtenni. ¹⁶ Nani yu' loj nīaa, di gal̄ jāājt te xca'ni xhablajzni. ¹⁷ ¡Aii! Xhiza nalas chu regunaa ni nuu bāz, luxh renani rusiā' xi'nni, nen redxejga. ¹⁸ Col̄nab loj Dios na'c sactu scree nen rebāinajl. ¹⁹ Nen redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanāljazni rexp̄ejnni nani aguleni.

²¹ 'Dxejc palga yu' chu naa lojtu: “Col̄huii, aree Crist”, o “Col̄huiire, ani suga' rec”, na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagw; te gusgueereni, te palga sajni, r̄lajzreni gusgueelireni renani agule Dios. ²³ Ni'cni la'tu col̄susin; agunixgaā lojtu guira'ti ni gac.

Xho gac che jāād Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴ 'Nen redxejga, cheni luux retrabajwduxhga, sicāy lo gubijdx, luxh diru bāii gusanij. ²⁵ Sitejb rebal̄xhaguibaa, sinibsejs recos nani nasnāj rebal̄xhaguibaa. ²⁶ Dxejcti suhuii rebejn loā, Xi'n Dios nani gujc Niguii, siālā nen reza guideb yālnibeduxh xtenā, nājza xcāldimbicha'ā. ²⁷ Dxejcti guxhalgacā rexanglā jāādtojpreni renani guleā guideb lo guedxliuj, cat nalooli guedxliuj nājza cadro nalooli guibaa.

²⁸ 'Col̄guiseed nani ruluii yagiigw. Cheni rii rebāte' lojni luxh che rcāj balajg lojni, acaxhnajntu bāii gusguij asadzungajxh. ²⁹ Sigajcza, che fiitu

acayajc recosre, sachheetu asiädgaxhä, ameer guidzunä. ³⁰ Rniliäpac lojtu, rebejn ni nabajn dxejc, direni nitloj, fixgaareni gac recosga. ³¹ Sinitloj guibaa näjza guedxliuj, rextidxä di nitloj.

³² 'Naj, ree najndi gac gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

³³ 'Colhuii, col̄susin, col̄nab loj Dios, sa'csi ditu gan gac guidzujn redxejga. ³⁴ Dee najc si'c najc te bejn ni birii säa zijt. Che gajdlini guirii, badeedni xtzun rexmosni, luxh gunibeezani susin nani canäj rolä'.

³⁵ Si'cza col̄susin, sa'csi ditu gan gac jiääd baxhuaan yu'ga, la jiäädni gudxej, o la jiäädni garol yääl, o la cäy, o la jiäädni rsil. ³⁶ Col̄susin, te di guiga'tu nagajejstu che guidzujni. ³⁷ Rediidx nani rniä lojtu, loj guiraa rebejn rniäni: col̄susin.

14

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

¹ Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rlajzreni niniaazreni Jesús con yäl̄rusguee, te nugu'trenini. ² Dxejcti räjpreni lo sa'reni:

—Na'c jiennu scree neñ redxelanij, te na'c gun beñguejdx biejj.

Te gunaa ni basäl se't yejc Jesús Betania

(Mt. 26:6-13; Jn. 12:1-8)

³ Yu' Jesús Betania, rolizj Simón, nani guyu' guejch ni ral̄ tiejxhni. Che sobga'ni lo mex, biääd te gunaa ca' te bo'tguij yu' setnard nen̄ni. Rlianexhduxhni, sacduxhni. Dxejc gudi'chni yejn bo'tguijga, te basäl̄ni se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? ⁵ Paru nido' se'tga, nijni si'cti chon gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Col̄saanni, ¿xhicuent rudxoijntu nani cayujn gunaare? Cos sacduxh dee bennäjni narä. ⁷ Guideb ni guibajntu, su' rebejn nani xhet rajpdi lojtu, luxh che rlajztu sajc gacnäjtreni. Narä et xchejdi chu'ä lojtu. ⁸ Gunaare abejnni nani gujctis bejn̄ni. Abaslanexhxgaani tiexhä, te chää tiexhä neñ baa. ⁹ Rniliäpac lojtu, cadrotis guidzujn xtidx Dios, guideb lo guedxliuj, siniizaren̄ni xcuent nani bejn gunaare, te guinaj lajzreni gunaare.

Rlajz Judas guto' Jesús

(Mt. 26:14-16; Lc. 22:3-6)

¹⁰ Dxejcti huij Judas Iscariot, nani najc tej retzubitio'p xpejn̄pac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguil̄ Judas xho guto'ni Jesús.

Gudauxchej Dad con rexpejn̄pacni

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladzṇaa reEgipto. Rājp rexpejṇpacni loj Jesús:

—¿Caro rlaṇzlu chosucheenu te gauulu nadxej, dxelanij?

¹³ Dxejc baxhaṇi tiop rexpejṇpacni, rājpni lojreni:

—Colchāj neṇ guejdx, ro'c guidxaagtu te niguui ni nuu te re' nis. Colchanajl niguuiḡa. ¹⁴ Cadro jiu'ni colye'tz loj bejṇ ni najc rolizni ro'c: “Naj Dad mastr, ¿con yu' cadro ria'n rebiooz, cadro gaunājni rexpejṇpacni nadxej, dxelanij?” ¹⁵ Dxejcti guluiini lojtu te yu' ni sojb jiaaliga yejc sa'ni, ni asuchexḡa neṇni. Colyujṇ xhi guidaunu ro'c.

¹⁶ Sas huij rexpejṇpacni, bidzujṇreni neṇ guejdxḡa. Bidxälreni te yu' si'cni rājp Jesús lojreni. Ro'c bejṇreni xhi gudajwreni dxelanij.

¹⁷ Che huääz gubijdx, bidzuṇṇāj Jesús guitzubitio'p xpejṇpacni. ¹⁸ Laṇi sobga'reni lo mex cayajwreni, rājp Jesús lojreni:

—Rniliāpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, rājp tebgajreni lo Jesús:

—¿La naräni?

Rāpgajc steeni:

—¿La naräni?

²⁰ Dxejcti guniini, rājpni lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujc Niguui, sia'ä, si'cpacni caj loj xtiidx Dios, per xhiza nalajz niguui ni guto' narä. Huentejti na'c niajl niguuiḡe.

²² Laṇi cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti rājpni:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neṇ basḡa. ²⁴ Dxejcti rājp Jesús lojreni:

—Dee najc si'c xtienä ni ruluii diidx ni biä'nmu, nani guixe' xcuent xhidajl rebejṇ. ²⁵ Rniliāpac lojtu, diruna yä'ä bin nani riṇi yejc uub, dxejli yä'äni stehuält loj xcälṇnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn. 13:36-38)

²⁶ Che gulujx biṇreni te dij xten Dios, biriireni, sääreni nez dajne' ni laa dan Oliib. ²⁷ Dxejcru rājp Jesús lojreni:

—Guiraatu sibälaztu narä naguxhijṇ, sa'csi si'c cajni lo guiitz: “Sugu'tä baxhtoor luxh suxuṇ rexiiil.” ²⁸ Che guibaṇsacä loj rebengut, ganidä cha'a Galilee, dxejcti jiäädṭu.

²⁹ Dxejc rājp Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc rājp Jesús lojni:

—Rniliāpac lojlu, lagajc guxhijṇre, nicla gajd guidgaii cuedxa' tiop huält, luj aguiniilu choṇ huält dilu gumbee narä.

³¹ Luxh laani sanuutis xtiidxni, rājpni:

—Cadro guetlu setäza, dina guiniä dina gumbeälu.

Luxh guiraa rexpejṇpacni gunii si'c.

Gunab Jesús loj Dios che yu'ni Getsemani

(Mt. 26:36-46; Lc. 22:39-46)

³² Dxejcti bidzujñreni te lajt cadro laa Getsemaní. Dxejc räjpni loj rexpejnñpacni:

—Colcuj ree lañi chanabä lo Dios.

³³ Dxejcru sanäni Pedr näj Jacoob näjza Juan. Dxejc gusloj cayac-huinduxh lajzñi, luxh cayu'ni yälrsiaduxh. ³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtaä, luj rajc rujñlu guira'ti: badzucaj retrabajwre loä. Xhet si'cni rlazädi narä, bejn si'cni rlaizlu luj.

³⁷ Dxejc biäädni gunaaznirenini nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

³⁸ Coltie'ch bacal, colñab lo Dios, te na'c guntu dojl. Lastootu rlaiz gutie'chtu bacal, luxh tiejxhtu abadxaig.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnirenini nagayejsreni, sa'csi yuduxh bacal lojreni. Luxh direni nidxäl xhi niniirenini lojni. ⁴¹ Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguii ladzñaa rebendojl. ⁴² Colchastie, colcho'. Asiäddzungenajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujñ Judas, ni najc te retzubitio'p xpejnñpacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis.

⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colñaazni, colyaptzu'tzni te si'c chanätuni.

⁴⁵ Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, guläa xspaadni, gudilgujdxni xmos bixhojz nani sajcru, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan?

⁴⁹ Guiraa dxej guyu'ä lojtu neñ guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejnñpacni gulälazrenini, baxunñtirenini.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵² Dxejcti baxunñi, libasa'nni bariaadga, sä'tini xhabäälñi.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädñäreni Jesús loj bixhojz ni sajcru. Bidojp rebixhojz nani rnibee, näj rebengool ni najc guxhtis, näjza rebejn ni ruluii leii. ⁵⁴ Luxh Pedr zijt zijt sanajlñi Jesús. Che bidzujñtini lo xle' bixhojz ni sajcru, gurenäjni rebejn nani rajp ro'c, cagucha' lajzñi lo bajl.

⁵⁵ Rebixhojz nani rnibee, näjza guiraa rebengool ni najc guxhtis, cagui-ilreni xhi tej xquej Jesús nidxälreni, te nugu'treni Jesús, xhet bidxäldireni.

⁵⁶ Xhidajl bejn gunii didxxhii, rājpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn ni guniireni stee didxxhii xcuent Jesús, rājpreni:

⁵⁸—Nuunu biejn diaagnu guniini: “Sutiexhā xyu' Dios ni guc-chee con ñaa rebejn, luxh chontis dxej gunchēā steeni, ni nac-chee et con ñaadi rebejn.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcru galāi guiraa rebejn, gunabdiidxni loj Jesús rājpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niāuutis ro'ni, xhet guniidini. Dxejcti gunabdidxsac bixhojz ni sajcru lojni, rājpni:

—¿La luj ni najc Crist, xi'n Dios nani rliä'p bejn xpala'nni, ä?

⁶² Dxejcti rājp Jesús lojni:

—Narāni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siälāza neñ reza ni tre' xhaguibaa.

⁶³ Dxejcru bixhojz ni sajcruga, batiājsni tla' xhajbni, rājpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho gu-niyajni Dios. Naja', ¿xhi najtu?

Dxejcti guiraareni rājp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basāuureni lojni, dxejc huääzrenini, rājpreni lojni:

—Gunii, ¿chuni'c huääzlu?

Luxh renani canājni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biääd te xcriaad bixhojz ni sajcru. ⁶⁷ Luxh bahuiini cagucha' lajz Pedr, cadxelojni lojni. Dxejcti rājpni:

—Nāj luj nadxaaglu Jesús ni siääd Nazare't.

⁶⁸ Dxejc Pedr basgueeni, rājpni:

—Dina gumbeäni. Dizana ganā xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹ Dxejc bahuisac criaadga lojni, rājpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni nāj luj najclu tejreni, sa'csi beñ Galileelu, luxh guyasi riejn rniilu si'c rniñ rebeñ Galilee.

⁷¹ Dxejc gusloj canii Pedr:

—Dios gun castiigw narā palga xhet guliidi ni caniä. Dios najc testiigw, dina gumbeä niguii nani caniitu.

⁷² Dxejcti barojp huält guredxa' guidgaii. Dxejc banalajz Pedr nani rājp Jesús lojni: “Che gajdl guidgaii cuedxa' tiop huält, luj gacla choñ huält arājplu dilu gumbee narä.”

Dxejc guslojni cayoonni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiraliü reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. ² Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús.
⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelaniypac ruslaa Pila't tej rebejn ni yu' latzguiib. Ruslaani chutis te ni rniab rebejn. ⁷ Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnä j gubieer. ⁸ Dxejc bidojp xhidajl bejn loj Pila't, gunabreni lojni gunni si'ctis rujnni casob lani. ⁹ Dxejc gunabdiidx Pila't lojreni, räjpni:

—¿La rlanjtu guslaä reii xten rexpejn Israel, ä?

¹⁰ Sa'csi guchegajcni rdexchlajz rebixhojz loj Jesús, ni'c bateedrenini lojni. ¹¹ Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlanjtu gunnä nani rniitu reii xten rexpejn Israel?

¹³ Dxejcru guredxa'reni:

—¡Bacuaani lo cruiz!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruiz!

¹⁵ Baslaati Pila't Barrabás, sa'csi rlanjni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruiz.

¹⁶ Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷ Dxejcti bashuajcwreni Jesús te lad moraad, bencheereni te coron guejch basälreni yejcn. ¹⁸ Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

¹⁹ Batiäjlreni te yabixhijl yejcn, batiobxhejnreni lojni, luxh guzux-hijbreni te rajnrenini. ²⁰ Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajcni Jesús te cuaarenini lo cruiz.

Bacuaarenini Jesús loj cruiz

(Mt. 27:32-44; Lc. 23:26-43; Jn. 19:17-27)

²¹ Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtað Alejandro näjza Rufo. Che sadejdni nejzga, la fuerz basguurenini xcrujz Jesús.

²² Dxejcti huinäreni Jesús cadro laa Gólgota, nani säloj: dan Calabeer. ²³ Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴ Che gulujxti bacuaareni Jesús loj cruju, gudzuju treni yejc rexbajni, te don xhini'c xca' tejjareni.

²⁵ Agujc choñ or gulejn gubijdx che bacuaareni Jesús lo cruju. ²⁶ Letreer cadro bacuaareni xtojni scree bejnrenini: “Rei xten rexpejn Israel.” ²⁷ Bacuaazareni lo stiop cruju tiop gubaan, tejni xladbee Jesús, xtee xladbägwini. ²⁸ Dxejc guzobj diidx ni caj loj guijtz nani rnii: “Loj rebeñgujdx bigabni.”

²⁹ Luxh renani sadejd nejzga guniyajreni Jesús, cagusniibreni yejcreni, räjpreni lojni:

—Jaa! Luj nutiejxhlu guidoo luxh choñtis dxej niunchesacluni. ³⁰ Naj baslaa lagajc luj, biäjt loj cruju.

³¹ Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. ³² Naj sujiäjt Criste, rei xten rexpejn Israel, lo cruju te guihuiinu, te chalilaaznu.

Näj regubaan ni caj lo cruju guniyajzareni Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

³³ Che gojlläidxej, bicäy si'cti choñ or. ³⁴ Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

³⁵ Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

³⁶ Sas baxuñ tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruju.

³⁷ Dxejcru guredxaduxh Jesús, gujttini. ³⁸ Dxejc lajd ni najl nen guidoro biräjsni, gujcn i tiop la', jiaali lo yujli. ³⁹ Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰ Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹ Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biäadni Jerusalén.

Biga'tz Jesús

(Mt. 27:57-61; Lc. 23:50-56; Jn. 19:38-42)

⁴² Biu' gudxhijn, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biääd José ni siääd Arimatea, najcni te rebejn ni saj loj reguxhtis. Näjza laani cabäjnzi xcälñnibee Dios. Guideb yälñabajn gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitáng lojni agujt Jesús, dxejc badeed Pila't

tiexh Jesús loj José. ⁴⁶ Agusii José te bariaad, luxh che gulätni Jesús lo cruz, batejbnini nen bariaadga. Dxejc gudixhni Jesús nen te biliäa ni caj cuä' te guilaj, dxejcru batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

16

Huäjz Jesús loj rebengut

(Mt. 28:1-10; Lc. 24:1-12; Jn. 20:1-10)

¹ Che gudejd sabd, dxej ni rusilajz rexpejn Israel, Marii Magdalen näj Marii xnan Jacoob näza Salomee gusii setnejxh te chatääbreni se'tga tiexh Jesús. ² Che biu' xmaan, rsildooru, che calejn gubijdx, biäädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubica juijga, luxh najcni te guiro-duxh. ⁵ Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladnol ni najc siol. Dxejc bidxejb regunaaga.

⁶ Dxejcti räjp bi'nga lojreni:

—Na'c guidxejbtu. Caguiltu Jesús ni siääd Nazare't, nani cuaj lo cruz. Rutiruni ree. Agubajnni lo rebengut, coltahuui cadro gudixhneni tiejxhni.

⁷ Colchäj, colchaye'tz lo rexpejnpacni, loj Pedr, ganidla Jesús guidzujn Galilee, dxejcti guidzujntu. Ro'c fiitu lojni, si'cni guniini lojt.

⁸ Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhneni.

Baluiloj Jesús loj Marii Magdalen

(Jn. 20:11-18)

⁹ Gubajn Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab nen lastooni.

¹⁰ Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebengut, luxh Marii abahuui lojni, di lajzreni nilii.

Baluiloj Jesús loj tiop xpejnpacni

(Lc. 24:13-35)

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

Baxhal Jesús repost

(Mt. 28:16-20; Lc. 24:36-49; Jn. 20:19-23)

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. ¹⁵ Räjp Jesús lojreni:

—Colchäj guideb lo guedxliuj, colnii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtnei lo dojl. ¹⁷ Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdireni; susujreni naareni yejc rebenracxhuu luxh siajc rebenracxhuu.

*Huä'p Jesús xhaguibaa**(Lc. 24:50-53)*

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnmi milagwr te gucbee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guijtzc xcuent guiraa redzuun ni gujc nez loonu te cuäxnejzreni redzuunga ² si'cpac ni biääd rediidxga loonu. Re-bejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴ te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes rei xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laḷ ni cayujn Zacarías dzuun neḷ guidoro si'c bixhojz nez loj Dios, ⁹ dxejc con daad bibee chuni'c jiu' neḷ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Laḷ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal. ¹² Che bahuui Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n chääl, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi beḷro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios neḷ lastooni cheni gaallini. ¹⁶ Sujnni gusiechlaiz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpní lagajc yälḷnibee ni gojp profe't Elías, te che jiejn diajgreni xtiidxni susiechlaiz redad, susiäljzareni diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

¹⁸ Gunabdiidx Zacaríi loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhaḷni narä te guininää luḷ, jiädnaä didxhuenre lojlu. ²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisacḷu. Rextidxä sisiojb che guidzujn dxej che riälḷ gacni.

²¹ Laḷni cayajc dee, cadxeloj rebejn ni suga' nez ro' yudxan cabäjzreni guiríi Zacaríi sa'csi cayacḷaani neḷ yudxan. ²² Che biríi Zacaríi, di niajcdiru niniini loj rebejn; dxejc gucheereni yu' xhi cosro bahuini neḷ

yudxan xten guidoo. Dxejc con seen guninäjni rebejnğa, sa'csi xheti xse'ni te niniini.

²³ Che gulujx bejnni dzuun nen guidoro, gubi'ni rolizni. ²⁴ Che gudejd redxej dxejcti bazeñ nuu Elisabe't, chäälñi, báz, gañi bäiñ diruni niñiñ rolizni. Bejnñi xhigab, räjpni: ²⁵ “Si'c bejn Dad Dios narä ñaj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäiñ, baxhal Dios xanglñi Gabriel lo te guedx Galilee ni laa Nazare't, ²⁷ te chahuini te dxapxteeb ni laa Marii. Agojt xtiidxni te guchñaani te dade' ni laa José. Dade're najc xagdoo torëiñ David. ²⁸ Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacñäjlu. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidxni, rujñni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxejblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalñi guirilajni Jesús. ³² Laani sajñi te bejn ni saccduxh. Sirilajzani Xi'n Gueb Dios ni yu' xhaguibaro. Gueb Dios sujñ gacñi reii sigajc ni gujc toxtadgoldooni David, ³³ te tejpas guinibeeni loj rexi'n Israel, luxh dipac xcälñibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguui.

³⁵ Badzu' xangl Dios diidxre lojni, räjpni:

—Sprit Dxan xten Dios siääd lojlu, xcälñibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajñi te beñdxan, sibälaj bejnñi Xi'n Dios. ³⁶ Näjza sa'lu Elisabe't su' te xi'nni luxh anajcni te beñgool; ni'cni gunaa nani najreni digacdi chu xi'nni agujc xho'p bäiñ nuuni báz. ³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuui Marii lo Elisabe't

³⁹ Nen redxejga, basquejn Marii sääni lo te guejdx ni tre' nen redajn xten Judea. ⁴⁰ Biu'ni rolizj Zacarí, guniini xtidxbee loj Elisabe't.

⁴¹ Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't. ⁴² Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuii xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:

Xaimä rliä'p xpala'n Xtadnu Dios.

⁴⁷ Rbalazduxhza lastoä xcuent Dios ni ruslaa narä lo dojl.

⁴⁸ Sa'csi agule Dios narä,

nacä te mos gunaa ni xhet sajcdi,

luxh ñajli sinii rebejn näjza reni churu chu lo guedxliuj,

chicbaani loj guiraa regunaa.

⁴⁹ Sa'csi Gueb Dios ni räjp guiraa yälñibee abejñ xhidajl cosro loä,

dxanduxh najc lajni.

⁵⁰ Dini cuääz gulaslajzni guiraa rebejn ni riu xtiidxni, reni rajñni.

⁵¹ Xhidajl cosnagajn abejñni con lagajc ñaani,

abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee,

per rebenñadolajz bejnñi gacreni benro.

⁵³ Bachajni xque' reni calaan,

badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nación xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'nñi diidx con retoxtadgoldoonu,

sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii rolijz Elisabe't si'cti choñ bäii, dxejc gubisacni rolijzni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te báz niguini. ⁵⁸ Dxejc bidzujñ rexpisñni näjza resa'ni biädhuiireni guiro'preni che gacbeereni lacti hueen gujc Dios con laani. Bibalaznäjrenini. ⁵⁹ Che gudejd xhujñ dxej, huiñäreni bāze'ga chuni bee. Rlajz rebejn nirilaj bāze'ga si'c laa xtadni, Zacarí. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamillu ni laa si'c.

⁶² Dxejcti gunabdiidxreni con seen lo xtad bāze'ga te gacbeereni xho rlajzni guirilaj bāze'ga. ⁶³ Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh lagajc dxejc gujc gunii Zacarí stehuält, dxejc guslojni calä'pni xpala'n Dios. ⁶⁵ Bidxeloduxh rexpisñreni xhini'c gujc ro'c. Luxh bire'ch diidx xcuent recosre guideb neñ redajn xten Judea. ⁶⁶ Guiraa reni bieñ diajg rediidxga gusloj cayujñreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacarí

⁶⁷ Dxejcti biääd Sprit Dxan xten Dios neñ lastoo xtadni Zacarí, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejnñi, te siädguslaani nuurnu neñ dojl.

⁶⁹ Abaxhalñi loonu te bejn ni rajp yälrusladuxh bejn neñ dojl.

Najcni te rexagdoo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu,

nājza ladzñaa rebejn ni gulälaz nurnu.

⁷² Te gulaslajzni retoxtadgoldoonu,

te soob diidx ni bia'nñi con rebejnğa.

⁷³ Scree bia'nñi diidx con toxtadgoldoonu, Abram:

⁷⁴ Suslaani nuurnu ladzñaa rebejn ni rdxe'ch loonu, te na'c guidxeebnu chunu lojni gusoobnu xtiidxni,

⁷⁵ con yäl'nabaŋsa'c näjza yäl'guxhtis guiraa redxej ni guibajñnu.

⁷⁶ Luxh luj, bāze', sirilajlu dade' nani rnii xtidx Gueb Dios ni yu' xh-aguibaa,

sa'csi sinijdlu lo Dad te gusucheelu rexnezyulajzni,

⁷⁷ te gunlj gachee rexpejñni xho gac laani lo dojl,

te gac guibicaj xtojlneni.

⁷⁸ Sa'csi Dios sanälajz bejn,

nājza rulaslajzni bejn ni'cni xhaguibaali suxhałni xi'nni te jiädnäni te dxecoob,

⁷⁹ te gusanijni lo rebejn ni nabajn lo yäl'xcäy xten dojl,

nājza rebejn ni nabajn lo xpala yäl'gujt,

te guluini xho sānu lo xnez yäl'rbecdxilajz.

⁸⁰ Dxejc gunis biuxe'ga, guyuduxh xcäriejñni xcuent recos xten Dios. Gubajñni nez loj reyubijdz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

2

Che gojl Jesús

(Mt. 1:18-25)

¹ Neñ redxejga, gunibee Augusto César xcaj laj rebejn guideb guedxliuj lo xquijtzn. ² Ni'c nacobgujc yäl'bigabre cheni najc Cirenio gobernadoor xten Siria. ³ Guiraa rebejn nanab chääreni lagajc lajdxreni te ro'c guigabreni. ⁴ Ni'cni birii José guedx Nazare't Galilee, te huijni Judea, lo guedx Belén, cadre gojl toDavid, sa'csi najc José xagdoo toDavid. ⁵ Huinäni Marii, nani guchñaani, huijreni guedx Belén te ro'c guigabreni. Luxh nuu Marii bāz. ⁶ Lalsi yu'reni guedx Belén, bidzujñ dxej ni gaal xi'n Marii. ⁷ Ro'c gojl xi'n galooni, dxejc batejbnini te xzuudni. Dxejc gudixh-nini cadre rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios nājza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa gux-hijn. ⁹ Chela baluiloj te xangl Dios, luxh bianij guideb gabireni con yäl'rdimbicha' xten Dios, dxejc bidxebduxhreni. ¹⁰ Sas anglga räjp lojreni:

—Na'c guidxejbtu, narä siädnää lojtu te didxsa'c ni suspalajz guiraa beñ guedxliuj. ¹¹ Nadxej gojl neñ guejdx xten toDavid, tej ni guslaa bejn neñ dojl, laani najc Crist ni najc Dad. ¹² Dee najc te seen lojtu, sidxältu bāze'ga nadejbni neñ te xzuudni, naga'ni cadre rusälreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

¹⁴ Colä'p xpala'n Dios ni yu' xhaguibaali.

Suchu yäl'rbecdxilajz lo rebeñ guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni: —Colcho' guedx Belén colchohuui ni guzajc ro'c ni gunii Xtadnu Dios loonu.

¹⁶ Rusquenduxhreni sääreni, dxejc bidxälreni Marii nājza José nājza bāze' ni naga' neñ cadre rusälreni guijxh rajw reguidxaa. ¹⁷ Cheni bahuiireni loj rebejnga, bijreni diidx xhi räjp rexangl Dios lojreni xcuent bāze'ga. ¹⁸ Niluxh guiraa reni biejn diajg rediidxre bidxeloduxhreni xtidx rebaxtoorga. ¹⁹ Niluxh Marii gulucheeni guiraa rediidx ni biejn

diajgni neŋ lastooni, rujntisni xhigab xcuent rediidxga. ²⁰ Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

²¹ Che gudejd xhujn dxej, huinäreni bāze'ga chuni bee, dxejc gulälajreni Jesús, lagajc laj ni räjp xangl Dios loj Marii guirilajni galooli guuni bāzga.

²² Che basa' redxej ni gac naya te nan si'cni gunibee toMoisés loj xquijtzni, huinäreni bāze'ga guedx Jerusalén, neŋ guidoro gunabreni gacnāj Diosni par tejpas. ²³ Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. ²⁴ Bidzujnreni ro'c ca'reni te gojn si'cni rnibee rexquijtz Dios: “Tio'p gague' o tio'p palombāz.”

²⁵ Neŋ redxejga, neŋ guedx Jerusalén rbājz te dade' ni laa Simeón. Najcni te beŋsacduxh, randuxhni Dios, cabājzni jiāād te bejn ni guslaa rexpejn Israel. Rbājz Sprit Dxan xten Dios neŋ lastoo Simeón. ²⁶ Sprit Dxan abejn gacbeeni dini guet ansde fiini loj Crist ni guxhal Dios. ²⁷ Dxejcti räjp Sprit Dxan xten Dios lojni chāāni guidoro. Laŋni yu'ni neŋ guidoo, bidzujn José con Marii, biādnāreni bāz Jesús, te gunnājreni Jesús nani rnibee xtidx Dios gunreni. ²⁸ Dxejc gudāāz Simeón bāze'ga, gusloj calä'pni xpala'n Dios, räjpni:

²⁹ Dad, asajc gusaanlu guetā con yālrbedxilajz,

sa'csi abasooblu nani bia'n diidx gunnājlu xmoslu.

³⁰ Sa'csi abahuiloā nani siādguslaa nuurnu neŋ dojl,

³¹ ni abasujlu nez loj guiraa rebeŋ guedxliuj.

³² Laani najc bianij ni susanij loj rebejn ni di gac xpejn Israel, näjza nani gac xpala'n rexpejnlu guedx Israel, lajdxlu.

³³ Bidxeloj José näjza xnan Jesús rediidx ni canii Simeón xcuent bāze'ga.

³⁴ Dxejc benle' Simeón yejcreni, dxejc räjpni lo Marii xnan Jesús:

—Bahuii gan; bāze're biāād te loj rexpejn Israel chu reni sibālaz xtiidxni, te chuza reni sililajz xtiidxni. Laani gacni te seen nani sibālaz bejn, ³⁵ te si'c jienloj xhi xhigab rujn cade tej rexpejn Israel neŋ lastooreni. Dxejcti par luj sajcnī asdoo chāāz te spaad lastoolu, sa'csi gac-huinuxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famiŋ xten Aser. Anajcni beŋgolduxh. Bachnaani che najcni dxaphuin, luxh gajdztis ijz gulāznājni chāālni che bia'nni biuud. ³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yāāl te yu'tisni lo Dios con yālrucua'n näjza yālrbedx-rniab lo Dios. ³⁸ Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent bāz Jesús loj guiraa renani cabājz yālruslaa xten Jerusalén.

Che gubi'reni guedx Nazare't

³⁹ Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. ⁴⁰ Gunís biuxe'ga, guc nadaanni, guc nasiŋruzani sa'csi cayacnāj Diosni.

Che biu' Jesús guidoro

⁴¹ Casob ijz rij rexcuzajn Jesús guedx Jerusalén te rinäreni te gojn xten lanij pascw. ⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnnani niclaza José direni niacbee bia'nni. ⁴⁴ Bejnreni xhigab pet siädsanäjni rebeñsa'ni. Si'c guzajreni tebdxej, dxejc gudiilrenini loj resa'reni, nájza loj reni rumbeereni, ⁴⁵ direni nidxälñi. Dxejc gubisacreni guedx Jerusalén te huitiilrenini ro'c.

⁴⁶ Chon dxej gudiilrenini dxejc bidxälrenini nen guidoro, sobga'ni nez galäi rebejn ni najn leii, cacuadiajgni xtiidxreni, cayujnzani yälgunabdiidx lojreni. ⁴⁷ Luxh guiraareni cacuadiajg xtiidxni, cadxelo-duxhreni yälñajn xtenni, nájza rediidx ni cagudzu'ni lojreni. ⁴⁸ Che bahuii rexcuzajnni lojni, bidxelojreni. Dxejc räjp xnnani lojni:

—Xi'nä, ¿xhicuent bennäjlu nuurnu scree? Narä nájza xtaclu cayunduxhnu xhigab caguiilnu luj nezree, nezre'c.

⁴⁹ Dxejcti räjp Jesús lojreni:

—¿Xhicuent caguiiltu narä? ¿La ditu gan riäjł gunä xtzun Xtaclä, ä?

⁵⁰ Luxh laareni direni niacbee rediidx ni guniini lojreni.

⁵¹ Dxejcti gubinäjñireni guedx Nazare't, sanuuni rusoobni xtiidxreni. Luxh Marii guluchetisni guiraa recosre nen lastooni. ⁵² Duurtis gunis Jesús, caroobruza xcälñajnni. Sanälajz Diosni, sanälajzza guiraa rebejnñi.

3

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

¹ Nen redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea nájza Traconite; Lisantias najc gobernadoor xten Abilinia. ² Lagajc nen redxejga Anás nájza Caifás najc rebixhojzro xten guidoro guedx Jerusalén. Nen redxejga biääd xtidx Dios lo Juan, xi'n Zacari'i cheni rbäjzni nez lo reyubijdz. ³ Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechłajz, yälrobnis ni nanab gunreni te gudzucaj Dios xtojłreni. ⁴ Si'cni caj lo xquijtz Isaías, dade' ni gunii xtidx Dios, cadro räjpni:

Riejn xse' te ni rbedxa' nez loj reyubijdz:

“Colyunsac xnezyuj Dad, colšlii rexnezyulajzni.”

⁵ Guiraa cadro sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, saccsa'creni.

⁶ Dxejcti guiralii bejn suhuii loj nani guxhal Dios.

⁷ Che bahuii Juan siääd xhidalduxh bejn te guirobnisreni, räjpni lojreni:

—¡La'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? ⁸ Colguchaa xmoodtu te si'c fii bejn guliini abasiechłajztu. Na'c cuentis rniitu lagajc nen lastootu “Abram najc xtaclnu”, sa'csi narä rniä lojtu, sajč xca' Dios reguijre te con laareni guncheeni bejn gac rexagdoo toAbram. ⁹ Aguibyajg naga' cuä' xlobaa

reyaig; ni'cni guiraa reyaig nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

¹² Näjza gaii bejn nani rusquijx xcuent reimpuest bidzujn lojni te guirobnisreni, dxejc gunabdiidxreni lo Juan räjpreni:

—Dad, mastr; ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjl quixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

¹⁵ Cadxeloj rebejn, cayujnreni xhigabduxh, naareni, “pet Juan najc Crist ni jiääd.” ¹⁶ Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcru loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrnibee loä. ¹⁷ Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuuga suze'cnini lo bajl ni rejx par tejpas.

¹⁸ Rediidxre näjza xhidajl yälrlujdx gunii Juan te basule'ni redidxcoob loj rebejn. ¹⁹ Näjza lo Herodes ni najc gobernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodias, chääl bejtzni Felipe, näjza xcuent sgaii dojl ni bejnini. ²⁰ Di Herodes niu xtidx Juan, alga bejnini stee dojl, basäläni Juan nen latzguuib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa, ²² dxejc biäjt Sprit Dxan xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzuu ijz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué

gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj beṇḏxab loj Jesús

(Mt. 4:1-11; Mr. 1:12-13)

¹ Jesús, sa'csi rbäz Sprit Dxan xten Dios lastooni, biunejzni gueu Jordán, dxejc huinā Sprit Dxan xten Diosni lo reyubijdz. ² Ro'c bia'nni tiuu gubijdx, tiuu guxhijñ. Ro'c bidzujñ beṇḏxab ni rnibee te rlanjzni gunni gusoob Jesús xtiidxni. Luxh calaan Jesús, sa'csi gajdni gau guiraa nen redxejga. ³ Dxejc räjp beṇḏxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajn bejn, nājza guiraa diidx nani rnii Dios sujn guibajn bejn.”

⁵ Dxejcti huinā beṇḏxab Jesús jiaa yejc te dajn. Teratbāztis baluilojni guiraa reguedxro ni tre' lo guedxliuj. ⁶ Dxejc räjp beṇḏxab lojni:

—Narā sunidxā guiraa yälrnibee nājza reyālnasa'c ni yu' loj reguejdxga sa'csi xtenā guiraareni, luxh sajc gudedāni lo chutis ni rlazā. ⁷ Palga luj suzuxhijblu loā, guiliä'plu xpala'nā, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtioistislu ganlu, luxh lojtisni chulu gunlu dzuun.”

⁹ Dxejcti huinā beṇḏxabni lo guedx Jerusalén, huinānini jiaa yejc xques guidoro. Dxejc räjp beṇḏxab lojni:

—Palga guliilu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhaḷ Dios rexanglni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux beṇḏxab rextiidxni, gubicajni lo Jesús sa'csi dini niujn gaan nusoob Jesús xtiidxni. Gulājzni guidzujñ stee dxej te gusacsíruni Jesús.

Gusloj Jesús cayujñ xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yäl'rnibee xten Sprit Dxan. Bire'ch diidx xcuentni guiraa neñ reguejdx ni tre' nejzga. ¹⁵ Ruluiini neñ reguidobáz luxh guiraa rebejn rliä'p xpala'nni.

Jesús guyu' guedx Nazare't
(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni neñ guidobáz sigajc ni rujnpacni, dxejc huisuliini te bil'ni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxäl'ni cadro rnii scree:

¹⁸ Sprit Dxan xten Dios suganäj narä, sa'csi agule Dios narä te gusule'ä xtidxcoobni lo rebenproob. Baxhal'ni narä te gusiaca lastoo renani di lastooreni cuedxi, te gusule'ä yäl'ruslaa lo rebejn ni yu' lo dojl, te gusiaca baloj reben lotiä'p, te guslaä reben ni cadejd trabajw, ¹⁹ te gusule'ä abiu' ijsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnä neñ guideoga, dxejc gurejni. Sa'csi guiraa rebejn ni sobga' neñ guideoga cahuidzu'tzreni lojni, ²¹ gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

²² Guiraareni sarü guniireni xcuent Jesús, bedxeloduxhazreni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni. ²⁵ Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niajb choñ ijz garol, dxejc guyu' yäl'rianduxh guideb guejdxga. ²⁶ Luxh di Dios nuxhal Elías roliz nicla tej regunabiuud ni guläjz guedx Israel, alga baxhalnini lo benzajt, roliz te gunabiuud ni rbäjz Sarepta, gajxh guedx Sidón. ²⁷ Sigajcza che gubajn Eliseo lo guedxliuj, guyu' xhidajl ben racxhuu ni ral tiejxhreni guedx Israel, luxh dini nusiajc nicla tejreni, alga basiajcni dade' ni laa Naamán, ni siääd te guedxzajt ni laa Siria.

²⁸ Che biejn diajg reni sobga' neñ guidoo rextidx Jesús, bidxecheduxhreni, ²⁹ huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlaizreni nustejbrenini. ³⁰ Dxejc Jesús sigaj gudejdni galäiireni, sä'tini ste'ca lajt.

Gulää Jesús bendxab lastoo te dade'
(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel. ³² Bidxeloduxhreni xtiidxni sa'csi rusule'ni si'c te ben'najn, si'c te ni rnibee.

³³ Neñ guideoga suga' te dade' ni rbäjz te bendxab neñ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxañ Dios.

³⁵ Gudidxa' Jesús lo beñdxa bga, räjpni lojni:

—Basäu ro'lu, birii lastoo niguiire.

Dxejcti beñdxa bre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. ³⁶ Bidxeloduxh rebejnğa, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeñdxa b con yälrnibee, luxh rusoob rebeñdxa b xtiidxni, riireni lastoo bejn.

³⁷ Dxejc gusaäb xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhreni lojni te gusiajc-nini. ³⁹ Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujnni mandaad, cahuiniireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰ La! ni cayäz gubijdx, guiraa reni rajp beñracxhuu ni rajc garen garen yälracxhuu biädnäreni rebejnğa lo Jesús. Dxejc laani batzuubni naani yejc tejgaren, dxejc bjaic rebeñracxhuuga. ⁴¹ Loj rebeñracxhuuga, yu'reni birii rebeñdxa b neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudiñäjni rebeñdxa b, dini nusaa niniireni sa'csi laareni najnreni najcni Crist ni cabäjreni.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiñ rebejnni, dxejc bidzujnreni cadro suga'ni. Rlajzreni nuscuääzrenini te di nuiini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruga guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neñ guiraa reguidobäz neñ reguejdx xten Galilee.

5

Che gunaazreni xhidajl bäl

(Mt. 4:18-22; Mr. 1:16-20)

¹ Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' niska, rud yu'di neñreni sa'csi rebejn ni rniaaz bäl abiriireni neñ rebarcw te caguiibreni xquijxhreni ro' niska. ³ Dxejc biu' Jesús neñ te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús neñ barcwga, ro'cli guslojni caguluini rebejn. ⁴ Che gulujx xtiidxni, räjpni loj Simón:

—Huinä barcw cadro jiäturu, colcuaa xquijxhtu lo nis te guiniaaztu bäl.

⁵ Räjp Simón lojni:

—Mastr, guideb yääl biennu dzuun, luxh dinu niniaaz nicla tej bājł, niluxh naj agunibeelu gusałsacnu guijxh lo nis.

⁶Cheni basālreni xquijxhreni lo nis, gunaazreni xhidalduxh bājł, dxejc guslojli carājs xquijxhreni. ⁷Dxejc bejnreni seen loj resa'reni ni yu' neñ stee barcwga te jiādyacnājreni. Bidzujntireni, bachajreni guiro'p barcw. Gudxaduxh rebarcw, ameer niāāzreni neñ nis. ⁸Che bahuui Simón Pedr recosre, bazuxhijbni nez loj Jesús, dxejc rājpni:

—Gubicaj loā Dad, sa'csi narā nacā te beñdojl.

⁹Si'c gunii Simón sa'csi bidxejb laani nājza guiraa rebejn ni yunājni sa'csi gunaazreni xhidalduxh bājł. ¹⁰Nājza Jacoob nājza Juan, rexi'n Zebedeo, ni runnāj Simón dzuun, nāzaren bidxejbreni. Per Jesús rājp lo Simón:

—Na'c guidxejblu, najli guisloj cueedxlu bejn lacuaa ni guiniaazlu bājł.

¹¹Dxejc, che bidzunnājreni rebarcw ro' nis, basa'nreni guiraa xhixtenreni, te sanajlreni Jesús.

Basiajc Jesús te bejn ni rał tiejxhni

(Mt. 8:1-4; Mr. 1:40-45)

¹²Cheni guyu' Jesús tej reguejdx, bidzujn te bejn lojni ni rajc lepra te yālguidxduxh ni rał tiejxhni. Che bahuuiini loj Jesús, bazuxhijbni, basajbni lojni lo yuj, rājpni lojni:

—Dad, palga rłajzlu, sajč gusiajclu narā.

¹³Dxejc batzuub Jesús naani yejčni rājpni lojni:

—Rlaza jiajclu. Susiacālu.

Che guniini rediidxre, biacgajc beñ racxhuuga. ¹⁴Dxejcti gunibee Jesús lojni rut lojdi gābni xhi guzajčni. Rājpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵Luxh xpala'n Jesús sanuutis cayā'pruni, guixe-guixee care'ch diidx xcuentni. Rdojpza xhidalduxh bejn te gucuađiajgreni xtidx Jesús nājza te gusiajčni yālracxhuu xtenreni. ¹⁶Yu'za huālt riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷Te dxej lałni caguluuiini rebejn, nejzga sobga' gaii farisee nājza gaii bejn ni ruluii leiı garen-garen reguejdx, siāāđreni guideb nez reguejdx xten Galilee, nājza región Judea, nājza guedx Jerusalén. Dxejc huenli-isi rluloj suganāj xcālrnibee Dios Jesús te rajc russiajčni rebenracxhuu.

¹⁸Dxejc bidzujn gaii dade' nuuren lo te lonbāz te bejn ni di gacdi guiniib, rłajzreni gusiū'renini neñ yu' te quixhrenini nez loj Jesús. ¹⁹Niluxh di-reni nidxāl canejz niu'reni sa'csi nadāduxh ro'c sa'csi tre' xhidajł rebejn. Dxejc huāpnājrenini yejč yu'ga, badzucajreni gaii tej, dxejc basajbreni xloon beñracxhuuga yejčli yu'ga te gujč bidzujn ni nez loj Jesús. ²⁰Che bahuui Jesús yārlililajz xtenreni, rājpni loj beñracxhuuga:

—Dade', agubicaj xtojłlu.

²¹Dxejc rebejn ni ruluii leiı nājza refarisee gusloj cayujnreni xhigab, naaren: “¿Chucha niguiire ni caniyajni Dios con rextiidxni? Ruti te bejn ni sajč gudzucaj xtojł rebejn, Diostis rudzucaj dojl.”

²²Dxejc gucbee Jesús xhi xhigab cayujnreni, ni'c rājpni lojreni:

—¿Xhicuent rujntu xhigab si'c neñ lastootu? ²³ ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? ²⁴ Mbaj naj, suluiä nez lojtu Xi'n Dios ni gujc Xi'n Niguii rajp yälrbinee, yälradip lo guedxliujre te gudzucajni xtojł rebejn.

Dxejc räjpni lo bejnga ni digacdi guiniib:

—Lojlu rniä, řhuistie, guläs xloonu, huij rolizlu!

²⁵ Lagajc dxejc nez lojreni huistiegajc bejn ni digacdi guiniib, guläsni xloonni cadro naga'ni, dxejc siini rolizni, calä'pni xpala'n Dios.

²⁶ Guiraareni rdxeloduxhreni recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuini Jesús lojni. Räjp Jesús lojni:

—Gudanajł narä.

²⁸ Dxejc huisu Leví, basa'nni guiraa recosga, dxejc sanajłni Jesús.

²⁹ Dxejc bejn Leví te lanij rolizni par Jesús. Biäd xhidajł bejn ni rusquijx xcuent impuest nájza sgaii bejn; sobganäjnireni lo mex. ³⁰ Dxejcti refarisee nájza rebejn ni ruluii lei guslojreni cayeinäjreni rexpajnıpac Jesús, räjpreni:

—¿Xhicuent raunäjtu, ränäjtu rebejn ni rusquijx impuest nájza rebenđojł, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racx-huu rquiinreni te doctoor. ³² Dina niädtedxä rebenısa'c, narä biädtedxä rebenđojł te gusiechłajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejnıga loj Jesús, räjpreni:

—¿Xhicuent lacti rucua'n rexpajnı Juan nájza rexpın refarisee, lacti rbedx-rniabreni loj Dios; niluxh rexpajnıpacıu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajı gucua'n rebejn ni yu' lo te sa' lałni yunäjreni bi'n, ä? ³⁵ Niluxh sidzujł dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhıga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusalıni bincoob neñ te guidbiejw sa'csi bincoobıga sutiäıya'ni guidbiejwıga dxej sixe' bınga, sixijnıza guidbiejwıga. ³⁸ Ni'cni nanab gusalıni bincoob neñ guidcoob si'c sigucheeza guiro'preni. ³⁹ Luxh nicla tej bejn ni agu' bin ni yu' agujc xchej rıajz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpajnı Jesús triuu dxej nani rusılajzreni

(Mt. 12:1-8; Mr. 2:23-28)

¹ Te dxej ni rusilajz rexpejn Israel sasaj Jesús nájza rexpejn^{pacni} nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini. ² Dxejc gunabdiidx gaii refarisee ni najc beñguidoo, räjpreni lojreni:

—¿Xhicuent rujntu dzuun ni di nungäjl guntu che rajl dxej ni rusilajznu?

³ Dxejc räjp Jesús lojreni:

—¿La gajdtu goj loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni neñ xquidoo Dios, gudajwni yätxtiil nani di nungäjl gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguui, rnibeä dxej ni rusilajztu.

Niguui ni nabijdz ñaani

(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn Israel, biu'ni neñ te guidobäz, dxejc guslojni caguluiini rebejn. Lagajc ro'c sobga' te dade' ni nabijdz ñaani ladbee. ⁷ Dxejc remastr xten leii nájza refarisee cagula'tzreni te don la susiajcní bejnga dxej ni rusilajzreni, sa'csi caguuilreni xho gucuaquijreni Jesús. ⁸ Niluxh laani najnni xhi xhigab cayujnreni, dxejc guniini lo dade' ni nabijdz ñaani, räjpni:

—¡Huisulii! ¡Gudaa nez galäiire!

Dxejc huisulii bejnga, gubigni lojni. ⁹ Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcälñabajnni o la gudzucajnu yälñabajnni, ä?

¹⁰ Che gulujx bahuui Jesús loj guiraa rebejn ni tre' guideb gabini, räjpni loj bejn ni nabijdz ñaani:

—¡Baslii ñaalu!

Dxejc bejnni si'c, luxh biacgajc ñaani. ¹¹ Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexpejn^{pacni}

(Mt. 10:1-4; Mr. 3:13-19)

¹² Neñ redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios. ¹³ Che bianij lo yuj, gurejdxni rexpejnⁿⁱ. Ro'c guleni tzubitio'preni te gacreni xpejn^{pacni}. Gulälajni reni reapost. ¹⁴ Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé; ¹⁵ Mateo; Tomás; Jacoob xi'n Alfeo; Simón ni nagab loj rexpen cananista; ¹⁶ Judas, bejtz Jacoob; nájza Judas Iscariote ni guto' Jesús loj rebixhojz.

Ruluui Jesús xhidajl bejn

(Mt. 4:23-25)

¹⁷ Che biätnäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siäädreni guiraa nez reguedx Judea, nájza guedx Jerusalén nájza reguejdx ni tre' gajxh nisdoo Tiro con Sidón. Rebejnga bidzujnreni te gucuadiajgreni xtidx Jesús, te gusiajczanireni xcälracxhuureni. ¹⁸ Guiraa ni rdejdza trabajw yu' beñdxab neñ lastooreni nájza reni'c biajc. ¹⁹ Guiraa rebejn rlaiz caan Jesús, sa'csi rusiajcní guiraarení con xcälrnibeeni.

*Balijdx Jesús rebejn**(Mt. 5:1-12)*²⁰ Dxejc bahuui Jesús loj rexpejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

²¹ 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjl Dios lajztu dxejcru suxhijztu.

²² 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rhälazreni lajtu si'c te cos guiidx sa'csi rililajztu xtidx Xi'n Dios ni gujc Niguii. ²³ Colguibalajz nen redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacsi retoxtadgoldooreni rebejn nani gunii xtidx Dios galoo.²⁴ 'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.²⁵ 'Probe'tu nani rajp guiralajz xhixtentu naj, sa'csi sidejdtu yäl'rliaan.

'Proobzatu ni ruxhijztu naj, sa'csi sonduxhtu sidejdtu yäl'huinduxh, yäl'nalas.

²⁶ 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.*Chanälajzni rebejn nani rdxe'ch lojni**(Mt. 5:38-48; 7:12)*²⁷ Räjpzani:—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. ²⁸ Benle'yejc rebejn ni rgube la'tu. Gunab lo Dios xcuent rebejn ni rcuaquij la'tu. ²⁹ Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹ Sigajc ni rlajzlu gunnäj bejn la'tu, si'cza la'tu colyennäj bejn.³² 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl. ³³ Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojl. ³⁴ Palga gudedlaatu lojtis reni rujntu xhigab gunidxsacni lojtu, xhi cos hueen rchalotu rujntu? Ni rebendojl rudedlaazareni loj rebejn ni najnreni siguixsac ni nasääbreni. ³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl. ³⁶ Colgulasajz resa'tu si'c rulasajz Xta'dnu Dios guiraa rebejn.*Colgulasajz sa'tu**(Mt. 7:1-5)*³⁷ Räjpzani:

—Na'c guntu yäl'guxhtis nani rujn bejn, naatu xhet laadi rujnni; te na'cza gun Dios yäl'guxhtis rextojltu. Na'c gucuaquijtu bejn te sigajcza di Dios gucuaquij la'tu. Colgusiäjl-lajz dojl ni rujn sa'tu, te si'cza gusiäjl-lajz

Dios rextoljtu. ³⁸ Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nenñi, cupe'tlini gusałreni nen xpolstu. Dios suniidx lojtu lagajc con mediid ni rudeedtu loj rebejn.

³⁹ Guniiza Jesús stee cuent räjpni:

—Ła sajc guluii te beñ lotiä'p nez yuj lo stee beñ lotiä'p, ä? Ła di guiro'preni guitejb nen te gueed, ä? ⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcnı si'cni najc mastr xtenni.

⁴¹ 'ŁXhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, Łxho mood gäblu lo bejtzlu: “Guidon cuää guixhe' ni yu' balojlu”; luxh dilu gachee yu' te yagro balojlu, ä? ¡Benıguıjdx! Guläxgaa yagro ni yu' balojlu, dxejc sajc fisa'clu te cuäälu guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³ Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. ⁴⁴ Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iıgw lo reyaguejch, diza bejn gutiu' uub lo te yag balagrejñ. ⁴⁵ Rebeñsa'c rnii didxsa'c, sa'csi xhigabsa'c yu' nen lastooni. Niluxh rebenıguıjdx rnii ganax didxguıjdx sa'csi xhigabguıjdx yu' nen lastooni, sa'csi ro'ni rnii nani yu' nen lastooni.

Tio'p bejn ni benchee tio'p yu'

(Mt. 7:24-27)

⁴⁶ Räjpzani:

—ŁXhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn ni riääd loä, rucuadiajgni xtidxä luxh rusoobni xtidxä. ⁴⁸ Najcni si'c te bejn ni benchee rolijzni, ganid gudäänni jiät, dxejcti bejnıi cimient yejc te guıaj. Cheni biäjt nisro ro' gueuu, bidijn nisro cuä' yu'ga, luxh nicla nusniıbnini, sa'csi yu'ga sobgadzu'tz yejc te guıaj. ⁴⁹ Niluxh reni rcuadiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujñ cimient xten yu'ga. Dxejcnı biäjt nisro, bidijnñi cuä' yu'ga, dxejc li gurebä'n yu'ga, gunitlojtini.

7

Basıajc Jesús xmos te beñ romanı ni rnıbee

(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te beñ romanı ni rnıbee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhalıgajcni gaii bengool lo rexpejn Israel te chagajñreni Jesús jiäädni te gusıajcni xmos dade'ga. ⁴ Che gubıgreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäjl gacnäjluni ⁵ sa'csi sanälajzni lajdx rexpejn Israel, luxh lagajc laani gunıbee guc-chee xquıdobäznu.

⁶ Dxejcti huınä Jesúsreni. Cheni siäddzunıgajxhreni royu', baxhalı capitána gaii xamiıgwñi, gäbreni loj Jesús:

—Si'c naj capitán: “Di rlazä gotalä xtzunlu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yäl'rnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcni.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolizj capitán, bahuiireni abiajc xmosni.

Baspañsac Jesús xi'n te gunabiuud

¹¹ Nen redxejga, huij Jesús te guejdx ni laa Naín. Huinäni rexpejnpacni näjza xhidajl bejn ni sanajlni. ¹² Che bidzujñni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³ Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴ Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

¹⁵ Dxejc huistie bengutga, sobga'ni guslojni caniini. Dxejc badeed Jesúsni lo xnanni. ¹⁶ Che bahuiireni xhini'c gujc, bidxejbreni, bidxelo-duxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujñ nez loonu.

Caniizareni:

—Lagajc Guejb Dios abiädhuui rexpejñni.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús

(Mt. 11:2-19)

¹⁸ Rexpejnpac Juan ni rutiobnis bij rediidxga lojni che yu'ni latzguiib. ¹⁹ Dxejc baxhalni gaiireni lo Jesús te sanabdiidxreni: “¿La guliipac najclu Crist ni jiääd o sibäznu chu stee bejn, ä?” ²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La lu najc Crist ni jiääd o la sibäznu chu stee bejn?”

²¹ Lagajc dxejc che bidzujñreni, basiajc Jesús xhidajl bejn ni rajc garen-garen yäl'guijdx, ni yu'za rebenxgab lastooreni, basiajczeni baloj ni di fi.

²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; reben'gut, agubansacreni; luxh loj rebenproob nani cabäz xcälracnäy Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te niyt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh nájza reni nabaṁsa'c, rolijz rereii yu'reni. ²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. ²⁷ Juan najc niguii ni ruzä't rexquijtz Dios cadro caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexingaan regunaa, nicla tejni gajd guiricaj ni najc te beṁsacduxhru nez loj Dios si'c najc Juan ni rutiobnis. Niluxh nani guxiiru saj c lo xcälṁnibee Dios ni jiääd, sajcruni loj Juan.

²⁹ Che biejn diajg rebejn nájza reni rusquijx impuest rextiidxni xcuent Juan, gucbeereni rujn Dios yälguxhtissa'c, sa'csi abatiobnis Juanreni. ³⁰ Niluxh refarisee nájza rebejn ni ruluii leiü gulälazreni nani niujn Dios par laareni, sa'csi direni nicäjb nutiobnis Juanreni. ³¹ Räjpa Jesús lojreni:

—¿Xhocha guiniä najc rebejn nani tre' naj? ³² Najcreni si'c rebiuxbäz nani rguijt nez lo guii cadro rdo', rbedxa'reni loj sa'reni, rniireni: “Bielṁu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biääd Juan, dini niauxha't, dizani niä' bin, luxh räjptu: “Yu' beṁdxab lastooni.” ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahulaare, dade'reauxha't, rä'zani, Najcni xamiigw rebendojṁ nájza rebejn ni rusquijx reimpuest xten gubier.” ³⁵ Ni'cni xcälṁnajn Dios huenliisi rienloj loj dzuun ni rujn rebejn ni najn.

Jesús huij rolijz Simón ni najc farisee

³⁶ Dxejc tej refarisee gunii loj Jesús, räjpnj:

—Jiäädlu rolizä te guidaunu.

Dxejc huij Jesús rolijzni, ro'c gurejni lo mex. ³⁷ Rbäjz te gunagubejxh lo guejdxga. Che biejn diajgni satajw Jesús rolijz fariseega, bidzunṁājni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzunṁni lo ni' Jesús, guslojni cayoonni. Con nisbee caguiibni ni' Jesús, dxejc caguspjdzni ni'ni con xquidxejcni. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolijzni, recosre, bejnṁni xhigab: “Palga gulii najc niguiire Xi'n Dios, sacbeeni chu najc nájza xho najc gunaare ni cagajn ni'ni, sacbeezani najcni te gunadoṁduxh.” ⁴⁰ Dxejc gunii Jesús loj fariseega, räjpnj:

—Simón, yu' xhi rlazä guiniä lojlu.

Dxejc räjpnj fariseega lojni:

—Guniini, Dad mastr.

⁴¹ Dxejc räjpnj Jesús lojni:

—Tio'p bejn nazäáb meel lo te bejn ni rudedlaa meel. Tej reni nazäáb si'cti gaiigayuu meel. Steeni nazäáb si'cti tiubitzuu meel. ⁴² Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, räjpnj:

—Rchaloä bejn ni nazääbru lojni.

Dxejc räjpnj Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc räjpnj loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcni. ⁴⁵ Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶ Dilu nusäl se't yecä, niluxh laani basälni se't ni rlianexhduxh ni'ä. ⁴⁷ Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojłreni, guxiiza sanälajzreni Dios.

⁴⁸ Dxejcti räjpni loj gunaaga:

—Agubicaj rextojłlu.

⁴⁹ Dxejc rebejn ni sobga' lo mex con laani, che biejn diajgreni rediidxre, gosloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojł bejn, ä?

⁵⁰ Räjp Jesús loj gunaaga:

—Agulaalu lo xtojłlu sa'csi ahuililajzlu; huij naj, bascuedxi lajzlu.

8

Regunaa ni gucnäj Jesús

¹ Dxejcti gosloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrmibee Dios loj rebejn. Sanäni rexpejn pacni ² näjza gaii gunaa ni abasiajcn, agulääni rebendxab lastooreni, näjza basiajcn xcälgujidxreni. Tejni laa Marii ni laaza Magdalen, ni gulää Jesús gajdz bendxab nen lastooni. ³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquii reni.

Xcuent bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajł bejn lojni ni birii xhidajł reguejdx. Lojreni gunii Jesús con te cuent ni ruluii, räjpni:

⁵ —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädzä remane' ni rutajt xhaguibaa, gudajwrenini. ⁶ Yu'za lajt bitejb binijga nen reguij cadro xheti xhidajł yuj. Che gulejn binijga, gubidzgajcni sa'csi xheti xcojp ro'c. ⁷ Yu'za lajt bitejbni nez nen reyaguejch. Che gulejn, di reyaguejch nusaan niroob gäjłga. ⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn pacni lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yäl najn te gacheetu reyälxhiga'tz xten xcälrmibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Răjpzani:

—Scree sāloj cuentre, rebinij najc si'c xtidx Dios. ¹² Binij ni biajb lo nezyuj najc si'c rebejn ni rucuadiajg xtidx Dios. Dxejc riāād bendxab, riāddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³ Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nālajznu, direni gandzu'tz xtidx Dios, rililajzreni te bo'c, per che rsacsí rebejnreni, rbālazreni xtidx Dios. ¹⁴ Binij ni biajb neñ reyaguejch najc si'c rebejn ni rucuadiajg xtidx Dios, per laļ ni sanuureni xnejzreni, rijia'nreni lo recos guedxliuj, lo yāl'nasa'c ni ruhuiireni, nājza rujnreni si'ctis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yāl'nasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par teipas

(Mr. 4:21-25)

¹⁶ Răjpzani:

—Ruti te bejn ni rucuaguij te bajl dxejc rusāuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te gusanijni guideb neñ yu'ga te reni jiu' fiireni lo bajlga. ¹⁷ Xhet yu'di ni yuchetzu'tzdi ni di guidzujn dxej guiluini; xhet yu'diza ni naga'tz naj ni di guidzujn dxej gacbee bejnini.

¹⁸ Ni'cni colcuadiagsa'c diidx; sa'csi guiraa rebejn ni rajp yālracbee, sajprureni yāl'najn. Luxh reni di ninuu nucuadiajg xtidx Dios, lojni sibicaj nāj ni abacuadiajgni, ni rchalonni najnni.

Xnan Jesús con rebejtzni

(Mt. 12:46-50; Mr. 3:31-35)

¹⁹ Dxejc bidzujn xnan Jesús nājza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰ Dxejcti huisa'n te bejn diidx loj Jesús, răjpni:

—Xnan guejblu nājza rebejtz guejblu suga' rolā', luxh rlajzreni fiireni lo guejblu.

²¹ Badzu' Jesús diidxre lojreni, răjpni:

—Xnanā nājza rebetzā najc rebejn ni rucuadiajg, ni ruzoobza xtidx Dios.

Basiacdxi Jesús te beduxh

(Mt. 8:23-27; Mr. 4:35-41)

²² Te dxej biu' Jesús nājza rexpejn pacni neñ te barcw. Dxejc răjpni lojreni:

—Colcho' stelaad ro' nisre.

Basyu'reni barcw lo nis, sā'tireni. ²³ Cheni sadejdreni galāii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jiāāz barcwga lo nis.

²⁴ Dxejcti huicuaānreni Jesús, răjpreni lojni:

—¡Mastr! ¡Mastr! ¡Cayāāznu lo nis!

Che gubajñni, huistieni, dxejc gudidxa'ni lo bejga nájza lo nis ni cayásjiaa. Dxejc gulájz bejga, guredxiza nisga. ²⁵ Dxejc rájpmi lojreni:

—¿Con xcälirililajztu, ä?

Per laareni bidxejbreni, bidxeloduxhrenei, canabdiidxreni lo sa'reni:

—¿Chuni'c najc niguiire te rnibeeni bej nájza nis, luxh rusobdiajg bej nájza nis xtiidxni?

Te beñ Gadara ni guyu' rexsprit bendxab lastooni

(Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajbni, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni rájpmi:

—¿Xhicuent riädchu'lu loonu, luj, Jesús Xi'n Gueb Dios ni rbäjz xh-aguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rniaaz rebendxabga bejnga ruliib rebejn ni'ni, ñaani con cadenguiib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz.

³⁰ Jesús gunabdiidx lojni, rájpmi:

—¿Chu laalu?

Dxejc badzu'ni diidxre loj Jesús rájpmi:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni.

³¹ Dxejc gunabduxhrenei loj Jesús na'c guxhašacnirenini cadro biriireni.

³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús, ³³ birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga nájza lo reben rench. ³⁵ Dxejc biädhuii rebejn xhini'c gujc ro'c. Che bidzujntireni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejcn; dxejc bidxebduxh rebejnga. ³⁶ Sas reni bahuiloj xho gujcn, bijreni diidx xho basiajc Jesús bejn ni guyu' rebendxabre lastooni. ³⁷ Dxejc guiraa reben Gadara nájza reguejdx ni tre' nejzga, gunabreni jiunejz Jesús ro'c sa'csi cadxebduxhrenei. Ni'cni biu' Jesús neñ barcw te gubisacni nejz cadro siäädni. ³⁸ Dade' ni birii rebendxab lastooni gunabni lo Jesús gusaanni chanajlnini, niluxh Jesús gunibee jia'nni, rájpmi lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo nájza te gunaa ni gudajn xhajb Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjpacreni guibisacni. ⁴¹ Dxejc bidzujntireni bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi

yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolizni, birinajl xhidalduxh bejn̄ni, catäälirenini.

⁴³ Loj rebejn̄ga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. ⁴⁴ Gubig gunaaga dejtz Jesús te gudajnni ro' xhajbni. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn̄ räjp:

—Dinu gan.

Räjpza Pedr:

—Mastr, ni yu'lu galäii reben̄ xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcäl̄rnibea.

⁴⁷ Che gucbee gunaaga anajn Jesús gudajnni xhajbni, bidxejbni, racejslini gubigni loj Jesús, bazuxhijbni lojni. nez loj guiraa rebejn̄ räjpni xhicuent gudajnni xhajbni näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ Lałni canii Jesús si'c bidzujn̄ te bejn̄ ni siääd roliz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuun Dad Mastr.

⁵⁰ Che biejn̄ diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹ Che bidzujn̄reni rolizni, xtebtis Pedr, Jacoob, Juan näjza xcuzañ dxape'ga biunäjni nen̄ yu'ga. Peta rebejn̄ ni siädnañlni bia'nreni rolä'.

⁵² Cayonduxh guiraa rebejn̄ ni sobga' nen̄ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäñrenini, sa'csi anajnreni agujt dxape'ga. ⁵⁴ Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

⁵⁵ Dxejc guban̄sac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejn̄pacni

(Mt. 10:5-15; Mr. 6:7-13)

¹ Batie' Jesús guitzubitio'p rexpejn̄pacni te badeedni yäl̄rnibee lojreni te cuääreni reben̄dxab lastoo rebejn̄, näjza te gusiajcreni reben̄racxhuu.

² Baxhal̄nirenini te gusule'reni diidx xcuent xcäl̄rnibee Dios näjza te gusiajcreni reben̄racxhuu. ³ Dxejc räjpni lojreni:

—Xhet chanäditu lo nejz, nicla baston̄, nicla bols, nicla yätxtiil, nicla meel; na'cza chanātu tio'p xhajbtu; tejtisni chanātu. ⁴ Chutis roliz bejn̄ cadro guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolizreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujñreni.

Xho gujt Juan ni rutiobnis

(Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujñ Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubañsac lo rebeñgut. ⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubañsac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

Bayaan Jesús gaii miñ bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejñpacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn, gajxh te guejdx ni laa Betsaida.

¹¹ Che gucbee rebejn caro sääreni, huinajlrenini bidxälrenini. Che siäädreni lojni huichaglojnireni, sas gusloj cagusule'ni lojreni xcuent xcälñibee Dios. Basiajczani rebejn ni cayacxhuu.

¹² Che gusloj cayäaz gubijdx, gubig rexpejñpacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadre tedreni guxhijñ lo rerench, neñ reguedxbäz, sa'csi ree xhet yu'di.

¹³ Dxejcti räjp Jesús loj rexpejñpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bälj. Ni'ctis yu' palga dinu chasiiru xhi gau reben xhidajltre.

¹⁴ Luxh najc rebejñga si'cti gaii miñ niguii. Dxejc räjp Jesús loj rexpejñpacni:

—Coljejtz lojreni cuereni xcua-xcuaareni, si'cti tiuubitzugajreni te cuaa.

¹⁵ Si'c bejnrenini, sas gurej guiraa rebejñga si'c. ¹⁶ Dxejc cua' Jesús gaii yätxtiilga näjza tio'p bäljga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäljga, dxejc sanuutis badeednini loj rexpejñpacni te gudisrenini loj rebejñga. ¹⁷ Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

¹⁸ Te dxej lañi cabedx-canab Jesús lo Dios, xtebni näjza rexpejñpacni, gunabdiidxni lojreni, räjpni:

—¿Chuni'c rnii rebejn nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

Jesús rnixgaa xho guetni
(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn.

²² Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xlei Moisés sibälazreni narä, naareni dina gacä Crist ni cabäaznu. Sugu'treni narä Xi'n Dios ni gujc Niguii, niluxh sibansacä ni riojn dxej.

²³ Dxejc räjpni loj guiraareni:

—Palga chu tejtü rlaiz guirinajl narä, nanab jällajzni xhixtenni, te guixe-guixee guntisni nani gudedä gunni. ²⁴ Sa'csi nani rlaiz guini-azdzu'tzni xcälñabajñni, sunijtni yälñabajñ lo Dios; luxh nani runijñ xcälñabajñni xcuent xtidxä, sica'ni yälñabajñ par tejpas. ²⁵ Sa'csi xhi gaan gun te bejn palga xca'ni guideb guedxliuj, luxh gunijtni xcälñabajñni lo Dios? ²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäazani cheni jialä si'c reii guideb yälrdimbicha' xten Xtaä näjza rexanglni. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcälñabee Dios.

Bachaa xho rluiloj Jesús
(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dxejcru huinä Jesús Pedr näjza Jacoob näjza Juan, huijreni jiaa yejc te dajn te guredx-gunabni loj Dios. ²⁹ Lañi cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini. ³⁰ Biricajza tio'p dade' caninäjreni. Redade'ga najc toMoisés näjza Elías. ³¹ Rdimbicha'za redade'ga. Caninäjreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacal lojreni; che bire'ch bacal lojreni bahuireni lo yälrdimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lañi caniini si'c, bire' te za gusloj cayajt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuireni sugaxteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuireni ro'c.

Basajc Jesús te biuux ni guyu' beñdxab lastooni
(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäjz Jesús. ³⁸ Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä.

³⁹ Luxh beñdxab rniaazni, sas ruscuedxa'nini, rajcni si'c yälguidxbej, rbääni bitzun ro'ni, rusacsiduxhnini, luxh dini gusaanni. ⁴⁰ Agunabä loj rexpejnpaclu nibääreni beñdxabga, luxh di niajcdini.

⁴¹ Dxejc badzu' Jesús diidxre, räjpni:

—¡Bejn ni di chalilajz, benguijdx! ¿Gucli chunäätu, gucli gunä huant la'tu? ¡Gudanä xi'nlu ree!

⁴² Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj bendxabga, basiacgajcni biuuxga, dxejc badeednini lo xtadni. ⁴³ Guiraa rebejn bidxeloduxh yälribeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lalni cadxeloj rebejn lo recos ni bejn Jesús, räjpni loj rexpejnpacni:

⁴⁴ —Colcuadiajgsa'c rediidxre, na'cza jiällajztreni, sa'csi sutedreni narä Xi'n Dios ni gujc Niguii ladznäa rebejn.

⁴⁵ Niluxh di rexpejnpacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzarenini niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per guchee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhał narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpendxab neñ lastoo bejn con xcälribee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacoob näjza Juan

⁵¹ Che siäddzujn redxej ni chää Jesús xhaguibaa, bejn ni xhigab chääpacni guedx Jerusalén. ⁵² Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c. ⁵³ Luxh rebejn samaritan di rlajzreni gudedlaarenini te lajt cadro jia'nreni, sa'csi najnreni chääreni guedx Jerusalén. ⁵⁴ Che biejn diajg Jacoob näj Juan, tio'p xpejnpacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebenguejdxga si'cni bejn Elías?

⁵⁵ Dxejc bahuu Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. ⁵⁶ Sa'csi narä Xi'n Dios ni gujc Niguii dina niälä te gudzucaä xcäl'nabajn rebejn. Narä biälä te guslaäreni lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷ Lalni sääreni lo nezyuj, biääd te bejn gunii loj Jesús, räjpni:

—Dad, narä rlazä jiädnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz räjp xpiliääreni, remane' ni rutajt räjp xpitiääreni, niluxh narä Xi'n Dios ni gujc Niguii, dina gapä nicla te lajt cadre guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tz xgaä xtaä, dxejcru jäädnaä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diid xcuent xcälrbibee Dios.

⁶¹ Dxejc räjp steeni lojni:

—Dad, rlaä jäädnaälu, niluxh basanxgaä chasadidxä resa'ä ni tre' rolizä.

⁶² Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzn di gacdi gunni dzuun lo xcälrbibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadre nanab tedni. ² Räjpni lojreni:

—Guliipacni, cayacduxh cose'ch, niluxh guxi najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni. ³ Colchäj la'tu; colhuii xho ruxhalä la'tu si'c xiil galäi recuyo't sa'csi sunnäjreni la'tu si'ctisni rlaizreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guiniäjt bejn lo nejz. ⁵ Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.” ⁶ Palga najcni te bejn ni rdxagajz yärbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu. ⁷ Coljia'n lagajc roliz bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj xca'ni xcuent dzuunga. Coljia'n tejtis lajt dxejts ni chutu lo guejdxga. ⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. ⁹ Colgusajc rebenracxhuu ni yu' ro'c, colye'tz lojreni: “Abidzujngajxh xcälrbibee Dios.” ¹⁰ Palga jiu'tu te guejdx cadre di rlaizreni gucuadi-ajgreni xtiidxtu, colrii lo nezyuj, ro'c colye'tz lojreni: ¹¹ “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzungajxh xcälrbibee Dios lojtu.” ¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

¹³ Räjpzani:

—¡Probe'tu bejn guedx Corazín! ¡Probe'zatu bejn guedx Betsaida! Paru nuhuii rebenzajt ni gubajn guedx Tiro näja Sidón remilaagwr ni benä nez lojtu, pet gucli nusiechlaizreni, niajcwreni ladnagas, nibejzaren lo cobdäj si'c te seen abasiechlaizreni. ¹⁴ Che gun Dios fis rextojl rebejn guedxliuj, guxiiru gac xfis Dios lo rebenzajt ni gubajn guedx Tiro näja Sidón. Fisoru gun Dios reguedx Corazín näja Betsaida. ¹⁵ Luxh luj

guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

¹⁶ Rappzani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhaļ narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhaļ Jesús, rbaduxh lajzreni, räjpreni:

—Dad, näjza rebenḁxab rusobdiajg xtiidxnu che rusä'tnu lajlu.

¹⁸ Räjp Jesús lojreni:

—O'n. Ni'cni narä bahuiä che gunijt xcälrnibee benḁxab, bitejbni xhaguibaa si'c bianij xten guzii. ¹⁹ Colgacbee. Narä runidxä yälrnibee lojtu te guläjtü yejc bäl näjza yejc naxejb; runidxäza yälrnibee te guntu gaan lo xcälrnibee benḁxab. Xhetliidi gun daan la'tu. ²⁰ Na'c guibalajztistu sa'csi rusobdiajg rebenḁxab xtiidxtu; colguibalajzru sa'csi acuaj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxiän xten Dios, dxejc räjpni lo Dios:

—Rliä'pä xpala'nlu Xtaḁä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtaḁä, sa'csi si'c rlaizlu gunlu.

²² 'Guiraa recosre abaniidxlu loä Xtaḁä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejbli Xtaḁä, xtebtis narä ni najc Xi'nlu, con rebejn ni rlaizä gumbee luj.

²³ Dxejc bahuüi Jesús loj rexpejn pacni, räjpni lojtisreni:

—Chicbaa la'tu näjza renani ruhüi guiraa nani cahuiilojtu. ²⁴ Sa'csi rniliä lojtu, balti redade' ni gunii xtidx Dios galoo, baltiza rereii rlaiz nuhuiireni guiraa ni cahuiilojtu, niluxh direni nuhuiini. Rlaizreni niejn diajgreni rediidxre ni cayejn diajgtu, luxh di diajgreni niejnni.

Xcuent te beḁhuen ni siääd Samaria

²⁵ Dxejc huisulüi te mastr xten lei, huininäjni Jesús, rlaizni nuxhiidni Jesús lo xtiidxni, gunabdiidxni lojni:

—Dad, Mastr, ḁxhini'c nanab gunä te guibanḁnää Dios par tejpas?

²⁶ Sas räjp Jesús lojni:

—ḁxhini'c caj lo guijtz xten lei? ḁxho roļluni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälaizza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yälḁabajre.

²⁹ Per mastr xten lei, rlaizni nidedbiani ni'cni gunabdiidxni loj Jesús räjpni:

—ḁxchuni'c najc resa'ä?

³⁰ Dxejc räjp Jesús lojni:

—Te beḁ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnneni guiraa xhixtenni, näjli xhajbni ni

najcwni. Sas gudijnrenini, basa'nrenini ro'c, guxii cayäädx nugu'trenini.
³¹ Gudejd te bixhojz ni siääd laadxnu, sazaj lagajc nezyujga, cheni bahuini lojni, alga gudejdni stee laad, sä'tini. ³² Gudejdza te levita, bejn ni rujnza dzuun nen guidoo. Che bidzujñni cadro naga' bejnga, gudejdni stelaad, sä'tini. ³³ Dxejcti te beñ Samaria, lañni sääni biaj, gudejdni nezyujga, bidzujñni cadro naga' bejnga. Che bahuini lojni, balaslajznini. ³⁴ Gubigni loj bejnga, basälni se't näjza bin loj bejn ni nadxälguidx, dxejc batejbnini te la' lajd. Dxejc bascuibnini dejtz lagajc xmanni, huinänini cadro rudedlaareni yu', ro'c cuanäjnini. ³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo mastr xten leii:

—¿Chu tej lo guidxon rebejnga najc si'c sa' xten dade' ni biajb ladznaa gubaan?

³⁷ Dxejc räjpni loj Jesús:

—Ni balaslajz bejnga.

Dxejc räjp Jesús lojni:

—Huij te sigajcza chayejnlu.

Bidzujñ Jesús rolijz Mart näjza Marii

³⁸ Lañni huinuu xnezyujni, bidzujñni te guejdx. Ro'c bidxaagni te gunaa ni laa Mart ni huinänini rolijzni. ³⁹ Yu' te bäjl Mart ni laa Marii, luxh laani gurejni cuä' ni' Jesús te cacuadiajgni xtiidxni. ⁴⁰ Mart cagusquejñni cayujñni xhi gaurení. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¡Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

¹ Te huält cabedx-canab Jesús loj Xtadni Dios, suga'ni te lajt. Che guluix cabedx-canabni, gunii te xpejñpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejñpacni.

² Dxejc räjp Jesús lojreni:

—Che cuedx-guiniabtu lo Dios, scree colnii:

Xtadnu ni yu' xhaguibaa,

suchä'p xpala'nlu, sujiääd xcälñnibeelu.

Sugac si'ctisni rälajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquinnuni.

⁴ Basiäjl lajzlu redojl xtennu si'cni riäjñ lajznu redojl ni rujn rebejn loonu.

Na'c gusaanlu jiajbnu lo xcälñnibee benñxab.

Baslaa nuurnu lo dojl.

⁵ Dxejc räjpza Jesús lojreni:

—Paru tejt yu' te xamügwini, luxh guidzujñni rolijzni garol yääl, gäbni: “Xamigwä, banidxlaa choñ yätxtiil, ⁶ sa'csi bidzujñ te xamigwä rolizä ni bazañ biaj, luxh xhet ra'pädi te gudedä xhi gauni.” ⁷ Xhixh

sinii ni naga' nen xyu'ni, gäbni: "Na'c riädtie'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu." ⁸ Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquintisni te na'cru gutie'chni bacalni. ⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguil xhi cos, rdxälnini; nani rusejz rolä', suxhalzareni lojni.

¹¹ 'Paru tejtü ni najc dad, jääd te xi'ntu guiniabni te yätxtiil lojtu, ðla sudeedtu te guij, ä? O palga guiniabni te bäjl, ðla sudeedtu te bäl, ä? ¹² O palga guiniabni te tzutbejt, ðla sudeedtu te naxejb, ä? ¹³ Palga la'tu, ni najc beñdojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yälrnibee xten beñdxab
(Mt. 12:22-30; Mr. 3:19-27)

¹⁴ Guläa Jesús te beñdxabgop lastoo te bejn. Che birii beñdxabga lastoo bejnga, guslogajc canii bejnga, dxejc bidxeloduxh reben xhidaalga. ¹⁵ Dxejc yu' reni räjp:

—Niguiire rbää reben dxab con yälrnibee xten Beelzebú ni rnibee loj reben dxab.

¹⁶ Sgaiireni rlajz guquuilrenini, ni'c canabreni gunni te seen ni siääd xhaguibaali. ¹⁷ Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaclaa sinijt gubierga lo guedxliuj. Palga te famil rdilnä j lagajc sa'ni, di gaclaa sinitloj familga. ¹⁸ Palga guiliä' sa' reben dxab, ðxho mood chanuu xcälrnibeereni? Dee rniä sa'csi la'tu rniitu narä rbää reben dxab con lagajc yälrnibee xten Beelzebú. ¹⁹ Palga si'c najcni, ðchuni'c rudeed yälrnibee loj rexpejntu te rbääreni beñdxab? Lagajc laareni ruluii xhet laadi rujntu xhigab. ²⁰ Palga narä rbää reben dxab con xcälrnibee Dios, ni'cni ruluiloj abidzujn xcälrnibee Dios lojtu.

²¹ 'Cheni suga' te beñdaan, ca'ni guib, canä jni rolizni, rutliidi ruhualdi rexhixtenni. ²² Niluxh che jääd stee ni nadipru lo beñdaanga, rudx-agdijlnini, rujnni gaanni, dxejc rudzucajni xquibni ni badeed yälbeñdaan lojni, dxejc sajç chanäni guiraa rexhixtenni. ²³ Reni xhet yu'di xladä, rdxe'chreni loä. Ni di gutopnä j narä, rutie'chni.

²⁴ Räjpzani:

—Cheni rii te beñdxab nen lastoo te bejn, ricansajni nez lo reyubijdz, caguilni cadro gusilajzni. Che cad rdxäldini, rujnni xhigab, naani: "Guibisacä rolizä cadro biriä." ²⁵ Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. ²⁶ Dxejcti rixiini sgajdz beñdxab ni rujnru latsiaj lojni. Dxejc riu'reni nen lastoo bejnga, dxejc nalasru ria'n bejnga loj ni gujçni galoo.

Chicbaa renani riu xtidx Dios

²⁷ La! ni canii Jesús rediidxre, te nane' ni yu' lo reben xhidaalga dipli guniini, räjpni:

—jChicbaa nan ni biädnälu guedxliuj! Chicbaaza nani baslaa luj.

²⁸ Luxh laani räjpni:

—Xhet si'c di najcni; chicbaaru rebejn ni rucuadiajg xtidx Dios, ni ruzoobza xtiidxni.

Rebenguijdx rniab te milagwr si'c te seen

(Mt. 12:38-42; Mr. 8:12)

²⁹ Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj benguidxduxhrenei, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguii, gacä te seen lo rebejn ni nabajn naj. ³¹ Cheni guidzujn dxej ni gac fis sistie te nane' ni gujc rein lo reyuj ni tre' ladbäjägw, sucuaquijni rebejn ni tre' guedxliuj naj sa'csi laani biriini zitduxh te bacuadiajgpacni yäl najn xten Salomón. Ree suga' galäiitu tej ni sacduxhru lo Salomón, ³² luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj nen redxej ni gac fis. Dxejc sucuaquijrenei rebejn ni nabajn naj sa'csi laareni, che huinäli Jonás xtidx Dios lojrenei, basiechljazrenei, basa'nrenei xtojlenei. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³ Räjpzani:

—Rut rucuaguijdi te bajl, te gusujnini te lat xhiga'tz, niclaza nen te caj. Susujni bajlga jiaa te rajc ruhuisa'c chutis ni riu' nen yu'. ³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäjä. ³⁵ Gunatiro te di gac xpianijlu yäl nacäjä. ³⁶ Palga guideb xcäriejnlu yu' bianijtis, xheti te lajt nacäjä, sajc fisa'clu guira'ti, si'c najc che rusanij te bajl nen yu'.

Rucuauquij Jesús refarisee näjza rebejn ni najn leii

(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajn te farisee Jesús chääni rolizni te chatajwni. Sä'tireni. Che biu' Jesús, gurejni lo mex. ³⁸ Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnrenei xhigab si'c racnayareni lo Dios. ³⁹ Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yäl gubaan näjza yällatsiaj. ⁴⁰ ¡Ben nadduxh! ¿La ditu gacbee? Nani benchée dejtzn, benchéeza nenni. ⁴¹ Colyajc nadolajz, colyacnäjä rebejn con ni rniitu, dxejc guiraa recos sajc naya par la'tu.

⁴² ¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguxhtis Dios näjza xcälrinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ ¡Proobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn “xchan Dad” lojtu che rijtu lo guii.

⁴⁴ ¡Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

⁴⁵ Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

⁴⁶ Dxejc räjp Jesús lojrenei:

—jProbe'za la'tu rebejn ni ruluui leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlajztu fal'tuni nicla con te bicuenabäztu.

⁴⁷ 'jProobzatu! Sa'csi runcheetu xpaas redade' ni gunii xtidx Dios galoo, luxh najctu rexajg renani bagu't redade'ga. ⁴⁸ Ni'cni najnpactu xhi gusajcreni, rchagljajzzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcäl'najnni, räjpni: "Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni." ⁵⁰ Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guccheeli guedxliuj. ⁵¹ Guislojni xtiejn toAbel, näjza xtiejnli Zacarias ni bagu'treni galäi nez lodxan nejn guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'jProbe'za la'tu, rebejn ni ruluui leii! Sa'csi rniitu la'tistu rajptu yäl'najn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluui leii näjza re-farisee lojni. Dxejc guslojreni canabdiidxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluui xcuent levaduur

¹ La! ni caniini, bidojp xhidajl mi! bejn ro'c, calaro'li sa'reni. Dxejc gusloj canixgaa Jesús loj rexejnpacni, räjpni lojreni:

—Colnati levaduur xten refarisee, rusgueerereni rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nejn reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjpzani:

—Rniä lojtu, xamigwä, na'c guidxejbtu rebejn ni sajcu ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejb nani che abadzucajni yäl'nabajn rajpni yäl'rnibee gusalni la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajcu jio' gaii mane' tio'p melbäz, luxh di Dios jiäl'lajz nicla tej remane'ga. ⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjpzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjlajz Dios laani. Niluxh chutis ni guiniyaj Sprit Dxan xten Dios, di Dios gusiäjlajz xtojlni.

¹¹ 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujn or ni guiniitu, Sprit Dxan xten Dios suluini xhini'c guiniitu.

Reyäl'nasa'c rusajb bejn nen dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yälguxhtis o gacä abogaad lojlu, ä?

¹⁵ Dxejc räjp sac Jesús lojreni:

—Colnatiro, colgantzu' te di rlaiztistu ga'ptu yäl'nasa'ctis sa'csi xcäl'nabajn bejn dini gac yäl'rajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te ben rapduxh. Racaduxh cose'ch lo rexcäjlni. ¹⁷ Dxejcti gusloj bejn xhigab: “¿Xhocha gunä? Dina gapä cadro cucheä recose'ch.” ¹⁸ Sas bejn xhigab: “Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” ¹⁹ Dxejcti siniä lo lastoä: “Lastoä, agulucheelu xhidajl xhi cos, sajlni xhidajl iiz. Basilajz naj, gudajw, gu', bibalajz.” ²⁰ Dxejc räjp Dios lojni: “¡Ben najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?” ²¹ Si'c sisiajc guiraa rebejn ni rguiltis xcäl'nasa'creni lo guedxliujre, niluxh xhet rajpdiñeni loj Dios.

Rcanäj Dios rexi'nni

(Mt. 6:25-34)

²² Che gojl stera't, räjp Jesús loj rexpejñpacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. ²³ Yäl'nabajn sajcruni lo yäl'rajw; tiejxhni sajcruni lo lajd ni rajcw bejn. ²⁴ ¡Colhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu lo rebalooga, ä? ²⁵ Luxh ¿Chu tejtü palga runduxhni xhigab sajç tioobruni sgarol metr? ²⁶ Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷ ¡Colhuii xho rga' reguino'ch! Direni gun dzuun, dizareni gun lajd lo dzuib, luxh rniä lojtu, nicla rei Salomón con guiraa xcäl'nasa'cni, dini nisiuchee si'c rsiuchee reguiiga. ²⁸ Palga rusuchee Dios recuaan ni rga' lo niaa, ni rial nadxex, luxh guixee-huijdx, che agubijdzni, rejçni lo däj, aticaxh Dios suniidx xhi gacw la'tu, ¡bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'c za yätu, na'c chutistu yärsia'. ³⁰ Si'ctis rujn rebenguedxliuj guideb xtijpreni rguilreni rehxicosre. Niluxh xtadtü ni yu' xhaguibaa anajnni xhini'c rquiintu. ³¹ La'tu colquiiltis xcäl'rnibee Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

³² Räjpzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yälguxhtis lo xcälrnibeeni. ³³ Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c neñni xhaguibaa cadro di gubaan jiu' niclaza xcabäj rexhicos. ³⁴ Sa'csi cadro rajptu xcäl'nasa'ctu, ro'cza yu' lastootu.

Nanab susintu

³⁵ Räj pzani:

—¡Col̄susiñ! ¡Col̄hualguij rebajl! ³⁶ Colyujñ si'c remos ni cabäjz guibi' xlam̄reni ni sää te sa', te cheni guibi'ni guxhalgajcreni rolä'. ³⁷ Chicbaa remos ni susiñ che guibi' xlam̄reni. Rniliäpac lojtu, lagajc xlam̄reni sajcwñi xhajbñi sibe'cñi rexmosni lo mex, dxejc lagajc laani sudeedni xhi gaureni. ³⁸ Mase guidzujñni garol yääl, mase guidzujñni cäjyru, palga guidxälñi arexmosni susiñ, ¡chicbaa remosga! ³⁹ Colyacebeepac, paru gacbee baxhuaan xten yu' xhi or̄ guidzujñ gubaan rolijzñi, dini gusaan guxhalreni rolijzñi te cuanreni xhixtenni. ⁴⁰ Näjza la'tu col̄susiñ, sa'csi or̄ ni ditu gun xhigab jiädñi, sidzujñ Xi'n Dios ni gujc Niguii.

Te mos guiidx

(Mt. 24:45-51)

⁴¹ Dxejc gunabdiidx Pedr lojni, räj pñi:

—Dad, ¿la lootisnu rujylu cuentre o la najcni par guiraa rebejn?

⁴² Dxejc räj p Jesús lojreni:

—¿Chuni'c najc mos hueen, mos nasin̄, ni rusannäj xlam̄ni guiraa rexmosni te gudeedni xhi gaureni che gal̄ oor, ä? ⁴³ Chicbaa mosga palga laaca cayujñni che guibi' xlam̄ni. ⁴⁴ Rniliäpac lojtu, lam̄ga sudeed guiraa rexhixtenni te xcanäj mosgani. ⁴⁵ Per palga gun mosga xhigab neñ lastooni: “Saclaa guibi' xlam̄ä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni; ⁴⁶ sibi' xlam̄ni te dxej ni xhet cabäjz dinini, or̄ ni dini gun xhigab guidzujñni. Dxejc sii sudeedni te castigwro lojni, sutiäjlñi te duu dejtzn̄i dxejc sinibeeni jiini, guidxaagni rebejn ni di gusobdiajg diidx.

⁴⁷ 'Mosga ni najñ xhini'c rlañz xlam̄ni gac, luxh dini susiñ, dizani guzoob xtiidxni, sutiälduxhreni duu dejtzn̄i. ⁴⁸ Niluxh mos ni di gan xhi rlañz xlam̄ni gac, ni'c rujñni redzuun ni di xlam̄ni guidxaglañz gac, guxiiru castiigw gacni. Reni rca' xhidajl, xhidajlza riäj̄l gudeedreni; loj reni rca' yäl̄rnibeduxh, xhiroobza siniabñi lojni.

Rlia' Jesús bejn lo sa'ni

(Mt. 10:34-36)

⁴⁹ Räj pza Jesús:

—Narä biälä te gucuaguiä guedxliujre; ¡malaii alagusloj cayejcni! ⁵⁰ Niluxh nanab tedä te yäl̄robnis ni säloj te trabajwduxh, ni'c cayuduxhä yärsia' cheni chale'lini. ⁵¹ ¿La rujntu xhigab biälä te jiädñä yäl̄rbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵² Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. ⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzn̄i, luxh gulijzga sidxe'ch lo xnansuegrni.

*Reseen xten retiem**(Mt. 16:1-4; Mr. 8:11-13)*⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riajbni. ⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni. ⁵⁶ iBejn ni rusguee! La'tu racheetu xhi säloj reseem ni rien lo guedxliuj näjza xhaguibaa, ¿xhicuent ditu gan xhi säloj retiem ni dxunnu naj, ä?

*Basiäjł diidx con rebejn ni rdxe'ch lojlu**(Mt. 5:25-26)*⁵⁷ Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, lałni sanāni luj ro jusgaad, basiäjł diidx con laani lo nejz, te na'c chanāni luj lo reguxhtis, sa'csi dxejc reguxhtis suteedreni luj lo reguixhajg te gusāureni luj neñ latzguiib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13*Colgusiech lajztu te di guettu*

¹ Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't neñ guidoo, bagu'chni xtiejnreni con xtiejn reman ni siädnāreni si'c gojn lo Dios. ² Sas räjp Jesús lojreni:

—¿La rujntu xhigab si'c gusajc reben Galileega sa'csi najcruren i ben dojl lo rebejn lajdxreni? ³ Narä rniä, dini gac si'c. Palga di'tu gusiechlaiz sigajcza sejt guiragajctu. ⁴ O xcuent guitzunbichon rebejn nani gujt che gubixh te or ni laa Siloé yejceni, ¿La rujntu xhigab najcruren i ben dojl lo rebejn ni rbäiz guedx Jerusalén, ä? ⁵ Narä rniä, dini gac si'c. Palga di'tu gusiechlaiz, sigajcza sejt guiragajctu.

*Xcuent te yag iigw*⁶ Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxālni. ⁷ Dxejc räjpni loj bejn ni canāj xyujni, agujc chon ijz siädtiä ninejxh lo yajgre, luxh xhetini. Batin yajgre. iXlia'si sujni lo yuj! ⁸ Luxh xmosni räjp lojni: “Dad, basaanni steb ijz, guslaā yuj ni'ni, gusälä abonni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusajc Jesús te gunaa

¹⁰ Te dxej ni rusilajz rexpejn Israel cagului Jesús neñ te guidobāz. ¹¹ Ro'c suga' te nane' ni agujc tzunbichon ijz racxhuuni. Benḏxab cagus-coodni, niluxh di gacdi sulii. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälgujdxga luj.

¹³ Che basujni naani yejcni, lagajc dxejc gujc gusulii nane'ga. Dxejc guslojni calā'pni xpala'n Dios. ¹⁴ Luxh dade' ni rnibee guidobāz bidxe'chni sa'csi basajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajg gun bejn dzuun; neñ redxejga sajg jiäädte te jiajctu, per na'c jiäädte dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—jBen rusguee! ¿La di chutis tejtuxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶ Luxh nane're najc te xagdoo toAbram, nani numbee Dios, ni agujc tzunbichon ijz baliib bendxabni, ¿la digacdi guixecni lo xcälgujdxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸ Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj?

¹⁹ Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhacwni.

Xcuent cojb ni rusaguij

(Mt. 13:33)

²⁰ Guniiä Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios? ²¹ Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa

(Mt. 7:13-14, 21-23)

²² Huinuu Jesús xnejzni sääni guedx Jerusalén. Lañi sadejdni reguejdx näjza rerench caguluiini rebejn. ²³ Dxejc gunabdiidx te bejn lojni, räjpni:

—Dad, ¿la guxii najc rebejn ni calaa loj rextojlreni, ä?

Dxejc räjpni lojreni:

²⁴ —Dää rolä' cadre jiu' bejn xhaguibaa. Ni'cni coltip lajztu te jiu'tu

ro'c, sa'csi xhidajl bejn rlaiz jiu'reni ro'c, niluxh direni gun gaan. ²⁵ Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädte.” ²⁶ Dxejc guislojtu guiniitu: “Bidx-unnäänu, bidaunäänu, bidunnäänu luj, baseedlu nuurnu lo xnezyuunu.”

²⁷ Dxejc siniini lojtu: “Rniliä lojtu, dipacnä gumbeä la'tu. Coljij guiraatu, benlatsiaj.” ²⁸ Dxejcti sonduxhtu, chubejli läjytu che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. ²⁹ Dxejga sidzujn xhidajl benziyt ni siääd ladjiaa, ladjiät, ladbägw, näjza ladbee, te jiu'reni lo xcälrnibee Dios xhaguibaa, ro'c sibejzarenini lo mex. ³⁰ Luxh yu' reni rujntu xhigab guxii sajcreni naj, sacduxhreni dxejc. Yu'za reni rchalotu sacduxh naj, xhet sajcdireni dxejc.

Jesús biin xcuent guedx Jerusalén

(Mt. 23:37-39)

³¹ Lagajc dxejga, bidzujn gaii refarisee, räjpreni lojni:

—Huij, biunejz ree, sa'csi Herodes rlaiz ju'tlu.

³² Dxejc laani badzu'ni diidxre lojreni, räjpni:

—Gojz lo bäjzga, ben rusguee: “jBahui! cabää rebendxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä

xtzunä.” ³³ Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxitis Jerusalén sajc guetni.

³⁴ 'iProbe'tu, la'tu beñ Jerusalén! Rugu'ttu redade' ni riädnni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. ³⁵ Bahuui xho bianxteb xquidootu. Ni'cni arnixgaä lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”

14

Rusijc Jesús te bejn ni guidxa guij

¹ Che gojl te dxej ni rusilajz rexpelj Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús, ² sa'csi nez loj Jesús suga' te dade' ni guidxa guij tiejxhni. ³ Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusijcni te beñracxhuu dxej ni rusilajz bejn o la di gacdini?

⁴ Per laareni dxitis suga'reni, niäutis ro'reni. Dxejc cua' Jesús beñracxhuuga, basiajcnini, gunibeezani biunejzni. ⁵ Dxejc räjpni loj refarisee:

—Chu la'tu ni rajp te bur o te gon, palga jiajbni neñ te bisie, ¿la ditu chalägajcni mase najcni dxej ni rusilajz bejn, ä?

⁶ Dxejc di niajcnini nudzu'reni diidx lojni.

Reni bidon chää sa'

⁷ Cheni bahuui Jesús xho rchagljaz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

⁸ —Cheni guidonñu chäätu te sa', na'c guntu te cuetu cuä' rebejnro, te di guidzujñ te beñroru lojlu, ⁹ dxejc jiääd bejn ni cayujñ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. ¹⁰ Maazru hueen, cheni guidonñu chäälu te sa', huicue lo mex ni zuj lo le' te che guidzujñ bejn ni cayujñ lanij, naani lojlu: “Xamigwä, gudaacuelu neñ yu' cadro rbej rebejnro.” Si'c sä'p xpala'nlu nez loj guiraa rebejn ni sobganäjlu lo mex. ¹¹ Sa'csi ni rlazj chä'p xpala'nni nez loj rebejn, sianxtujñni nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räjpzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cueedxtislu reexamigwlu con rebejtzlu, con resa'lu, ni claza rexpisñlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. ¹³ Che gunlu te lanij, alga gurejdx rebenproob, rebencoj, näjza rebenlotiä'p, ¹⁴ dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibanñsac rebejn loj rebengut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadro rnibee Dios.

¹⁶ Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiädtaunäjrenini. ¹⁷ Che bidzujñ or ni gaureni, baxhal dade'ga te xmosni chatejdxni rebejn ni abidonñ, räjpni lojreni: “Colchäj, asuchee lo

mex.” ¹⁸ Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹ Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰ Steeni räjp: “Entis bachñaä ni'cni di gacdi jiälä.” ²¹ Che gubi' mosga, badeedni diidx lo xlamni xhi räjp rebejnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebennatiujnc.” ²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³ Dxejc räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. ²⁴ Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵ La! sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtni, näjza rebisiajnini, nägajcza xcäl nabajnni, di gacdi gacni te rexpenä. ²⁷ Palga yu' chutis tej ni di rlajz tedni trabajw te jiädnajlni narä, di gacdi gacni te rexpenäpac. ²⁸ Chu tejtü ni rlajz gun te yuro, ni di gunxgaa xhigab lacti meel chanä yu'ga, te guidon la sajz guluuxnini. ²⁹ Didi cheni abejnni recimient, di gacdi guluuxnini, dxejc guiraa reni fii lojni suxhiznäjrenini, ³⁰ säjpreni: “¡Bahulaare! Bejnre gusloj bencheeni te yu' per di niajcdi nuluuxnini.” ³¹ ¿Chu te reii ni gun xhigab chachagdiyl ni stee reii, ni di gunxgaa xhigab don laa sajz gunni gaan con tzuu mil soldaad loj stee reii ni siääd con gajl mil soldaad, ä? ³² Palga di gacdi gucuanäjnini, che gacheeni zijtli siääd stee reiiga, suxhalni te xpejnini chanab yälrbexi lojni. ³³ Ni'cni palga chutis tejtü di gusaan rexhixtenni te jiädnajlni narä, di gacdi gacni te rexpenäpac.

Che diru sejd gac nadzujy

(Mt. 5:13; Mr. 9:50)

³⁴ Räjpzani:

—Huen najc sejd. Per cheni diruni gac nadzujy, ¿xho gacru gac nadzujyni? ³⁵ Xhetru sajcdini, nicla te chääni loj yuj, niclaza te chääni lo abon. Gusäl'tis bejn sejdga. Reni rlajz gucuadijg xtidxä, sucuadiagsa'creni.

15

Xcuent xiil ni gunijt

(Mt. 18:10-14)

¹ Guiraa reni rusquijx impuest näjza rebendojl cabigreni loj Jesús, te cuadijgreni rextiidxni. ² Refarisee näjza rebejn ni ruluii leii gusloj camojmreni, räjpreni:

—Bejnre rusaan rbig rebendojl lojni, luxh raunäjzanireni.

³ Dxejcti bij Jesús cuent ni ruluiire lojreni, räjpni:

⁴ —Chutejtü ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? ⁵ Luxh che guidxäl'nini sibaduxh lajzni, dxejc sutzuubnini ro xhajcwni. ⁶ Che guidzujnni rolijzni sutojpn rexamiigwni näjza rexpisinni te gäbni lojreni: “Colguibalaznä narä sa'csi abidxälä xile' ni gunijt.” ⁷ Rniä lojtu, sigajcza su'ru yälrbalajz xhaguibaa xcuent tejtis bejn

ni guibig lo Dios ni gusiechlajz xtojlni quela xcuent tapbitzubigaa bejn ni di guiquin gusiechlazreni xtojlni.

Xcuent meel ni gunijt

⁸ Răjpzani:

—Sigajcza te gunaa ni rajp tzuu meel, palga chasălni tejni, ȝla dini gusanij te bajl te guloobni nen yu' hasta guidxălnini, ä? ⁹ Luxh che guidxălnini, sutojpni rexamiigwni năjza rexpisinni, săjpni lojreni: “Colguibalaznăj nară sa'csi abidxăla meel ni gunijt.” ¹⁰ Rniăza lojtu, sigajcza sibalajz rexangl Dios xhaguibaa xcuent te bendojl ni rusiechlajzni.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejc xi'nni ni najc huinruga, răjpni lo xtadni: “Dad, baniidx yălnasa'c nani nungăjl xca'a.” Sas badeed xtadni xerensni. ¹³ Di niacלא, balsi dxej gudejd, chela bato' xinhuinni guiraa xhixtenni, dxejc săăni, bidzujnni te guedxzijz. Ro'c banijtni guiraa xmeelni lo recosguijdx. ¹⁴ Che abanijtni guiraa xhixtenni, biăăd te gubinduxh guedxzijzga cadro yu'ni. Sas guslojzani calaanni. ¹⁵ Dxejc huitiilni dzuun lo te benguejdxga. Baxhal bejngani te huigajpni cuch lo xyuj dade'ga. ¹⁶ Luxh calanduxhni bejnni xhigab malaii sajz gauni recuaan ni najc si'c lia ni cayajw recuch, niluxh rut badeeddi xhi niajwni. ¹⁷ Lal ni cadejdni trabajwga, bianij xcăriejnni bejnni xhigab, naani: “Balti rexmos xtadă rausa'c, ria'nru xhi gaureni. Luxh nară ree calanduxhă, ameerli guetă. ¹⁸ Guibi'ălis ladxă, rolizj xtadă, găpă lojni, Dad, banită lo Dios năjza lojlu. ¹⁹ Diru nungăjl guirilaă xi'nlu. Cua' nară si'c te xmoslu.” ²⁰ Dxejc gunazgajcni nejz te gubi'ni rolizj xtadni.

'Cheni zijtru siăădni, bahuii xtadni lojni. Dxejc balaslajznini, ruxunlini, huichaglojnini, sas gudăăznini, bachagro'ni lojni. ²¹ Dxejc răjp xi'nni lojni: “Dad, abanită lo Dios năjza lojlu. Diru nungăjl guirilaă xi'nlu.” ²² Per răjp xtadni loj rexmosni: “Coltană te ladsa'c, colshuajcwnini xi'nă, colgusăl te niil bicueănaani, xcajza te gura'ch ni'ni. ²³ Coltană te biser ni guro' colgu'tni. ȝColsqejn te guidaunu, jiennu te lanij! ²⁴ Sa'csi xi'năre abenă xhigab gujt, luxh năj si'cni agubansacni, gunijtni niluxh năj abidxăjl ni.” Dxejc guslojreni bejnreni te lanij.

²⁵ 'Lal ni cayajc dee, xingangalooni cayujn dzuun lo niaa. Che gubi'ni, siăădzungajxhni rolizjni, che biejn diajgni cayel rolizjni, caguya'zaren. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc răjp mosga lojni: “Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni.” ²⁸ Dxejc bidxe'ch xingangalooni. Naadtini jiu'ni rolizjni. Che gucbee xtadni naadtini jiu'ni, bihuii xtadnini te gunabni jiu'gani. ²⁹ Dxejc răjpni lo xtadni: “ȝBahuilaa! Agujc xchej cayună dzuun lojlu, luxh rusobdiagă guiraa xtiidxlu, per nicla tej huălt gajdlu guniidx nicla te dxibe' loă te gună te lanij con rexamigwă. ³⁰ Luxh năj ni abidzujn xi'nlu, ni banij xmeellu con regunadxab, xhoxh bagu'tlu te biser guro' te cayujnlu xlanijni.” ³¹ Dxejc răjp xtadni lojni: “Xi'nă, sugagajclu loă, luxh guiraa ni rapă najc xtenlu. ³² Niluxh năj riăjpac jiennu lanij, guibalaaznu, sa'csi bejtzlu ni benă xhigab agujt, agubi'ni năj, najcni si'cni gubansacni; gunijtni, năj abidxăjl ni.”

16

Xcuent te ni rnibee loj remos

¹ Dxejc cayujyza Jesús stee cuent loj rexpejn pacni, räjpni:

—Guyu' te benrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn ni rnibee loj rexmoslu xhetlaadi cayujnni cagunijtni rexhixtenlu.” ² Dxejcti gurejdx xlamnini, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” ³ Dxejc bejnga bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. ⁴ Ananä xhini'c gunä te che dirunä ga'pä dzuun, sibejdx rexamigwä narä rolizreni.” ⁵ Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzunxgaa: “¿Lac nazääblu lo xlamä?” ⁶ Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtze, bacuaa tiubitzuutis baril nazääblu lojni.” ⁷ Dxejc gunabdiidxni loj steeni, räjpni: “¿Luj a'? ¿Lac nazääblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzu; bacuaa tajtis dximro.” ⁸ Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

⁹ Rniä lojtu, colquuil rexamiigwtu con reyäl'nasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' rolijztu par tejpas.

¹⁰ Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'cni dzuun lo te dzunro. ¹¹ Ni'cni palga xhetlaadi cuaräl'näjtü reyäl'nasa'c xten guedxliuj, jxho guniidx Dios reyäl'nasa'c xtenni lojtu! ¹² Palga xhetlaadi cuaräl'näjtü xhixten bejn, ¿chu guniidx lojtu ni gac xtenpactu, ä?

¹³ Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios laj ni sanälajztisni xcäl'nasa'cni.

¹⁴ Mbaj naj, refarisee, sa'csi rchaglazduxhrene meel, cacuadi-agdzu'tzreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctu bejn ni ruhuii rebejn lojtu, naareni bensacduxhtu, niluxh acanajn Dios xhi xhigab rujntu nen lastootu. Sa'csi guiraa ni rchalajtju najc yäl'nasacduxh, guiraa ni'c rbixhlajz Diosni.

Xleii Moisés con xcäl'rnibee Dios

¹⁶ Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcäl'rnibee Dios, ni'cni xhidajl bejn cagusutijp lajzni te jiu'reni loj yäl'rnibeega.

¹⁷ Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Ruluii Jesús xcuent ruro'n sa' bejn
(Mt. 19:1-12; Mr. 10:1-12)

¹⁸ Răjpzani:

—Palga guro'n te bejn chäälni, dxejc guchnaani stee gunaa, rujnni dojl, luxh nani ruchnaa te gunaa ni abaro'n chäälnini, niguiiga rujnzani dojl.

Te benrajp năjza Lázaro

¹⁹ Răjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro. ²⁰ Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni. ²¹ Rlajzni maläi xho gunni gauni nani rtejb loj xmex benrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. ²² Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti năjza benrajpga gujt, huicua'tztirenini. ²³ Che yu'ni gabijl cadro rij guiraa rebendojl, ro'c cadejdn trabajwduxh. Dxejcti guläsni lojni, bahuini zitduxh cadro suganăj Abram Lázaro. ²⁴ Dxejcti guredxaduxh benrajpga, răjpni lo Abram: “iXtadä Abram! Balazlajz narä, baxhal Lázaro guhuajdxni yejc bicuenaani nis te gusiälyujni ludxä, sa'csi ree cadedä trabajwduxh lo guiboo.” ²⁵ Luxh răjp Abram lojni: “Xi'nä, basaa lajzlu che gubajnl lo guedxliuj gojplu guira'ti xhixtenlu, luxh sigajcza Lázaro gudejdn trabajwduxh. Per naj ree casilajzni, naj luj cadejdlu trabajwduxh. ²⁶ Luxh di gacdi jiääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jiäädreni loonu.” ²⁷ Dxejcti răjp benrajpga lojni: “Rniabduxhä lojlu, xtadä, baxhallaa Lázaro chääni roliz xtadä, ²⁸ sa'csi ro'c yu' gaii betzä, te chalijdxni laareni, te gusiechlajzreni, te di năjza laareni jiäädreni ree cadro rdejd bejn trabajwduxh.” ²⁹ Dxejc răjp Abram lojni: “Arajpreni guijt cadro caj xleii Moisés năjza xtidx redade' ni gunii xtidx Dios, sugusobiajgreni rediidxga.” ³⁰ Luxh benrajpga badzu' diidxre, răjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlajzreni.” ³¹ Dxejc răjp Abram lojni: “Palga direni gusobiajg xtidx to Moisés năjza xtidx redade' ni gunii xtidx Dios, dizareni chalilajz xtidx te bejn ni guibansac loj rebengut.”

17

Riesgw jiajbni lo dojl

(Mt. 18:6-7, 21-22; Mr. 9:42)

¹ Răjp Jesús loj rexpejn pacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. ² Maaz guliibni te guij xten molin guejnni, gusäl bejn ni lo nisdoo cadro jiätro quela gunni jiajb rexi'nä ni ahuililajz xtidx. ³ Colsusin!

⁴ Palga gun bejtzlu dojl lojlu, balijdxni. Palga gusiechlajzni, basiäjl diidx con laani. ⁵ Masque gajdz huält nen teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäjl lajzlu”, basiäjl lajz con laani.

Bastioob xcärlililaaznu

⁵ Gunii rexpejn pacni lo Jesús, răjpreni:

—Dad, baniidxru yärlililajz loonu.

⁶ Dxejc răjp Jesús lojreni:

—Palga rajptu yälirilajz, mase najcni si'cti te bedzbäz xten muxhtas, sajç gäbtu lo yagro rec: “Biliädxa' ro'c, guzuj galäi nisdoo”, susobdiajg yajgga xtiidxtu.

Ni riäjl gun te mos

⁷ Räj pzani:

—¿Chu tejtu ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? ⁸ Dini gäb si'c. Niluxh säjpni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejç sajç gauzalu, yäzalu.” ⁹ Dini gudeed xquixtios lo mosga sa'csi rujnni recos ni gunibeeni sa'csi si'c riäjl gunni. ¹⁰ Sigajça la'tu, che luux guntu guiraa redzuun ni guniä guntu, riäjl guiniitu lo Dios: “Najcnu mos ni xhet sajcdi, nani riäjl jiennu, ni'ctis biennu.”

Basajç Jesús tzuu bejn ni ral tiejxhrene

¹¹ La! ni sasaj Jesús nez guedx Jerusalén, gudejdni loj región Samaria näjza región Galilee. ¹² Che biu'ni tej reguejdxga, huichagloj Jesús tzuu bejn ni rajc te yälguidx ni ral tiejxhrene, niluxh zijtru guzujreni. ¹³ Dxejç rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuui Jesús lojreni, räjpreni lojreni:

—Colchäj, te fii rebixhojz abiajctu.

La! ni sääreni, bia tiejxhrene. ¹⁵ Dxejç tejreni, che bahuui abiajçni, gubiguxunni, cabedxa'ni calä'pni xpala'n Dios. ¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te bejn Samaria. ¹⁷ Dxejçti räjpre Jesús lojni:

—¿La et tzuudi najc reni biajç, ä? ¿Con sgaareni? ¹⁸ ¿La rutru gubi'di loä te guiliä'preni xpala'n Dios, xtebtis benzijtre, ä?

¹⁹ Dxejç räjpre Jesús loj bejnre:

—¡Huisulii, huij! Abiajçlu sa'csi huililajzlu.

Xho guidzujn xcälrnibee Dios

(Mt. 24:23-28, 36-41)

²⁰ Dxejç, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpreni lojreni:

—Di xcälrnibee Dios guidzujn con seen ni sajç fiitu. ²¹ Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

²² Dxejç räjpre Jesús lo rexpejn pacni:

—Sidzujn dxej rlaizgatu fiitu te dxej sa' ni chu che jiädsac Xi'n Dios ni gujç Niguui, luxh ditu fiini. ²³ Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii. ²⁴ Sa'csi sigajç ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujç Niguui, che gal dxej guibi'ä. ²⁵ Luxh ganid-doo sidedä trabajwduxh, sa'csi sibälaz reben guedxliuj ni tre' naj narä. ²⁶ Si'cni gujç nen redxej cheni gubajn toNoé, si'cza gac nen redxej che jiälä narä, Xi'n Dios ni gujç Niguui. ²⁷ Nen redxej ni gubajn toNoé guda-jwreni, gu'reni, bachñaareni, badeedzareni xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejç biääd nisguiduxh, gujt guiraa reben dojl, guzääbreni lo nis. ²⁸ Sigajça gujç nen redxej ni gubajn toLo't: gudajwreni, gu'reni, gusiireni, bato'reni, gule'ceni binij, bencheezareni rolizjreni. ²⁹ Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuui,

gunitlojti guiraa rebejn dojl, huejcreni. ³⁰ Sigajcza gac nen redxej cheni jiälä narä, Xi'n Dios ni gujc Niguii.

³¹ 'Dxejga, palga yu' chu niä'p yejc yu', diru galädi jäjtni te chalääni rehxixtenni ni yuchee nen yu'; palga yu' chu suga' nezjiät, di galädiruni guibi'ni rolijzni. ³² Colgusnaj lajztu xhi gujc chää toLo't. ³³ Ni rlaiz ga'p xcäl'nabajnni lo guedxliujre, sunijtnini, nani gunijt xcäl'nabajnni lo guedxliujre xcuent rextidä, xcäl'nabajnni rajpni xhaguibaa.

³⁴ 'Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n. ³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

18

Xcuent te gunabiuud con te juejz

¹ Bijza Jesús te cuent ni rului lojreni, te guisieedreni xho riajl cuedx-guiniabreni lo Dios lacuaa gac-huin lajzreni, ² räjpni lojreni:

—Te guejdx guyu' te juejz ni di chalilajg xtidx Dios, dizani jiu re-bejn. ³ Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. ⁴ Balti dxej naadti juejzga gun yälguxhtisga. Dxejcti bejnini xhigab, naani: “Mase dina guidxebä Dios, dizana jiuä rebejn, ⁵ sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

⁶ Dxejc räjp Jesús lojreni:

—Riejn diajgtu xtidx juezgüjdxga, ⁷ Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gac laa gunni yälguxhtis xcuent reni aguleni. ⁸ Ni'cni rniä lojtu, sungajcni yälguxhtis par laaren. Luxh che guibi' Xi'n Dios ni gujc Niguii, ¿la sidxäl'ni bejn ni rililajg xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni rului loj rebejn ni rluiisi najc beṇsa'c, ni rchalo xhet sajcdi resabejnreni. Räjpni:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega laḷ ni canabni lo Dios, räjpni: “Dad, Dios, runidä xquixtios lojlu sa'csi dina gacä si'c najc rebejn ni najc gubaan, ni najc beṇ nadiplajz, ni najc beṇdojl, dizana gacä si'c najc bejnre ni rusquijx impuest. ¹² Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan.” ¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiäl'naatisni lastooni, caniini lo Dios, räjpni: “Dad, Dios, ¿balaslajz narä, nacä te beṇdojl!” ¹⁴ Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojlni, niluxh di Dios nudzucaj rextojl beṇ farisee. Sa'csi guiraa rebejn ni rlaiz guiliä'p lagajc xpala'nni, susanxtiuj Diosreni, dxejc reni di rlaiz guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbáz
(Mt. 19:13-15; Mr. 10:13-16)

¹⁵ Yu'reni siädnä rexpiuxbázreni loj Jesús te guzujni naani yejcreni. Che bahuüi rexpejn pacni si'c, gusloj cadildiidxreni con rebejn te na'c jiädnäreni rebiuxe'. ¹⁶ Dxejc gurejdx Jesúsreni, räjpni lojreni:

—Colgusaan jiääd rebiuxe' loä, na'c gudxoijnturen, sa'csi xcälrnibee Dios najc xten reni najc nadolajz si'c rebiuxbäze're. ¹⁷ Rniliäpac lojtu, chutis ni rlajz jiu' lo xcälrnibee Dios nanab gusobdiajgreni xtidx Dios si'c rusobdiajg rebiuxe' xtidx xtradreni. Palga dini gun si'c, dini jiu' lo xcälrnibee Dios.

Te bi'n ni rajp xhidajl xhixtenni
(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yälñabajñ par tejpas?

¹⁹ Dxejc räjp Jesús lojni:

—¿Xhicuent rniilu narä: “Mastrsa'c”? Rutru najcdi bens'a'c, xtebtis Dios.

²⁰ Anajnlu xho najc remandamient ni caj lo xleii Moisés: “Na'c guesnäjlun gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtradlu, xnanlu, bahuüizaren.”

²¹ Dxejc räjp bi'nga lojni:

—Guiraa remandamientre rusobä cheni gucäli biuux.

²² Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rexhixtenlu, gudisni loj rebejn ni xhet rajpdi dxejc sajplu xcälñasa'clu xhaguibaa. Dxejc gudanajl narä.

²³ Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. ²⁴ Dxejc rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcälrnibee Dios. ²⁵ Guyasiru ted te cameii ni' te guux lo ni jiu' rebenrajp lo xcälrnibee Dios.

²⁶ Reni biejn diajgni rediidxre, räjpreni:

—¿Chuxhni'c sajç laa lo dojl, palga si'c najcni?

²⁷ Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxejc räjp Pedr lojni:

—Dad, nuurnu abasa'nnu guiraa rexhixtennu te siopnalnu luj.

²⁹ Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajnni, rebejtzn, chäälni, xi'nni xcuent xcälrnibee Dios, ³⁰ sica'ni xhiroobru lo guedxliujre, luxh sica'ni yälñabajñ par tejpas.

Rusule' Jesús stehuält xho guetni
(Mt. 20:17-19; Mr. 10:32-34)

³¹ Gurejdx Jesús rexpejn pacni te laad, te räjpni lojreni:

—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguüi.

³² Sutedrenini ladznäa rebenzajt, suxhiznäjrenini, susacsärenini, sutiobx-hejnlireni lojni, ³³ luxh che luux quininrenini, dxejc sugu'trenini, luxh ni riojn dxej sibañsacni loj rebeñgut.

³⁴ Dxejc laaren, direni niacbee rediidxre, dizaren gan xhini'c caniini, sa'csi najcreni diidx ni di gacdi gacbeereni.

Rusiajc Jesús te beṇ lotiä'p
(Mt. 20:29-34; Mr. 10:46-52)

³⁵ Cheni sadzujṇ Jesús te guejdx ni laa Jericó, sobga' te beṇ lotiä'p ro' nezyuj, canabni gojn. ³⁶ Che biejn diajgni cadejd xhidajl bejṇ lo nezyujga, gunabdiidx beṇ lotiä'pga xhini'c cayajc. ³⁷ Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—¡Jesús, xi'n toDavid, balaslajz narä!

³⁹ Rebejṇ ni nijd lojreni gudilṇäjreni beṇ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jiädnäreni bejṇga lojni. Che bidzujṇni lojni, gunabdiidx Jesús lojni, räjpni:

⁴¹ —¿Xhini'c rälajzlu gunnäá luj?

Badzu' beṇ lotiä'pga diidxre, räjpni:

—Dad, rläzä jien löä.

⁴² Dxejc räjp Jesús lojni:

—¡Sujien balojlu! Abiajclu sa'csi huililajzlu.

⁴³ Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejṇ ni bahuui xhi guzajcni, gulä'pzareni xpala'n Dios.

19

Huij Jesús rolijz te bejn ni laa Zaqueo

¹ Dxejc biu' Jesús guedx Jericó, sadejdzani guejdxga. ² Ro'c rbäjz te beṇrapduxh, ni laa Zaqueo, ni rnibee lo reni rusquijx xcuent impuest. ³ Rläjz Zaqueo fiini loj Jesús te gumbeenini, per digacdi fiini lojni sa'csi najcni te beṇxhate', luxh xhidajl bejṇ siädsaj guideb gabi Jesús. ⁴ Ni'c baxuṇni gunijdni lojreni, huä'pni lo te yajgro ni suga' gajxh nez cadro ted Jesús te si'c sajz fiini loj Jesús. ⁵ Che gudejd Jesús nejzga, guläsni lojni jiaa, bahuini cadro sobga' bejṇre. Dxejc räjpni lojni:

—Zaqueo, basquejn biäjt ro'c, lagajc nadxej rläzä chajia'nä rolijzlu.

⁶ Dxejcti biätguxuṇ Zaqueo lo yajgga, rbalazduxhni huinäni Jesús rolijzni. ⁷ Che bahuui guiraa rebejṇ xhi gujc, gusloj camojmreni, direni jiulajz, räjpreni:

—Jesús sajia'n rolijz te bendojl.

⁸ Dxejcti huisulii Zaqueo, räjpni loj Jesús:

—Bahulaare, Dad, gala' xhixtenä gudedä loj rebenproob; luxh palga yu' chu loj cua'a xhixtenni con yälrusguee, sudzu'a lojni tajp huält si'cti ni cua'a.

⁹ Räjp Jesús lojni:

—Lagajc nadxej gubicaj xtojllu näjza xtojṇ reni rbäjz rolijzlu, sa'csi guliipac najclu te xagdoo toAbram. ¹⁰ Pues Xi'n Dios ni gujc Niguii biädtil rebendojl te guslaani rebejṇga ni gunijt nen dojl.

Xcuent tzuu meel

¹¹ Lal ni cagucuadiajgreni xtidx Jesús, bijzani te cuent ni ruluii, sa'csi asiäddzujṇgajxhrene guedx Jerusalén, luxh laareni rujnreni xhigab sisloj guinibee Jesús si'ctisni guidzujṇni guejdxga. ¹² Dxejc räjpni lojreni:

—Guyu' te bejṇ, beṇräjpni, huijṇi te guejdx zijtro te gacni rei, dxejc guibisacni. ¹³ Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun

con meelre che guibisacäli.” Sä'tini. ¹⁴ Per reben lajdxni dipacreni guichaglaiz bejnga, ni'c baxhalreni gaii bejn te saye'tzreni: “Di rlaizdinu gacni xreinu.” ¹⁵ Luxh empac gujcni reii, dxejc gubisacni lajdxni. Che bidzujñni gurejdxni rexmoxni ni badeedni meel cua'reni, te gacbeeni lac bejn tejgareni gaan. ¹⁶ Ni bidzujñ ganid räjpni lojni: “Dad, xmeellu bejn gaan stzuu meel.” ¹⁷ Dxejc räjp reii lojni: “Hueenca, luj najclu te mossac, sa'csi laaca bejnlü dzuun lo te dzunbäz, naj sunidxä guinibeelu loj tzuu guejdx.” ¹⁸ Bidzujñ stee mos lojni, räjpni: “Dad, xmeellu bejn gaan gaii meel.” ¹⁹ Dxejcti räjpni lojni: “Luj guinibeelu loj gaii guejdx.” ²⁰ Bidzujñti stee mos lojni, räjpni: “Dad, aree xmeellu, guluchedzu'tzäni nen te baii ²¹ sa'csi bidxebä guejblu, sa'csi najc guejblu te beñ nadiplajz, rutojp guejblu cadro di guejblu nuzuj, luxh rliäs guejblu cose'ch cadro di guejblu nibe'c.” ²² Dxejcti räjp reii lojni: “¡Mosguijdx! lagajc ro'lu birii diidx ni gunälu yälguxhtis. Palga najnlü nacä te beñ nadiplajz, najnlü rutopä cadro dina nusuä, najnlü rliäsä cose'ch cadro dina nibe'cä, ²³ ¿Xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?” ²⁴ Dxejc räjpni lojreni suga'ro'c: “Colgudzucaj meelga lojni, colgudeedni loj ni rajp tzuu meel.” ²⁵ Laareni räjpreni: “Dad, per laani arajpni tzuu meel.” ²⁶ Dxejc badzu' reii diidxre lojreni, räjpni: “Ni'cni rniä, reni rajp, sica'ruren, niluxh reni di ga'p lojreni sibicaj guiraa recosbäz ni rajpreni. ²⁷ Luxh xcuent reni rdxe'ch loä, ni di rlaiz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén. ²⁹ Che asadzungajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejñpacni, ³⁰ räjpni lojreni:

—Colchäj lo guejdx' ni suga' lad rec. Che guidzujñtu, guidxältu caduu te bur huin ni gajd bejn cuib. Colguxhecni, coltanäni ree. ³¹ Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

³² Sä'ti rexpejñpacni nani baxhalni, bidxälreni manga sigajctisni räjp Jesús. ³³ Cheni caguxhecreni bure'ga, rexpaxhuan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtzni, te gubijb Jesúsni. ³⁶ Guideb cadro gudejd Jesús gudixhreni xhajbreni lo nezyuj cadro tedni. ³⁷ Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnñi. ³⁸ Räjpreni:

Chicbaa reii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäi rebejn, räjpreni loj Jesús:

—Mastr, guididxa' lo rebejn ni siädnajllu te na'cru guiniireni si'c.

⁴⁰ Dxejc Jesús räjp lojreni:

—Rniliä lojtu, palga redee gusäu ro'reni, sibedxa' reguijre.

⁴¹ Che bidzujñni gajxh, che bahuini guedx Jerusalén, biin Jesús xcuent guejdxga, ⁴² räjpni:

—¡Maläi gacbeelu, masque nen redxejre, xhini'c sajc guniidx yälbedxilajz lojlu! Per naj naga'tzni, luxh digacdi fiilu lojni. ⁴³ Sidzujñ dxejga lojlu, cheni jiääd reni rdxe'ch lojlu sujnreni si'c te guralyuj guideb gabilu, nez lojlu sigajc nez dejtzu sisiujreni. ⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

Rusia Jesús nen guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús nen guidoro, guslojni cabääni rebejn ni caguto' näjza reni casii. ⁴⁶ Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadro jiädnahtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguluii Jesús nen guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguiilreni mood te ju'trenini, ⁴⁸ luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

20

Xcälrnibee Jesús

(Mt. 21:23-27; Mr. 11:27-33)

¹ Te dxej suga' Jesús nen guidoro, caguluiini rebejn, cagusule'zani diidx xcuent xho guibicaj xtojlni, che bidzujñ reni rnibee loj rebixhojz näjza rebejn ni ruluii leii näjza rebengool, ² räjpreni lojni:

—¿Xhi yälrnibee rujnlu recosre? ¿Chu baniidx yälrnibee ga lojlu?

³ Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, ⁴ ¿chuni'c baxhal Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” ⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

⁸ Dxejc räjp Jesús lojreni:

—Dizana guiniä xhi yälrnibee rapä te runä recosre.

Xcuent remosguijdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c. ¹⁰ Che bidzujñ dxej ni guidojp cose'ch, baxhalni te xmosni sanab cose'ch ni riäjli xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. ¹¹ Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xhetza badeeddireni lojni, ganaxni gubi'ni lo xlamni. ¹² Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³ 'Dxejc bejn baxhuaanga xhigab, naani: "¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni." ¹⁴ Dxejc che bahuüi reni go'n-meed lo xi'nni, dxejc räjpreni lo sa'reni: "Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu." ¹⁵ Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guidxre, ä? ¹⁶ Sidzujñni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

¹⁷ Bahuüi Jesús lojreni, dxejc räjpni:

—¿Xhixhni'c caj lo guijtzt ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcní siujpacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

¹⁹ Reni ribee loj rebixhojz, näjza reni ruluii leii rlanjreni guiniaazreni Jesús lagajc órga, sa'csi gubeereni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰ Dxejc cagula'tztisrenini, baxhalreni gaii bejn te gunsireni si'c ni najceni bendxan, te gucuadiajgreni xtiidxni don gaxäjssi guiga'ni lo te diidx te gutedrenini lo yälguxhtis, yälñabee xte gubernadoor. ²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios. ²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree? ²⁴ Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

Rniabdiidxreni xcuent yälrbansac lo rebengut

(Mt. 22:23-33; Mr. 12:18-27)

²⁷ Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús,

²⁸ räjpreni:

—Dad, Mastr, basa'n Moisés guijtzt loonu, lojga caj: "Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni." ²⁹ Guyu' gajdz niguii, bejtz najceni. Sas cua' niguigalooga chäälni. Che gujtni ruti xi'nni. ³⁰ Dxejcti cua' ni rojpga gunaaga. Che gujtni, rutiza xi'nni. ³¹ Sigajcza guzajc ni riojnga. Si'cza

guläsnäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti nāj gunaaga gujt. ³³ Guigajdzreni guläsnäjreni gunaare, ni'cni, che guibaṣsacreni lo rebengut, ¿chu chääł gacni, ä?

³⁴ Dxejc räjp Jesús lojreni:

—Lo guedxliujre ruchṇaa rebejn, rudeedzareni xindxa'preni ruchṇaa. ³⁵ Niluxh rebejn ni agule Dios te chääreni xhaguibaa, nājza te guibaṣsacreni lo rebengut, di reni'c guchṇaa, dizareni gudeed xindxa'preni guchṇaa, ³⁶ sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspaṣsac Diosreni. ³⁷ Moisésli basule' xcuent ni rbaṣsac reben lo rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, nājza Xtios Jacoob”, ni'cni nabajnpacreni lo Dios. ³⁸ Sa'csi di Dios gac Xtios rebengut; najcni Xtios rebejn ni nabajn par tejpas, sa'csi par laani guiraa rebejn nabajn.

³⁹ Dxejc gaii reni ruluii lei badzu'reni diidxre, räjpreni lojni:

—Mastr, laaca guniilu.

⁴⁰ Sa'csi dirureni niajx niniabdiidxruren lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood rniireni Crist najc xi'n toDavid, ä? ⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xtaä:

⁴³ “Gurej xladbeä cheni guidzujnl dxej ni gudzugä guiraa ni rdxe'ch lojlu te gacheereni luj rnibeelu guira'ti.”

⁴⁴ ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii lei

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuaadiajg che räjp Jesús loj rexpejnpacni:

⁴⁶ —Colajp cuidaad reni ruluii lei, sa'csi rdxagljazreni rajcwreni lajd siool, rljazreni saru guinii guiraa rebejn “xchan” lojreni, rljazreni jiu bejnreni nez loguii, rljazreni cuereni lo reyagxhilsa'c nen reguidobäz, nājza cadre rajc lanij. ⁴⁷ Rudzucajzareni rehxixten regunabiuud, dxejc rolreni rele' siolduxh che rniabreni lo Dios te fii rebejn, te naa bejn najcreni benḁxan, luxh lojreni suxhał Dios te castigwroru.

21

Gojn xten te gunabiuud

(Mr. 12:41-44)

¹ Nen guidoro bahuui Jesús cagusäl rebenrajp gojn nen te guiñ cadre rdojp gojn. ² Bahuiizani lo te gunabiuud, lacti proobni. Basälñi xcojnñi nen guiñga, tio'ptis melbäz basälñi. ³ Dxejc räjp Jesús:

—Rniäpác lojtu, gunabiuud proobga basälñi loj guiraa reni casäl gojn, ⁴ sa'csi guiraa redec ni cagusäl xcojnñi casälñi tudxe'nsi xmeelreni, niluxh gunaare loj xcälproobni, basälñi guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayuj diidx xcuent guidoro, räjpreni:

—Lacti sacruduxh rien̄ni sa'csi guisa'c naccheeni, suchenājzani xhidajl recossa'c ni badeed bejn̄ si'c gojn̄.

Dxejc gunii Jesús lojreni, rājpni:

⁶—Sidzujn̄ dxej sibijl̄ guiralii ni cahuiitu, nicla tej guiij di jia'n yejc sa'ni, guiragajcni sibijl̄.

Reseen ni chu che nitloj guedxliuj

(Mt. 24:3-28; Mr. 13:3-23)

⁷Dxejc gunabdiidx rexpejn̄pacni lojni, rājpreni:

—Dad, Mastr, ¿guc gacni? ¿Xhi seen chu che gac recosga?

⁸Rājp Jesús lojreni:

—¡Col̄susin̄ te na'c gusgueereni la'tu! Sa'csi xhidajl reni jiāād sinii: “Narā nacā Crist”, o “Asiādgajxh redxej che jiāādni”, per na'c chalilajztu xtiidxreni, na'cza chanajltureni. ⁹Luxh che jiejn̄ diajgtu cayajc guer cadil̄nāj sa' bejn̄, na'c guidxejbtu, sa'csi ganid recosga gac, luxh gad gal̄di nitloj guedxliuj.

¹⁰Dxejc sanuu cayājpni lojreni:

—Sājs te nación, sucuanāj stee nación, nājza te ladx bejn̄ sucuanāj stee lajdx bejn̄. ¹¹Sajcza xuro, su' gubijn̄, su'za yālguijdx nez ree nez rec. Luxh xhaguibaali sien̄ guiraloj ni ruchejb̄ nājza seenro.

¹²'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben̄ guidobāz, susāl̄zaren̄ la'tu nen̄ latzguuib, sināzaren̄ la'tu nez loj reii nājza gubernadoor sa'csi rinālajztu xtiidxā. ¹³Luxh guiraa dee sajctu te gac gusule'tu xtiidxā lojreni. ¹⁴Na'c gunxgaatu xhigab nen̄ lastootu xhini'c guiniitu lojreni, ¹⁵sa'csi narā sunidxā diidx guiniitu, sunidxāza yālnajn̄ lojtu te digac gudzu'reni diidx lojtu niclaza gacdi guiniyajreni xtiidx̄tu. ¹⁶Nājza rexcuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni. ¹⁷Guiraa rebejn̄ guedxliuj sibāl̄az la'tu sa'csi rinālajztu xtiidxā. ¹⁸Niluxh ni'cla tej xquidxejctu di nitloj. ¹⁹Luxh palga sutijptis lajztu, sajptu yālnabajn̄ par tejpas.

²⁰'Che fiitu tre' xhidajl soldaad guideb gabi guedx Jerusalén col̄yacbee abidzujn̄ dxej ni guibijl̄ni. ²¹Dxejc reni yu' guedx Judea, nanab guxuñreni chacuatzlojreni nen̄ redajn̄; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²²sa'csi nen̄ redxejga sujn̄ Dios fis lo guejdxga te soob rediidx̄ ni caj lo reguijtz xten Dios. ²³Probe'za regunaa ni nuu bāz nen̄ redxejga, nājza regunaa ni ca' bāz, sa'csi su' yāluinduxh lo guedxliuj, nājza fis ni gun Dios loj rebejn̄ga. ²⁴Yu'reni guet lo guer, yu'zaren̄ chāā pres, sijreni balti guedxzij̄t. Dxejc reben̄zij̄t sinibee guedx Jerusalén che guiza'li redxej ni gusaan Dios guinibee rebejn̄ ni di gac xpejn̄ Israel.

Cheni jiāād Xi'n Niguii

(Mt. 24:29-35, 42-44; Mr. 13:24-37)

²⁵Rājpzani:

—Dxejc su' seen lo gubijdx nājza lo bāii, nājza loj rebajle' ni yu' xh-aguibaa. Luxh lo renacion̄ guedxliuj su' rebejn̄ yārsia', di jien̄ xhi gunreni, sidxebduxhreni sa'csi siejn̄ diajgreni chubeduxh lo nisdoo, sāsduxh nis ni rājs lo nisdoo. ²⁶Sitioḹ rebejn̄ xcuent̄ yālr̄dxbduxh che gunreni xhigab xhicharuni'c gac lo guedxliuj, sa'csi nāj guideb guibaa sinibsejs. ²⁷Dxejcti suhuiireni lo Xi'n Dios ni gujc Niguii, siāādni lo te za guideb

xcälrnibeeni, nájza yälrdimbichaduxh. ²⁸ Che guisloj gac recosre, colsutijp lajztu, colguiliás yejctu, colguibalajz sa'csi asadzujn dxej gusilajztu.

²⁹ Guniizani stee cuent lojreni, rájpni:

—¡Colhuui lo yagiigw nájza lo guiraa reyajg! ³⁰ Che fiitu acabääni be'n, colyacbee lagajc la'tu, abidzujungaxh bäii nisguij. ³¹ Sigajcza che fiitu agusloj cayajc recosre, colyacbee asiáddzujn xcälrnibee Dios.

³² 'Rniliäpac lojtu, guiraa recosre sajz ansde guet rebejn ni yu' naj.

³³ Guibaa nájza guedxliuj sinitloj, rextidxä dini nitloj.

³⁴ '¡Colsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujn dxejga. ³⁵ Sa'csi si'c sidzujn dxejga loj guiraa reben guedxliuj. ³⁶ Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

³⁷ Rdxee ruluii Jesús nen guidoro dxejc guxhiijn sajia'n ni yejc dan Oliib. ³⁸ Rsilru ristie rebejn te rdzujnreni lo Jesús nen guidoro casob rsil, te gucuadiajgreni rextiidxni.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Siáddzujungaxh dxe lanij che rajwreni yätxtiil ni di säguij, laaza lanijga pascw. ² Dxejc reni rnibee loj rebixhojz nájza rebejn ni ruluii leii caguiilreni xho gunreni te ju'treni Jesús, sa'csi rdxejbreni rebenguejdx.

³ Dxejc biu' bendxab lastoo Judas ni laaza Iscariote, ni najc tej retzubi-tio'p xpejnpacni. ⁴ Dee huininäjni dade' ni rnibee loj rebixhojz nájza loj reni rnibee rexcuxhtis guidoo. Guninäj Judasreni xho gunni te guteedni Jesús ladznaareni. ⁵ Dxejc bibalajzreni, bia'nreni diidx gudeedreni meel lojni. ⁶ Cuäjbti Judas, dxejcn guslojni caguiilni xho gunni guteedni Jesús ladznaareni che rut bejndi suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujn dxe lanij che rajwreni yätxtiil ni di säguij, che rugu'tzareni te xiil si'c ni caj lo xleii toMoisés. ⁸ Dxejc baxhal Jesús Pedr nájza Juan, rájpni lojreni:

—Colchayejn xchej xten pascw te guidaununi.

⁹ Dxejc laareni gunabdiidxreni lojni, rájpreni:

—¿Caro rlajzlu choyennuni?

¹⁰ Rájp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolizj bejn cadro jiu'ni laani. ¹¹ Dxejc colye'tz lo bejn ni najc rolizjni ro'c: “Si'c naj Dad Mastr: ¿Con yu' cadro sajz gauxchenää rexpenä naj pascw?” ¹² Dxejc guluiini lojtu te yu' ni sojb jiaa yejc stee yu'. Asuxexgaa yu'ga. Ro'c colyejn xhi guidaunu.

¹³ Sä'tireni. Si'tis ni rájp Jesús lojreni, si'cpac bidxälreni. Dxejc bejnreni xchej xte lanij pascw gaureni.

¹⁴ Che bidzujn or, gurenäj Jesús rexpejnpacni lo mex. ¹⁵ Dxejc rájpni lojreni:

—Guyuduxhä gaan gaunääpactu xchej xten pascw ansde tedä traba-jwduxh. ¹⁶ Sa'csi rniä lojtu, diruna gaunää la'tu pascw cheni guidzujnli dxej ni gacni lo xcälrnibee Dios.

¹⁷ Dxejc cua'ni te co'p, badeedni xquixtios lo Dios, räjpni:

—Colyā' dee, colgudeedni lo sa'tu. ¹⁸ Sa'csi rniä lojtu, diruna yā'ä nis ni rii yejc uub stehualt cheni guidzujnli xcälrnibee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudis-nini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx gudajwreni, räjpni lojreni:

—Ni yu' nen co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹ 'Per bahuilaare, bejn ni guto' narä sobganāj narä lo mexre.

²² Guliipacni, Xi'n Dios ni gujc Niguii sinuu tedni loj nezyuj ni abaluii Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, çchuchani'c gunni?

Cayejyreni chuni'c najc benroru

²⁴ Sas gusloj cayejyreni, don chuni'c guibee gac benro lojreni.

²⁵ Dxejcti räjp Jesús lojreni:

—Rerēi ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rnii lacti hueen najc rerēiiga. ²⁶ Per la'tu na'c gactu si'c. Nani najc bengoolru lojtu, ni'c riāj gacni si'c najc ni huinru lojtu. Luxh nani rnibee riāj gacni si'c mos. ²⁷ ÇChuni'c sajcru lo bejn? ÇLa bejn ni rbej lo mex te gauni o la ni ruteed xhi gaureni lo mex? ÇLa xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ 'La'tu najctu ni gusunāj narä guideb ni gudedä retrabajw ni gudedä.

²⁹ Ni'cni narä runidxä yälrnibee lojtu sigajc ni baniidx xtad yälrnibee loä, ³⁰ te gautu, yātu lo xmexä xhaguibaa, te cuezatu lo yagxhil cadro guntu yälguxhtis loj rexpejn guitzubitio'p rexagdoo Israel.

Räpxgaa Jesús di Pedr guicäjp numbeeni

(Mt. 26:31-35; Mr. 14:27-31; Jn. 13:36-38)

³¹ Räjp Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jiäädx xcälrililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjp Simón lojni:

—Dad, narä sirinalälu; mase gusäureni luj latzguiib, näjza narä siäunäälü; mase ju'treni luj, näjza narä setnäälü.

³⁴ Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu choñli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanātu, nicla carterdi, niclaza stee gura'chdi, çla yu' xhi biquiintu, xhi biäädx lojtu, ä?

Dxejc räjpreni:

—Xheti.

³⁶ Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. ³⁷ Sa'csi rniä lojtu, sisiojib rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹ Dxejti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. ⁴⁰ Che bidzujnreni ro'c, räjpni lojreni:

—Colcuejdx, colnab lo Dios te na'c jiajbtu lo dojl.

⁴¹ Dxejc gubicaj Jesús lojreni, huijni te lajt zite' cadre suga'reni, si'cti cadre rdzujn te guij che rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yälrutiplajzni. ⁴⁴ Lałni cadejdni trabajwduxh, cayac-huinduxh lajzni, cabedx-canabruni lo Dios. Guzunislini gosloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadre suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni. ⁴⁶ Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ Lał ni canii Jesús lojreni, bidzujn xhidajl bejn. Tej rexpejnpacni ni laa Judas, nijdni nez loj rebejnğa. Dxejti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yälruhagro' ruteedlu Xi'n Dios ni gujc Niguui ladznäa rebejnre, ä?

⁴⁹ Che bahuui reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudilnäj te mos xten ni rnibee loj rebixhojz, batiu'ni diajgni ladbee. ⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. ⁵² Gunigajc Jesús loj reni rnibee loj rebixhojz näja reni najc guixhajg xten guidoo näja rebengool, guiraa reni siädxiiini, räjpni:

—¿La siädnätu spaad näja garo't, astoocanu siädxiiitu te gubaan, ä?
⁵³ Cheni suga'a lojtu guixe-guixee nen guidoo, ditu nuhual narä. Per dee najc xortu, luxh arnibee yälñacäy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejti gunaazreni Jesús huinärenini roliz bixhojz ni rnibee lo guiraa rebixhojz. Siädnäj Pedrni zit-zijt. ⁵⁵ Che bidzujnreni gule'creni

guiboo galäi lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelajtisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpejni.

Per Pedr räjp lojni:

—Gurniälojlu, Dad, dina gacä xpejni.

⁵⁹ Che gudejd si'cti teb or, räjp stee bejn lojni:

—Gulipacni, näj bejnre guyunäjni, sa'csi laani najczani te bejn Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniilu löä.

Lalni canii Pedr rediidxre, guredxa' te guidgaii, ⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu choñ huält, räjpilu dilu gumbee najrä.” ⁶² Dxejcti guc-huin lajz Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj caguxhisnärenini, caguijnzarenini.

⁶⁴ Dxejc basäurenini lojni, gudajpreni lojni, räjpreni lojni:

—iGunii chuni'c gudijnlu!

⁶⁵ Luxh guiraloj cayäjbreni lojni, caniyaduxhrenini.

Bidzunäjäreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluii lei, huinäreni Jesús te suuni nez lojreni nen yu' cadro rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga löä. ⁶⁹ Per najli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰ Dxejc gunabdiidx guiraarenini lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlaiztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraarenini, huinäreni Jesús nez loj Pila't. ² Ro'c guslojreni cabe'creni xquejni, räjpreni:

—Bidxälnu bejnre cayujnni biey lo rexpejnnu. Räjpzani xhet nanabdi quiixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz nájza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siäd bejnğa?” ⁷ Cheni räjpreni ro'c siädni, baxhañnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén.

⁸ Che bahuu Herodes loj Jesús, bibalajzni sa'csi agujc xchej rlajzni fini lojni, sa'csi abiejn diagni diidx xcuent ni cayujnni. Luxh rlajzni fini gunni te milaagwr. ⁹ Xhidajl yälgunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz nájza rebejn ni ruluii leii, cabecduxhrureni xquejni. ¹¹ Dxejc gulälaz Herodes náj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhañsacrenini loj Pila't. ¹² Lagajc dxejga, Pila't nájza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39–19:16)

¹³ Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx. ¹⁴ Dxejc räjpni lojreni:

—La'tu biädñātu bejnre loä, najtu caguquini rebejn gunreni biey, luxh narä agunabdiidxä guiraloj lojni nez lojtu, luxh abahuuitu dina nidxälä nicla tej dojl ni cagucuaquijtuni. ¹⁵ Niclaza Herodes di nidxäl nicla tej dojl, ni'cni baxhañsacnini loonu, luxh abahuuitu xhet dojldi bejnini te guetni. ¹⁶ Ni'cni quinäni, dxjecti guslaäni.

¹⁷ Najc costumbr ruslaa Pila't te bejn ni yu' nen latzguiib casob rajc lanijre. ¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, baslaa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, nájza sa'csi yu' chu bagu'tni. ²⁰ Rlajzpac Pila't guslaani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Bacuaani lo crujz, bacuaani lo crujz!

²² Riojn gunisac Pila't lojreni, räjpni:

—¿Xhi dölduxh bejnini? Xhetlidi dojl rdxälä bejnini te guetni. Ni'cni siguinäni dxejc suslaäni.

²³ Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejntireni gaan gujc si'c ni rlajzreni. ²⁴ Dxejc cuäjB Pila't gunibeeni gac si'c ni gunabreni. ²⁵ Dxejc baslaani bejn ni yu' latzguiib sa'csi bejnini biey, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

*Che cuaj Jesús lo cruiz**(Mt. 27:32-44; Mr. 15:21-32; Jn. 19:17-27)*

²⁶ Cheni sanäreni Jesús xcaj lo cruiz, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini cruiz, siädnajltini dejtz Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸ Dxejc gu-biré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejcnu”, säjbzarenini loj relom: “Colgucua'tz nuurnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenini tio'p benguijdx xcajzarenini loj recruiz, guetnäjreni Jesús. ³³ Che bidzujnreni te lajt ni laa Calabeer, ro'c bacuaarenini Jesús lo te cruiz, bacuaazarenini guiro'p rebenguijdxga lo stio'p cruiz, tejni xladbee, steeni xladbäjgwni. ³⁴ Cheni cagucuaa rebejn reni lo cruiz, gunii Jesús, räjpni:

—Xtadä, badzucay xtojł rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cua'renini. ³⁵ Suga' rebejn ro'c cadxelojtisreni. Näjza reguxhtis cagux-hisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigreni lojni te badeedreni bin-nii yäni. ³⁷ Dxejc räjpreni lojni:

—Palga guli najclu reii xten rexpejn Israel, baslaa lagajc luj.

³⁸ Luxh bacuaarenini gaii diidx loj te baräjd ni cuaj yejc cruiz. Con didx griegw, con didx latin, näjza didx hebreo, bacuaarenini scree: “Dee najc Reii xten rexpen Israel.”

³⁹ Te reben guijdx ni najl lo te cruiz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo cruiz stelaadga guididxa'ni loj stee benguijdx ni caniyaj Crist, räjpni:

—¿La dila guidxejb Dios? ¡Ni cayajczalu tejsi castiigw! ⁴¹ Per nuurnu cayajcnu castiigw ni riäjl gacnu te guidiixnu redojl ni biennu. Luxh laani xhet dojlđi bejnini.

⁴² Dxejc räjpni loj Jesús:

—Bazalajzlu narä che guidzujnlu lo xcälrnibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

*Che gujt Jesús**(Mt. 27:45-56; Mr. 15:33-41; Jn. 19:28-30)*

⁴⁴ Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti. ⁴⁵ Bicäy lo gubijdx, luxh ladró ni najl nen yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladznaalu rutedä xaimä.

Che guniini si'c, gujttini.

47 Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojlđi bejn bejnre.

48 Guiraa rebejn ni suga' ro'c ni bahuii guiraa ni guzajc ro'c, gubi'reni rolizjreni, cayääzreni lagajc lastooreni. 49 Luxh guiraa reni rumbee Jesús, nájza regunaa ni biädnajlđni che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

50 Guyu' te bejn ni laa José, lacti huen najcni, luxh laaca rujnni guira'ti. Siääđni guedx Arimatea, región Judea. Nadxaagzani loj reni rnibee neñ guidoro xten rexpejn Israel. 51 Cabäjjza José jiääđ yälrnibee xten Dios, ni'cni dini nidxaglajz nani bejn resa'ni. 52 Dxejcti huijni lo Pila't, gunabni tiejxh Jesús. 53 Che gulätnini lo crujz, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. 54 Dxejga najc dxej ni rusuchereeni guira'ti, luxh agojl jiu' dxej ni rusilajzreni.

55 Regunaa ni guzanäj Jesús che biriilini Galilee huihuiireni robaaga te bahuiireni xho gudixhrenei togoolga neñ baa. 56 Che gubi'reni rolizjreni bencheereni recuaan ni rlianexhduxh náj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubañsac Jesús lo rebengut

(Mt. 28:1-10; Mr. 16:1-8; Jn. 20:1-10)

1 Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni. 2 Che bidzujnreni, bahuiireni agubicaj guiñ ni rusäu ro' baa. 3 Dxejc che biu'reni neñ baaga, direni nidxäl tiejxh Jesús. 4 Lał ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. 5 Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajn lo rebengut, ä? 6 Rutini ree. Agubañsacni. Colgusnaj lajztu rediidx ni guniini cheni guyusijcni Galilee, 7 che najni lojtu: “Riäjl jiajb Xi'n Dios ni gujc Niguui ladznaa rebendojl, xcajzani lo crujz, dxejc ni riojn dxejga sibañsacni loj rebengut.”

8 Dxejc banaj lajz regunaa xtidx Jesús, 9 biriireni robaa, gubi'tireni te bijreni diidx lo retzubiteeb rexpejnpacni nájza loj rebejn ni yunäjreni. 10 Reni huisa'n diidx loj rexpejnpac Jesús najc redee: Marii Magdalen, nájza Xuan, nájza Marii xnan Jacoob, nájza sgaii gunaa. 11 Niluxh rexpejnpacni bejn xhigab didxnayääłni, direni nililajz xtidx regunaaga.

12 Dxejc huisu Pedr, ruxunłini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolizjni, rdxelojtsni xcuent ni gujc.

Ni guzajc lo nezyuj ni sii guedx Emaús

(Mr. 16:12-13)

13 Lagajc dxejga, tio'p rexpejnpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. 14 Lał ni sasajreni lo nezyujga, cayujyreni diidx xcuent reni gujc ro'c. 15 Lał ni caniireni gubig

Jesús lojreni, gusloj sasanäjnireni. ¹⁶ Luxh mase cahuiireni lojni, yu' xhi badxojn niembeerenini. ¹⁷ Dxejc gunabdiidx Jesús lojreni, rājpnī:

—¿Xhini'c ruytu laĵ ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, rājpnī:

—Guiraasi bejn najn xhi gujc nen guedx Jerusalén. ¿La lujtis bia'nlū nen guejdxga ni di gan xhi gujc ro'c, ä?

¹⁹ Dxejcti rājpn Jesús lojreni:

—¿Xhini'c gujc ro'c?

Dxejc rājpreni lojni:

—Recos xcuent Jesús ni siädä guedx Nazare't, ni gujc te niguii ni gunii xtidx Dios, rājpnī yäl̄r̄nibeduxh xten Dios loj redzuun ni rujnni nājza loj rediidx ni rniini, nez loj Dios nājza nez loj rebejn. ²⁰ Nājza xho bejn reni rnibee loj rebixhojz nājza rexcuxhtisnu, bateedrenini ladzn̄aa reni gunibee guetni, dxejc bacuaarenini lo crujz. ²¹ Niluxh nuurnu cabäāznu laani gacni nani nusl̄aa rexpejn Israel ladzn̄aa rebenzijt. Naj agujc choñ dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, ²³ direni nidxäl tiejxhni. Biädsanreni diidx loonu najreni bahuiireni lo tio'p xangl Dios ni rājpn lojreni, agubañsac Jesús lo rebengut. ²⁴ Dxejcti huihuii gaii sa'nu robaa, bahuiizarenī najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc rājpn Jesús lojreni:

—¡Lacti nayääl tre' xcäriejntu! Lacti nen rililajztu xtidx redade' ni gunii xtidx Dios xcuent Crist. ²⁶ ¿La di nungäjl tedxga Crist retrabajwduxhre dxejcti jiu'ni lo xcäl̄rdimbicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonājni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujnreni guejdx cadre sääreni, bejn Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannājnireni, rājpreni lojni:

—Biannāj nuurnu, sa'csi acayajc gudxej, agojl jiu' guxhijn.

Dxejcti biu' Jesús te jiannājnireni. ³⁰ Cheni sobganājnireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni.

³² Dxejcti rājpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirurenī nibājz ro'c, alga gunasgajceni nez, gubi'reni guedx Jerusalén. Ro'c bidxälreni abidojp xpejnpac Jesús nājza sgaii bejn.

³⁴ Dxejcti bijreni diidx loj guiro'preni bidzujn, rājpreni:

—Guliipac gubañsac Jesucrist, luxh baluilojni loj Simón.

³⁵ Dxejc guiro'p reni bidzujn bijzarenī diidx ni gusajceni lo nezyuj, nāj xho biembeezarenī Jesús che gula'ni yätxtiil.

Baluiloj Jesús loj rexpejnpacni

(Mt. 28:16-20; Mr. 16:14-18; Jn. 20:19-23)

³⁶ Canisi'ceni rediidxre chela baluiloj lagajc Jesús galäiireni, guniini xchan lojreni, rājpnī:

—¡Col̄cuedxi lajztu!

³⁷ Per laareni rdxelojreni bidxejbreni, naareni cahuiireni lo te sprit.
³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu? ³⁹ ¡Colhuii reñaä, nájza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääł niclaza tzujt si'c rapä narä.

⁴⁰ Che guniini rediidxga, baluigajcni reñaani nájza reni'ni. ⁴¹ Lał ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', nájza te la' seer ni yu' tzujn. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjl soob guiraa rediidx xcuentä ni caj lo xleii Moisés, nájza lo rexquijtz redade' ni gunii xtidx Dios nájza ni caj lo rexquitz Salmos.

⁴⁵ Dxejti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guibañsacni loj rebengut. ⁴⁷ Sire'chza diidx xcuent xho ruslaa Crist rebejn nen dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjlzlini nen lastootu, guniidxni yälrnibee ni siääd xhaguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni. ⁵¹ Lał ni cayujnni si'c, gubicajni lojreni, huäjsni xhaguibaa. ⁵² Peta laareni gulujx gojnrenini, dxejc cabalazduxhreni gubi'reni guedx Jerusalén. ⁵³ Ro'c guixe-guixee guyu'reni nen guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Nigui

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gac-cheeli guedxliuj, yunäjni Dios. ³ Xcuent laani benchee Dios guedxliuj nájza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojp yälñabajñ. Yälñabajnga najc bianij xten rebejñ. ⁵ Luxh bianijga rdimbicha' nez lo yälcäjy, niluxh yälcäjyga di niajcdi nusuini.

⁶ Guyu' te niguii birilaj Juan, ni baxhał Dios. ⁷ Laani biäädni te basule'ni diidx. Biädsule'ni diidx xcuent bianij te nililajz guiraa rebejñ diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusanij lastoo guiraa rebejñ, luxh ñaj abiäädni lo guedxliujre.

¹⁰ Nani najc Diidxga guyu' lo guedxliujre, xcuent laazani guchee guedxliujre, luxh di rebejñ guedxliujre nililajz chu najni najcni. ¹¹ Biäädni loj rexpen Israel, niluxh rexpejñni direni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yälñabee gacreni xi'n Dios. ¹³ Laa reni'c ni di gac si'c xi'n bejñ guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yälñabajñ par tejpas lojreni.

¹⁴ Diidxga gujc te bejñ guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtadni, laani najcpacni nani sanälajz nuurnu, nani rnii didxlii loonu. ¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siääd detzä sajcruni loä, sa'csi laani ganidni nabajñni loä.

¹⁶ Sa'csi guiraanu cua'nu xcälñasacduxhni, yälracnäy detz yälracnäy. ¹⁷ Leii xten Dios biädñä toMoisés, niluxh yälracnäy nájza redidxlii biädñä Jesucrist. ¹⁸ Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist

(Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxhał rexpejñ Israel rebixhojz nájza rexpejñ guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiääd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäáznu jiääd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxhaḷ nuure. ¿Xhi rniilu, chuxhni'c najclu?

²³ Räj Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴ Rebejn ni baxhaḷ redee najc reni rniireni “farisee”. ²⁵ Dxejc gunab-diidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabäáznu jiääd, ä?

²⁶ Dxejcti räj Juan lojreni:

—Narä rutiobnisä con nis, niluxh galäiitu yu' tej nani ditu gumbee.

²⁷ Laa dee ni siääd detzä niluxh di nungäjl nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuui Juan siääd Jesús lojni. Dxejc räjpreni:

—¡Colhuui! Aree Xile' xten Dios nani rudzucaj xtojḷ reben guedxliuj.

³⁰ Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajḷni.” ³¹ Luxh dina niembeäni, per biädtiobnisä con nis te guluiä lo rexpejn Israel chu najcni.

³² Guniiiza Juan stee diidx xcuentni, räjpreni:

—Narä bahuiä biäjt Sprit Dxan xten Dios xhaguibaa si'c te palom guzudxini yejci. ³³ Dina niembeäni, per nani baxhaḷ narä gutiobnisä con nis, laani najni loä: “Cheni fiilu jiäjt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.” ³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejn Jesús ganiddoo

³⁵ Che bara stee yääl, sugasac Juan ro'c, suganäjni tio'p rexpejnḷni.

³⁶ Bahuiini lo Jesús che sasajni, dxejc gunii Juan, räjpreni:

—¡Colhuui! ¡Laa dee ni najc Xiil xten Dios!

³⁷ Biejn diajg guiro'p rexpejnpac Juan diidxga, dxejc sanajlreni Jesús.

³⁸ Che gubiré Jesús bahuiini siädnajlreni, dxejc räjpreni:

—¿Xhi caguultu?

Räj rebejnnga:

—Mastr, ¿caro rbäjzlu?

³⁹ Badzu' Jesús diidxre, räjpreni:

—Coltaa, te fitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

⁴⁰ Tej reni biejn diajgni xtidx Juan laa Andrés, bejtz Simón Pedr dxejc huinäjḷni Jesús. ⁴¹ Ganiddoo huitiilni bejtzni, dxejc räjpreni lojni:

—Abidxälnu Mesías nani sälojza Crist ni cabäáznu jiääd.

⁴² Sas huinänini loj Jesús. Che bahuui Jesús lojni, räjpreni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe nájza Natanael

⁴³ Bara yäälga rlaǝz Jesús cháä nez Galilee. Dxejc bidxaagni Felipe, räjpni lojni:

—Gudanajl narä.

⁴⁴ Felipe siääd guedx Betsaida, guedxro ni najcza lajdx Andrés näjza Pedr. ⁴⁵ Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶ Räjp Natanael:

—¿La sajc guirii te beṇsa'c guedx Nazare't, ä?

Räjp Felipe lojni:

—Gudaa, te filu.

⁴⁷ Che bahuii Jesús siääd Natanael nez lojni, räjpni:

—Colhuii te beṇ Israelpac nani dipacni gusguee.

⁴⁸ Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueddx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa' ni guyu' guedx Caná xten Galilee

¹ Che gudejd choṇ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejn pacni, sa'csi bidonreni cháäreni lo sa'ga. ³ Gubijdz bin. Dxejc räjp xnan Jesús lojni:

—Dirureni ga'p bin.

⁴ Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujṇ.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racnayareni te si'c guisa' xleii toMoisés. Neṇ tejga guesguijga ru' si'cti te gayuu litr nis. ⁷ Räjp Jesús loj remos:

—Colguchaj reguesguijre nis.

Dxejcti bachadoo rebejngani. ⁸ Dxejcti räjp Jesús lojreni:

—Colca' che'nni naj te colchanäni lo nani cahuii cayajc sa're.

Dxejc huiä remosga che'n bin lojni. ⁹ Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:

—Guiraa rebejn rudeedreni binsa'c räxgaä rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yäl̄rnibee xtenni luxh ni'cni huililajz rexpejn̄pacni xtiidxn̄i.

¹² Che gudejd sa'ga, huijni guedx Capernaum con xnanni, rebejtni nájza rexpejn̄pacni. Ro'c bia'nreni tio'p-chon̄ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³ Sa'csi abidzungajxh lanij pascw xten rexpejn̄ Israel cheni rnalajzreni guxhiñ̄ ni gudejd guixhajg xten yäl̄gujt̄ neñ Egipto, ni'c sãä Jesús guedx Jerusalén. ¹⁴ Neñ guidoro bidxäl̄ni xhidajl̄ bejn̄ nani ruto' gon, xiil, palom nájza reni sobga' caguchaa melzijt. ¹⁵ Dxejc bejn̄ni te chico't con gaii duu, gulääni regon con rexiil neñ guidoo. Batie'chni xcoobr rebejn̄ nani ruchaa melzijt, barexh-xhät̄ni rexmexreni. ¹⁶ Räj̄pzani loj reni caguto' repalom:

—Colcuää redee, na'c rujntu rolizj xtaďä si'c te guii cadro rdo' guiraloj.

¹⁷ Dxejcti banajlajz rexpejn̄pacni xhi caj lo reguijtz ni bacuaa redade' ni gunii xtid̄x Dios: “Gucnaj lazä xcuent ni runnäjreni rolizjlu.”

¹⁸ Dxejcti gunabdiid̄x reni najc xpejn̄ Israel lojni, räj̄preni:

—¿Xhi seen guluiilu loonu ñaj te fiinu arajplu yäl̄rnibee te abejnlu recosre?

¹⁹ Badzu' Jesús diid̄xre räj̄pni:

—Colgut̄zujl̄ guidoore, luxh narä neñ chont̄is dxej sunchesacäni.

²⁰ Räj̄p rexpejn̄ Israel lojni:

—Tiubixho'p iiz guclaa ni guc-chee guidoore, ¿xhixh sajc gunchesacluni neñ chont̄is dxej, ä?

²¹ Niluxh laani caniiini xcuent guidoo ni najc lagajc tiejxhni. ²² Ni'cni cheni gubansacni loj rebengut, banajlajz rexpejn̄pacni rediidxre ni guniini, dxejc huililajzreni nani caj lo rexquijtz Dios nájza rediidx ni gunii Jesús.

Numbee Jesús guiraa rebejn̄

²³ Cheni guyu' Jesús guedx Jerusalén cadro cayajc lanij pascw, lañ̄ ni cayajc lanijga, xhidajl̄ rebejn̄ huililajz xtiidxn̄i, bahuiizareni remilagwr ni bejn̄ni. ²⁴ Luxh di Jesús nililajz xtid̄x rebejn̄ga, sa'csi arumbeeni xho najc rebejn̄. ²⁵ Niluxh dini niqiiin chu gäb lojni xho najc bejn̄, sa'csi lagajc laani anancheeni xho najc lastoo tejga bejn̄.

3

Jesús con Nicodem̄

¹ Guyu' te niguii lo rexpejn̄ refarisee ni laa Nicodem̄, najcni te beñroru loj reni rnibee rexpejn̄ Israel. ² Te guxhiñ̄ biädxhiga'tzni nez loj Jesús, räj̄pni lojni:

—Mastr, nadonnu lo Dios siääd̄lu si'c te ni ruluui, sa'csi rut rajcdi rujn sa' remilagwr nani rujnlu palga di Dios sunäj̄ni.

³ Dxejcti räj̄p Jesús lojni:

—Rniliäpac lojlu, nani di gaal stehuält, di gacdi fiini xcäl̄rnibee Dios xhaguibaa.

⁴ Dxejcti räj̄p Nicodem̄ lojni:

—¿Xho gac gaal te bejn̄ stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

⁵ Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxan xten Dios, di gacdi jiu'ni lo xcäl'rnibee Dios xhaguibaa. ⁶ Nani rajl xi'n beñ guedxliujre, ni'c najctisni beñ guedxliuj, luxh nani rajl por Sprit Dxan xten Dios, Spritza najcni. ⁷ Na'c rdxelojlu sa'csi rniä: “Nanabpac gaallu stehuält.” ⁸ Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

⁹ Badzu' Nicodem diidxre, räjpni:

—¿Xho mood sajç gac recosre?

¹⁰ Räjp Jesús lojni:

—¿La najclu te mastr xten rexpejn Israel luxh dilu gan recosre, ä? ¹¹ Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. ¹² Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

¹³ 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. ¹⁴ Lagajc si'cni guläsjaia toMoisés bäl guuib lo yajç neñ reyubijdz, sigajcza nanab chäs Xi'n Dios ni gujc Niguii jiaa; ¹⁵ te guiraa renani chalilajz xtiidxni direni nit lo Dios, sica'reni yäl'nabajn par tejpas.

Xho huinälaiz Dios rebejn guedxliuj

¹⁶ 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl'nabajn par tejpas. ¹⁷ Sa'csi di Dios nuxhal xi'nni te gusniytjni rebejn guedxliuj, alga baxhal'nini te laa rebejn neñ xtojlrëni xcuentni.

¹⁸ 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtiidx Xinxteb Dios. ¹⁹ Ni'cni dee najc yäl'nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxaglaizruren yäl'nacäy cadro tre'reni, gulälazreni bianijga sa'csi xhet laadi najc xtzuunreni. ²⁰ Guiraa reni rujn dzunguijdx, rhälaz bianijga, dizaren guibig loj bianijga, didi guluiloj bianijga rextzunguijdxreni. ²¹ Luxh reni rusoob didxlii, rbigrëni loj bianijga, te bianijga ruluiloj najc rextzuunreni redzunsac xten Dios.

Rnisac Juan ni rutiobnis xcuent Jesús

²² Dxejcti biääd Jesús näjza rexpejnpacni nez lo reyuj xten Judea. Ro'c gyunäjniren, batiobnisza rexpejnpacni rebejn. ²³ Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijn nis. Ro'c säa rebejn lojni te cagutiobnisniren. ²⁴ Dxejc gajdreni gusäu Juan neñ latzguib.

²⁵ Dxejcti gusloj rexpejn Juan cayujy diidx con gaii xpejn Israel xcuent yäl'rdiib naaren ni najc xcostumbr rexpejn Israel. ²⁶ Dxejc biäädreni lo Juan, räjpreni:

—Mastr, dade' nani gyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

²⁷ Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni.

²⁸ Lagajc la'tu nancheetu guniliä: “Dina gacä Crist ni cabäjztu jiääd.”

Guniäza: “Narä nacä nani biädnijd lojni.” ²⁹ Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduhni sa'csi riejn diajgni xse' bi'n. Sigajcza abibaduxh lazä xcuentni. ³⁰ Nanab gacni laani beñroru, beñsajcru, biädla narä riajl gacä beñhuinru, ni guxiiru sajc lojni.

Nani siääd Xhaguibaa

³¹ Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. ³² Nani bahuini, nani biejn diajgni, ni'c rusule'ni niluxh guxii rililajzreni xtiidxni. ³³ Nani rililajz diidx ni rusule'ni, beñga ruluiloj guliipac najc xtidx Dios. ³⁴ Nani baxhal Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. ³⁵ Dad Dios sanälajzni xingaanni, abadeedzani guiraliiti chu ladzñaani. ³⁶ Nani rililajz xtidx xingaanni arajp yälñabajñ par tejpas, luxh ni di chalilajz xtidx xi'nni, dini fii yälñabajñ, siääd xcälrdxe'ch Dios yejcni, sujn Dios castiigwni.

4

Rdxaag Jesús te gunaa Samaria

¹ Che guchee Jesús abiejn diajg refarisee xhidajlru beñ sanajl Jesús luxh guxiiru sanajlreni Juan, luxh cagutiobnisreni, ² (niluxh xhet Jesúsdi cagutiobnis. Rexpejñni ni catiobnis), dxejc ³ biriini Judea gubisacni nez Galilee.

⁴ Lañ ni sasajni, nanab tedni nez Samaria. ⁵ Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed tojacoob lo xi'nni toJosé. ⁶ Ro'c sojb te bisie ni rniireni “xpisie Jacoob”. Sa'csi abadxajg Jesús siädsajni, gurejni ro bisiega. Agojl läidxej. ⁷ Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

⁸ Sa'csi rexpejñpacni asääreni guejdxga sasiireni xhi gaureni.

⁹ Räjpti guna samaritanğa lo Jesús:

—¿Xho mood rniablu nis loä, luj ni najc te beñ Israel luxh narä nacä gunaa samaritan?

(Sa'csi di rexpejñ Israel chanä sa'reni rebejñ Samaria.) ¹⁰ Räjp Jesús lojni:

—Paru najnlu xhini'c najc yälñulasajz xten Dios, paru numbeelu chuni'c canab nis lojlu, luj siniablu lojni te laani guniidxni nisñabajñ lojlu.

¹¹ Räjpti gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisñabajñga, ä? ¹² ¿La beñrorulu lo toxtadgoldoonu Jacoob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

¹³ Badzu' Jesús diidxre lojni, räjpni:

—Guiraa reni rä' nis bisiere, siojlreni stehuält. ¹⁴ Luxh nani yä nis nani gudedä, diruni jiojl, sa'csi nis nani gudedä neñ lastooni sajcn si'c te bisie nani rdatis nisni te gudeedni yälñabajñ par tejpas.

¹⁵ Dxejcti räjp gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jiädlä'pä nis ree.

¹⁶ Räjp Jesús:

—Huij, huitejdx chäälu gudanäni ree.

¹⁷ Räj̄p gunaa loj Jesús:

—Ruti chälä.

Räj̄p Jesús lojni:

—Laaca guniilu, ¹⁸ sa'csi aguyu' gaiili chäällu. Luxh nani rbäznäjlu naj dini gac chäällu; guliica najlu.

¹⁹ Che biejn diajg gunaaga si'c, räj̄pni:

—Dad, rchaloä najclu te niguui ni rnii xtidx Dios. ²⁰ Retoxtdagoldoonu gojnreni Dios lo dajnre, luxh la'tu rniitu guedx Jerusalén najc cadro nanab ganni Dios.

²¹ Räj̄p Jesús lojni:

—Gunaa, huililajz xtidxä, sidzuj̄n or cheni nicla lo dajnre, niclaza guedx Jerusalén ditu chagaj̄n Dad Dios. ²² La'tu rajntu Dios nani ditu gumbee, nuunu raj̄nnu Dios nani rumbeenu; sa'csi yälruslaa bejn lo dojl siäd xcuent rexpejn Israel. ²³ Niluxh sidzuj̄n or, luxh alabidzuj̄nni, che reni guliipac raj̄n Dad, reni'c neñ lastooreni, lo xcäriejnreni saj̄nni Dios. Sa'csi sa' bejnre rguil Dad Dios te ganrenini. ²⁴ Dios najc te Sprit. Reni raj̄n Dios nanab ganrenini neñ lastooreni, lo xcäriejnreni, guideb xtijpreni sa'csi rumbeerenini.

²⁵ Räj̄p gunaa lojni:

—Ananä siäd Mesías ni laaza Crist. Cheni jiädni, laani susule'ni guiraliiti loonu.

²⁶ Räj̄p Jesús lojni:

—Narä ni caniä lojlu, nacä laani.

²⁷ Dxejc bidzuj̄n rexpejn̄pacni, bidxeloren̄i sa'csi gunii Jesús lo gunaaga, niluxh rut gunabdiidxdi xhi rlaj̄zni, niclaza rut gunabdiidxdi xhini'c caninäjni gunaaga. ²⁸ Dxejcti basa'n gunaaga xtie'ni, sä'tini guedxroga. Dxejcti räj̄pni loj rebejn̄:

²⁹ —Coltaa, fiitu te niguui ni gunii loä guira'ti nani abenä. ¿La et laadi dee Crist ni cabääznu jiäd, ä?

³⁰ Dxejc birii rebejn̄guejdxga, bidzuj̄ntireni lojni. ³¹ Reni najc rexpejn̄pacni canabduxhrenei gau Jesús, räj̄preni:

—Mastr, gudajw.

³² Laani räj̄pni:

—Narä rapä xhi gauä nani ditu gumbee.

³³ Dxejcti räj̄p rexpejn̄pacni lo sa'reni:

—¿Xhaa yu' chu abiädnä xhi gudajwni, ä?

³⁴ Räj̄p Jesús:

—Yälrajw xtenä najc gunä si'cni rlajz nani baxhal narä, näj guluxä xtzuunni. ³⁵ La'tu rniitu riäd̄x tajp bäii te guire' cose'ch. Narä rniä colguiliäs lojtu, colfisa'c loniaa, abiquijt̄z regäj̄l, agojl guire' cose'ch. ³⁶ Nani ruj̄n dzuun rutie' cose'ch rca'ni xcuentni, luxh ni caca'ni najc par yäl̄nabaj̄n par tejp̄as, te tejsi guibalaznäj̄ nani gule'c binij̄ näj nani batie' cose'ch. ³⁷ Sa'csi gulii najc diidx nani rnii bejn̄, rniireni: “Tejni rbe'c binij̄, ste'cani rutie'ni.” ³⁸ Narä abaxhalä la'tu gutie'tu cose'ch nani ditu nibe'c; ste'ca najc nani bejn̄ dzuun gule'cni binij̄, dxejc la'tu jiu'tu gutie'tu cose'ch loj xtzuunni.

³⁹ Xhidaj̄l reben̄ Samaria huililajz xtidx Jesús xcuent rediidx ni räj̄p gunaaga lojreni che räj̄pni: “Guniini loä guiralii nani abenä.” ⁴⁰ Ni'cni, che biäd̄ reben̄ guedx Samaria lojni gunabreni loj Jesús jia'nni lajdxreni.

Dxejc bia'nni ro'c tio'p dxej. ⁴¹ Dxejc xhidajlrureni huililajz xtiidxni ni guniini lojpacreni. ⁴² Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni ruslaa rebejn guedxliuj loj dojl. Laani najc Crist ni cabäaznu jiaäd.

Basiajc Jesús xi'n te bejn ni rujn xtzuun gubier

⁴³ Che gudejd tio'p dxej, biriini guedx Samaria, huinuuni xnezyujni nez Galilee. ⁴⁴ Sa'csi lagajc Jesús gunii, räjpni: Te bejn nani rnii xtidx Dios di reben lajdxpacni chanälajz xtiidxni. ⁴⁵ Che bidzujnni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejnni.

⁴⁶ Gubisacni, bidzujnni guedx Caná xten Galilee cadro bejnni bidxaa nis gujcn bin. Dxejcti guyu' te dade' nani rujn xtzuun reii. Guedx Capernaum naga' te xi'nni cayacxhuu. ⁴⁷ Che biejn diajg dade'ga abirii Jesús Judea, abidzujnni nez Galilee, huijni lo Jesús, gunabduxhni lojni chääni te gusiajcn xi'nni nani naga' cuentro, ameerli guetni. ⁴⁸ Dxejcti räjp Jesús lojni:

—Paru ditu fii reseene, remilagwr, ditu chalilajz chuni'c nacä narä.

⁴⁹ Dade' ni rujn xtzuun reii, gunii lojni, räjpni:

—Do'o Dad, te di guet xi'nä.

⁵⁰ Räjp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolijzni, birii rexmosni, huichaglojni, badeedreni diidx nabajn xi'nni.

⁵² Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³ Dxejcti guchee dade'ga lagajc oṛga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäzreni jiaäd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejn Betesda nani naxu'n

¹ Che gujcti recosre, guyu' te lanij xten rexpejn Israel, dxejc huij Jesús guedx Jerusalén. ² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäzreni guiniib nisga ⁴ sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcn lo xhitis yälguijdx ni rajcni. ⁵ Ro'c guyu' te beñ racxhuu nani agujc galbitzubixhujn ijz cayacxhuuni. ⁶ Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlajzlu jiajclu?

⁷ —Dad —räjp beñ racxhuuga lojni—, dina gapä chu gusäl narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

⁸ Räjp Jesús lojni:

—Huistie, guläs xta'lu, guzaj, huij.

⁹ Lagajc dxejc biajc bejn̄ga, guläsni xta'ni, gusloj gusajni. Niluxh dxejga najc dxej nani rusilajz rexpejn̄ Israel, ¹⁰ ni'c räjp rexpejn̄ Israel lo bejn̄ ni biajcga:

—Nadxej najc dxej ni rusilajz bejn̄. Di gacdi guulu xta'lu.

¹¹ Laani räjpni:

—Nani basiajc narä, laani naj loä: “Guläs xta'lu, gusaj.”

¹² Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³ Dxejcti ben racxhuu ni biajcga dini gaan, sa'csi gunitloj Jesús, biriini ro'c laḷ ni tre' xhidajl bejn̄ lajtga. ¹⁴ Che bidxaagni Jesús stehuält nen̄ guidoro, räjp Jesús lojni:

—Ahuii, naj ni abiajclu, na'c gunlu dojl̄ stehuält, didi sajclu xhi stee ni najc cuentruru.

¹⁵ Sä'ti bejn̄ga, huiye'tzni loj rexpejn̄ Israel laa Jesús ni basiajcni.

¹⁶ Ni'cni gusloj rexpejn̄ Israel carinajlreni Jesús, rlaizreni guiga'ni te ju'trenini, sa'csi rujnni redzuunga dxej ni rusilajzreni. ¹⁷ Luxh räjp Jesús lojreni:

—Xtadä Dios najli cayujnni dzuun, ni'cni näjza narä cayunä dzuun.

¹⁸ Ni'cni rlaizru rexpejn̄ Israel ju'tni, xhet ganaxdi sa'csi rujnni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

¹⁹ Badzu' Jesús diidxe räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn̄ Xtadni dzuunga, sa'csi guira'tis dzuun ni rujn̄ Xtadni, dzuunga rujnza Xi'nni sigajc rujn̄ Xtadni. ²⁰ Sa'csi rinälajz Dad xi'nni, ruluini lo xi'nni guiraa redzuun nani rujnni, luxh dzunroruza suluini lojni gunni, te guidxelojtu. ²¹ Sigajc ni rliäs Dios rebengut, rudeedni yälnabajn̄ lojni, sigajcza sudeed xi'nni yälnabajn̄ lo renani rlaiztisni. ²² Nicla Dad di gun yälguxhtis, alga badeedni guiralii yälguxhtis gun Xi'nni, ²³ te guiraa bejn̄ guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhaḷni biäädni.

²⁴ Rniliä, rniliäpac lojtu, nani rucudiajg xtidxä, ni chalilajzzani nani baxhaḷ narä, ni'c rajpni yälnabajn̄ par tejpas; niluxh dini ted lo yälguxhtis, alga abiriini lo yälgujt, agudejdni lo yälnabajn̄. ²⁵ Rniliä, rniliäpac, sidzujn̄ or, luxh alabidzujnni, cheni siejn̄ diajg rebengut xse' Xi'n Dios, luxh reni riejn̄ diajgni diidxga sibaḷsacreni lo rebengut. ²⁶ Si'cni rajp Dad Dios yälnabajn̄ lagajcsi laani, sigajcza badeedni lo Xi'nni ga'pni yälnabajn̄ lagajcsi laazani. ²⁷ Badeedzani lojni yälrnibee te gunni yälguxhtis, sa'csi najcni Xi'n Dios ni gujc Niguii. ²⁸ Na'c rdxelojtu rediidxre, sa'csi sidzujn̄ or cheni guiraa reni yu' nen̄ baa siejn̄ diajgreni xse'ni ²⁹ siriizareni nen̄ baa. Reni bejn̄ dzunsa'c siriireni te guibaḷsacreni loj yälnabaḷsa'c, niluxh reni bejn̄ dzunguijdx, siriireni te guibaḷsacreni te tedreni lo xcälguxhtis Dios.

Nani ruluiloj yälrnibee ni rajp Jesús

³⁰ Xhet rajc di runä lagajcsi narä. Sigajc ni riejn̄ diagä, sigajcza runä yälguxhtis. Luxh yälguxhtis ni runä laaca najcni sa'csi dina quilä gunä

nani rlazätis, rguilätis gunä si'c ni rlanj Dad nani baxhaḷ narä. ³¹ Palga narätis rniä diidx lagajc xcuentä, xhet sajcdi diidxga. ³² Yu' stee nani rnilli diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhaltu chu huij loj Juan, huinabdiidxreni lojni "chu najc bejnga", niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rnii rebejn xcuentä luxh canisacä rediidxre te laatu lo xtojltu. ³⁵ Juan gujc si'c te bajl ni ralguij, basanijzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtaďä gunä, lagajc redzuun ni runä, huenliisi ruluilojreni Xtaďä Dios baxhaḷ narä. ³⁷ Xtaďä ni baxhaḷ narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni neḡ lastootu, sa'csi di lajztu chalii xtiidx nani baxhaḷ narä. ³⁹ La'tu roḷduxhtu reguijtz xten Dios sa'csi rchalotu si'c sidxältu yäl nabajḡ par tejpas, luxh lagajc reguijtzga rusule' chu narä. ⁴⁰ Naadditu jiääd tu loä te ga'ptu yäl nabajḡ par tejpas.

⁴¹ 'Narä dina quilä chu bejn guiliä'p xpala'nä nez loä. ⁴² Luxh narä anumbeätu, ananä ditu chanälajz Dios neḡ lastootu. ⁴³ Narä biälä xcuent Xtaďä, luxh ditu gucuadiajg xtiidxä; paru jiääd chu stee bejn xcuentcani, ni'c sii sucuadiajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quii xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtaďä. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nililajz pactu xtiidx toMoisés, dxejc niliiza lajztu xtiidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, ¿xho chalilajztu rediidx nani cania lojtu, ä?

6

Bayaan Jesús gaii miḷ niguii

(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ² Sanajl xhidajl bejnmi sa'csi rhuiireni remilagwr ni rujnni lo rebejn racxhuu. ³ Dxejcti huä'p Jesús yejc te dajn, ro'c gurenäjni rexpejn pacni. ⁴ Niluxh ameer gac lanij pascw xten rexpejn Israel, cheni rudeedreni xquixhtios lo Dios xcuent dxej ni biriireni Egipto. ⁵ Cheni guläs Jesús lojni, bahuini siääd xhidalduxh bejn, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

⁶ Dxejc räjpzani si'c te don xhi xhigab gun Felipe, luxh laani anajnni xho gunni. ⁷ Räjp Felipe lojni:

—Di tio'p gayuu beex yätxtiil gaḷ te gaureni tlagaj.

⁸ Tej rexpejn pacni ni laa Andrés, bejtz Simón Pedr, räjp lojni:

⁹ —Ree suga' te biuux ca' gaii yätxtiil con tio'p bäl, ¿xhixh sajḷ ni'c gau rebejn xhidajlre?

¹⁰ Dxejcti räjp Jesús:

—Colyejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaii miḷ najc reniguii.

¹¹ Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejn pacni. Dxejcti rexpejn pacni gudisrenini loj rebejn nani

sobga'. Sigajcza gudisreni rebäjl si'ctisni rlaizreni gaureni. ¹² Che gulujx gudajwreni, gudxaj xque'reni, dxejcti räjp Jesús loj rexpejnpacni:

—Colgutie' guiraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' gudajwreni. ¹⁴ Che bahuui rebejn ga reseen, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabääznu jiaäd lo guedxliuj.

¹⁵ Sas che gucbee Jesús cayujnreni xhigab jiaänaazrenini te niujnreni gacni rei te guinibeeni lojreni, biriini ro'c, xtebni gubisacni nen dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojl guxhijn, bidzujn rexpejnpacni lo nisdoo. ¹⁷ Biu'reni nen te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcuente te beduxh nani cabi'. ¹⁹ Ni'cni che gusajreni si'cti gaii o xho'p kilómetro, bahuireni siäddzungajxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni nen barcw. Dxejcti bidzungajczeni stelaad lo yuj cadro sääreni.

Caguiil rebejn Jesús

²² Che bara yääl, rebejn nani bia'n stelaad ro' nisdoo, bahuireni asanä rexpejnpacni barcwbäz nani suga' ro'c, niluxh di Jesús nij, xtebsireni sääreni. ²³ Luxh bidzungajc sgaii barcw nani birii guedx Tiberias, te lajt ni tre' gajx cadro gudajwreni yätxtiil che gulujx badeed Jesús xquixtios lo Dad. ²⁴ Che bahuui rebejn ruti Jesús ro'c, niclaza rexpejn, biu'reni nen rebarcw, sääreni guedx Capernaum satiilreni Jesús.

Jesús najc yätxtiil xten yälnabajn

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujnlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiditu remilagwr nani benä. ²⁷ Na'c guntu dzuun ganax par yälrajw nani rnitloj. Colyejn dzuun par yälrajw nani di nitloj, ni runiidx yälnabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlaiz Dios?

²⁹ Räjp Jesús lojreni:

—Dee najc ni rlaiz Dios guntu: chalilajztu xtidx narä, nani baxhalni.

³⁰ Räjpreni lojni:

—¿Xhi seen gunlu te guihuiinu xcälrnibeelu te cholilajznu xtiidxlu? ¿Xhi dzuun rujnlu? ³¹ Retoxtdadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäädpac xhaguibaa. ³³ Sa'csi

yätxtiil xten Dios najc bejn ni siääd xhaguibaa, niluxh laani rudeedni yälñabajn par tejpas loj reben guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälñabajn nani riäjł jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojl par tejpas. ³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtaďä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rłajz Xtaďä, xhet si'cdi ni rłazädi. ³⁹ Dee najc ni rłajz Xtaďä nani baxhał narä: na'c nit nicla tej renani baniidxni loä, te guspañsacä guiragajcreni che gał dxej lult ni riäjł jiaäd. ⁴⁰ Scree rłajz nani baxhał narä: guiraa renani fii lo Xi'n Dios, nāj chalilajzreni xtiidxni, xca'reni yälñabajn par tejpas niluxh narä suspañsacäreni che gał dxej lult ni riäjł jiaäd.

⁴¹ Rediidxre bejn gusloj casiejy rexpejn Israel xcuent Jesús sa'csi räjpreni: “Narä nacä yätxtiil ni biäjł xhaguibaa.” ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtaďni, xnanni, ¿xhoxh rniini xhaguibaa biäjłni?

⁴³ Dxejc räjp Jesús lojreni:

—Na'c rusieinäj sa'tu. ⁴⁴ Rut rajcdi riääd loä palga di Xtaďä ni baxhał narä jiädnäni loä, te guspañsacäni che gał dxej lult ni riäjł jiaäd. ⁴⁵ Loj reguijtz ni bacuaa redade' ni gunii xtidx Dios caj scree: “Sului Dios guiraareni.” Ni'cni guiraa reni rucuadiajg xtidx Xtaďä, reni rsieed lojni, reni'c ni jiaäd loä.

⁴⁶ 'Dinä guiniä yu' chu abahuii lo Dios; tejtis ni abahuii lojni: nani baxhał Dios, ni'ctis abahuii lojni. ⁴⁷ Rniliä lojtu che rniä: nani chalilajz xtidxä, ni'c rajp yälñabajn par tejpas. ⁴⁸ Narä nacä yätxtiil nani rudeed yälñabajn. ⁴⁹ Retoxtaďtu gudajw mana ni bastejb Dios lo reyubijdz, dxejcti gujtzareni. ⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹ Narä nacä yätxtilbajn ni siääd xhaguibaa. Palga yu' chu gau yätxtiilre, sibajłni par tejpas. Yätxtiil nani runidxä narä te xca' reben guedxliuj yälñabajn najc lagajc bältiehxä.

⁵² Dxejcti gusloj casiejy rexpejn Israel räjpreni:

—¿Xho gac guñidx dee bältiehxhni guidaunu, ä?

⁵³ Räjpre Jesús:

—Rniliä, rniliäpac lojtu, palga ditu gau bältiehxh Xi'n Dios ni gujc Niguii, palga dizatu yä xtiejłni, digacdi ga'ptu yälñabajn. ⁵⁴ Nani gau bältiehxä, nani yäza xtiēnā, ni'c rajp yälñabajn par tejpas, niluxh suspañsacäni che gał redxej lult. ⁵⁵ Sa'csi bältiehxä najc te yälrausa'cpac, xtiēnā najcza te yälräsa'cpac. ⁵⁶ Nani gau bältiehxä, nani yäza xtiēnā, ni'c yu'pac con narä, luxh narä yu'äza con laani. ⁵⁷ Xtaďä ni baxhał narä rajp yälñabajn par tejpas. Narä nabañä xcuent laani. Sigajcza nani rajw narä, sibajłzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni gudajw xtaďtu dxejc empac gujtreni, sa'csi nani gau yätxtiilre sibajłni par tejpas.

⁵⁹ Recosre baluii Jesús neñ te guidobāz lał ni guyu'ni guedx Capernaum.

Diidx xten yälñabajn par tejpas

⁶⁰ Che biejn diajgreni si'c, xhidał rexpejłpacni räjpre:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusieyreni xcuent rediidxga, dxejc gunabdi-idxni räjpni:

—¿La rusieed rediidxre la'tu, ä? ⁶² ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? ⁶³ Sprit xten Dios najc ni rudeed yälñabajñ; bälñiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälñabajñ par tejpas. ⁶⁴ Luxh laltis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, gutedni laani ladzñaa reben dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jääd loä palga di Xtaä jädnäni loä.

⁶⁶ Lagajc dxejc gusloj cabicaj xhidajl rebejn ni agujc xchej gusanäj Jesús, dirureni nisianäj Jesús. ⁶⁷ Dxejcti räjp Jesús loj guidzubitio'p rexpejn pacni:

—¿La nägajcza la'tu rlanjtu jiitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälñabajñ par tejpas.

⁶⁹ Nuure abiolilaaznu, anajnnu najclu Crist Xi'n Dios nani nabajñ.

⁷⁰ Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtunajc bendxab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejn pac Jesús.

7

Di rebejtz Jesús chalilajz

¹ Che gujcti recosre, cansaj Jesús nez reyuj xten Galilee, di rlanjzni jia'nni nez reguedx Judea sa'csi rlanj reben ro'c ju'tni. ² Luxh ameer gal lanij xten cose'ch xten guidoguijd, te relanij xten rexpejn Israel. ³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejn pacu fii redzunro nani rujnlu. ⁴ Sa'csi rut rujndi xtzuunni xhiga'tz palga rlanjzni gacbee bejn xhi dzuun rujnni, te gumbée bejnñi. Palga rujnpacul redzuunre, baluini lo guiraa reben guedxliuj.

⁵ Guniireni si'c lojni sa'csi nicla rebejtzni di chalilajz xtiidxni. ⁶ Dxejcti räjp Jesús lojreni:

—Gajd xhorä guidzujñ, niluxh par la'tu xhitis or najc hueen. ⁷ Di gacdi guidxe'ch reben guedxliuj lojtu, luxh rdxe'chreni loä sa'csi narä niliä xcuentreni: dzunguijdx najc xtzuunreni. ⁸ La'tu colchäj lanij; narä dina cha'a lanijga sa'csi gajd xhorä gal.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. ¹¹ Dxejcti caguil rexpejn Israelni lo lanijga, räjpreni:

—¿Concha niguiiga?

¹² Lo rebejn xhidaalga yu' xhidajl bejn ni cagusieyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusueeni reben guejdx.”

¹³ Nicla tejreni xhet casäbdiidxireni xhini'c caniireni. Direni guinii dip sa'csi rdxejbreni rexepejn Israel nani rnibee.

¹⁴ Agurojl lanij, che biu' Jesús nen guidoro. Dxejcti gusloj caguluiini.

¹⁵ Dxejcti rdxeloj rexepejn Israel nani rnibee, räjpreni:

—¿Xho najn dee guiralaj, niluxh dini nisieed xleii toMoisés?

¹⁶ Badzu' Jesús diidxre, räjpni:

—Yälrlului nani caluiyā et xtenādini, xten nani baxhaļ narāni. ¹⁷ Palga yu' chu rlajz gun nani rlajz Dios, sacbeeni la xten Dios najc reyälrlului xtenā, o la lagajcsi narā rbāā diidx ni caguluiā. ¹⁸ Nani rusule'ni diidx nani lagajc laani rbāāni, ni'c rniini diidxga te guiliā'p rebejn xpala'nni, luxh nani rguil chā'p xpala'n nani baxhaļni, ni'c ni rnii didxlii, xheti yälrusguee nen lastooni. ¹⁹ ¿La di toMoises nuniidx leii lojtu, ā? Niluxh nicla tejtu di gusoob xtidx leiiga. ¿Xhicuent rlajztu ju'ttu narā, pes?

²⁰ Badzu' reben xhidajlga diidxre, räjpreni:

—¿Xpriet bendxab yu' lastoolu! ¿Chuni'c rlajz ju'tlu?

²¹ Badzu' Jesús diidxre lojreni, räjpni:

—Tejtis dzuun benā con xcāl rnibeā, dxejc guiraatu cadxelojtu sa'csi benāni dxej ni rusilajztu. ²² Ni'cni baniidx toMoisés lojtu yälru'tu bee, luxh etlaadini guläxtejnini, agac guläxtej retoxtadgoldootuni. La'tu rusältu bee rebiiux mase najcni dxej nani rusilajztu. ²³ Mbaj pes, palga rajc rusältu bee bejn te dxej nani rusilajztu didi nit xleii Moisés, ¿xhicuent rdx'e'chtu loā sa'csi basiacāpac te bejn te dxej nani rusilajztu, ā? ²⁴ Na'c rujntu yälguxhtis si'ctis ni rlajztu. Cölyejn yälguxhtis con yälguxhtis xten Dios.

Rusule' Jesús casiäädni

²⁵ Dxejcti gusloj gaai bejn Jerusalén cayujn yälgunabdiidx, räjpreni:

—¿La etlaadi dee ni caguilreni te ju'trenini, ā? ²⁶ Ani asuga', caniiini nez loj guiraa rebenguejdx, niluxh rut rudxojdini. ¿Xhaa ahuililajz reguxhtis, regubier laani najcpacni Crist, ā? ²⁷ Niluxh nuure nadoncheenu caro siääd niguiire, niluxh che jiääd Crist, rut gacbeedi caro siäädni.

²⁸ Caguluii Jesús nen guidoo che biejn diajgni rediidxre, dxejc dipduxh guiniini, räjpni:

—La'tu numbeetu narā, najntu caro siälä; luxh dina niälä lagajcsi narā; nani baxhaļ narā guliipac nabajnni, luxh la'tu ditu gumbeeni. ²⁹ Luxh narā numbeāni, sa'csi lojni biriä, laani baxhaļzani narā.

³⁰ Dxejc rlajzreni niniaazrenini, niluxh rut gunaazdini, sa'csi gajd xhorni gal. ³¹ Xhidajl bejn lo reben xhidajlga huililajz xtiidxni, dxejcti räjpreni:

—Cheni jiääd Crist, ¿xhixh sujnrundi milagwr loj nani rujn dee, ā?

Ruxhaļ refarisee guixhajg guiniaaz Jesús te jiäuni

³² Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhaļreni guixhajg te guiniaazreni Jesús te jiäuuni. ³³ Sas räjp Jesús lojreni:

—Bale'si dxej su'ā lojtu, dxejcti guibi'ā loj nani baxhaļ narā. ³⁴ Siguilto narā, niluxh ditu guidxäl narā, sa'csi cadre cha'ā digacdi jiäädtu.

³⁵ Ni'c gunii rexepejn Israel lo sa'reni; räjpreni:

—¿Cacharo chāāni ni'c di gacdi guidxälnuni? ¿Xhaa sijni loj rexepejn Israel nani nare'ch nez lajdx regriegos te guluiini regriegos? ³⁶ ¿Xhi säloj

diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiäädту”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiäädni loä te yäni. ³⁸ Nani chalilajz xtidxä si'cni caj lo rexquijtz Dios nen lastoolini siliejn nisnabajn.

³⁹ Rediidxre guniini xcuent Sprit Dxan nani churu jiädläjz nen lastoo reni rililajz xtiidxni, sa'csi gajd Sprit Dxan jiääd, sa'csi gajd Jesús guibansac lo rebengut.

Gucgala' rebejn

⁴⁰ Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹ Yu'zaren räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiääd Crist nez Galilee. ⁴² Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadro siääd torei David.

⁴³ Dxejcti gucgala' rebejn xcuent Jesús. ⁴⁴ Yu'reni rlajz chääni pres luxh rut białxdi gunaazni.

Di reguxhtis chalilajz biääd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶ Badzu' reguixhajg diidxre, räjpreni:

—¿Gajdpac te bejn guinii si'cni rnii bejnga!

⁴⁷ Dxejc räjp refarisee:

—¿La näj la'tu abasgueeni, ä? ⁴⁸ ¿Xhixh loj regubier o loj refarisee yu' chu tej ni ahuililajz xtiidxni, ä? ⁴⁹ Reben xhidajlre ni di gan xleii to Moisés, reni'c aguijtpac.

⁵⁰ Nicodem, nani huij lojni te guxhijn, najc te refarisee. Laani räjpni lojreni:

⁵¹ —Lo xleiiu caj: digacdi guntu yälguxhtis te bejn palga gajdtu gucuadiagxgaa xtiidxni, te don xhi bejnii.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Bılsa'c xhi caj lo xquijtz Dios, suhuiilu nicla tej niguii nani rnii xtidx Dios di jiääd nez Galilee.

Gunaa nani biga' carälguijxh con te niguii

⁵³ Dxejc cade tejreni sii rolijzreni.

8

¹ Dxejcti huij Jesús nez dan Olib. ² Rsilru gubi'ni, bui'ni nen guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluinireni. ³ Dxejcti biääd refarisee näjza reben najn, biädnäreni te gunaa nani biga' carälguijxh con te niguii. Basujrenini galäii reni suga' ro'c. ⁴ Räjpreni loj Jesús:

—Mastr, gunaare biganäj te niguii carälguijxhreni, niluxh yu' chäälni.

⁵ Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. ⁷ Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagucuaani con bicueñaani lo yuj. ⁹ Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näza gunaa ni suga' galäiireni. ¹⁰ Dxejc gusulii Jesús, luxh sa'csi rutru lojdi bahuini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquijdiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yälñacäy, sica'ni bianij ni rudeedpac yälñabajn.

¹³ Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵ La'tu rujntu yälguxhtis si'c najctis rehxigab xten beñ guedxliuj. Narä rut lojdi runä yälguxhtis. ¹⁶ Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtaä ni baxhal narä rienñuni. ¹⁷ Luxh lo xleiitu caj diidxre: “Che rnii tio'p bejn tejsi diidx, didxliini, colchalilajzni.” ¹⁸ Narä rniliäpac diidx lagajc xcuentä, dxejcti Xtaä nani baxhal narä rniliizani diidx xcuentä.

¹⁹ Räjpreni loj Jesús:

—¿Caro yu' xtaälu?

Räjp Jesús lojreni:

—Ditu gumbee nicla narä, niclaza Xtaä; paru niembeetu narä, niem-beezatu Xtaä.

²⁰ Rediidxre gunii Jesús cadro re' gojn, lañ ni caguluiini nen guidoro niluxh rut gunaazdini sa'csi gajd xhoñni guidzujñ.

Cadro cha'ä, la'tu digacdi jiäädtu

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtту. Cadro cha'ä di gacdi jiäädtu.

²² Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³ Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴ Ni'cni guniä lojtu, sejtту lo xtojltu sa'csi palga ditu chalilajz nacä chu nacä, sejtпactu lo xtojltu.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhal narä najc beñ guliipac; nani bieñn diagä guniini, rediidxga rniä loj reben guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxhalni, luxh xhetliidi runä lagajcsi xcuentä. Si'cni baluii Dad narä, si'ctis rniä. ²⁹ Nani baxhal narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ La! ni caniini si'c, xhidajlreni huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä.

³² Sumbeezatu nani najc didxguli, niluxh didx guliiga suslaa la'tu lo xtojltu.

³³ Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

³⁴ Räjp Jesús:

—Riniliä, rniliäpac lojtu, chutis ni rujn dojl najc mos xten dojl. ³⁵ Nani najc mos, dini jia'n roliiz xlamni guideb guibajnni, niluxh nani najc xi'n lamga, ni'c sii sia'n roliiz xtadni guideb guibajnni. ³⁶ Ni'cni, palga ruslaa xi'nni la'tu lo dojl, dxejcsii apac gulaatu. ³⁷ Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtadä; luxh la'tu rujntu nani bieñza diajgtu lo xtadtu.

³⁹ Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni beñn toAbraham. ⁴⁰ Luxh naj rlanjtu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c! ⁴¹ La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejnñdi; nuure tejtis xtadnu yu', laani najc Dios.

⁴² Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhal narä. ⁴³ ¿Xhicuent ditu gacbee rediidx ni rniä lojtu? Sa'csi di rlanjtu gucuadijgtu rextidxä. ⁴⁴ Xtadtu najc beñdxab. La'tu najctu xi'nni, rlanjtu guntu nani rlanjztisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii. ⁴⁵ Niluxh narä rniä didxlii, ni'c ditu chalilajz xtidxä. ⁴⁶ ¿Chu tejtut sajc guluu te dojl ni benä? Narä rniä didxlii. ¿Xhicuent ditu chalilajz xtidxä, ä? ⁴⁷ Nani najc xpejn Dios, ni'c rucuadijgtu xtidxä Dios. Sa'csi la'tu ditu gac xpejn Dios, ni'cni ditu gucuadijgtu xtidxä.

Ansde to Abraham, agac nabajñ Crist

⁴⁸ Dxejcti badzu' rexpejn Israel diidxre, räjpreni lojni:

—Laaca rniinu luj najclu te bejn ni siääd Samaria, bendxab yu' lastoolu.

⁴⁹ Räjp Jesús lojreni:

—Xhet bendxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä. ⁵⁰ Luxh narä dina quilä chu guiliä'p xpala'nä, yu' chu rguil guiliä'p bejn xpala'nä, niluxh laani rujnni yalguxhtis. ⁵¹ Rniliäpac lojtu, nani riu, nani rusoob xtidxä, dipacni guet.

⁵² Dxejcti räjp rexpejn Israel lojni:

—Naj agucbeepacnu yu' bendxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.” ⁵³ ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioistu. ⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. ⁵⁶ ToAbraham toxtadgoldootu, bibalajzni sa'csi nuhuiini dxej nani jlälä, niluxh bahuinini dxej bibalazduxhni.

⁵⁷ Dxejcti räjp rexpejn Israel lojni:

—Nicla gajdlu chu tiubitzuu ijz, ¿xho naalu abahuilu lo toAbraham?

⁵⁸ Räjp Jesús lojreni:

—Rniliäpac lojtu, che gajdli guibajñ toAbraham, agac nabañä narä.

⁵⁹ Dxejcti cua'reni guij te nucuaareni yejc Jesús, per di Jesús niga', biriini neñ guidoro, gudejdni galäireni. Sä'tini.

9

Basijc Jesús te bejn ni natiä'p balojni che gojllini

¹ Che cadejd Jesús te lajt, bahuini sobga' te bejn ni che gojlli bejnğa agajc natiä'p balojni. ² Dxej gunabdiidx rexpejnpacni lojni, räjpreni:

—Mastr, ¿chuni'c bejn dojl, la bejnre o la xcuzejnni, ni'c natiä'p balojni che gojlni, ä?

³ Räjp Jesús:

—Nicla laani, niclaza xcuzejnni di niujn dojl. Si'c gojlni te xcuent ni saj bejnre suhuii bejn xho najc xtzuun Dios. ⁴ Nanab gunä xtzuun nani baxhal narä naj ni najc rdxee, sa'csi cheni guidzujñ guxhijñ rut gacdi gun dzuun. ⁵ Lañi yu'ä lo rebejn guedxliuj, nacä xpianij guedxliuj.

⁶ Che gulujx guniini si'c, batiobxhejn ni lo yuj, bejn ni bajñ con xhejn ni, gudääbnini con bicueñaani lo rebaloj lotiä'pga. ⁷ Dxejcti räjpni:

—Huij, huitiib lojl neñ nis ni laa Siloé. Laj nisga sälojza “baxhalni”.

Dxejcti huijni. Huitiibni lojni. Che gubi'ni, aruhuiini. ⁸ Dxejcti rexpisin lotiä'pga, näj renani galoo bahuireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zaren räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arien balojlu?

¹¹ Dxejcti räjpreni dade'ga nani gujc lotiä'p:

—Dade' ni laa Jesús bejn bajn, gudääbnini baloä, dxejcti najni: “Huitiib lojlu nen te nis ni laa Siloé”, dxejcti che huitibä loä, lagajc dxejc bien loä.

¹² Dxejcti räjpreni lojni:

—¿Con dade'ga naj?

Räjpti bejnga:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee. ¹⁴ Luxh sa'csi najcni dxej ni rusilajzreni che bejn Jesús bajn ni gudääbni loj lotiä'pga te biajc balojni, ¹⁵ gunabdiidxsac refarisee loj dade' nani biajc balojni, xho mood arien balojni naj.

Laani räjpreni lojreni:

—Bajn gudääbni loä, dxejc gudibä loä, naj aruhuiä.

¹⁶ Dxejc yu' refarisee ni räjpre:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zaren i räjpre:

—¿Xho gac gunni sa' remilagwrga paru najcni ben dojl?

Ni'cni gula' sa'reni, gujcreni tio'p gala'. ¹⁷ Dxejcti gunabdiidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjpre dade'ga:

—Narä rniä najcni te bejn nani rnii xtidx Dios.

¹⁸ Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga.

¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu chen gojllini natiä'p lojni? ¿Xhoxh arien lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹ Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, najcni bengool, lagajc laani sajc guiniini xhi gusajcni.

²² Si'c gunii xcuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' nen guidoo chutis te bejn ni naa Jesús najc Crist nani abiääd. ²³ Ni'cni räjpre rexcuzajnni:

—Anajcni bi'n ni ayu' xcäriejnni. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu ben dojl najc dade'ga.

²⁵ Dxejcti badzu' dade'ga diidxre, räjpreni:

—Dina ganä la najcni ben dojl o la dini gac. Tejtis nanä: gucä lotiä'p, luxh naj arien baloä.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejnni basiajcni balojlu?

²⁷ Badzu' dade'ga diidxre, räjpreni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh näj la'tu rlanjtu gactu xpejn pacni, ä?

²⁸ Dxejci gudilnäjrenini, räjpreni:

—Luj najclu xpejñni, per nuure najcnu xpejn to Moisés. ²⁹ Anadonnu guninäj Dios to Moisés, niluxh dade're dinu guidon casiäädni.

³⁰ Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiäädni, jniluxh laani basiajcní baloä! ³¹ Nadoncheenu di Dios cuadiajg xtidx reben dojl; palga yu' chu rajñ Dios, ni rusooobza xtiidxní, rucuardiajg Dios xtidx sa' bejnğa. ³² Che guslojli guedxliuj gajd diajgnu jiejn xcuent te bejn nani rusiajc baloj te beñ lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluilu nuure?

Dxejcti guläärenini neñ guidoro, barilaagwrenini.

³⁵ Biejn diajg Jesús guläärenini neñ guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxní?

³⁷ Räjp Jesús:

—Abahuiilu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojñnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

⁴⁰ Refarisee nani suganäjreni, che biejn diajgreni diidxre, räjpreni:

—¿Xhixh najczanu beñ lotiä'p, ä?

⁴¹ Räjp Jesús:

—Paru najctu lotiä'p, rut gucuajquijditu xtojltu, naj sa'csi rniitu rien lojtu, sicaquijtu rextojltu.

10

Jesús najc te baxtorsa'c

¹ 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan. ² Nani riu' nez ro' gurajl xten rexiil, laani najc xpaxtoorreni. ³ Che guidzujñ baxtoor, ruxhal nani rcanäj ro lä', te jiu'ni. Rexiilga numbeerreni xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadro naga' guixasa'c. ⁴ Che rii rexiilga neñ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga. ⁵ Luxh dipacreni chanä te baxtoor nani direni gumbee, ruxunreni lojni sa'csi direni gumbee xse' garenca bejn.

⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil. ⁸ Guiraa reni abiääd galoo, najcreni ganax gubaan luxh di rexiil nucuadiajg xse'ni. ⁹ Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

¹⁰ 'Ni najc gubaan riäädtisni te cuanni, te ju'tni, te guxhinžani, niluxh narä siälä te ga'ptu yäl̄nabaṇsa'c, yäl̄nabaj̄n par tejpas. ¹¹ Narä nacä baxtorsa'c; luxh baxtorsa'c sudeed lagajc xcäl̄nabaj̄n̄ni xcuent rexiilni. ¹² Niluxh te mos ni rajxh, di gac baxtoorpac, ni xhet xtendini najc rexiil, che rhuini siäd te cuyo't, ruxuṇni, li rbälazni rexiil. Dxejc rniaaz cuyo't rexiil, rutie'chzani rexiil. ¹³ Mosga ruxuṇ sa'csi najcni mostis, luxh dini jiu xhi rsiajc rexiil.

¹⁴ 'Narä nacä baxtorsa'c; numbeä reni najcpac rexilä; rexilä num-beezareni narä ¹⁵ sigajc numbee Xtaďä narä, sigajc numbeäza Xtaďä; luxh sudeďä xcäl̄nabaṇä xcuent rexiilga. ¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷ 'Narä siguixäza xcäl̄nabaṇä, guetä, te dxejcru siliässacä xcäl̄nabaṇä, guibaṇsacä, ni'cni sanälajz Xtaďä narä. ¹⁸ Rut sajcdi ju't narä, lagajc narä gudedä xcäl̄nabaṇä, guetä. Rapä yäl̄rnibee te gudedä xcäl̄nabaṇä, guetä, rapäza yäl̄rnibee te xcasacä xcäl̄nabaṇä te guibaṇsacä, sa'csi dee najc yäl̄rnibee ni baniidx Xtaďä loä.

¹⁹ Xcuent rediidxre gula' sa' rexpej̄n Israel, gujcreni tio'p gala'. ²⁰ Xhidajlreni canii:

—¿Xhicuent riutuni? ¿La ditu gan te beṇdxab yu' lastooni? Yejcni rajc. Xhigac rcuadiajgtu xtiidxni.

²¹ Dxejc ste cuaareni:

—Dini gac. Di rediidxre gac xtidx te beṇdxab. ¿Xhixh sajc rusiajc beṇdxab baloj relotiä'p, ä?

Rdxe'ch rebej̄n loj Jesucrist

²² Lagajc neṇ redxejga gujc lanij xten xquidoo rexpej̄n Israel guedx Jerusalén. ²³ Najcni bäi najl. Biu' Jesús guidoro, sasajni nez neṇ cordoor ni laa xten Salomón. ²⁴ Gubig rexpej̄n Israel guideb gabi Jesús, räjpreni lojni:

—¿Gucli gucuat'zlu loonu chu najclu? Palga luj najclu Crist ni cabääznu jiäd, guiniliini loonu tejpas.

²⁵ Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl̄rnibee Xtaďä, huenliisi ruluilojreni chuni'c nacä. ²⁶ La'tu ditu chalilajz sa'csi ditu gac rexilä. ²⁷ Rexilä numbee xse'ä, luxh narä num-beäzareni, riädnajlzareni narä. ²⁸ Narä rudedä yäl̄nabaj̄n par tejpas loj rexilä, luxh direni nitloj par tejpas. Rutza laadi nani sajcdi gudzucajreni ladzṇä. ²⁹ Xtaďä baniidxreni loä, laani najcni guroobru, nadipru loj guiraareni. Rut laadi nani sajcdi gudzucajreni ladzṇaa Xtaďä. ³⁰ Narä näjza Xtaďä najcnu tejsi.

³¹ Dxejc gulässac rexpej̄n Israel guij, te nucuaareni yejc Jesús. ³² Dxejcti räjp Jesús lojreni:

—Xhidajl dzuun xten Xtaďä abaluiä lojtu, ¿lo redzuunga, xhi tej dzuun rujn gucuatu guij yecä?

³³ Dxejcti räjp rexpej̄n Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beṇ guedxliujlu, luxh najlu najclu tejsi con Dios.

³⁴ Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?
³⁵ Nancheenu digacdi guidxaa xquijt Dios. Palga gulalajni redios rebejn nani bejn yälguxhtis loj rexpejn Israel, dxejc ³⁶ naj xhicient guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. ³⁷ Palga dina gunä redzuun xten Xtaä, na'c chalilajztu rextidä. ³⁸ Luxh palga runnäni, mascä ditu chalilajz xtidä, colchalilajz ni ruluu reyäl milagwr nani runä, te gacbeetu par tejpas, Xtaä yunäj narä, narä yunääza laani.

³⁹ Che rlajzreni niniaazrenini stehuält, laani biriini ladz naareni.

⁴⁰ Dxejcti sääni, gubisacni nez stelaad gueu Jordán, nejzga huijia'nni, cadro gusloj batiobnis Juan. ⁴¹ Xhidajl bejn bidzujn lojni ro'c, räjpreni:

—Di Juan niujn nicla tej yäl milagwr luxh guiraa rediidx ni gunii Juan xcuent dade're najc didxliipac.

⁴² Xhidalduxhreni huililajz xtiidxni ro'c.

11

Gujt Larz

¹ Yu' te dade' ni cayacxhuu ni laa Larz. Rhäzjni guedx Betania, lajdxza rebisiajn Marii näjza Mart. ² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcn. ³ Ni'cni baxhal guiro'p bälre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcäl rnibee Dios. Te guluilojza yälracxhuure xcäl rnibee Xi'n Dios.

⁵ Sanälajz Jesús Mart, bäljni, näjza Larz, ⁶ che räjpreni lojni cayacxhuu Larz, bia'nni stio'p dxej cadro yu'ni. ⁷ Dxejcti räjpni loj rexpejn pacni:

—Colcho', chonnu stehuält región Judea.

⁸ Räjp rexpejn ni lojni:

—Mastr, gajd gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuii lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejn pacni lojni:

—Dad, palga agudiesni, pet siajcn.

¹³ Jesús canii lojreni agujt Larz, niluxh rexpejn pacni bejn xhigab canini xcuent yälrejs xten bacältis.

¹⁴ Ni'cni guniliipac Jesús räjpni lojreni:

—Agujt Larz. ¹⁵ Rbalazä sa'csi rutinu ro'c, te chalilajztu xtidä. Colcho' te chohuiinuni.

¹⁶ Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

Jesús najc yälrbansac lo yälgujt

¹⁷ Che bidzujn Jesús lo guejdxga, agujc tajp dxej biga'tz Larz. ¹⁸ Guedx Betania tre' gajxh lo guedx Jerusalén, si'cti tio'p garol kilómetro. ¹⁹ Xhidajl

rexpejn Israel abidzujn, siadhuiireni Mart, nājza Marii, te di gac-huin lajzreni sa'csi gujt bisiajnreni. ²⁰ Che gucbee Mart abidzujn Jesús, biriini huichaglojnini; niluxh Marii bia'n rolijzreni. ²¹ Dxejcti räjp Mart lo Jesús:

—Dad, paru suga'lu ree, di bisianä niejt. ²² Narä nanä suniidx Dios guiraa nani guiniablu lojni.

²³ Jesús räjpni lojni:

—Sibaṇsac bisiajnlu.

²⁴ Räjp Mart lojni:

—Acananä sibaṇsacni che guidzujn dxej ni guibaṇsac bejn loj rebengut dxej lult che gun Dios yälguxhtis.

²⁵ Dxejc räjp Jesús lojni:

—Narä nacä yälrusaṇsac bejn loj rebengut, nājza yäl nabajn par tejpas. Nani rililajz rextidxä, masä agujtni, sibaṇsacni. ²⁶ Chutis tej bejn ni nabajn ni chalilajz xtidxä, dini nitloj par tejpas, ħriliiga lajzluni, ä?

²⁷ Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhaḷ Dios lo guedxliujre.

Biin Jesús cuä' xpaä Larz

²⁸ Che guluux gunii Mart, huitejdxni bäjlni Marii, xhiga'tz räjpni lojni:

—Abidzujn Mastr. Cabejdxzani luj.

²⁹ Che biejn diajg Marii rediidxga, huisugajcni, sahuuini Jesús. ³⁰ Gajd Jesús jiu' guejdxga, laltis suga'ni cadro bidxaagni Mart. ³¹ Rexpejn Israel nani biädcuenäj Marii, ni cahuii didi gac-huin lajzni, che bahuiireni huisu Marii, sääni, nājza laareni huirinajlreni Marii, naareni pet lo baa sayoonni.

³² Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

³³ Che bahuii Jesús cayoon Marii, nājza rexpejn Israel ni siädnajl Marii, guc-huin lastooni, biääd te rsliajz lastooni. ³⁴ Dxejcti räjpni lojreni:

—ĤCaro bacua'tztuni?

Räjpreni lojni:

—Dad, gudaa ree te fiilu.

³⁵ Dxejcti biin Jesús. ³⁶ Ni'cni cayäjp rexpejn Israel:

—Colhuii, lacti sanälajznini.

³⁷ Yu'zareni räjp:

—Dade're basiajc beṇ lotiä'p. ĤXha di niajcdi nusiajcni bejnre te di niejtni, ä?

Gubaṇsac Larz

³⁸ Guc-huinduxh lastoo Jesús, gubigni lo baa. Baaga najc si'c te biliäa, suga' te guiro ni rusäuureni ro'ni. ³⁹ Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

⁴⁰ Dxejc räjp Jesús lojni:

—ĤEt rniä lojlu, palga rililajztu, suhuiilu xcälṛnibee Dios, ä?

⁴¹ Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. ⁴² Narä nanä gullica rucuadiajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

⁴³ Che guluxj guniini rediidxga, guredxa'ni räjpni:

—jLarz! jGudaa ree!

⁴⁴ Dxejc birii bengutga neñ biliää. Naliib reñaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

⁴⁵ Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. ⁴⁶ Yu' reni huihuii loj rexpejn Israel ni laa farisee, bijreni diidx xhi bejn Jesús. ⁴⁷ Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr. ⁴⁸ Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlza'reni lajdxnu.

⁴⁹ Dxejc Caifás, bixhojzro ni riäjł gunibeeni lo rebixhojz iijzga, räjpni lojreni:

—La'tu xhetliidi najnditu. ⁵⁰ Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹ Niluxh Caifás dini ninii diidxre xcuentcani. Sa'csi iijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. ⁵² Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre. ⁵³ Ni'cni dxejlga bachaag rebejnğa diidx te don xho gunreni gugu'treni Jesús.

⁵⁴ Ni'cni diru Jesús nisaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

⁵⁵ Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw. ⁵⁶ Cansajreni caguilreni Jesús; che yu'zaren neñ guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudäáb te gunaa se't ni' Jesús

(Mt. 26:6-13; Mr. 14:3-9)

¹ Che riäädx xho'p dxej gal lanij pascw, huij Jesús guedx Betania cadro rbäjz Larz nani baspañsac Jesús loj rebengut. ² Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex. ³ Dxejcti bidzunäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejcn. Guideb neñ yu'ga gulanejxh se'tga. ⁴ Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

⁵ —¿Xhicuent di se'tre nido' choṇ gayuu denar te nidis meelga loj rebenproob? (Choṇ gayuuga najc si'cti ni xca' te niguii paru gunni dzuun tzubiteb bäii.)

⁶ Gunini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadro ruche meel, luxh rbääni meel lojga te rca'nini. ⁷ Ni'cni räjp Jesús lojni:

—Na'c gudxojnłuni; subasälxgaanini, che gajd guidzujṇ dxej nani guiga'tzä. ⁸ Dxej-yääl yu' rebenproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajł xpejṇ Israel yu' Jesús roliz Larz ni gubaṇsac lo rebenṇgut, bidzujṇreni, xhet xcuentis Jesús. Biäädreni te fiizareni loj Larz nani baspaṇsacni lo rebenṇgut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajł rexpejṇ Israel salilajzreni xtidx Jesús sa'csi bahuiireni gubaṇsac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹² Che bara yääl, rebejṇ xhidajł ni bidzujṇ lanij biejn diajgreni asiäddzujṇ Jesús guedx Jerusalén, ¹³ dxejcti batiu'reni ṇaa reyagzijṇ, biriireni neṇ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc reii lo rexpejṇ Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejṇ ni rbäjz neṇ guedx Sión. ¡Colhuii! Reii xtentu asiääd, bijbni dejtz te burbäz.

¹⁶ Di rexpejṇpacni niacbee recosga che gujcreni, niluxh che gubaṇsacni loj rebenṇgut, dxejc banaj lajzreni recos nani caj lo guijtz xcuentni, näjza guiraa recos ni bejṇ rebejṇ lo Jesús te guzojb rediidxga.

¹⁷ Reben xhidajł ni suganäni che gurejdxni Larz te biriini neṇ baa che baspaṇsacni lo rebenṇgut, bijzareni diidx xcuent guiraa ni bahuiireni. ¹⁸ Ni'cni biädchagloj reben xhidajłgani, sa'csi abiejṇ diajgreni laani bejṇni milagwrre. ¹⁹ Ni'cni räjp refarisee lo sa'reni:

—Aruhuiitu xhet sajcdi jienṇnu. ¡Colhuii! Empac sanajł guideb guedxli-ujni.

Riädtiil regriegw Jesús

²⁰ Yu' gaii bengriegw nadxaag lo rebejṇ ni biädted lanij guedx Jerusalén.

²¹ Rebejṇre bidzujṇ loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biääd Felipe, räjpni loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujṇ or ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, neṇ xhurc cadro cueni, te rianxtebni, guetni, dini guiliejn. Luxh palga guetni, siliejṇni, rajcza te nisro lojni, rajc xhidajł xob binij. ²⁵ Nani sanälajz xcälṇabajṇni, sunijtnini, luxh nani rbälaz xcälṇabajṇni lo guedxliujre, sica'ni yälṇabajṇ par tejpas. ²⁶ Palga yu' chu tej ni rlajz chu loä, sujiädnałni xnezyuä, te cadro yu'ä, ro'cza cuäaz ni ru' loä. Palga yu' chu gun xtzunä, siliä'pza Xtadä xpala'nni.

Rnixgaa Jesús guetni

²⁷ Răjpzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre.

²⁸ Xtadä, bejn si'cni riäjł gac te guiliä'p bejn xpala'nlu.

Dxejcti xhaguibaali biejn te xse' te ni răjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni răjp:

—Lascanu gunii te guzii.

Guyu'zareni răjp:

—Te xangl Dios ni gunii lojni.

³⁰ Dxejc răjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹ Naj abiääd xcälguxhtis Dios lo guedxliuj. Naj sibicaj xcäl'rnibee nani rnibee lo guedxliujre. ³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Răjp rebejn lojni:

—Nuure biejn diajgnu bilreni lo leii, Crist ni jiääd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti răjp Jesús lojreni:

—Stera'tsi yu' bianij lojtu. Col'saj lał ni rajptu bianijga, te di guiniaaz yälxcäy la'tu, sa'csi ni rsiaj loj nacäy, dini gan caro chääni. ³⁶ Lał ni rajptu bianij, colchalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

Xhicuent di rexpejn Israel nililajz xtidx Jesús

³⁷ Xhidajł remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhał Dios lojreni. ³⁸ Ni'cni guzobj diidx nani gunii Isaías, ni gunii xtidx Dios galoro, răjpni:

Dad, ¿chuni'c huililajz xtiidxlu?

¿Chuloj baluiilu xcäl'rnibeduxhlu, ä?

³⁹ Ni'cni di niajcdi nililajzreni, sa'csi guniiza Isaías, răjpni:

⁴⁰ Abascäjyni lojreni,

abennajdni lastooreni,

te di rebalojreni fii,

te di lastooreni gacbee,

te di gusiejch lajzreni,

te di gusiäcäreni.

⁴¹ Rediidxre gunii Isaías, sa'csi bahuini xcälrdimbicha' Jesús xhaguibaa, dxejc guniini xcuentni.

⁴² Dxejcti gaii rebejn ni rnibee huililajz xtiidxni che răjpni abaxhał Diosni, niluxh bidxejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo.

⁴³ Sa'csi rdxaglaizruren guniä'p rebejn xpala'nreni luxh guxiiru rlaizreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni canä rililajzni, năjza xtidx Xtadä nani baxhał narä rililajzni. ⁴⁵ Nani ruhuii loä, ruhuiizani loj ni baxhał

narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, dirureni chu lo yälkäjy. ⁴⁷ Nani riendiajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis rebenguedxliuj, biälä te guslää reben guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlni che gal lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl nabajn par tejpas. Ni'cni rediidx nani rniä, rniäreni si'cpacni gunii Xtadäni loä.

13

Jesús gudiibni ni' rexpejn pacni

¹ Che gajd gal dxe lanij ni laa pascw, najn Jesús asiäddzungajxh xorni, or ni jiunejzni lo guedxliujre te chääni lo Xtadni. Luxh sa'csi agajc sanälajzni rexpejn pacni nani yu' lo guedxliujre, sinälajznanireni par tejpas.

² Ni'cni la! ni cayauxchejreni biu' bendxab nen lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtadni guira'ti ladznaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudojbni te tuäi, batejbnni xque'ni. ⁵ Dxejcti cua'ni nis nen te chaa, guslojni gudiibni ni' rexpejn pacni, baspidzni ni'reni con tuäiiga. ⁶ Che bidzujni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

⁸ Räjp Pedr lojni:

—¡Dipaclu quibä ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹ Räjp Pedr lojni:

—Dad, na'c quiblu ni'ätis näjza naä näjza yecä gudiib.

¹⁰ Räjp Jesús lojni:

—Nani agojz di guiquiin gzsacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guniini: “Xhet guiraaditu naya.”

¹² Ni'cni che guluix gudiibni ni' rexpejn pacni, gotsacni xhajn, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjl quibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac benroru lo xlamni; diza te ni rij xmandaad bejn gac benroru loj nani baxhalni. ¹⁷ Palga najntu recosre, chicbaazatu palga si'c guntu.

¹⁸ Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijztni. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztni nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtuto suto' narä.

²² Dxejc gusloj cadxeloj rexpejni lo sa'reni, di jien chuchani'c cagusa'tni. ²³ Tej rexpejni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini.

²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlaizlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c.

²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi.

³⁰ Che gudajw Judas yätxtiilga, birigajcni, luxh abiu' guxhijñ.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälrmibee Xi'n Dios ni gujc Niguii, luxh lojni sienloj xcälrmibee Dios. ³² Palga suluiloj Xi'n Dios ni gujc Niguii xcälrmibee Dios, dxejc suluilojza Dios xcälrmibee Xi'n Dios ni gujc Niguii, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jiäadtu cadro cha'a. ³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sachee guiraa beñgedxliuj najcpactu rexpenä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnaillu narä naj; niluxh sidzujñ dxej jiäadlu ro'c.

³⁷ Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' choñ huält, säjblu dilu gumbee najrä.

14

Jesús najc nezyuj lo Dad

¹ Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. ² Yu' xhidalduxh yu' cadro rbäyz Xtaä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadro

cuääztu, che guluxäni, sibisacä, te chanäätu ro'c, te cadre yu'ä, ro'cza chutu. ⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

⁶ Räjp Jesús lojni:

—Narä nacä nezyuj. Narä nacä didxliipac, nacäza yäl'nabajn. Por narätis sajç chää bejn cadre rbäjz Xtäädä. ⁷ Palga la'tu niembeetu chuni'c nacä, niembeezatu Xtäädä. Luxh najli abiembeepactuni sa'csi acahuiitu lojni.

⁸ Räjp Felipe loj Jesús:

—Dad, basaan guihuiinu loj Xtädlu; ni'ctis rlaaznu.

⁹ Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtäädä. ¿Xhicuent rniablu fiilu lo Xtäädä, ä? ¹⁰ ¿La dilu chalilajz najrä yunää Xtäädä, luxh Xtäädä yunäjzani narä, ä? Rediidx nani rniä dina guiniäni lagajc xcuentä, sa'csi Xtäädä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtäädä, luxh Xtäädä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliäpac lojtu, nani chalilajz xtidxä, sajç gunni redzuun nani runä, luxh sujnni dzunroru sa'csi sia'a cadre yu' Xtäädä. ¹³ Luxh guiraa ni guiniablu lo Xtäädä xcuentä, narä sunäni, te guluiloä xcäl'rnibee Xtäädä. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dxan

¹⁵ Räjpzani:

—Palga sanälajztu narä, susoobtu xtidxä. ¹⁶ Dxejc siniabä lo Xtäädä, te guniidxni stee nani gacnäjt te chunäjni la'tu par tejpas. ¹⁷ Nalajznu, Xpriet Dxan xten Dios, ni rnilli. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu. ¹⁸ Dina gusanbisiäbä la'tu; sibisacä jiädhuiä la'tu. ¹⁹ Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu. ²⁰ Nen redxejga, dxejc sacbeetu yunää Xtäädä, la'tu yunäjtu narä, luxh narä yunääza la'tu. ²¹ Nani numbee Xtäädä, nani rusoobza xtidxä, ni'c ruluiini sanälajzpacni narä. Luxh Xtäädä sinälajzza nani sanälajz narä, näjza narä chanälazä bejnga, luxh suluiloä lagajc narä lojreni.

²² Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

²³ Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtäädä, dxejc jioplänäänuni guiro'pnu Xtäädä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtäädäni ni baxhal narä.

²⁵ 'Caniä guiraa rediidxre lojtu lalni yu'ä lojtu, ²⁶ per Sprit Dxan xten Dios nani jiädycnäjt, nani guxhal Xtäädä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu. ²⁷ Yäl'rbecdxilajz rusa'nä lojtu, xcäl'rbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu.

Paru ninälajzpacktu narä, sibalajztu xcuentä che guniä sia'ä lo Xtadä, sa'csi Xtadä najc benroru loä. ²⁹ Scree agunixgaäni lojtu, te che soobni, dxej cru chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäjl gac recosre te gacbee reben guedxliuj sanälazä Xtadä, rusobäza xtidx Xtadä, runä nani gunibeeni. Colchastie, colcho' jiunejznu ree.

15

Jesús najc si'c te yaguub

¹ Rāpzani:

—Narä nacä si'c te yaguub. Xtadä najc si'c nani rusuj yajgga. ² Rebejn najc si'c reṇaa yajgga. Guiraa reṇaa yajgga nani xhet cajdi lojni rutiu-ugni. Luxh guiraa reṇaa yajgga ni caj ninejxh lojni, rusianini te xcajru ninejxh lojreni. ³ La'tu anajctu benṇaya xcuent rediidx nani aguniä lojtu. ⁴ Colguibanāj narä, sigajc ni nabannäa la'tu. Digacdi xcaj ninejxh lo te ṇaa yajg palga agurujni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reṇaa yajgga. Nani riannāj narä, naräza riannäāni, ni'c saj c runduxhni xtzunä, sa'csi che guibicajni loä, xhet sajcdi gunni. ⁶ Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo dāj te checni.

⁷ Palga chupactu loä, palgaza chupac xtidxä lastootu, colṇab nani rlaiztistu, luxh narä sunidxāpacni. ⁸ Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtadä, Dios. ⁹ Si'cpacni sanälajz Xtadä narä, sigajcza sanälazä la'tu. Colchanuu lo xcälṛinälazä. ¹⁰ Palga jiutu rextidxä, sinuutu lo xcälṛinälazä, sigajc ni abasobä xtidx Xtadä, luxh rinuä lo xcälṛinälajz Xtadä.

¹¹ 'Rniä rediidxre lojtu te guibalaznājtu narä, te si'c guibalazduxh-pactu. ¹² Dee najc diidx ni rnibeä guntu: colchanälajz sa'tu si'cni sanälazātu. ¹³ Xheti te yälsanälajz ni guroobru lo yälsanälajzre, gudeed te bejn xcälṇabajṇni, guetni lacuaa resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ Diruna cuäläa “mos” la'tu, sa'csi di remos gan xhi rujn xlamreni. Luxh narä aguläläa la'tu “rexamigwä”, sa'csi guira'ti rediidx ni biejn diagä lo Xtadä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtadä, te na'cza nitloj dzuunga. Te guira'tiza nani guiniabtu lo Xtadä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn guedxliuj Jesús nājza rexpejṇni

¹⁸ 'Palga cuälaz reben guedxliuj la'tu, anajntu agulälazxgaareni narä. ¹⁹ Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtadä, ni'cni rbälaz reben guedxliuj la'tu. ²⁰ Colṣnaj laiztu diidx nani guniä lojtu, 'di te mos gac benroru lo xlamni'. Palga basacsíreni narä, susacsízareni la'tu. Palga rusoobreni xtidxä, susoobzareni xtiidxtu. ²¹ Guiraa recosre sunnājreni la'tu xcentä sa'csi direni gumbee nani baxhaṇ narä.

²² 'Paru dina niädniä lojreni direni niujn dojl xten xcälṛdxechlajzreni loä, per naj di gacdi guiniireni direni gacbee yu' xtojṇreni. ²³ Nani rbälaz narä,

rbälazzani Xtaďä. ²⁴ Palga dina niunä nez lojreni remilagwrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, nájza Xtaďä. ²⁵ Bejnreni si'c te guzobj diidx nani cuaj lo guijt agujc xchero: “Gulälazreni narä, luxh xhetliđi benä.”

²⁶ ‘Che jiäď nani gacnäj la'tu, laani sinii xcuentä, chu nacä. Laani najc Sprit ni yu' lo Xtaďä, siniini didxlii. Narä suxhaläni lojtu; lo Xtaďä guiriini jiäďni lojtu. ²⁷ Nájza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

16

¹ ‘Rediidxre nixgaä lojtu, te didi yu' xhi gun jiajbtu te gunijttu lo xtidxä. ² Sidzujñ dxej sibääreni la'tu dirureni gusaan jiu'tu neñ guidoro. Sidzujñ or chutis ju't tejtü, suchaloni cayacnäjni Dios. ³ Guiraa recosre sujnreni sa'csi direni gumbeepac Xtaďä, niclaza narä. ⁴ Agunixgaä rediidxre lojtu, te che guidzujñ orga sinaj lajztu xcuent rediidx ni guniä lojtu.

Redzuun ni rujñ Sprit Dxan xten Dios

‘Dina niniä rediidxre lojtu che gusloä cagusule'ä diidx, sa'csi suganää la'tu. ⁵ Naj agojl guibi'ä loj nani baxhal narä, luxh nicla tejtü di guini-abdiidx: “¿Caro cháalu?” ⁶ Dxejc sa'csi aguniä recosre lojtu, ni'c cayac-huin lastootu. ⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiäď lojtu nani racnäj. Niluxh palga cha'ä, suxhaläni lojtu. ⁸ Luxh laani, che jiäďni lo guedxliujre, susanijni xcäriejn rebejn te gacbeereni xcuent dojl, nájza xcuent xcälñabannaya Dios, nájza xcuent yälguxhtis xten Dios. ⁹ Guluiizani xcuent dojl lojreni sa'csi direni chalilajz xtidxä. ¹⁰ Guluiini xcälñabannaya Dios lojreni sa'csi sibisacä lo Xtaďä, luxh dirutu fii loä. ¹¹ Guluiini xcuent yälguxhtis xten Dios lojreni sa'csi abejñ Dios yälguxhtis loj beñdxab nani rnibee lo guedxliujre.

¹² ‘Yu' xhidajlrü diidx rlazä guiniä lojtu, niluxh digacdi gacbeetureni naj. ¹³ Che jiäď Sprit xten didxlii xten Dios, laani susanijni xcäriejntu te gacbeetu guiraa redidxgulii, sa'csi dini guinii diidx xcuentcani, siniitisni ganax rediidx nani gudeed Dios lojni te guiniini. Siniizani xcuent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiniini lojtu. ¹⁵ Guiraa ni rajp Xtaďä najc xtenä, ni'cni rniä suluini xhixtenä lojtu.

Xcälñac-huin lajztu sibixloj ni yälrbalajz

¹⁶ ‘Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaďä.

¹⁷ Dxejcti räjp rexpejn pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, nájza: sa'csi sia'a lo Xtaďä. ¹⁸ Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

¹⁹ Gucbee Jesús xhini'c rlajzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. ²⁰ Rniliäpac lojtu, la'tu soontu, niluxh rebeñ guedxliujre sibalazduxhreni. Sac-huinduxh lastootu niluxh yälñac-huinre sibixhlojni yälrbalajz. ²¹ Te gunaa che gaal xi'nni, rdejđni trabajw, dxejcti che aguyu' xi'nni, riäl lajzni

gudejdni trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ Nen redxejga xhetiru xhi yälguiniabdiidxd guntu loä. Rniliäpac lojtu, nani guiniabtu lo xtaä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtaä. ²⁶ Nen redxejga guiniabtu por laä. Luxh dizana guiniä siniabä narä loj Xtaä par la'tu, ²⁷ sa'csi lagajcza Xtaä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. ²⁸ Biriä lo Xtaä xhaguibaa, biälä lo guedxliujre, siunezáa lo guedxliujre, sibilasä lo Xtaä xhaguibaa.

²⁹ Räjp rexpejn pacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii. ³⁰ Naj sii gucheenu racbeelu guira'ti rexhicos, xhetru nanabdi guiniabdiidxrnu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzactu naj, ä? ³² Asiäddzungajxh teb or luxh ala bidzujn orga, che guire'chtu, cade tejt xnez-xnejztu, te gusanxtebtu narä, luxh dina jianxtebä sa'csi Xtaä suganäj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejn pacni

¹ Che gulujx guniini loj rexpejn pacni rediidxga, guläsni lojni xhaguibaa, räjpni lo Dios:

—Xtaä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yäl nabajn par tejpas lo guiraa renani badeedlu lojni. ³ Redee rajp yäl nabajn par tejpas; numbeerani luj ni najc tejtis GuebDios, näjza narä Jesucrist nani baxhaľu lo guedxliujre.

⁴ Narä gulä'p xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtaä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. ⁷ Naj agucbeerani guiraa rediidx ni guiniä lojreni lojpaclu siäädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhaľ narä.

⁹ Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ 'Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtaďä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. ¹² Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusobj ni caj lo xtidx Dios.

¹³ 'Luxh naj sibisacä lojlu. Caniä rediidxre laĵ ni yu'ä lo guedxliujre, sa'csi rlaďä guibaa lajzreni si'c ni rbaa laďä. ¹⁴ Abasule'ä xtiidxlu lojreni, luxh rebejĵ guedxliuj rdxe'chreni lojreni sa'csi direni gac bejĵ guedxliujre sigajc ni dizana gacä bejĵ guedxliujre. ¹⁵ Dina guiniabä cuäälureni lo guedxliujre, rniabä gudzucajlureni loj beĵdxab. ¹⁶ Direni gac bejĵ guedxliuj, sigajc ni dizana gacä narä bejĵ guedxliuj. ¹⁷ Basyareni con xtiidxlu, sa'csi xtiidxlu najc didxguliipac. ¹⁸ Sigajc ni baxhaĵlu narä lo guedxliujre, sigajcza ruxhaĵäreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipac. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlaďä gun guiraareni tejsi xhigab, sigajc ni rujnlu, Xtaďä, si'c runäza; te sigajc ni yu'äza con luĵ, sigajcza churenĵ con nuurnu, te gacbee reben guedxliuj luĵ baxhaĵlu narä. ²² Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luĵ cayunnäĵlu narä dzuun, te jiennu tejsi dzuun, te gacbee rebejĵ guedxliuj luĵ baxhaĵlu narä, luxh sanälajzlureni si'cni sanälajzzalu narä.

²⁴ 'Xtaďä, guiraa renani baniidxlu loä, rlaďäza churenĵ cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajďli guirixtieĵ guedxliujre. ²⁵ Xtaďä ni rujn cossa'ctis, di rebejĵ guedxliuj gumbeelu, luxh narä numbeälu, luxh redee agucbeezareni luĵ baxhaĵlu narä. ²⁶ Aräpä lojreni chu najclu; säpäzaru lojreni te chu yäl'sanälajz sa' ni rajplu par narä neĵ lastooreni, te cuäďäza neĵ lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

¹ Che gulujx gunii Jesús rediidxga, huinäni rexpejĵpacni dejtz gueu Cedron. Ro'c yu' xhiroob yuj cadro sojb guiraloĵ reyaĵg. Ro'c biu' Jesús näjza rexpejĵpacni. ² Anajn Judas, nani guto' Jesús, caro rij Jesús con rexpejĵpacni sa'csi si'csi-si'c rdxaag sa'reni ro'c. ³ Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶ Che gunii Jesús lojreni: “Laa naräni”, biäxhanreni, biajbreni lo yuj. ⁷ Dxejcti gunabdidxsac Jesús lojreni:

—¿Chu rguiltu?

Dxejc räjpzareni stehuält:

—Jesús nani siääd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

⁹ Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” ¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹ Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rnibee rexpejn Israel, gunaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh ijzga biäj najc Caifás bixhojzro ni rnibee lo rebixhojz. ¹⁴ Caifás najc nani baliidx rexpejn Israel nanab guet te niguii xcuent rebeñguejdxga.

Cadro gunii Pedr dini gumbee Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr näjza stee xpejnpacni huinajl dejtz Jesús. Luxh numbee bixhojzro bejnga, biunäjzani Jesús lo xle' bixhojzro. ¹⁶ Bia'nti Pedr rolä'ga. Dxejc birii xpejnpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷ Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnpac Jesús, ä?

Räjp Pedr loj gunaaga:

—¡Xho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

Bixhojzro cayujn yälgunabdiidx lo Jesús

(Mt. 26:59-66; Mr. 14:55-64; Lc. 22:66-71)

¹⁹ Dxejcti gusloj cayujn bixhojzro yälgunabdiidx lo Jesús xcuent chuni'c najc rexpejnpacni näjza xcuent xhini'c ruluiini.

²⁰ Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadro re' guiraa rexpejn Israel, nicla tej diidx dina ninixhiga'tzädi. ²¹ ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliibni baxhañ Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn_{pac} niguiiga, ä?

Badzu'ni diidxga räjpni:

—¡Xho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸ Dxejc birinäjpreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

³⁰ Dxejcti räjpreni lojni:

—Paru di niguiire najc te beñ latsiaj, dinu niopnäni ladz_{naa} guejblu.

³¹ Räjp Pila't lojreni:

—Colchanäni, colhuui xho gunnäjtuni yälguxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

³² Guniireni si'c te guzojb diidx nani gunii Jesús xcuent xho guetni.

³³ Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu rei xten rexpejn Israel, ä?

³⁴ Dxejcti räjp Jesús lojni:

—¿La lagajc luj rniilu si'c, ä? O ¿laa yu' churen'i'c naj lojlu si'c?

³⁵ Dxejcti räjp Pila't lojni:

—¿Xhixh näj narä nacä te xpejn Israel? Lagajc reben lajdxlu näjza rebixhojz bateedlu ladz_{naa}. ¿Xhi bejnlu?

³⁶ Dxejcti räjp Jesús lojni:

—Xcäl_{rnibeä} dini gac yäl_{rnibee} sa' ni yu' guedxliujre. Paru najc xcäl_{rnibeä} te yäl_{rnibee} sa' ni yu' guedxliujre, ala cagucuaa rexpe_{na} te di tedä ladz_{naa} rexpejn nani rnibee Israel. Naj di xcäl_{rnibeä} gac yäl_{rnibee} sa' ni yu' lo guedxliujre.

³⁷ Ni'cni räjp Pila't lojni:

—¿Rei najclu, ä?

Räjp Jesús lojni:

—Laaca najlu nacä rei. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuadaijgreni xtidxä.

³⁸ Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtoj_l bejnre. ³⁹ Niluxh la'tu rajptu te costumbr, casob lani pascw, ruslaanu te bejn ni yu' neñ latzguiib. ¿Xhi najtu? ¿La rlanjtu guslää ni najc rei xten rexpejn Israel, ä?

⁴⁰ Dxejcti guiragajcreni guredxa', räjpreni:
—¡Na'c guslaalu niguiiga! ¡Baslaa Barrabás!
Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguiib lojni. ² Bejn resoldaad te coronguejch, bazalrenini yejc Jesús. Dxejcti bahuajcwrenini te ladmoraad. ³ Dxejcti gusloj gubigreni lojni, te räjpreni lojni:

—¡Gubajn par tejpas Reii xten rexpejn Israel!
Dxejc huääzreni lojni.

⁴ Dxejcti birisac Pila't, räjpni lojreni:

—¡Colhuii! Acabääni nez lojtu, te gacheetu dina guidxäl nicla tej xtojlni.

⁵ Dxejcti birii Jesús nez lojreni, yu' coronguejch yejcní, najcwzani ladmoraadga. Dxejcti räjp Pila't lojreni:

—¡Colhuii! ¡Aree niguiire!

⁶ Ni'cni, che bahuii rebixhojzro nájza rexquixhajgreni lojni, guredxa'reni, räjpreni:

—¡Colgucuaani lo crujz! ¡Colgucuaani lo crujz!

Räjp Pila't lojreni:

—Lagajc la'tu colchanäni te gucuaatuni lo crujz. Per narä dina guidxälä nicla tej xtojlni.

⁷ Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

⁸ Che biejn diajg Pila't rediidxga, bidxejbruni, ⁹ biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰ Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo crujz, rapäza yälrnibee te guslaälu, ä?

¹¹ Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhrureni, räjpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

¹³ Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujnni yälguxhtis, cadro laa Litóstoros con didx-griegw sälojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuii, aree xreiiitu.

¹⁵ Ni'cni guredxa'reni räjpreni:

—¡Suguetni! ¡Suguetni! ¡Bacuaani lo crujz!

Dxejcti räjp Pila't lojreni:

—¿La sucuaä xreiiitu lo crujz, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiiinu.

¹⁶ Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcruzjni, cheni bidzujnlireni te lajt ni laa lajt xten Calabeer, con didx hebreo laani Gólgota. ¹⁸ Ro'c bacuaarenini lo cruzj. Bacuaazareni tio'p niguui lo stio'p cruzj, tejgani te laad cuä' Jesús. ¹⁹ Dxejc bacuaa Pila't diidx ni chää yejc xcruzjni; rediidxga najc scree: "Jesús, beñ Nazare't, Reii xten rexpejn Israel." ²⁰ Xhidajl bejn bil diidx ni caj yejc xcruzjni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw, näjza didx latin bacuaareni rediidxga. ²¹ Dxejcti räjp rebixhojzro xten rexpejn Israel loj Pila't:

—Na'c nucuaalu: "Reii xten rexpejn Israelni", laacar u nacuaalu: "Laani najni, najcni reii xten rexpejn Israel".

²² Dxejcti räjp Pila't lojreni:

—Nani abacuaä, abacuaä. Si'c jia'nni.

²³ Dxejcti resoldaad, che gulujx bacuaareni Jesús lo cruzj, cua'reni rexbablojiaani bejnrenini tajp la', te cade tejreni cua'reni te la'ni. Luxh yu' stee xhajbni ni laa tunica, nadibni, guejnni hasta lo yuj guc-cheeni.

²⁴ Ni'cni räjpreni lo sa'reni:

—Na'c guitiäjnuni; do'o guidzujtnu te daad lojni, te don chu xten gacni. Si'c bejnreni te gusojb xtiidx Dios cadro caj scree: "Batiäjsreni xhablojiaä: yejczä xhabä ni bia'n gudzujtreni daad."

Ni'cni bejn resoldaad recosre. ²⁵ Niluxh cuä' xcruzj Jesús suga' xnanni, con bäjl xnanni, ni laa Marii chää! Cleofas, näjza Marii Magdalen. ²⁶ Che bahuui Jesús loj xnanni, dxejc bahuuizani loj xpejnpacni nani sanälazduxhni, räjp Jesús loj xnanni:

—Nan, ¡bahuui, aro'c xi'nlu!

²⁷ Dxejcti räjp Jesús loj xpejnpacni nani sanälazduxhni:

—¡Bahuui, aro'c xnanlu!

Ni'cni dxejcli sinä nani najc xpejnpacni xnan Jesús rolijzpacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸ Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹ Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. ³⁰ Che gulujx gu' Jesús vinagrga, räjpni:

—Agulujxni.

Dxejcti basajb yejcn, baslaani xaimni.

Xhi bejn te soldaad lo Jesús

³¹ Dxejga najc dxe vispr xte lani pascw, che ru' mandaad par lanijga. Rexpejn Israel di rlaizreni nia'n rebejnnga lo recrutz, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu quich ni'reni te guetreni, te jäjtreni loj recrutz. ³² Dxejcti bidzujñ resoldaad, gudi'chreni guiro'p ni' nani caj te laad, sigajczä bennäjreni stee ni caj ste laadga. ³³ Che gubigreni lo Jesús, bahuireni alagujtni, direni niguich ni'ni. ³⁴ Tej soldaadga baqui'tzni te lans ro' xcustiini, dxejc bixe' rejn

näjza nis. ³⁵ Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. ³⁶ Sa'csi si'c gujc guira'ti, te guzobj xtidx Dios cadro caj: "Nicla tej xtzujtni di guech." ³⁷ Sigajcza lo stee guijtz caj diidxre: "Sidxelojreni loj nani biguijtz te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te beñ Arimatea, naxchiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo crujz. Cuäjbza Pila't, dxejc biääd José gulätni Jesús, sanätini togoolga. ³⁹ Näjza Nicodem biääd dxejc, nani galoo huininäj Jesús te guxhijñ. Biädñäni si'cti tiuu kil te dänejh ni najc si'c yaal ni laa mirra näjza áloes. ⁴⁰ Dxejcti cua'reni Jesús batejbrenini te la' lad lino, basälzarení dájga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. ⁴¹ Gajxh cadro cuaj Jesús lo crujz, yu' te huert, neñ huertga yu' te bacoob si'c te biliäa, cadro nicla tej bejn gajd guiga'tz. ⁴² Sa'csi abidzujñ dxej vispr lani pascw xten rexpejn Israel, luxh gajxh suga' biliääga, neñga gudixhreni Jesús; si'c biga'tztini.

20

Gubansac Jesús loj rebengut

(Mt. 28:1-10; Mr. 16:1-8; Lc. 24:1-12)

¹ Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. ² Dxejcti ruxuñni gubi'ni te huiye'tzni lo Simón Pedr näjza lo stee xpejñpac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

³ Dxejc biriguxuñ Pedr näjza stee bejñga, huijreni nez lo baa. ⁴ Ruxun guiro'preni. Niluxh stee bejñga ruxunduxhruni loj Pedr. Laani ganid bidzujñni lo baaga. ⁵ Dxejcti guretäñni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. ⁶ Dxejc bidzungajc Pedr, biugajcni neñ baaga, bahuiini naga' relajdga te laad. ⁷ Bahuiizani lajd ni guyu' yejcní, ni'c nie'tni saru, naga'ni te laad. ⁸ Dxejcti biu' stee bejñga nani bidzujñ ganid. Che bahuiini neñ baaga, huililajzni gubansac Jesús. ⁹ Sa'csi gajdreni gachee ni caj lo reguijtz, cadro caj nanab guibansacni loj rebengut. ¹⁰ Dxejc gubisac guiro'p rexpejñpacni rolizjreni.

Bahuiloj Jesús loj Marii Magdalen

(Mr. 16:9-11)

¹¹ Laltis suga' Marii cuä' baaga, cayoonni. Ni'cni lal ni cayoonni, basajb lojni te bahuiini neñ baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanāj huertga, ni'c rājpni lojni:

—Dad, palga luj sanāluni, gunii caro gudixhluni te guiliāsāni te chanāāni.

¹⁶ Dxejcti rājp Jesús lojni:

—¡Marii!

Dxejc gubiré Marii, rājpni neñ xtidx hebreo:

—¡Raboni!

(Sāloj diidxga “Mastr”).

¹⁷ Dxejcti rājp Jesús lojni:

—Na'c guiniaazlu narā sa'csi gadna cha'a lo Xtaďā xhaguibaa. Huij loj rebetzā, huiye'tz lojreni, cha'a lo Xtaďā, nājza Xtadtū, loj Xtiozā nājza Xtiooztū.

¹⁸ Dxejcti huij Marii Magdalen, bidzujñni loj rexpejñpacni badeedni didxcoob, rājpni:

—Abahuiā lo Dad Jesús.

Rājpzani lojreni guiraa recos ni gunii Jesús lojni.

Baluiloj Jesús loj rexpejñpacni

(Mt. 28:16-20; Mr. 16:14-18; Lc. 24:36-49)

¹⁹ Che gojl gudxej, najcni dumingw, primer dxej xten xmaan, abiāudzu'tz ro lā' ro' yu' cadro tre' rexpejñpacni, sa'csi rdxejbreni rexpejñ Israel. Chela bidzujñ Jesús, guzujni nez galāiireni, rājpni lojreni:

—Suchu yālrbedxi lastootu.

²⁰ Che guniini si'c, baluigajcni reñāani lojreni nājza cuā' xcustiini. Ni'cni bibaduxhlajz rexpejñpacni che bahuiireni lo Dad Jesús. ²¹ Dxejc rājp Jesús lojreni stehuālt:

—Suchu yālrbedxi lastootu. Si'c ni baxhał Xtaďā narā, si'cza ruxhałā la'tu.

²² Che gulujx guniini rediidxga, balejbni yejcreni, rājpni, lojreni:

—Suguibajñ Sprit Dxan xten Dios neñ lastootu. ²³ Rextojł rebejñ nani siāłlajztu, sibicajreni. Rextojł rebejñ nani ditu jiāłlajz, siannājreni redojlga.

Tomás bahuii lo Jesús ni gubañsac

²⁴ Tomás, ni laaza Didimo, najcni te retzubitio'p xpejñpac Jesús. Rutini che biāāď Jesús loj rexpejñpacni. ²⁵ Dxejcti rājp rexpejñpacni lojni:

—Abihuiinu loj Jesús, agubañsacni loj rebengut.

Dxejcti laani rājpni lojreni:

—Palga dina fiā loj reñāani cadro caj seen xten reclaab, palga dina guqui'tzā bicueñaā cadro guyu' claabga, guqui'tzāza ñaa cadro bixal cuā'ni, di lazā chalii gubañsacni loj rebengut.

²⁶ Che gudejd xhujñ dxej, tresac rexpejñpacni neñ yu', nadxaagza Tomás lojreni. Niāudzu'tz yu'ga, luxh chela gubeereni abidzujñ Jesús, guzujni galāiireni, rājpni lojreni:

—Suchu yālrbedxi lastootu.

²⁷ Dxejcti rājpni loj Tomás:

—Baqui'tz bicueñaalu ree loj patñaā, basāłza ñaalu cuā'āre, na'c ractio'p lajzlu, huililajzpac gubañsacā loj rebengut.

²⁸ Dxejcti rājp Tomás lojni:

—¡Xtaďā, Xtioozā!

²⁹ Dxejcti rājp Jesús lojni:

—Sa'csi abahuiilu loā, Tomás, huililajzlu. Chicbaa renani mase direni fii, rililajzreni xtidxā.

Xhicuent bacuaani reguijtzre

³⁰ Xhidalroduxhru dzuun bejn Jesús nez loj rexpejn^{pacni}, nani di nica^j lo guijtz. ³¹ Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn jiääd, Xi'n Dios. Luxh che chalilajz te bejn xtiidxni, saj^{pni} yälnabajn par tejpas.

21*Jesús baluilojni lo gajdz xpejn^{pacni}*

¹ Dxejcti baluiloj Jesús loj rexpejnⁿⁱ ro' nisdoo ni laa Tiberias. Scree baluilojni lojreni. ² Nadxaag sa' rebejnre: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejn^{pacni}. ³ Dxejcti räjp Simón Pedr loj resa'ni:

—Chanazä bäl.

Räjpreni lojni:

—Näjza nuure chonnu.

Dxejcti sääreni, huä'preni neñ te barcw. Guideb guxhijnga xhet bäljdi gunaazreni. ⁴ Che acayanij loj guedxliuj, suga' Jesús ro' nisdoo, di rexpejnⁿⁱ niembeeni. ⁵ Ni'cni räjp Jesús lojreni:

—Rexi'nä, ¿la xhet bäljdi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusal xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer dini-ajcdi nibääreni guijxhga ro'c sa'csi gudxadotzu'tzni bäl. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäl, dxejcti gutiäjsni lo nisdoo. ⁸ Sgaii rexpejn^{pacni} biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayääd. Siädnäzarenı guijxh guidxa rebäl. ⁹ Che bidzujnreni ro' nisdoo, bahuireni re' guiboo, ro'c dzuub te bäl näjza yätxtiil cague'. ¹⁰ Dxejcti räjp Jesús lojreni:

—Coltanä gaii bäl nani entis gunaaztu.

¹¹ Dxejcti huij Simón Pedr, guläani guijxhga, guidxani bälro. Guyu' si'cti te gayuu garol con chon bäl neñ guijxhga, niluxh dini niräsa' mase guyu' xhidalduxh bäl neñ. ¹² Dxejcti räjp Jesús lojreni:

—Coltaa te gauxharejntu.

Nicla tej rexpejn^{pacni} dini niabdiidx lojni: “¿Chu luj?” sa'csi anajnreni laa Jesúsni. ¹³ Dxejcti cua' Jesús yätxtiil, badeedni lojreni, sigajcza rebäl.

¹⁴ Dee najc ni riojn huält baluilojni loj rexpejn^{pacni}, che guban^{sacni} loj rebeñgut.

Jesús rninäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

¹⁶ Rāpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Rāpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält:

“¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. ¹⁸ Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu naalu te gushuajcw ste'ca bejn xhajblu, te chanäreni luj cadro di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuini loj stee xpejn, nani sanälajzru Jesús, siädnajlni dejtreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” ²¹ Ni'cni, che bahuini Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejnga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejnga najc narä, xpejn Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

²⁵ Yu'ru xhidalduxh dzuun ni bejn Jesús. Palga gucuaanu guiralii redzuun ni bejn Jesús, nicla lo guedxliujre di gal chu reguijtz cadro xcajni.

Redzuun Rexpejn Dios

Siääd Sprit Dxi xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit Dxi xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejnpacni. Tiuu dxej baluilojni loj rexpejnpacni balti huält te gacbeereni agubansacni. Guniizani lojreni xcuent xcälrnibee Dios.

⁴ Che gudejd tiuu dxejga, batojp Jesucrist rexpejnpacni, gunibeeni na'c guiriireni guedx Jerusalén, cuääzreni jiääd Sprit Dxi xten Dios nani aguniipac Dios jiääd. Räjpmi:

—Dee abiejn diajgtu guniä lojtu. ⁵ Juan batiobnis con nis, luxh naj guxii dxej cayäädx dxejcru siääd Sprit Dxi xten Dios te cuääzni neñ lastootu. Si'c guirobnistu —räjpmi.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexpejn Israel, ä?

⁷ Dxejcti räjpmi Jesucrist loj rexpejnpacni:

—Di riälj gacbeetu xcuent redxej näjza retiepm nani abasobxga Dios con xcälrnibeeni. ⁸ La'tu sica'tu yälrnibee che abiääd Sprit Dxi xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räjpmi.

⁹ Gulujxtis gunii Jesucrist rediidxga, luxh lałni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn nuhuii lojni. ¹⁰ Lałni cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladmol suga' gajxh cadre suga'reni. ¹¹ Dxejc räjpmi reangl loj rebejn:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpmi.

Gulereni Matías ni najc apostcoob

¹² Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajz sareni dxej ni rusilajzreni. ¹³ Che biu'reni Jerusalén, bidzujpreni ro'yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob. ¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajl bejn. Dxejcti huisulii Pedr galäiireni, räjpmi loj rebejn:

¹⁶ —Caniä lojtu, resa'ä, nanabpac soob xtidx Sprit Dxi xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni. ¹⁷ Gujc Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejnmi

dzunguijdx ni bejn̄ni, badeedsacni meel lojreni. Gusiireni te la' yuj. Dxejcti lagajc Judas basāl duu guejn̄ni, guzābnaj̄ni lo bej, gujtni. Gusaguij̄ni, dxejcti birājs xque'ni birii guiraa reziini. ¹⁹ Che biejn diajg rebejn̄ Jerusalén si'c, gulāljareni yujre Acēldama, ni sāloj yurejn. ²⁰ Neñ guijtz ni laa Salmos abacuaa toDavid rediidxre:

Sujianxteb rolijzni;

na'c cuāāzru bejn̄ rolijzni;

nājza:

Suxca'za ste'ca niguii xtzuunni.

²¹ Naj nanab cuenu stee niguii —rāj̄p Pedr—. Nanab gacni tej ni gusanāj̄ nuunu guideb redxej ni guyunāj̄ Jesucrist nuunu, ²² dxejli ni gusloj batiobnis Juan hasta dxej ni huājs Jesucrist xhaguibaa. Te gacnāj̄ niguiire nuunu gusule'nu diidx gubānsacpac Jesucrist lo rebengut.

²³ Dxejc gulāāreni tiop niguii lojreni, tejni laa José Barsabás ni rbālajreni Justo, steeni laa Matías. ²⁴ Gurejdx, gunabreni lo Dios, rāj̄preni:

—Dad, Dios, ni rachee lastoo guiraa rebejn̄, baluii loonu con ni najc niguii ni agulelu loj guiro'p niguiire, ²⁵ te jiu'ni lo dzuun nājza lo yālapost ni basa'n Judas cheni sāāni garenca nejz —rāj̄preni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnāj̄ Matías stzubiteeb reapost te gujcreni tzubitio'p apost.

2

Biāād Sprit Dxan xten Dios

¹ Che bidzuj̄n dxej ni rajc lanij xten Pentecostés, tre' guiraareni tejsi lajt neñ te yu', ² chela gusloj cayubej xhaguibaa si'c te beroduxh, bachajni guideb neñ yu' cadro suga'reni. ³ Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴ Biu'ti Sprit Dxan xten Dios neñ lastoo guiragajcreni. Dxejc gusloj caniireni garen-garen didxsaj si'ctisni badeed Sprit Dxan xten Dios guiniireni.

⁵ Neñ redxejga, xhidajl rexpejn̄ Israel ni sasanāj̄pac xtidx Dios bidzuj̄n guedx Jerusalén. Xhidajl lajt biriireni siāādreni. ⁶ Che biejn diajgreni guyubej beduxhga, bidojp reben̄ xhidaalga, bachaag sa'reni. Rdxeloduxh reben̄ xhidaalga sa'csi cayejn diajgreni canii reapost xtidxsajpac cade tejreni. ⁷ Cadxelojreni rāj̄preni:

—¡Bahuiilaare! ¿La et beñ Galileedi renani canii, ā? ⁸ ¿Xhoxh riejn diajgnu caniireni xtiidxpacnu si'ctis ni rniinu laadxnu, ā? ⁹ Najcnu beñ naciōñ Partia, beñ naciōñ Media, beñ región Elam, beñ Mesopotamia, beñ Judea, beñ estad Capadocia, beñ región Ponto, nājza beñ Asia. ¹⁰ Najczanu beñ distrit Frigia, beñ estad Panfilia, beñ naciōñ Egipto, nājza bejn̄ ni siāād stelaad Cirene, te estad neñ Africa. Loj rebejn̄ ni siāād Roma yu' reni najc xpejn̄ Israel, yu'za reni bazuxhijb lo Dios sa'csi rililajzreni si'cni rililajz rexpejn̄ Israel. ¹¹ Yu'za beñ Creta. Yu'za beñ naciōñ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayuj̄n Dios.

¹² Bidxeloduxh reben̄ xhidaalga, dijiejn̄ xhi xhigab gunreni. Rāj̄preni lo sa'reni:

—¿Xhi sāloj dee?

¹³ Dxejcti guyu' rebejn̄ ni baxhiznāj̄reni, rāj̄preni:

—Agusojz redee.

Gunii Pedr loj rebejn

¹⁴ Dxejcti gusulii Pedr nājza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rhājz distrit Judea nājza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Rājz Dios:

Sidzujn dxej che guxhalä Xsprit Dxañä cuääzni nen lastoo guiraa rebejn. Rexingaantu nājza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

¹⁸ Guxhalä Xsprit Dxañä loj guiraa reni siädnañl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa nājza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäjy loj gubijdx, sajz bäii si'c rejn.

Sajz guiraa recosre,

dxejcru sidzujn dxeduxh che jiälsacä narä, Dios.

²¹ Dxejc guiraa rebejn nani cueedx guiniab gacñaj Diosreni, reni'c siliaa lo dojl.

²² Rājz Pedr lojreni:

—Rexpejn Israel, colcuadiajg xtidxä. Dios baluii Jesucrist, ben Nazare't, lojtu por recosro, remilagw, reseen nani bejnñi nez lojtu. Lagajc Dios badeed yälrnibee loj Jesucrist te bejnñi redzunroga. La'tu nancheetu dee.

²³ Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladzñaa rebenguijdx te bacuaareni Jesucrist lo cruz te bagu'trenini. ²⁴ Baspansac Dios Jesucrist, baslaa Diosni ladzñaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt.

²⁵ Che gubansac Jesucrist, guzobj diidx ni bacuaa David lo guijtzc xcuent Jesucrist. Rājz David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä nen baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibanä par tejpas.

Sibalazduxhä sa'csi guibanñä luj,

si'c rājz David xcuent Jesucrist.

²⁹ Rājz Pedr:

—Guyasi guiniä lojtu agujc xchero gujt David. Aguyutzu'tzni nen baa. Sajz guihuiinu baa cadro biga'tz David. ³⁰ Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni rei si'cni gujc David. ³¹ Sa'csi baluixgaa Dios recosre lo David, ni'c rājz David sibansac Crist lo rebengut sa'csi di Dios gusaan jia'n xaimni nen baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut. ³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxañi loj Jesucrist si'cni bia'n diidx. Naj abaxhal Jesucrist Sprit Dxañ lo guedxliuj. Jesucrist cayujn guira'ti nani

cahuiitu, nani cayejn diajgtu nadxej. ³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä

³⁵ che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ 'Rniliäpac lojtu —räjp Pedr—. La'tu bacuaatu Jesús lo cruju. Ni'cni, colgacbee, guiraatu xpen Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruju, guc-huinduxh lajzreni. Räjpreni lo Pedr näjza lo reapost ni suga' ro'c:

—Ailu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlajztu chana-jltu Jesucrist, te si'c jia xtojltu. Dxejc suniidx Dios Sprit Dxan cuääz nen lastootu. ³⁹ Si'c rlajz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ miñ bejn. ⁴² Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

Xho gubajn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr.

⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixeguixee bidojpreni nen guidoro xten Israel. Tejsi najc rehxigabreni. Gudaunäj sa'reni rolijz cadetejreni, guiraareni bibalaznäduxh sa'reni. ⁴⁷ Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixeguixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

3

Biajc niguii nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rcachon gudxej.

² Guyu' te niguii nani racxhuu ni'ni, digacdi sani che gojllini. Guixeguixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan nen guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjp Pedr lojni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjp Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusuli! ¡Gusaj! —räjpni.

⁷ Dxejcti gunaaz Pedr naani, guläsnini. Biligajc ni'ni, gusutijp ni'ni. ⁸ Huisuyälni, gusajni. Biunäjni Pedr näjza Juan neñ guidoro. Rsiajni, rtiäsnini, calä'pni xpala'n Dios. ⁹ Bahuii xhidajl bejn lojni neñ guidoro, rsi-ajni, calä'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

Baluii Pedr xtidx Dios neñ cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidxujn neñ cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejn räjpni lojreni:

—¿Xhicuent rdxeloy guebju, rexejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcäl'rnibee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacoob, lagajc Diosga abadeed yäl'rnibee loj Xi'nni Jesús. Niluxh la'tu bateedtuni ladz'naa reguxhtis. Che r'rajz Pila't ni rnibee nus'laa Jesucrist, ditu nicäjb niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxi'an xten Dios nani rujn ganax dzunsa'c. Alga gunabtu birii te niguii nani bagu't bejn. ¹⁵ Jesucrist rudeed yäl'nabajn, luxh la'tu gunabtu bacuaareni Jesucrist lo cruzj. Gulässac Dios Jesucrist lo rebengut. Bahuiloonu nabajn Jesucrist, najcnu testiigw gubansac Jesucrist lo rebengut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcäl'rnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te najcni si'cni rhuittuni naj.

¹⁷ Rxejn Israel, narä nanä di'tu niacbee, diza rexcuxhtistu niacbee laa Xindxi'an xten Dios ni bacuaatu lo cruzj. ¹⁸ Scree gujc te guzojb xtidx Dios ni cuaj lo guijt agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni col'siechlajztu, col'guibi' loj Dios te guibicaj xtojltu. Dxejc susiäl'yuj Dios lastootu, sujnni gac nacoob guira'ti, si'cni bia'n diidx gacni. ²⁰ Lojtu suxhalza Dios Jesucrist nani rnibee, nani aguleni galooli. ²¹ Naj nungäjl jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii to Moisés lo retoxtadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexejn Dios.”

²⁴ Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa to Samuel, näjza guiraa reniguii ni siädnajlni, xcuent recos ni cayajc neñ redxejre. ²⁵ La'tu najc xajg reniguii ni gunii xtidx Dios. La'tu biannäjt diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl te xajglu ni guspalazduxh reben guedxliuj, sa'csi suslaanireni lo dojl.” ²⁶ Dxejcti ganiddoo lojtu baxhal Dios Jesucrist te guibaa lajztu che gusiech lajztu, te na'cru guntu dojl —räjp Pedr.

4

Baluii Pedr näj Juan xtidx Dios loj reguxhtis

¹ Laḷ ni caniireni lo rebejn, ro'c bidzujn rebixhojz xten Israel nājza nani rnibee lo resoldaad xten guidoro nājza resaduceso. ² Bidxe'chduxhrene sa'csi caguijdxreni rebejn, cayājpreni:

—Sibaṇsac rebejn lo rebengut sa'csi gubaṇsac Jesucrist lo rebengut.

³ Gunaaz reguxhtisreni, biāurenī sa'csi agudxej luxh abiāu jusgaad. Neṇ latzgūiib bararenī yāāl. ⁴ Xhidaḷ reni biejn diajg xtiidxreni huililajz xtidx Dios. Si'cti gaii mīl niguii huililajz xtidx Dios.

⁵ Che bara yāāl, bachaag sa' guiraa rebengool, renani rnibee guedx Jerusalén, nājza rebejn ni ruluii leii, ⁶ nājza Anás ni rnibee guiraa rebixhojz, nājza xpagojzni ni laa Caifás, nājza Juan, nājza Alejandro, nājza guiraa reniguii ni najc sa' rebixhozro ni rnibee. ⁷ Gunibeereni biāad Pedr nājza Juan gusuj galāiireni te gunabdiidxreni lojreni:

—¿Chu xcāl rnibee rajptu? ¿Chu laj basā'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxa xten Dios neṇ lastooni, rājpni lojreni:

—Caniā lo guejbtu, reguxhtis nājza rebengool xten rexpejn Israel, ⁹ palga canabdiidxtu xhicuent gucnājnu niguii nani gucxhuu ni'ni, palga canabdiidxtu xho basiajctnu niguiiga, ¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yāl rnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios gulāsni lo rebengut. ¹¹ Di'tu ninālajz xtidx Jesucrist. Laani najc si'c te guij nani rbācajtu che runcheetu te yu'. Per Dios abejn najc Jesucrist si'c guij nani maaazru nacsac, nani guyu' squiin xte yu'. ¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhaḷ Dios te guslaani bejn lo dojl —si'c rājp Pedr.

¹³ Che biejn diajgreni xtidx Pedr, bidxelojreni sa'csi di Pedr nājza Juan guidxejb, dizarenī guitujy. Dxejcti rājp rebixhojz ni sajcru lo sa'reni:

—Direni ganduxh guijtz, bejntisreni.

Dxejcti gubeereni gusanāj redee Jesucrist, lojni bisieedreni. ¹⁴ Bahuiiza rebixhojz lo niguii ni abiajc ni'ni, suganājni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaarenī. ¹⁶ Rājpreni lo sa'reni:

—¿Xhi jiennāānu reniguiire? Guiraa rebejn Jerusalén anajn xcuent dzunroduxhre ni cayujnreni. Digacdi gucuatzaaznuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huxisac rebixhojzreni. Dxejcti rājpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr nājza Juan, rājpreni lojreni:

—¿Colguinii loonu chu xtiidx sajcru guicuadaagnu? ¿Xtiidx la'tu, o xtiidx Dios? ²⁰ Digacdi gusāunu ro'nu. Nanabpac gusule'nu diidx xcuent recos nani abahuiinu nājza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr nājza Juan, sa'csi canii rebejn bejnreni te dzunsa'c. Xhidaḷ rebejn gulā'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajctreni xcuent yālmilagrw agudejdni tiuu ijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nájza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rájpreni:

—Xtadnu Dios, nani benchee xhaguibaa nájza guedxliuj nájza nisdoo nájza guira'ti ni yu' lojreni, neñreni, ²⁵ nani bejn basoob toDavid xtidx Sprit Dxián te bacuaani xtiidxlu, rájpmi:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj nájza reguxhtis xten reguejdx te gudxojnreni xtzun Dios nájza xten Dad Crist nani baxhal Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes nájza Poncio Pila't nájza rexpejn Israel nájza rebenzijt nani di gac xpejn Israel. Bidxehnäjreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuui xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. ³⁰ Baniidx xcälñnibeelu loonu te guisajcnu rebejn, te jienzanu redzunro, remilajgwr con xcälñnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsez yu' cadre tre'reni, cayac si'c te xu. Dxejcti biääd Sprit Dxián xten Dios basutijpruni lastooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rexhixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojp xyujni, rolijzni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías náj chäälmi rujn dojl

¹ Guyu' stee niguii ni laa Ananías. Chäälmi laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälmi nanchee xhi cayujnni. ³ Dxejcti rájpmi lojpmi:

—Ananías, ¿xhicuent rusooblu xtidx Satanás ni rnibee lo reben dxab, ä? ¿Xhicuent rlaizlu gusgueelu Sprit Dxián xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebdudxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

⁷ Pet agujc choñ or gujtni chela bidzujñ chääł Ananías. Dini gan agujt chääłni. ⁸ Räjñ Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjñ Safira lojni:

—O'n, si'c huijni.

⁹ Dxejcti räjñ Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlaiztu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni nen baa.

¹⁰ Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgajcnenini cuä' baa cadro biga'tz chääłni. ¹¹ Bidxebdudxh guiraa rexpejn Jesucrist, näjza guiraa rebejn nani biejn diajgni recosre.

Bejn reapost xhidajł redzunro, remilagwr

¹² Xhidajł redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx nen cordoor ni laa Salomón. ¹³ Guyu' xhidajł bejn ni di nuchaag lo rexpejn Jesucrist sa'csi bidxebbreni guchaagreni lojreni. Rebenguejdxga guläpdudxhneni xpala'n rexpejn Jesucrist. ¹⁴ Nen redxejga xhidaldudxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpala Pedr yejcneni che ted Pedr ro'c, te si'c jiajcneni. ¹⁶ Guedx Jerusalén bidzujñ xhidajł rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' bendxab nen lastoorenini. Con xcälñrnee Jesucrist basiajc reapost reben racxhuu, gulääzarenini rebendxab nen lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcneni reben racxhuu. ¹⁸ Gunaazrenini reapost. Basäurenini nen latzguiib. ¹⁹ Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost nen latzguiib. Räjñni lojreni:

²⁰ —Colchäj guidoro. Ro'c colguinii lo rebejn xho gac guibanñäreni Dios par tejpas.

²¹ Che biejn diajgreni si'c, rsildooru biu'reni nen guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu nen ladtguiib. ²² Che bidzujñ reguixhajg latzguiib, bahuü reguixhajg nen latzguiibga, niluxh rut yu'di nen latzguiib. Che gubi'reni biädnäreni diidx, räjñreni loj reguxhtis:

²³ —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di nen latzguiib.

²⁴ Che biejn diajg bixhojz ni rnibee, nájza capitán nani rnibee resol-daad xten guidoro, nájza rebixhojz, ben tio'p lajzreni, rájp lo sa'reni:

—¿Xhini'c gujc? ¿Xhoni gac naj? —rájpreni.

²⁵ Dxejcti bidzujn te niguii, rájpni lojreni:

—Reniguii ni basäutu nen latzguiib, areni suga' nen guidoro, luxh caguluiireni rebejn —rájpni.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaarení guij yejreni. ²⁷ Che bidzunñäjreni reapost, rájpreni suurení nez loj reguxhtis xten Israel, sas gunii bixhojz ni rnibee, ²⁸ rájpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn nen guedx Jerusalén. La'tu rlaiztu cuaquijtu nuure bagu'tnu Jesucrist.

²⁹ Dxejc rájp Pedr nájza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.

³⁰ Bagu'ttu Jesucrist che bacuaatuni lo crujz. Niluxh Xtios xtagoldoonu guläni lo rebejgut. ³¹ Naj agule'c Diosni xladbeení cadre rnibeení, abadeedza Dios yälrnibee loj Jesucrist te guslaani nuure, te si'c rlaizni guibicaj xtoj guiraa rexpejn Israel nani gusiechlaizreni. ³² Bahuiloonu xhi bejn Dios. Ni'c cagusule'nu. Nadoncheenu Sprit Dxaan xten Dios cayacnáj nuure te gusule'nu rediidxre. Badeed Dios Sprit Dxaan xtenni lo guiraa renani susoob xtiidxni.

³³ Che biejn diajg reguxhtis rediidxga, bidxechduxhreni, rlaizreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost nen yu'ga.

³⁵ Dxejcti rájp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlaiztu gunnäjtu reniguiire. ³⁶ Colzaa laiztu gajd gac xchej guyu' tej ni laa Teudas, rájpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejn, xhetru bejndireni. ³⁷ Nen izj ni guyu' cens, biriiza Judas ni siääd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzu-unre, xtebcani sinitlojni. ³⁹ Palga xtzuum Dios ni cayujnreni, digacdi guscuääznu dzuunga, sa'csi guidiinu guidxe'ch Gueb Dios loonu.

⁴⁰ Bichaglaiz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh laizreni sa'csi gujc gudejdreni trabajw xcuent Jesucrist. ⁴² Guixe-guixee laitis baluiireni xtidx Jesucrist nen guidoro nájza rolijz bejn. Cagusule'reni diidx lo rexpen Israel:

—Jesús najc Crist nani cabääztu jiääd.

6

Gulereni reniguii ni gudeed yätxtiil lo rexpejn Jesucrist

¹ Nen redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rni didx griegw. Rájpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexepejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud.
³ Ni'c nanab cuetu lo resa'tu gajtz niguii nani najntu najc ben'sa'c, nani rbäjz Sprit Dxi xten Dios nen lastooreni, nani yu' xcäriejnreni. Reniguiire quis xhi gaureni. ⁴ Te si'c saj chanuutis guiniabnu lo Dios, guiluizanu xtidx Dios lo rebejn.

⁵ Guiralii rebejnga bidxagljazreni diidxga. Dxejcti gulereni Esteban, te niguii ni rilaljzpac xtidx Dios, rbäjzsa Sprit Dxi xten Dios nen lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶ Sas biädnä rexepejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni naareni yejc reniguiiga si'c te seen abiu'reni lo xtzunreni.

⁷ Birechduxh xtidx Dios. Xhidajl ben Jerusalén huililajz xtidx Dios, näjza xhidajl bixhojz.

Gunaazreni Esteban sanäreni lo rebixhojz nani rnibee

⁸ Gucnäduxh Dios Esteban, bejnri redzunro, remilagwr nez lo rebejn.
⁹ Dxejc reben guidoo ni laa Libertados gusloj cadilnäj Esteban. Lojreni nadxaag ben Cirene, näjza ben Alejandría, näjza gaii ben Cilicia, näjza sgaii bejn ni siääd reguedx Asia. ¹⁰ Reniguiire di niajcdi nuzejczeni diidx lo Esteban, sa'csi nasinduxhni, luxh cayacnäj Sprit Dxi xten Diosni.
¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinäreni lo reguxhtis xten Israel. ¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre.
¹⁴ Abiejnza diaagnu gunii Esteban: “Jesús nazareno sutzuyl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojreni:

—Colgucua diajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán. ³ Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” ⁴ —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtdadni, biädnä Dios toAbram nez ree, cadro rbääznu naj. ⁵ Di Dios nuzalajz nicla tla' yuj cadro suu te ni' toAbram. Niluxh räjp Dios

sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsi bejnreni si'cti tajp gayuu ijz.” ⁷ Räjp Dios: “Narä sunä castiigw rebejn ni gusacsireni che najcreni mos. Narä cuää rexagdoolu ro'c, te ree guzuxhijbreni loä neñ guejdxre”, si'c räjp Dios ⁸ —räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujñ dxej, basälza toAbram beegani si'c te seenza. Sigajcza bennäj Isaac xi'nni Jacoob. Sigajcza bennäj Jacoob guitzubitio'p rexi'nni nani najc rexpengoldoo xpen Israel.

⁹ Räjp Esteban:

—Guitzubiteb rexi'n Jacoob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. ¹⁰ Che gudejd José trabajwduxh, gucnäj Diosni. Badeed Dios yälñasiñduxh lojni. Bejn Dios bichaglañ rei Faraón José. Badeed rei Faraón gujñ gubernadoor xten Egipto. Gunibeeza José guira'ti xhixten reiiga.

¹¹ Räjpza Esteban:

—Che bidzujñ dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. ¹² Che biejn diajg xtdadgoldoonu Jacoob yu' xhi gaureni neñ reguejdx xten Egipto, ro'c baxhañ rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxhañ José diidx jiääd xtdadni Jacoob, näjza guiraa resa'ni, cuääzreni Egipto. Najc rebejnğa si'cti gayonbitzubigaii bejn. ¹⁵ Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu. ¹⁶ Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

¹⁷ Räjp Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. ¹⁸ Dxejcti guyu' te xrei Egipto ni di gan guiraa redzunsac nani bejn toxtadgoldoonu José. ¹⁹ Reiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiga basälreni guiraa rebäz niguii te di laareni, te guetreni. ²⁰ Neñ redxejga, gojl Moisés. Che gujc Moisés báz, te báz daani, saru rujñ lojni, huinälajz Diosni. Gułaani choñ bäi rolizñi. ²¹ Dxejc huisälrenini, te guzojb xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni. ²² Bisieed Moisés guiraa ni najñ reben Egipto. Gunisa'cni diidx, bensa'cni dzuun.

²³ Räjp Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. ²⁴ Dxejc bahuini casacsí te beñ Egipto te beñ sa'ni. Sas bagu'tni beñ Egipto. ²⁵ Bejn Moisés xhigab pet sacbee resa'ni cayacñäj Diosni te guslaani rexpejnñi. Luxh di resa'ni niacbee si'c. ²⁶ Che bara yääl, bahuini Moisés cadilñäj sa'reni tiop xpen Israel. Räjp Moisés lojreni: “Colcuedxi, Dad. Lagajc sa'tu cadilñajtu. ¿Xhicuent rdijltu?” si'c gunii Moisés, te na'cru tilñäj sa'reni. ²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälñibee lojlu te jiädñibeelu

nuure? ²⁸ ¿La rlaizlu ju'tlu narä si'c bagu'tlu beñ Egipto naai?" —räjpni—. ²⁹ Che bieñ diajg Moisés rediidxga, baxuñni, huijni zijt. Huiläzsjcni guedx Madián. Ro'c bachñaani, guyu' tiop xingaanni.

³⁰ Räjpa Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuini te bajl neñ te yaguejch. Neñ bajlga baluiloj angl xten Dios lo Moisés. ³¹ Bidxeloduxh Moisés che bahuini si'c. Dxejcti gubigni te rlaizni nuhuisa'cni yajgga. Dxejcti bieñ diajgni gunii Dios, räjpni lo Moisés: ³² “Narä nacä Xtios rextadgoldoolu, narä nacä Dios xten Abram, nájza xten Isaac nájza xten Jacoob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. ³⁴ Abahuia xho cagusacsí reben Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxhalälu chäälü Egipto.”

³⁵ Räjpa Esteban:

—Dios badeed yälñibee lo Moisés nani baze' retoxtadgoldoonu che räjpreni: “¿Chu baniidx yälñibee lojlu te jiädñibeelu nuure?” Baxhal Dios Moisés te guinibeeni xpeñ Dios, gucnäza Dios Moisés baslääni rexpeñni neñ nación Egipto si'c gunii angl xten Dios che baluilojni lo Moisés neñ yaguejchga. ³⁶ Gulää Moisés rebejnga. Ganiddoo beñ Moisés redzunro, yälrdxeloj neñ nación Egipto nájza ro' nisdoo ni laa nido xniaa. Tiuu ijz cuansaj retoxtadgoldoonu neñ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räjpni loj rexpeñ Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés gyunäj rebeñ neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹ Räjpa Esteban:

—Niluxh di retoxtadgoldoonu nusoob rextidx Moisés. Di rlaizreni guinibee Moisésreni. Canaduxhlajreni nación Egipto. ⁴⁰ Che säa Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnuren. Chu gan con Moisésre ni baluii nezyuj che gulääni nuure guejdx reEgipto.” ⁴¹ Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴² Dxejcti gubicaj Dios loj rexpeñ Israel sa'csi bejnreni si'c. Basaan Dios gojnreni gubijdx, nájza bäii, nájza rebal xhaguibaa. Gujcní si'cni caj lo guijtñ ni beñ reniguii nani bacuaa rextidx Dios. Räjpa Dios:

La'tu beñ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räjp Dios.

Cuansanäjtu te yu' najcw guijd cadro chu te banäjb.

Nenga guyu' banäjb ni laa Moloc, nani najtu najc xtiostu.

Gojñzatu balbäze' xten xtiostu ni laa Remfán.

Redios ni bencheetistu reni'c gojñtu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guijd. Gujcní xquidooreni. Ro'c guninäjreni Dios. Benchee retoxtadgoldoonu yu' najcw guijdga si'cni gunibee Dios che baluini lo Moisés xhoni gacni. ⁴⁵ Che gujt Moisés, Josué gunibee lacuaa to Moisés, huinani retoxtadgoldoonu naciön Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp reii David. ⁴⁶ Huinälaiz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquini te yu' nani runchee bejn. Scree bacuaa te niguii nani gunii xtidx Dios. Räjp Dios: ⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä. Si'c te bancw cadro rsiuj ni' reii, si'c najc guedxliuj nani bencheä. Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuum Sprit Dxan xten Dios, dizani cuääz neñ lastootu. Si'c beñ retoxtadgoldootu, si'cza rujntu. ⁵² Basacsí retoxtadgoldootu guiralii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäatuni lo guxhtis te gunibeetu gujtni. ⁵³ La'tu biannäjtü leii nani gunii reangl xten Dios loj Moisés, luxh la'tu ditu nucuadiajg rediidxga.

Bagu'treni Esteban

⁵⁴ Che bieñ diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. ⁵⁵ Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjp Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani guj Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxuñreni bixa'treni yejc Esteban. ⁵⁸ Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yecni, guläyalreni xhajbreni; te niguii ni laa Saulo biannäj xhajbreni. ⁵⁹ La'l ni cagucuaareni guij yecni, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlureni.

Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh laiz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduhx neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea nájza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. ³ Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii nájza regunaa te basäunireni neñ latzguiib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjpmi:

—Jesús najc Crist nani cabäjztu jiäd.

⁶ Ro'c bachagsa' rebejn bacuadiajgreni rextidx Felipe, bahuizaren redzunro, remilagwr nani bejn Felipe. ⁷ Gaii bejn yu' beñdxab neñ lastooreni. Che gunibee Felipe guirii rebeñdxab lastoo rebejnğa, guredxa' rebeñdxabga, dxejcti biriireni neñ lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrnibee Jesucrist basiajc Felipe guiraa rebejnğa. ⁸ Sa'csi gujc si'c, bibalazduhx guiraa rebejn neñ guejdxga.

⁹ Guyu' te niguii ni laa Simón neñ guejdxga. Bisieedni bejnmi xhidajl redzuun yälbidxaa, basgueeni rebeñguejdxga. Bidxeloduxh rebeñguejdx lojni. Räjpmi lo rebejn rutru chu stee bejn ni najc maazru beñro lojni. ¹⁰ Luxh guiraa rebejn, rebuiux, rebengool, rebenrajp, rebenproob bacuadiajgreni xtidx bidxaaga, räjpmi:

—Laani rajpmi yälrnibee xten Dios.

¹¹ Xchero basgueeni rebejn, bidxelojreni rextzunyälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, nájza xcuent Jesucrist. Xhidajl rebeñguejdxga huililajz rediidx nani gunii Felipe. Dxejcti birobnisreni, niguii nájza gunaa. ¹³ Năgajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr nájza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxan xtenmi lojreni, ¹⁶ sa'csi gajd Sprit Dxan xten Dios jiädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist. ¹⁷ Dxejc batzuub Pedr nájza Juan ñaareni yejc tejga renani ahuililajz xtidx Dios, dxejc badeed Dios Sprit Dxan xtenmi biädläjzmi neñ lastooreni.

¹⁸ Che bahuii Simón biädläjz Sprit Dxan xten Dios lastoo rebejn ni batzuub reapost ñaani yejcreni, rläjz Simón nudeedni meel loj reapost, ¹⁹ räjpmi lojreni:

—Colguniidx yälrnibee loä te si'cza gudzubä ñaa yejc rebejn, te jiu' Sprit Dxan xten Dios neñ lastooreni.

²⁰ Dxejcti räjpmi Pedr lojni:

—iSunitloj xmeellu con lui! Xho gunlu xhigab siilu Sprit Dxan xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. ²² Basie'ch lajzlu,

badzucaj rehxigab guijdx xtenlu. Guredx-gunab lo Dios, top susiäjl lajz Dios xtojlu ni bejnlu nen lastoolu. ²³ Naj narä nanä ruguilazduxhlu, luxh runduxhlu xhigabguijdx.

²⁴ Dxejcti räjp Simón lo guiro'preni:

—Colnab loj Dios xcuentä te na'c sacä si'cni caniitu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siääd nación Etiopía

²⁶ Dxejcti biääd te xangl Dios, räjpni lo Felipe:

—Huij lo nezyuj ni ri guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sä'ti Felipe. Che bidzujnni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajnni Dios. ²⁸ Siädbisacni lajdxni. Sobga'ni nen te gare't saruduxh, cayolni xtidx Isaías, nani bacuaa xtidx Dios agujc xchero. ²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijt nani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni nen gare'tga.

³² Cadro cayol dade'ga nen guijtznä ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäj gunreni.

¿Xho guiniinu yu' xpejnni?

Ni abagu'trenini. Diruni guibajn lo guedxliuj.

³⁴ Dxejcti gunabdiidx ben Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

³⁵ Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. ³⁶ Lañ ni sääreni lo nezyuj, bidzujnni te lajt cadro yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojn tiobnisä?

³⁷ Dxejc räjp Felipe lojni:

—Palga rililajzlu xtidx Dios nen lastoolu, sajc tiobnislú.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjt guiro'preni, biu'reni nen nis, ro'c batiobnis Felipe dade'ga. ³⁹ Che biriireni nen nis, huinä Sprit Dxan xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. ⁴⁰ Dxejcti chela guchee Felipe

abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

9

Huililajz Saulo rextidx Jesucrist
(Hch. 22:6-16; 26:12-18)

¹ Lañtis cagusacsí Saulo rexpejñ Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guijtze chanäni lo reguidoo neñ guedx Damasco te palga guidxälni reni najc xpejñ Jesucrist neñ reguidooga, niguii sigac gunaa, guliibnireni, jiädnänireni guedx Jerusalén te jiäureni. ³ Lañ sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo. ⁴ Dxejñ biajbni lo yuj, biejn diajgni te xse' bejñ nani canii lojni:

—Saulo, Saulo, ¿xhicuent rusacsílu narä, näjza rexpeña?

⁵ Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejñ caru'ch.

⁶ Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejñ räjp Jesús lo Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejñ ni siädnä Saulo sugadxireni, bidxebbreni sa'csi biejn diajgrenti te xse' bejñ, luxh rut lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejñ gunaazreni ñaani, sanärenini guedx Damasco. ⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejñ Jesucrist ni laa Ananías. Baluiloj Jesucrist loj Ananías lo te bacad, räjp Jesucrist lojni:

—Ananías.

Dxejñ räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, beñ Tarso. Cabejdx, canabni loä naj. ¹² Lo bacad abahuiini siääd te niguii ni laa Ananías te gutzuubni ñaani yejñni te fiini stehuält.

¹³ Dxejñ räjp Ananías lojni:

—Dad, abiejñ diagä xho basacsí niguiiga rexpejñlu neñ guedx Jerusalén. ¹⁴ Luxh rebixhojz ni rnibee abadeed guijtze lojni te guiniaazni ree guiraa rebejñ nani rbedx-rniab lojlu, chanänireni jiäureni.

¹⁵ Dxejñ räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpeñ Israel, näjza loj reni rnibee renacion, näjza loj rexpejñ Israel.

¹⁶ Narä suluiä lo Saulo trabajwduxh ni tedni te jiädnajñni narä.

¹⁷ Dxejñ säa Ananías, bidzujñni ro yu' cadre rbäzlaa Saulo. Batzuubni ñaani yejñ Saulo. Dxejñ räjp Ananías lo Saulo:

—Betä Saulo, Jesucrist ni rnibee, nani baluiloj lojlu lo nezyuj cheni siäädlu, lagajc laani baxhalni narä te filu stehuält, te jiädläjjza Sprit Dxan xten Dios neñ lastoolu.

¹⁸ Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

Gusloj basule' Saulo xtidx Dios neñ guedx Damasco

²⁰ Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzgüiib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnıbee.

Baxun Saulo guedx Damasco

²³ Che gudejd xhidajł dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa reneyuj ni rdzujñ guejdxga te ju'trenini. ²⁵ Dxejcti che gojł te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujñ Saulo guedx Jerusalén

²⁶ Che bidzujñ Saulo guedx Jerusalén, rlajzni nuchaagni loj reni rililajł xtidx Jesucrist, niluxh guiraareni bidxebrenini sa'csi direni gan ahuililajłni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räjp Bernabé lojreni:

—Baluiłoj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilñäj Saulo rexpejn Israel nani rnii didx griegw. Laareni rdxecheduxhrenei, rlajzreni nugu'treni Saulo sa'csi direni nichagłajł xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajł guiraa renani huililajł xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsi rexpejn Jesucrist, luxh guc xhidajłrurenı. Basoobreni xtidx Jesucrist, bisieedrurenı rextiidxni, gucnäjza Sprit Dxan xten Diosreni.

Biajc Eneas

³² Che gusloj sahuii Pedr guiraa renani huililajł xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälñi te niguii ni laa Eneas. Agujc xhujñ ijz naga' niguiiga cayacxhuuni. Abixu'n tiejxhni, digacdiru guiliini.

³⁴ Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcni, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubansac Dorcas

³⁶ Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujx bahuajz rebejn togoolga, huitixhrenini nen te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjpn redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huinäreni Pedr nen yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajnni. ⁴⁰ Dxejcti gunibee Pedr birii guirareni nen yu'. Dxejc bazuxhijbni, guredx-gunabni loj Dios. Dxejc gubiréni bahuuini loj togoolga, räjpn:

—Tabita, huistie.

Dxejcti baxhal gunaaga balojni; che bahuuini loj Pedr, gurejni. ⁴¹ Dxejc gunaa Pedr naani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuilojreni agubansacni. ⁴² Gucbegajc reben guedx Jope xhini'c gujc, dxejcti xhidajl rebejn ga huililajz xtidx Jesucrist. ⁴³ Xchejza guyu' Pedr ro'c, guläjzni roliz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel. ² Bensacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuuini loj xangl Dios, räjpn loj Cornel:

—¿Conlu Cornel?

⁴ Che bahuu Cornel xangl Dios, bidxejbni, bidxelojni, räjpn lojni:

—¿Xhini'c, Dad?

Dxejcti räjpn angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii chää guedx Jope te chaxiireni Simón Pedr. ⁶ Rbäjzni roliz te dade' ni laa Simón nani ruscoodz guijd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni näjza te xsoldaadni nani sanälajz Dios. ⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungajxhreni guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. ¹⁰ Calanduxh Pedr, rajzni gauni. Lañ ni cayujnreni xhi gauxhuejni, gusloj canixcalni. ¹¹ Bahuuini bixal xhaguibaa, bahuizani biäjt

te bariadro nani naliib guidap xi'ni. Siädjäätchäiini gajxh nez loj Pedr. ¹² Neñ bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choñ huält gujc si'c, huä'psac bariaadga xhaguibaa. ¹⁷ Laļ ni cayujn Pedr xhigab xhichani'c säloj nani bahuini, bidzujn reniguii ni baxhaļ Cornel ro' yu'ga, sa'csi agunabdiidxreni caro rbäjz Simón nani ruscoodz guijsd.

¹⁸ Che bidzujnreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laļ ni cayujn Pedr xhigab xcuent ni bahuini, gunii Sprit Dxan xten Dios lojni, räjpni:

—Bahuii, choñ dade' caguillu. ²⁰ Biäjt yejc yu're te jinäluren. Na'c gunlu xhi stee xhigab, sa'csi lagajc narä baxhaļäreni lojlu.

²¹ Dxejcti biäjt Pedr jiaaga, bidzujnni cadro suga' redade'ga, räjpni lojreni:

—Narä nacä ni caguillu. ¿Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te beñsa'c, te bejn ni rajn Dios, te bejn ni sanälajz rexpejn Israel, laani baxhaļ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejnğa, biu'reni neñ yu'. Ro'c bia'nreni te guxhijn. Che bara yääl, Pedr näjza sgaii beñ Joje ni najc xpejn Jesucrist, sanä redade' ni baxhaļ Cornel.

²⁴ Che bara yääl, bidzujnreni guedx Cesarea. Abatojp Cornel resa'ni näjza reexamigwni rolijzni. Cabäjzreni guidzujn Pedr. ²⁵ Che bidzujn Pedr ro yu', huichagloj Cornelni, bazuxhijbni lo Pedr. ²⁶ Dxejc gunaaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neñ yu'. Che biu'ni bahuii Pedr nadxagsa' rebejn neñ yu'. ²⁸ Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj beñzajt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajc guchagsa'ä chutis bejn. ²⁹ Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'. ³¹ Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo rebeñ proob, racbee Dios, di lajzni jiäl luj. ³² Ni'cni naj baxhaļ tiop dade' choä guedx Joje te chaxiireni Simón Pedr nani rbäzlaa rolijz Simón ni ruscoodz guijsd. Rolijzni sojb gajxh ro' nisdoo. Che guidzujnni, laani gusule'ni xtidx Dios lojtu.” ³³ Dxejc baxhaļä chu biädxiilu. Xquixtiostelu

biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gucheliä tebloj rinälajz Dios guiraa bejn; rebenzijt sigajc rexpejn Israel. ³⁵ Niluxh rinälajz Dios chutis beñ guedxliuj nani ruzuxhijb lojni, nani rusooob rextiidxni, nani laaca nabajn. ³⁶ Badeed Dios xtiidxni loj rexpejn Israel, basule' Dios biääd Jesucrist te gac chanälaznu Dios te cuedxilajznu, sa'csi Jesucrist rnibee guideb guedxliuj. ³⁷ Che gulujx baluii Juan ni rutiobnis xcuent yälrobnis, dxejc gosloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea. ³⁸ Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxan xtenni te cuääzni neñ lastooni. Nancheetu xho bejnri redzunro, remilagwr, basiajcnri rebejn nani caguteed beñdxab trabajwduxh. Redzunroga bejnri sa'csi bennäj Diosni dzuun. ³⁹ Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexpejn Israel Jesucrist lo cruiz, ro'c gujtni. ⁴⁰ Dxejcti che biojn dxej, guläs Dios Jesucrist lo rebenjut, gubansacni, badeed Dios yälrnibee lojni te gujc biädluiloj Jesucrist loonu. ⁴¹ Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebenjut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebenjut. ⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebenjut. ⁴³ Galooli bacuaa renani gunii xtidx Dios lo guijtz, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

Biädlajz Sprit Dxan xten Dios neñ lastoo rebenzijt

⁴⁴ Lañ ni canii Pedr rediidxga, biädlajz Sprit Dxan xten Dios neñ lastoo renani huililajz xtiidxni. ⁴⁵ Bidxeloj guiraa rexpejn Israel nani huinä Pedr sa'csi biädlajz Sprit Dxan xten Dios neñ lastoo renani najc benzijt. ⁴⁶ Gucbeereni biu' Sprit Dxan xten Dios lastoo rebenzijt sa'csi bejn Sprit Dxan guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dxan xten Dios neñ lastoonu, abiädlajzni neñ lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

11

Basule' Pedr xho biädlajz Sprit Dxan xten Dios lastoo rebenzijt lo rexpejn Jesucrist neñ guedx Jerusalén

¹ Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzijt ni digac xpejn Israel xtidx Dios. ² Che bidzujñ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilnäjreni Pedr. ³ Räjpreni lo Pedr:

—¿Xhicuent biu'lu rolijz benzijt nani xhet yu'di bee si'c nuure? ¿Xhicuent gudaunäjuren, ä?

⁴ Dxejcti basule' Pedr diidx xho gujc huijni loj rebenzijt:

5 —Yu'a guedx Joep. Cabedx-canabä lo Dios, dxejc si'c gunix-calä, bahuiä bixal xhaguibaa, siädjäjt te bariadro, naliib guidap xi'ni. Siädjiätchäini nez loä. ⁶ Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt. ⁷ Dxejcti biejn diagä naj Dios loä: “Pedr, huisu. Bagu't man gaulu.” ⁸ Dxejcti räpä: “Digacdini Dad. Nicla tej gadna gauä te man nani rnii lei xtenlu najc mandxuudx.” ⁹ Dxejc gunisac Dios loä: “Na'cru guiniilu nacdXuudx recos nani abasia Dios.” ¹⁰ Che gujc choñ huält gunii Dios si'c, huä'psac bariaadga xhaguibaa. ¹¹ Lagajc orga bidzujñ choñ dade' ro yu' cadro yu'ä. Guedx Cesarea biriireni, biädxiiireni narä. ¹² Dxejc gunii Sprit Dxiän xten Dios loä: “Huinä reniguiire. Na'c gun tiop lajzlu.” Dxejcti huinää xho'p beñ Joep, dade' nani rililajz xtidx Jesucrist. Che bidzuñnu guedx Cesarea, biu'nu rolijz Cornel. ¹³ Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhal tiop dade' chää guedx Joep te chaxiireni Simón ni rniireni Pedr. ¹⁴ Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵ Che gusloj cagusule'ä xtidx Dios lojreni, biu' Sprit Dxiän xten Dios neñ lastooreni si'c biu'ni lastoonu galooli. ¹⁶ Dxejcti banaj lazá rextidx Dad Jesucrist che najni: “Juan abatiobnis con nistis, biädla narä suxhalä Sprit Dxiän xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxiän xtenni lojreni si'c baniidxni Sprit Dxiän xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxiän xtenlu lojreni.”

¹⁸ Che biejn diajg rebeñ Jerusalén rediidxga, biäuu ro'reni, dirureni nidilñäj Pedr. Alga gulä'preni xpala'n Dios, räjpreni:

—Näjza rebeñzijt nani digac rexpejñ Israel abasaan Dios gusiechla-jzreni te guibaññäjreni Dios par tejpas.

Rexpejñ Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejñ Israel. ²⁰ Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo beñzijt nani rnii didx griegw. Basule'reni lo rebeñzijtga guiraa xcuent Jesucrist. ²¹ Guenäj Diosreni caniireni xtiidxni. Xhidajl rebejnga huililajz xtidx Jesucrist, basoobreni xtiidxni.

²² Che biejn diajg rexpejñ Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnga. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Bensä'c najc Bernabé. Rililazduxhni xtidx Jesucrist. Racnäjduxh Sprit Dxiän xten Diosni. Xhidajl rebejñ huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxälñ Saulo, huinäni guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Nen redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía. ²⁸ Huisullii te dade'ga ni laa Agabo. Gucnäj Sprit Dzan xten Diosni te guniini siääd te gubijn guideb guedxliuj. Luxh gujc gubijnga nen reijz ni gunibee rei Claudio ni sajcrú. ²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz nen reguedx Judea. ³⁰ Batojpreni meel, baxhalrenini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacobo, biäu Pedr nen latzguiib

¹ Nen redxejga, trabajwduxh bateed rei Herodes gaii rexpejn Jesucrist. ² Gunibeeni gujt Jacobo betz Juan, biru' guejñni. ³ Che bahuii Herodes bibalazduxh rexpejn Israel sa'csi bagu'tni Jacobo, gunibeeni gunazgajczeni Pedr. Dee gujc nen redxe lanij che rajwreni yätxtiil ni di saguij. ⁴ Che gunaazreni Pedr, biäuni nen latzguiib. Gunibee Herodes biääd tadjp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr nen latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr nen latzguiib

⁶ Bidzujñti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäi tiop soldaad. Caden naliib guiro'p naa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij nen latzguiib. Dxejcti gunaazni xhajcw Pedr, basniibnini te gubajñni. Räjpmi lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räjpmi xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpmi xangl Dios lo Pedr:

—Gojt xhablajzlu, gudanajl narä —räjpmi.

⁹ Biriitini latzguiib sanajlñi angl xten Dios. Niluxh dini gun xhigab guliipac nani bejn xangl Dios. Bejñni xhigab pet canixcalñi. ¹⁰ Gudejdreni nez loj te soldaad, gudedgajczeni nezloj steeni, dxejc bidzujñreni ro' puertguiib xten latzguiib nani caj lo nezyuj ni rdejd galäi guejdxga. Xtebca bixal puertroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajñ Pedr, bejñni xhigab:

—Naj sii nanä baxhal Dios te xanglñi baslaa narä ladznäa Herodes te digacdi gun rexpejn Israel nani rlajzreni gunnäjreni narä.

¹² Che gucbee Pedr xhi gusajcni, huijñi rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadijñni ro' lä'. ¹⁴ Che biembee Rode xse' Pedr, sa'csi bibalazduxhni, biallajzñi nuxhalni ro' lä'. Alga baxuñni biusacni nen yu', räjpmi lojreni:

—Pedr suga' ro' lä'.

¹⁵ Dxejcti räjpmi lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxelo-duxhrenei bahuiireni lo Pedr. ¹⁷ Dxejcti bazäb Pedr naani te na'cru jieyrenei. Dxejc bij Pedr diidx xho baxhal Dios ro' latzguiib. Dxejc räjpreni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr nen latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jiäjl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajcu lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebejnğa.

²¹ Basoobtini te dxej te guininäjniren. Dxejga gojt Herodes xhajb reiini, gurejni lo xyacxhil reiini. Dxejcti gusloj caniini didxsa'c loj rebejnğa.

²² Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejnni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn najcni te dios, sa'csi dini niliä'p xpala'n Dios.

²⁴ Xhidajl bejn biejn diajgni xtidx Dios, huililajzreni xtidx Dios.

²⁵ Che gulujx badeed Bernabé näjza Saulo meel ni batojp reben Antioquía lo rebengool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxan xten Dios Bernabé näjza Saulo

¹ Lo rexpejn Jesucrist ni rdxaaq sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaaq Bernabé, näj Simón ni rniireni Negr; näj Lucio, ben Cirene; näj Manaén ni gulanäj reii Herodes gujcni si'c bejtzni; näjza Saulo. ² Bidzujn te dxej cagucua'nreni laj ni cabedx-canabreni lo Dios, dxejc räjpre Sprit Dxan xten Dios lojreni:

—Colcue Bernabé näjza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzuubreni naareni yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

Guro'preni baluii xtidx Dios lo reben Chipre

⁴ Baxhal Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre' galäi nisdoo, ni laa Chipre.

⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Nāj Marcw gucnājreni. ⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueni rebejn guejdxga, rājpni xtidx Dios caniini, niluxh dini gac xtidx Dios. ⁷ Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nājza Saulo, sa'csi rlajzni jiejn diajgni xtidx Dios. ⁸ Dxejcti Barjesús, ni laaza Elimas, bidxagdijñni guiro'preni sa'csi di rlajzni chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, rājpni loj Barjesús:

¹⁰—Rusgueduxhlu rebejn, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxechñāzalu guiraa recossa'c xten Dios. ¿Guc cuāāz guxhiidlu xtidxlii Jesucrist te di chalilajz bejn xtidx Jesucrist?

¹¹ Nāj siāād xcastiigw Dios yejclu. Xhidajl dxej sicāy lojlu, xhetliidi fiilu —rājp Pabl.

Gujcsi rājpni si'c, bicāigajc lojni. Dxejctiru cuansajni caguiilni chu guiniaaz naani guluii canejs chāāni. ¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcāl̄rului Dios.

Bidzujñ Pabl nājza Bernabé guedx Antioquía xten distrit Pisidia

¹³ Che baluux Pabl nājza resa'ni xtzuunreni guedx Pafos, biu'reni nen barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. ¹⁴ Dxejcti birināj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejn Israel, biu'reni neñ xquidoo rexpejn Israel, ro'c gurejreni. ¹⁵ Che gulujx bil̄ te dade' reguijtz xten Dios ni laa leii nājza reprofe't, baxhaḹ reguxhtis xten guidoo chu huigajñreni, rājpreni lo Pabl nājza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejc huisulii Pabl, gulāsni naani bejn̄ni seen lo rebejn te cuadiajgreni xtiidxni. Rājp Pabl lojreni:

—Colcuadiajg, la'tu rexpejn Israel, guiraatu ni rajñ Dios. ¹⁷ Galooli gule Xtios rexpejn Israel retoxtadgoldoonu. Luxh che gulājzreni nación Egipto, bidalduxh retoxtadgoldoonu. Gucñājduxh Diosreni bejn̄ni remilagwr, te gulāānireni guedx Egipto. ¹⁸ Tiuu ijz gulājzreni lo reyubijdz. Xhidajl huālt direni nusoob xtidx Dios, niluxh empac gucnājza Diosreni. ¹⁹ Guyu' gajtz nación gulājz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. ²¹ Dxejcti gunab rexpejn Israel te reīi lo Dios te guinibee reīiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee toreii David. Rājp Dios: “Agucebā David xi'n Isaí rujñ tejsi xhigab con narā. Susoobni xtidxā sujñni guiralii ni rlazā gac.”

²³ Rājpza Pabl:

—Galooli bia'id diidx lo rexagdoo David guxhaḹ Dios te bejn̄ni gudzucaj xtoj̄l̄nu, ni gusḷaa nuure lo dojl̄. Nāj aguzojb diidxga. Jesucrist najc bejn̄ga, rudzucajñi xtoj̄l̄nu, rusḷaani nuure lo dojl̄. ²⁴ Che gusloj cagulijdx Juan

rebejn, baluiini nanabpac gusiechlajz rexpejn Israel, tiobnisreni te jia xtojłreni. ²⁵ Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

²⁶ Räjpa Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhał Dios xtiidxni ni rusule' xho rudzucaj Jesucrist xtojłnu, xho ruslaani nuunu lo dojl. ²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtza. ²⁸ Balijdxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo guijtza xcuent Jesucrist, gulätreni Jesucrist lo cruz, bacua'tzrenini nen baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo reexamigwni nani biädnałni nez rexyuj Galilee, renani biädnałzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. ³³ Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj nen Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

³⁴ Räjpa Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” ³⁵ Ni'cni bacuaaza toDavid nen stee Salmo ni gunii Dios, guniini: “Dipaclu gusaan gudx tiejxh Xi'nlun nani sanälajzlu.” ³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh guläs Dios Jesucrist lo rebengut, ni'c di tiejxhni niujdx. ³⁸ Ni'cni colyabee, la'tu resa'ä, Jesucristre, bejn ni caniä xcuentni, laani rudzucajni rextojłnu. ³⁹ Chutis ni rililajz xtidx Jesucrist ruslaa Jesucristni loj guiraa rextojłni nani digacdi guibicaj mascä rusoobni guiralii ni caj lo lei xten toMoisés. ⁴⁰ Colšusın te na'c sajctu recos ni caj lo guijtza ni bacuaa te niguii nani bacuaa xtidx Dios:

⁴¹ Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴² Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejnğa, xhidajl rexpejn Israel, näjza xhidajl rebenzajt nani rusoob xtidx Dios si'c rujn rexpejn Israel, birinałreni Pabl näjza Bernabé. Dxejc balijdxreni rebejn ni siädnałreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejn Israel, xhidalduxh rebenguejdx bire' te gucuadiajgreni guinii Pabl xtidx Dios. ⁴⁵ Che bahuui

rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni "didxxhiini". Caniyajzareni Pabl nájza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, rājpreni lo rebejn:

—Nungājł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibanājtu Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejn Israel. ⁴⁷ Sa'csi si'c agunibee Xtiosnu. Scree caj xtidx Dios lo guijt:

Suxhalātu te guluiilu rextidxā lo rebenzijt ni digac xpejn Israel,
te chalilajz rebejnğa xtidxā,
te laareni lo xtojłreni, cadrotis yu'reni lo guedxliuj,
rājp Dios.

⁴⁸ Che biejn diajg rebenzijt rediidxre, bibalazduxhreni, gulā'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcu, nájza reniguii ni sajcu nen guedx Antioquía, te bidxechnājreni Pabl nájza Bernabé, barilaagwreni Pabl nájza Bernabé te biunejzreni guedx Antioquía. ⁵¹ Dxejcti Pabl nájza Bernabé gubijb guxhuj ni'reni si'c te seen te gacbee rebejn xhet laadi bejnreni. Sā'tireni guedx Iconio. ⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

14

Guyu' Pabl náj Bernabé guedx Iconio

¹ Che bidzujł Pabl nájza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nájza lo rebenzijt. Xhidajł rebejnğa huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzijt te bidxechnājreni rebejn nani huililajz xtidx Jesucrist. ³ Ni'cni bia'n Pabl nájza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcālŕnibee Dios te bahuui bejn cayacnāj Diosreni. ⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nájza Bernabé, ⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nájza benzijt, nájza reguxhtis, rłajzreni nidxagdijłreni reapost, rłajzzareni nucuaareni guij yejc Pabl nájza Bernabé. ⁶ Dxejc gucbeereni xhi rłajzreni gunreni, ni'c baxunreni ro'c huijreni nez reguedx Licaonia, ro'c bidzujłreni guedx Listra, guedx Derbe, nájza reguejdx ni re' nejzga. ⁷ Che bidzujłreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojłłini racxhuu ni'ni. ⁹ Cagucuadiajg niguiiga xtidx Pabl. Che bahuui Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. ¹⁰ Dxejcti dip gunii Pabl lojni, rājpni:

—jHuisulii!

Dxejcti huisuyālłni, gusajni. ¹¹ Che bahuui rexpejn Licaonia xhi bejn Pabl, lagajc xtiidxreni guniireni, rājpreni lo sa'reni:

—jRedios abiādłuiłoj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najl guii guejnreni. Biädnäni regonga ro' xquidoo Júpiter ni suga' ro' guejdxga. Rebejn näja bixhojz rlajzreni nugu'treni regon te ganreni Bernabé näja Pabl si'c rajnreni rextiosreni. ¹⁴ Che biejn diajg reapost xhi cayajc, batiäjsreni tla' xhajbreni si'c te seen direni guichagljaz xhi cayujn rebejnğa. Ruxunreni bidzujnreni lo rebejn, räjpreni lo rebejn:

¹⁵ —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc ben guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa näja guedxliuj, näja nisdoo, näja guiralii ni yu' lojreni, nenreni, ¹⁶ Galoo basaan Diosga gun reben guedxliuj si'ctis ni rlajzreni. ¹⁷ Huen najc Dios, rudeedni nisguuj, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

¹⁸ Xhidajl diidx guniireni te chäii bejnreni gaan guredxi rebejn, sa'csi rlajzpac rebejn nugu'treni regon.

¹⁹ Dxejcti bidzujn gaii xpejn Israel siäädreni guedx Antioquía näja guedx Iconio. Baquiiireni reben Lистра te gucuaarenini guij yejc Pabl. Bacuaarenini guij yejc Pabl, gudobxhajxhrenini guläärenini ro' guejdxga, sa'csi naarenini agujtni. ²⁰ Dxejc lał ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejnğa. Xhidajlreni huililajz xtidx Dios. Dxejc gubi'reni, biu'reni guedx Lистра, näja guedx Iconio, näja guedx Antioquía. ²² Balijdxreni rebejn nani huililajz xtidx Dios, gucnäjnreni rebejnğa te batiplajz rebejnğa, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lał ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näja Bernabé distrit Pisidia, bidzujnreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhalreni Pabl näja Bernabé chasule'reni xtidx Dios nen guiraa reguejdx. Naj abaluux Pabl näja Bernabé dzuunga. ²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laarenini, näja xho badeed Dios huililajz rebenzijt nani digac rexpenn Israel. ²⁸ Xchej biannäjreni rexpejn Jesucrist ro'c.

15

Bidxagsa'zarenini nen guedx Jerusalén

¹ Nen redxejga bidzujn gaii dade' ni siääd nez Judea, caguluiireni rexepejn Jesucrist, räjpreni lojreni:

—Palga ditu gusäl bee si'c gunibee toMoisés, di Dios guslaatu lo xtojltu.

² Che biejn diajg Pabl näjza Bernabé rediidxga, bidxagdijlreni redade'ga. Dxejc gule rexepejn Jesucrist Pabl näjza Bernabé näjza sgaii rexepejn Jesucrist chääreni guedx Jerusalén te guininäjreni reapost näjza rebengool te guidon xho gac xcuent beega.

³ Huisunejz rexepejn Jesucrist ni najc ben Antioquía Pabl näjza rebejn ni sanäjreni, sääreni guedx Jerusalén. Gudejdreni reguedx Fenicia, näjza reguedx Samaria. Cadrotis gudejdreni bijreni diidx lo rexepejn Jesucrist ahuililajz rebenzijt xtidx Dios. Bibalazduxh rexepejn Jesucrist che biejn diajgreni rediidxga.

⁴ Che bidzujnreni guedx Jerusalén, huichagloj rexepejn Jesucristreni. Dxejcti bij Pabl näjza Bernabé diidx lo reapost, lo rebengool nani rnibee rexepejn Jesucrist, näjza lo rexepejn Jesucrist, guiraa redzunro nani cayunnäj Diosreni. ⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab churenii bee, nanabza gusoobreni lei xten toMoisés.

⁶ Dxejcti bachagsa' reapost näjza rebengool nani rnibee rexepejn Jesucrist, te don xho gunreni. ⁷ Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzijt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajzpac rebenzijt xtiidxni. Badeed Dios Sprit Dxaan xtenni lojreni si'c te seen te gachee bejn najcreni xpejnni. Sigac baniidxni Sprit Dxaan xtenni loonu galoo, si'cza badeednini lo rebenzijt. ⁹ Sigajc rinälajz Dios nuunu, sigajcza rinälajzni rebenzijt. Che huililajz rebenzijt xtiidxni, basia Dios lastooreni. ¹⁰ Naj xhicuent rusieedu Dios, ä? Di niajcdi nisanäj retoxtadnu releiiga, digacdiza chosanäjnu releiiga naj. xhicuent rlaiztu chasanäj rebenzijt releiiga? ¹¹ Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guir'o'preni bijreni diidx xho cayujn Dios redzunro, remilagwr nez lo rebenzijt.

¹³ Che gulujx gunii guir'o'preni, xhet guniidi rebejn. Jacoobtis räjp lojreni:

—Sa'ä, colcuadiajg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzijt te gurejdx Dios rexepejnni ni nadxaag lo rebenzijt. ¹⁵ Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexepejn Israel che gubajn toDavid.

Si'c gunä,

¹⁷ te jiädgajn rebejn narä te gacä Xtiosreni,

näjza guiraa rebenzijt nani najc rexpenä jiädgajn narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacoob lojreni:

—Dee najc xhigab ni runä. Na'cru gusieednu rebenzijt ni cagusiech-lajzreni, renani salilajz xtidx Dios. ²⁰ Gucuaanu te guijt, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bäälni nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacoob.

²² Che biejn diajg reapost näjza rebengool nani rnibee, näjza guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcru loj rexpejn Jesucrist. ²³ Dxejcti bejnreni guijt huinäreni. Bacuaaren rediidxre:

“Nuure reapost, näjza rebengool ni rnibee, näjza rexpejn xquidoo Jesucrist ruxhalnu xtiixti lojtu, resa'nu nani rbäz guedx Antioquía näjza estad Siria näjza estad Cilicia. ²⁴ Rucuaanu guijtze sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rni leii xten toMoisés. Xhet nuudinu gunibeenu jiädniireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näjza Pabl, nani sanälaznu. ²⁶ Agajc balti huält rlanjreni nugu'treni Bernabé näjza Pabl, luxh direni guidxjeb gusule'reni xtidx Jesucrist. ²⁷ Naj ruxhalnu Judas näjza Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjt. Releitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bäälni nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacru guibajntu. Sujiannäjt Dios.”

³⁰ Dxejcti basadiidx rexpejn Jesucrist Judas näjza Silas huinäreni Pabl näjza Bernabé guedx Antioquía. Che bidzujreni ro'c batojpreni guiraa rebejn nani huililajz xtidx Dios te bilreni guijtza lojreni. ³¹ Che biejn diajg rexpenzit Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. ³² Dxejcti basule' Judas näjza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtiixti loj reni baxhalreni.

³⁴ Dxejc Silas bejn xhigab jia'nni ro'c. ³⁵ Luxh Pabl näjza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlanj chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäjb Pabl näjza Bernabé. ³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäi nisdoo. ⁴⁰ Dxejcti Pabl gule Silas te sanänini. Badeed

rexpejn Jesucrist xtextios lojreni, räjpreni gacnäj Diosreni. ⁴¹ Laḷ ni sasajreni gudejdreni guiraa reguedx Siria näjza guiraa reguedx Cilicia, ro'c gucnäjreni guiraa rexpejn Jesucrist, basule'ruren i xtidx Jesucrist lojreni.

16

Huinä Timoteu Pabl näj Silas

¹ Bidzun̄sac Pabl näjza Silas reguedx Derbe näjza Listra. Ro'c bidx-aagreni te xpen Jesucrist ni laa Timoteu. Xnanni najc beṇ Israel ni huililajx xtidx Jesucrist. Xadni najc beṇ griegw. ² Didxsa'ctis rnii rexpen Jesucrist ni yu' Listra näjza Iconio xcuent Timoteu. ³ Rlajz Pabl chanäni Timoteu. Dxejcti basäl Pabl bee Timoteu te gujcn i si'c xpen Israel, te xhet naadi rexpejn Israel, sa'csi guiraareni nanchee xtaḷ Timoteu najc beṇ griegw. ⁴ Che bidzujñreni cade tej reguejdx, basule'reni xtidx reapost näjza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. ⁵ Bazutijp xtidx Dios lastoo renani huililajx xtidx Jesucrist. Guixe-guixee xhidajlru beṇ huililajx xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, näjza estad Galacia, di Sprit Dxan xten Dios nusaan nusule'reni xtidx Jesucrist neṇ reguedx Asia. ⁷ Bidzujñtiren i gajxh estad Misia. Dxejc rlajzreni nijreni estad Bitinia, niluxh di Sprit Dxan xten Dios nusaan nijreni ro'c. ⁸ Ni'c gudejdtiren i stelaad estad Misia, bidzujñreni guedx Troas. ⁹ Te yääl si'c lo te bacal bahuu Pabl suga' te beṇ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlru nuunu.

¹⁰ Che bara yääl ni gunixcaḷ Pabl, gudilgajcnu te barcw te chonnu estad Macedonia, sa'csi gucheenu Dios najc nani caguxhaḷ nuure te guluiini xtiidxni lo rebeṇ Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹ Biu'tinu neṇ barcw ro' guedx Troas. Bidzun̄nu Samotracia, te yuj ni re' neṇ nisdoo. Che bara yääl bidzun̄nu guedx Neápolis. Ro'c biriinu neṇ barcw, ¹² bionnu guedx Filipos, guejdx nani sajcu lo estad Macedonia. Guedx romanni. Ro'c bia'nnu tiop choṇ dxej. ¹³ Che gojl sabd, dxej ni rusilajx rexpejn Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. ¹⁴ Lojreni nadxaag te nane' ni laa Lidia, te beṇzijt ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajñ gunaaga Dios si'c rajñ rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵ Birobnisni, näjza guiraa reni rbäjz rolizjni. Dxejc guniini loonu:

—Palga ruhuiitu guliä rililazä xtidx Dios, colṭaa rolizä te ro'c cuääztu.

Lacti gunab nane'ga nuunu, ni'c huijia'nnu rolizjni.

¹⁶ Te dxej cheni sionnu cadro rninäj beṇ Dios, bidxaagnu te dxa'p nani yu' te beṇdxab neṇ lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷ Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii bendxab neñ lastoo dxape'ga.

¹⁹ Che bahuui rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhreni guiro'preni nez roguui cadro suga' reguxhtis. ²⁰ Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni bieyy lo guejdxre. ²¹ Caguluiireni garenca lei nani digacdi gusoobnu sa'csi najcnu ben roman.

²² Dxejcti bidxehnäj rebejn Pabl näjza Silas. Gunibee rejuejz gulääreni xhajb Pabl, näjza xhajb Silas, te batiäjlreni baar guideb tiejx guiro'preni.

²³ Che gulujx gudinduxhreni Pabl näjza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

²⁵ Garolyääl guninäy Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni.

²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajn guixhajg ni canäj latzguiib, bahuini naxhal latzguiib, gulääni spaad xtenni, te rlajzni nugu'tni lagajc laani, sa'csi naani abadxun reni niäu neñ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuui, guiraliinu suga'nu ree.

²⁹ Dxejc gunibee guixhajg biääd te bajl te biu'ni neñ latzguiib. Racsejsni biäadni bazuxhijbni nez loj Pabl näjza nez loj Silas. ³⁰ Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudi-ibni dejtzen cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huiä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäy Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu ben roman. Batiäjlreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren nuure

neñ latzguiib. Leii xten roman di gusaan gac reben roman si'c. Luxh naj rlaizreni guslaareni nuure xhiga'tz. iDinu guirii si'c! Lagajc laareni sujiädsälääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni ben roman najc Pabl näjza Silas. ³⁹ Dxejcti biääd reguxhtis, gulääreni Pabl näjza Silas, gunabreni jäjälajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neñ latzguiib, huijreni roliz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

17

Cadxecluduxh guiraa reben Tesalónica

¹ Che gudejdreni reguedx Anfípolis, näjza guedx Apolonia, bidzujñreni guedx Tesalónica cadro yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Choñ sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo guijtza ni bacuaa reniguii ni gunii xtidx Dios galooli. Caj lo guijtza: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh ben griegw nani rajñ Dios näjza xhidajl reguna griegw ni sajcru huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii benpjoj, benlatsiaj, bejnreni biey nez galäi. Biu'reni roliz Jasón caguilreni Pabl näjza Silas te cuääreni guiro'preni nez lo rebejn. ⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu, ⁷ luxh badeed Jasón rolizni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo reexamigwni. Räjp reguxhtis sudesdareni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza reexamigwni.

Che guyu' Pabl con Silas guedx Berea

¹⁰ Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel. ¹¹ Hueenru najc reben Berea loj reben Tesalónica, sa'csi rbaali lajzreni bacuadiajgreni xtidx Pabl ni guniini xcuent Jesucrist. Guixe-guixee bilreni guijtza cadro caj xtidx Dios te gucheereni la gulii rextidx Pabl. ¹² Xhidajl rexpejn Israel näjza xhidajl ben griegw ni sajcru, gunaa sigajc niguii, huililajz xtidx Dios. ¹³ Che guchee rexpejn Israel ni rbäjz guedx Tesalónica caguluui Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni biey ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. ¹⁵ Dxejcti rebejn ni guzanäj Pabl huinänini

guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jiädgajcreni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ La! ni guläz Pabl guedx Atenas, guyuduxhni yärsia' sa'csi bahuini rajn guiraa rebejn rebanäjb nani runchee lagajc bejn. ¹⁷ Ni'c nen xquidooreni gudildiidx Pabl rexpejn Israel näjza rebenzijt ni rajn Dios si'c rajn rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biääd gaii bejn lojni. Yu' reni rolduxh guijtzt ni bacuaa epicúreos, yu'za renani rolduxh guijtzt ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resurec-ion”, ni säloj yälgubansac lo rebengut. ¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, ²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Reben Atenas näjza rebenzijt ni yu' ro'c ruteedreni redxej rniireni didxcoob lo sa'reni, o rucua diajgreni didxcoob. Ni'cpac rchaglaizreni.

²² Galäi Areópago huisulii Pabl, räjpni lojreni:

—Colcuadiajg guejbtu, ben Atenas. Abahuiä xho randuxhtu xhidajl banäjb. ²³ Che siädsä lo guejdxre, bahuiä lo rexpänäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. ²⁵ Diza Diosre guiquiin chu gacnäjni sa'csi lagajc Diosre rudeed yäl nabajn, yäl nadaan, näjza guiralii nani rquiin reben guedxliuj.

²⁶ Räjp Pabl:

—Guiralii reben guedxliuj najc rexagdoo tejsi gunaa näjza tejsi niguii. Desde galooli gunibee Diosga bal iiz chu renacion, näjza cati gunibee renacionga. ²⁷ Benchee Dios guiraa reben guedxliuj te quiiilreni Dios te chalilajzreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajnnu lo guedxliuj, runiidxni rsiaan lo guedxliuj, runiidxzani rdajlru xcäl nabannu lo guedxliuj. Laaca bacuaa rexpenajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäjl jiennu xhigab najc Dios si'c rebanäjb ni nac-chee pla't, o guij, o yajg si'ttis ni runchee bejn rexpänäjbtu. ³⁰ Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechlaiz guiraa rebejn, ³¹ sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc beñsa'c. Rnili Jesucrist rediidx ni najc guliitis. Guläs Dios Jesucrist, baspanasacnini lo rebengut, te gacbeenu rajp Jesucrist yäl rnibee lo guiraa recos.

³² Che biejn diajg rebejnğa gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiagrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc bejn Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpejn Israel guedx Roma. Birinäj Aquila Priscila chäälmi. Biriireni Italia, biäädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' Pabl xtidx Dios nen xquidoo rexpejn Israel. Rlajzni chalilajz rexpejn Israel näjza bejn griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhal Dios.

⁶ Dxejc bidxehnäj rexpejn Israelni, guniyajzaren i xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjpzani lo rexpejn Israel:

—Lagajc la'tu rajptu dojl nittu lo Dios. Xhet dojl di rapä narä. Aguniä xtidx Jesucrist lojtu. Naj lo rebejn nani di gac bejn Israel gusule'ä xtidx Jesucrist —räjpni.

⁷ Dxejcti biriini lojreni, huijni rolijz Justo, te bejn ni rajn Dios si'c rajn rexpejn Israelni. Rolijzni sojb cuä' xquidoo rexpejn Israel. ⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzni. Xhidajlza bejn Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bacad, räjpni lo Pabl:

—Na'c guidxiejblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galion gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galion. ¹³ Räjpreni lo Galion:

—Niguiire caguluii rebejn ganreni Dios garenca mood, xhet si'cti ni caj lo xleinu —räjpreni.

¹⁴ Agojl ninii Pabl, che räjp Galion lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuu xho guntu yälguxhtis —räjp Galion.

¹⁶ Gunibee Galion barilaagw resoldaad rexpejn Israel. ¹⁷ Dxejc gunaaz reGriegw Sóstenes nani nusgab xquidoo rexpejn Israel. Batiäjlreni baar dejtz Sóstenes nez ro' jusgaad xten Galion. Niluxh nicla niu Galionreni.

Chon huält huihui Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadre bahuaj Pabl yejcní si'c te seen yu' xhi diidx bia'nni con Dios. ¹⁹ Che bidzujñreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtixtios, räjpni lojreni:

—Nungäjpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. ²² Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluii Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huinärenini rolijzreni. Ro'c basule'rureni xtidx Dios nani gajdñi gan. ²⁷ Dxejc, sa'csi abejñ Apolos xhigab cháäni reguejdx ni tre' nez Acaya, bacuaa rexpejn Jesucrist guijtñ lo rexpejn Jesucrist ni yu' neñ reguejdxga te gacñajreni Apolos. Gucñäduhx Apolos rebejn nani badeed Dios huililajz xtidx Dios neñ reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguui ni gunii xtidx Dios galoo basule'ni: “Jesús najc Crist nani cayunlojtu guxhañ Dios.”

19

Guyu' Pabl guedx Éfeso

¹ Lañ ni guyu' Apolos guedx Corinto, huij Pabl xhidajñ reguejdx nen región Asia, dxejcti bidzujñni guedx Éfeso cadre bidxaagni gaii bejn nani huililajz xtidx Dios. ² Gunabdiidx Pabl lojreni:

—Che huililajztni xtidx Dios, ¿la biädlajz Sprit Dxan xten Dios nen lastootu, ä?

Räjpreni lojni:

—Nicla gajd diajgnu jieñ la yu' te Sprit Dxan xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

⁴ Dxejcti räjp Pabl lojreni:

—Guliica bastiobnis Juan che basiejch lajz rebejn xtojłreni. Răjpza Juan lo rebejn: “Colchalilajz xtidx bejn ni siăäd detzä.” Bejn ni basä'tni najc Jesucrist —răjp Pabl.

⁵ Che biejn diajgreni rextidx Pabl birobnišreni te gacbee rebejn na-jcreni xpejn Jesucrist. ⁶ Che batzuub Pabl naani yejcreni, biu' Sprit Dxan xten Dios neñ lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c choñ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn neñ xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejñni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbăjz Asia biejn diajgreni xtidx Dios. ¹¹ Gucnăj Dios Pabl bejn ni xhidajł dzunro, remilagwr. ¹² Ni'cni biăäd bejn ca'reni baii, ca'reni tla' lajd te guxheebreni relajdga lo Pabl. Dxejcti rinăreni relajdga lo rebejn ni racxhuu, luxh riacgajc rebejn ni racxhuuga, rigajcza rebendxab lastoo renani yu' bendxab.

¹³ Dxejcti guyu' gaii beñ Israel nani entis rcansaj, direni cuăäz tejsi guejdx. Najcreni bejn ni rbăä bendxab lastoo rebejn. Bejn redee xhigabcoob, naareni cuăäreni bendxab xcuent laj Jesucrist, ni'cni răjpreni lo renani yu' bendxab neñ lastooni:

—Xcuent xcälrnibee Jesucrist nani ruluui Pabl rnibeenu guiriilu neñ lastoo bejnğa —răjpreni.

¹⁴ Guyu' gajdz xi'n Esceva, te beñ Israel, nani sajcro lo rebixhojz. Ruñ redee dzuun rbăäreni rebendxab neñ lastoo rebejn. ¹⁵ Che gunii rexi'n Esceva loj bendxabga si'c, răjp bendxab ni yu' neñ lastoo bejnğa lojreni:

—Rumbeä Jesucrist, rumbeäza Pabl. ŁLa'tu, chu la'tu? Dina gumbeä la'tu.

¹⁶ Dxejcti bixa't niguui nani yu' bendxab neñ lastooni yejc rexi'n Esceva, gudinduxhnireni, basälta'nireni, batiăjsni xhajbreni. Dxejcti baxunreni biriireni neñ yu'ga, bidxăłguijdxzarenı birăsy'a' xhajbreni. ¹⁷ Dxejcti guiraa reben Ēfeso, rexpejn Israel sigajc beñ griegw, gucbee xho bennăj bendxab reniguiiga. Bidxebduxh rebejnğa, luxh huă'p xpala'n Jesucrist.

¹⁸ Xhidalduxh reni huililajz xtidx Dios biăäd lo rexpejn Jesucrist. Cacăjpreni guiraa recos xhet laadi nani ruñreni. ¹⁹ Xhidajł reni najc bidxaa biădnă reguijtz cadro caj yăłnajn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mił melpla't. ²⁰ Xhidalduxh rebejn huililajz xtidx Dios. Batijp Dios lastoo rexpejñni. Gulă'p guiraareni xpala'n Dios.

²¹ Che gulujx recosre, bejn Pabl xhigab chăäni guedx Jerusalén, niluxh tedxgaani reguejdx ni re' nez Macedonia năjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhał Pabl Timoteu năjza Erasto, tio'p renani racnăjni, huijreni Macedonia, luxh laani bia'nni Asia.

Bidxebduxh reben Ēfeso

²³ Nen redxejga, guyuduxh rebejn yärsia' sa'csi baluii Pabl xtidx Dios. Direni nichagljaz care'ch xtidx Dios. ²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhrenei gaan meel ro'c. ²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäanu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. ²⁷ Ni'c ries nitloj xtzunnu palga diru bejn sii ni'ch ni riencheenu. Luxh riesza diru bejn jiädgajn Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcu, niluxh palga diru rebejn gan Diana, pet sinitlojni —räjpni.

²⁸ Che biejn diajg replateer xtiidxni, bidxe'chduxhrenei, guredxa'reni räjpreni:

—Sacduxh Diana xtios reben Éfeso.

²⁹ Guideb guejdx guyu' biey. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, ben Macedonia ni rinajl Pabl. ³⁰ Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäalu cadro nadxagsa' rebejnnga —räjpreni.

³² Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnnga nicla gan xhicuent bidxagsa'reni. ³³ Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basäabni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chrenei lo rexpejn Israel. ³⁴ Niluxh che gucbee rebejn najc Alejandro ben Israel, tiop or guredxaduxhrenei, räjpreni:

—Sacduxh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu ben Éfeso, caguidxäjl te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. ³⁶ Sa'csi rediidxre najc gulli, nungäjl cuedxitu, na'c guntu recos guiidxre. ³⁷ ¿Xhicuent gunaaazu reniguii ni siädnätu ree? Direni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte rebenguejdx si'c ni caj lo xleinu. ⁴⁰ Ries jii xquejnu lo gubier, naareni bidojpu te guidxagdilu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia nájza Grecia

¹ Che bire'ch rebejn, gurejdx Pabl rexpejn Jesucrist biäd lojni, te balijdxnireni. Badeedni xtixtios lojreni. Sä'tini nez reguedx Macedonia.

² Guiraa reguejdxga cadro gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³ Che bidzujñni Grecia, bia'nni ro'c choñ bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pírios, te beñ guedx Berea; náj Aristarco nájza Secondo, beñ guedx Tesalónica; náj Gayo, beñ guedx Derbe; náj Timoteu; náj Tíquico nájza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzuñnu guedx Troas. Ro'c bia'nnu gajdz dxej.

Baluii Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejñpacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. ¹⁰ Dxejcti biäjñ Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejñpacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzñi. ¹² Xhetliidiru rajcdi bi'nga nani gubañsac, nani guläs Pabl. Bibalazduxhrenei, huisa'nrenini rolizjni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw. ¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzuñnu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzuñnu guedx Samos. Guedx Trogilio basilaaznu. Che bara stee yääl, bidzuñnu guedx Mileto. ¹⁶ Di rlaiz Pabl jiu'nu guedx Éfeso, diza rlaizni chunu Asía xchej, sa'csi riojb laizni guidzuñnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸ Che bidzujñreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzuñä, nabañnä Dios. ¹⁹ La'tu najntu xho runä xtzuun Jesucrist guixe-guixee,

guideb xcäl'nadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlaiz rexpejn Israel nugu't narä, gudedä trabajwduhx. ²⁰ La'tu najntu xho baluiä lojtu guirali rextidx Dios ni najc huen par la'tu. Che nadxagsa'tu baluiä xtidx Dios lojtu, näjza roliz cade tejtü huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzajt ni di gac xpejn Israel. Räpä lojreni nanab gusiechlaizreni, gusa'nreni xtojreni, nanab chalilajzreni xtidx Jesucrist te gudzucaj Dios xtojreni. ²² Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadro rdedä rnii Sprit Dxan xten Dios loä sidedä trabajwduhx, siäüä neñ latzguilb guedx Jerusalén. ²⁴ Niluxh dina guidxebä, dizana chanälazduhxä xcäl'nabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojreni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucbeä dirutu fisac loä, la'tu nani basule'ä xcäl'nibee Dios lojtu. ²⁶ Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷ Xhetliidi biäädxd di loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlaiz Dios guibanu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruz te gac gudzucaj Dios xtojreni. ²⁹ Anancheä che rutdiru narä, siääd bejn nani rlaiz chalilajztu ste'ca diidx, na'c chalilajztu niclaza jiutu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlreni redee ni rusguee. ³¹ Colhuui te di gusgueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjpza Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejnni. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con naä te bio' xhi gudaunää reexamigwä. ³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpni.

³⁶ Che gulujx gunii Pabl rediidxga, bazuxhibnäjni rebejnga, guredx-gunabni lo Dios. ³⁷ Dxejcti ronduxh guiraareni gudäazreni guejn Pabl, bachagro'renini. ³⁸ Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'ntinu rexpejn Jesucrist ro'c, biu'nu neñ barcw, sionnu te lii nejj lo yuj ni laa Cos, ni tre' lo nisdoo. Che bara yääl, bidzuñnu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara. ² Che bidzuñnu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. ³ Bahuiinu

lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunu guedx Tiro cadre gule'creni cargw ni nuu barcwa. ⁴ Ro'c bidxälnu rexpejn Jesucrist. Biannänureni gajdz dxej. Baluii Sprit Dxan xten Diosreni te guniireni lo Pabl, räjpreni:

—Na'c chäälü guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhijbnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gubisacreni rolizjreni.

⁷ Biriitinu guedx Tiro. Che bidzunu ro' guedx Tolemaida, gulujx xpiajnu biäjtnu neñ barcw. Dxejc biohuiinu rexpejn Jesucrist ni yu' guejdxga, biannänureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzunu guejdxga, bionnu rolizj Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolizjni huijia'nnu. ⁹ Yu' tajp xindxapxteb Felipe. Dios badeed diidx guiniireni lo bejn. ¹⁰ Xhidajl dxej guläjznu rolizj Felipe. Lañ ni dxunnu ro'c, bidzujñ te niguii ni laa Agabo, biriini nez Judea. Ruzanij Dios xcäriejn ni te guiniini xtidx Dios.

¹¹ Che bidzujñni loonu, cua' Agabo xsindoor Pabl, baliibni lagajc reni'ni näjza reñaa ni, najni loonu:

—Anaj Sprit Dxan xten Dios: “Scree sulib rexpejn Israel ni yu' guedx Jerusalén niguii ni najc xtenni sindoorre te gutedrenini ladzñaa rebenzajt.”

¹² Che biejn diaag nuu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhuiintu laza? Xhet najcdi jääuä neñ latzgüib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechlajzni, xhetru guniudin lojni. Räjptisnu lojni:

—Sugac nani rlaiztis Dios.

¹⁵ Che gudejd redxejga, bilucheenu rehxixtennu, biriinu guejdxga, siontinu guedx Jerusalén. ¹⁶ Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure rolizj te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizjni, ro'c guläaznu.

Huihui Pabl Jacoob

¹⁷ Che bidzunu guedx Jerusalén, bibalazduxh rexpejn Jesucrist sa'csi siopnu ro'c. ¹⁸ Che bara yääl huinänu Pabl lo Jacoob näjza lo renani rnibee guidoo xten rexpejn Jesucrist. ¹⁹ Dxejc gudäaz Pablreni, bijni diidx xcuent tebgaj redzuun nani badeed Dios bejn ni che guyunäjni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzaren lo Pabl:

—Guejblu, sa'nu, anajnl lacti xhidalduxh xpejn Israel yu' nani rililajz xtidx Jesucrist luxh rapdaduxhreni lei xten to Moisés. ²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzajt, rulijdxluren ni na'c gusälreni bee rexi'nreni, na'cza chazanäjruren rexcostumbrnu. ²² ¿Xhini'c jiennu?

Siejn diajgreni abidzujnlu ree, dxejc suchagsa'reni te jiädreni lojlu. ²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerreni laaca rusooblu xleii toMoisés. ²⁵ Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääł nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiädnä teygareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl nen guidoroga. Gunaazreni Pabl, dxejcti gusloj cayujnreni biey, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuiilaare! Niguiire najc nani rniyaj rexpejn Israel cadrotis rijni. Rulijdxni bejn te di chazanäjruren xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree ben griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Tróimos lo nezyuj. Tróimos najc te benzijt ni siädä guedx Éfeso. Naj cayujnreni xhigab laa niguiiga ni siädnä Pabl nen xquidoro rexpejn Israel.

³⁰ Guideb guejdxga guyu' yärsia', bire' benguihxuj, bixa'treni yejc Pabl, gunaazrenini, gudobxhaxhuren Pabl, gulägajcneni nen guidoroga. Biägajc repuertro xten guidoro. ³¹ Lał ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh nen guejdxre.

³² Guredxgajc comandant resoldaad näjza gaii capitán, ruxunreni bidzujnreni cadro tre' rebejn. Che bahuii rebejn lo comandant näjza resoldaad, guläjb caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunab-diidxni lo Pabl, räjpni:

—¿Chu luj? ¿Xhini'c bejnlu?

³⁴ Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadro rbäzreni. ³⁵ Che bidzunäjb resoldaad Pabl ro' scaleer ni caj ro'c, biireni Pabl te bejnreni gan biunäjbreni Pabl, sa'csi nialazduxh rebejn rlaizreni nugu'treni Pabl.

³⁶ Siädnaļ guiraa rebejn Pabl, rbedxa'reni:

—Colgugu'tni.

³⁷ Che agoļ jiu' Pabl nen yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidxsaä! ³⁸ An dilu gac niguii ni siääd naciön Egipto, nani gudilñaj gubier, nani huinā lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narā nacā te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabā gun guejblu te hueen, gusaan guejblu guiniā lo rebejnre.

⁴⁰ Dxejc cuājbe comandant guinii Pabl lo rebejn. Lal ni suga'ni lo scaleer basāab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu beñgool, guejbtu resa'ä, näjza la'tu dade'. Gucuadiajgtu rextidxä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narā nacā te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narā guiragajc releii xten retoxtadgoldoonu. Guideb xtipä basobā ni gunibee Dios. Gucä si'cpac ni najctu naj. ⁴ Dxejcti bidxechduxhä loj renani huililajz xtidx Jesucrist, bagu'tazareni. Balibā xhidajl bejn, niguii näjza gunaa, con cadenguiib. Basäuäreni neñ latzguiib. ⁵ Bixhojz ni sajcru näjza guiraa rebengool ni sajcru neñ xquidootu, sajcu guinii xhini'c benä. Laareni baniidxreni guijt loä. Ni'c huinā lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jiädnääreni guedx Jerusalén te jiäuren neñ latzguiib, te gusacsireni rebejnğa.

*Gunii Pabl xho huililajzni xtidx Jesucrist
(Hch. 9:1-19; 26:12-18)*

⁶ Räjpzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷ Biabrlöä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsilu narä näjza rexpenä?” najni. ⁸ Dxejcti räpä lojni: “¿Chuluj, Dad?” Najni loä: “Narā nacā Jesucrist ni siääd Nasare't, nani cagusacsíduxhlu.” ⁹ Rebejn ni sanää bahuilöj bajlga, bidxebreni, niluxh di diajgreni niejn xse' nani gunii loä. ¹⁰ Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibea gunlu.” ¹¹ Bastujxh bajlga loä, diru loä nien, ni'cni gunaaz resa'ä nää, sontinu guedx Damasco.

¹² Räjp Pabl:

—Guejdxga guläz te niguii ni laa Ananías. Rusoobni guiraa releii xten toMoisés. Guiraa rexpejn Israel rniñ nadalajz lo dade'ga. Biääd Ananías loä. ¹³ Cuä'a guzujni najni loä: “¡Saulo, betzä, bahuisac!” Lagajc dxejc bi-ajc loä, bahuiä lojni. ¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵ Loj guiraa bejn susule'lu guiraa ni bahuiilu näjza nani biejn diajglu. ¹⁶ ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluiini xtidx Dios lo rebenzajt

¹⁷ 'Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Laḷ ni cabedx-canabä lo Dios, astoo gunixcalä, ¹⁸ dxejc bahuiä lo Jesucrist. Najni loä: "Basquejn, birii guedx Jerusalén sa'csi di rebejn chalilajz xtidxä ni gusule'lu lojreni." ¹⁹ Narä räpäza lojni: "Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäüäreni neñ latzguiib. ²⁰ Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajn xten renani bagu't Esteban laḷ ni bacuaareni guij." ²¹ Dxejcti naj Jesucrist loä: "Huij. Suxhalä luj zitduxh. Chäälü lo guiraa rebenzijt ni di gac xpejn Israel."

Bia'n Pabl neñ rolijzro xten resoldaad

²² Bacuadiajg guiraa rebejn laḷ ni gunii Pabl rediidxga, dxejcti guredxa'reni, räjpreni:

—Colgu't niguüiga. Di nunyäjḷ guibajnruni.

²³ Sanuutis cabedxa'reni. Gulääreni xcamangwreni, cacuaazareni yuyol jiaa. ²⁴ Dxejcti gunibee comandant lo resoldaad, räjpni:

—Colchanä Pabl neñ yuro xtenu. Ro'c colquini Pabl te guiniini didxgulii, te gacheenu xhicuent rbedxaduxh rebejn lojni.

²⁵ Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beñ roman che gajdtu gacbee xhi dojl bejnni, ä? Et si'cti caj lo xleilü.

²⁶ Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beñ roman.

²⁷ Biädguxuñ comandant lo Pabl, räjpni:

—¿La gulii najclu beñ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beñ roman.

Dxejcti räjp Pabl lojni:

—Narä che goḷäli nacä beñ roman.

²⁹ Che biejn diajg resoldaad nani niguijn Pabl si'c, basḷagajcreni reduguijd ni naliib ni', naani. Che biejnza diajg comandant najc Pabl beñ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rḷajz comandant gacheeni xhicuent rḷajz rexpejn Israel ju't Pabl. Ni'c gunibeeni jiaäd rebixhojz ni saj cru näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laḷ ni räjpni lojreni:

—Narä gusule'ä tiop diidx lo guejbtu, beñ Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni saj cru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beŋguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gachee laa bixhojz ni sajcruxten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacheä cania lo bixhojz ni sajcruxten, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beŋ saducee, yu'za reni najc ben farisee. Dxejc guredxa' Pabl räjpni lojreni:

—Sa'ä, narä nacä te beŋ farisee, xi'nza te beŋ farisee narä. Rililazä sibansac bejn lo rebengut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhrenei, räjpreni:

—Di niguiire gac beŋguijdx. Palga gunii te angl xten Dios o te togool lojni, alga Dios tilnäjn, dxejc sidxehnäj Diosnu.

¹⁰ Che gusloj cabedxaduxhrenei lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadro suga' Pabl. Guideb xtiypreni gulääreni Pabl galäi rebejnnga huinäsaereni nen yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidundinu palga dinu guigutxgaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jädnäni Pabl lojtu. Colyejn si'c ni rlaiztu jiejnru diajgtu diidx xcuent Pabl. Che jädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujn, biu'ni räjpni lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani näu nen yuro xten resoldaad, gunab löä jädnälaa bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant naa bi'nre, huinäniini te laad cadro rut jiejni diajgni xtiidxreni, dxejc räjpni lojni:

—¿Xhini'c rlaizlu guiniilu löä?

²⁰ Dxejc bazejcní diidx, rájpní loj comandant:

—Abia'n te cuaa xpejn Israel diidx siniabreni lo guejblu jiádná guejblu Pabl ro jusgaad guixee. Sujnsireni si'c ni rlaiz jiejnru diajgreni diidx xcuent Pabl. ²¹ Na'c chalilajz guejblu xtiidxreni. Tiu niguii sibázhiga'tz cuá' nezyuj te ju'treni Pabl. Abia'nreni diidx direni gau, dizareni yá palga direni jutxgaa Pabl. Naj cabájtisreni guxhał guejblu diidx siná guejblu Pabl ro jusgaad.

²² Che biejn diajg comandant diidxga, basaanni sii bi'nga rolizjni, rápxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, rájpní lojreni:

—Colgutojp tiop gayuu soldaad, cháä guedx Cesarea nájza gayonbitzuu soldaad ni bijb cabaii, nájza tiop gayuu soldaad ni ca' spaad. Rcagaa guxhijn guiriireni ree. ²⁴ Colquiil tiop cabaii cuib Pabl te xhet gacdi Pabl cheni chanátuni lo gubernador Pels —rájpní.

²⁵ Dxejcti bejn comandant te guijt chanäreni lo gubernadoor.

²⁶ Loj guijtza rnii scree: “Gubernador Pels, nani sacduxh. Narä, Claudio Lisias, ruxháłá xtixtios lo guejblu. ²⁷ Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni beñ roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc gucbeä requej ni rbe'creni najc ganax xcuent leiı xtenreni, niluxh xhet bejndini te nungäjl guetni, niclazä nanab jiäuni neñ latzguiib. ³⁰ Che baxhalreni diidx loä cabázhiga'tz rexpejn Israelni te ju'treni dade're, baxhalga'cäni lo guejblu. Agunibeäza jiädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijt ni bejn comandant.

³¹ Che biu' guxhijn, huixii resoldaad Pabl sanäreni guedx Antípatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujn redee Cesarea, badeedreni xquijt comandant lo gubernadoor, huinäzareni Pabl lojni te biembeenini. ³⁴ Che gulujx bilni guijtza, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, ³⁵ rájpní lo Pabl:

—Guidzujnsi rexpejn Israel ni cadxechnäj luj, sucuadiaggacä xtiidxlu —rájp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujn Ananías, bixhojz ni saj cru, nájza gaii rebengool xten guidoro, nájza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Rájpní lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujn guejblu. ³ Xquixtiosduxh guejblu, gubernadoor Pels, xcuent guiraa redzunsac ni rujn guejblu guira nejz.

⁴ Luxh na'cru gusieednu guejblu, gucuadiaglaa guejblu tiop diidx.

⁵ Agucbeenu xho najc niguiire. Benguidxduxhni. Cadrotis rijni rujnni bieju lo rexpejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biääd guedx Nasare't. ⁶ Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. ⁷ Niluxh bidzujñ comandant Lisias näjza resoldaad. Diptis badzucajreni niguiiga ladznaanu. ⁸ Laani gunibeeni lo guejblu jiaäd reni rbe'c xquejni. Naj lagajc guejblu sajç guiniabdiidx lojni te gacbee guejblu gulii guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn Israel ni suga' ro'c räjp guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —räjp Pabl—. ¹¹ Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdilä bejn nen guidoro. Nicla tej dina niunä bieju nen reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu gulii najc xtiidxreni. ¹⁴ Rniliäpac lo guejblu: Rañä Xtios retoxtadgoldoonu. Jesucrist baluii xho gañsa'cnu Dios. Rililazä rextiidxni. Xhidalduxh rexpejn Israel rniyay xho basule' Jesucrist gañ bejn Dios. Ruzobä guiraali relei xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujñ te dxej che guibañsac rebengut, rebenguijdx sigajc rebensa'c. ¹⁶ Ni'cni racbeä laaca nabañä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

¹⁷ Räjp Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸ Ni'c sanää guidoro. Ro'c bidxäjñ rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza biejdidi cayunä. ¹⁹ ¿Con rebejnğa naj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiaädli comandant Lisias dxejc gunä yälguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlaajtisni gunni. Na'cza gudxojnñi jiaäd rexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibañsa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guiidx, sa'csi

sidzujn dxej gac Dios juejz loj guiraa rebejn te fiini xhi bejnreni. Racslesi Pels tant bidxejbni biejn diajgni diidxga. Räjpnı lo Pabl:

—Huij naj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcnı gubernadorcoob. Niluxh Pels rlajz chanälajz rexpejn İsrailni, ni'c basa'nni niäusijc Pabl.

25

Gunii Pabl xtiidxnı lo Festo

¹ Che biu' Festo gujcnı gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén. ² Che bidzujnı guejdxga, rebixhojz nani rnibee näjza reniguii ni sajcrı lo rexpejn İsrail biäd lo Festo. Gusloj cabe'creni xquej Pabl lojni. Gun-abduxhreni lo Festo ³ sa'csi rlajzreni gunni te huen laareni, guinibeeni jiädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezıuj.

⁴ Dxejcti räjp Festo lojreni:

—Suniau Pabl guedx Cesarea. Di gaclaa guibi'ä guedx Cesarea.

⁵ Suchää reniguii ni sajcrı lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnı —räjpnı.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biäd Pabl lojni. ⁷ Che bidzujn Pabl lojni, biäd rexpejn İsrail nani biäd guedx Jerusalén ro'c. Guzıjreni guideb gabi Pabl. Gule'creni xhidalduxh xquej Pabl, luxh di niajcdi nulıireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenuu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlajzni guiliäsni xpala'nni loj rexpejn İsrail, räjpni lo Pabl:

—¿La sisiajlu guedx Jerusalén te cue'c rexpejn İsrail xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reiı César. Guejblu rnibee guiraa reguejdxre. Ree nungäjl cue'creni xquejä lo guejblu, xhet guedx Jerusalendi. Ananchee guejblu xhet latsiajdi benä lo rexpejn İsrail. ¹¹ Palga nacä te benguijdx, o palga yu' xhi latsiaj benä te nungäjl guetä, xho dina xcäbä guetä. Palga xhet latsiajdi benä nani canii rexpejn İsrail benä, dxejc rutliidi sajg guteed narä ladznaareni. Suchale'creni xquejä lo César nani najc reiı xten rebenı roman —räjp Pabl.

¹² Che guninäj Festo reguxhtis xten xquidoro rexpejn İsrail, räjpni lo Pabl:

—Luj gunablu chäälu loj reiı César. Mbaj. Sijlu lo reiı César —räjp Festo.

Huixiireni Pabl huinäreni lo reiı Agripa

¹³ Che gudejd balti dxej, bidzujn reiı Agripa näjza chäälı Berenice guedx Cesarea. Biädhuiireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjpnı Festo lojni:

—Ree niäusijc te niguui ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. ¹⁶ Răpă lojreni: “Di leiï xten naciön roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” ¹⁷ Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl. ¹⁹ Alga cadilnäjrenini xcuent xleiireni, xcostumbrreni. Guniizareni xcuent te niguui ni laa Jesucrist. Agujtni, niluxh canii Pabl gubañsacni lo rebengut. ²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni laḷ ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlažäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gcuadiazglu xtiidxni —räjpni.

²³ Che bara yääl, biääd Agripa näjza Berenice, luxh sucheduxhrene. Näjza recapitän ni sajcru näjza rebejn ni sajcru lo guejdxga biu'reni nen yuro xten Festo. Dxejc gunibee Festo biääd Pabl. ²⁴ Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiazg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhrene guetni. ²⁵ Niluxh narä rchaloä xhet bejndini te nungäjl guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guijtze te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtze ni chää lo César. ²⁷ Narä runä xhigab di nungäjl guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpni:

² —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gcuadiaglaa guejblu guiraa rextidxä.

⁴ Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleinu si'cni rililajznu. ⁶ Naj suga'a ree, rlajzreni jiäuä sa'csi rililazä diidx nani bia'n

Dios con retoxatadgoldoonu. ⁷ Guitzubitiop cuaa rexpejn Israel huililajz siliäs Dios guiraa rebengut te guibaṣacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibaṣacreni, ni'cni rlaizreni gusäureni narä. ⁸ Palga abejn Dios xhigab guiliäsni guiraa rebengut te guibaṣacreni, xhicient di lajztu chalii xtidx Dios?

⁹ Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni neṇ latzgüib. ¹⁰ Guiraa recosre benäza guedx Jerusalén. Baniidx rebixhojz ni rnibee guijt loä te basäuä rexpejn Jesucrist neṇ latzgüib. Che biäureni neṇ latzgüib, narä gule'cä xquejreni te gujtreni. ¹¹ Balti huält basacsiduxhäreni lagajc neṇ reguidobäz te niniyajreni Jesucrist. Luxh basacsiduxhäreni, hua'a guideb nez reguedxziyt te ro'c huisacsia rexpejn Jesucrist.

(Hch. 9:1-19; 22:6-16)

¹² Räjpa Pabl:

—Ni'c sa'a nez guedx Damasco, ca'a guijt ni baniidx rebixhojz ni rnibee. ¹³ Rniliä lo guejblu, reii, si'cti läidxej, bahuiä te bajl ni siäd xhaguibaali. Rsanijruni lojubijdx. Basanijni guideb gabi cadro suga'a näza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, xhicient rusacsilu narä näza rexpənä? Che rusacsilu narä, lagajc luj rdejdlu trabajw, si'c te gon ni rucuanii' yejc garu'ch.” ¹⁵ Dxejcti räpä lojni: “xChu luj Dad?” Dxejc najni loä: “Narä nacä Jesucrist nani cagusacsiduxhlu. ¹⁶ Huistie, gusulii. Narä baluiloä lojlu sa'csi rlaizä gaclu te xpenä. Aguleälu te gusule'lu lo rebejn guiraa ni bahuilu nadxej, näza guiraa recos ni churu guluiä lojlu. ¹⁷ Naj suxhalälu loj rexpejn Israel näza lo rebenziyt nani di gac xpejn Israel. Che gusacsí rexpejn Israel näza rebenziyt luj, sacnäduxhälu, te di ju'treni luj. ¹⁸ Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Benḏxab ni rnibee rebendxab, sa'csi susoobreni xtidx Dios. Che chalilajzreni rextidxä, sudzucaj Dios xtojlni. Dxejcti suchaag Diosreni loj renani anajc beṇnaya sa'csi basoobreni xtidx Dios, huililajzreni xtidxä.”

¹⁹ Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgaä xtiidxni lo reben Damasco. Räpä lojreni: “Colgusiechlaiz, colgusoob xtidx Dios. Colujn dzunsa'c te gacbee rebejn abasiechlaiztu, arusoobtu xtidx Dios.” Si'cza guniä lo reben Jerusalén, näza lo rebejn ni yu' reguedx Judea, näza lo rebenziyt ni di gac xpejn Israel. ²¹ Sa'csi benä si'c, gunaaz rexpejn Israel narä neṇ guidoro, rlaizreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijt nani bacuaa toMoisés näza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibaṣacni lo rebengut, ganiddooza laani suluiini loj rexpejn Israel näza loj guiraa rebenziyt guliipac xtidx Dios, sibansac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ La! ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guiitz ni'c cayajc yejclu.

²⁵ Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii cania. ²⁶ Ree suga' reii Agripa. Laani nancheeni guiraa rediidxre, ni'c guyasi cania rediidxre lojni, dizana guidxebä sa'csi anajnni gulii guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, ðla rililajz guejblu xtidx reniguii nani bacuaa xtidx Dios, ä? Nañcheä rililajz guejblu diidxga —räjp Pabl.

²⁸ Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹ Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰ Dxejcti huisu Agripa, Festo, Berenice, näjza rebejn ni sobganäjreni.

³¹ Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

³² Dxejcti räjp Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹ Basoobtireni dxej ni niu'nu nen barcw te chonnu Italia. Dxejc bateedreni Pabl näjza sgaai bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi sääb te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu nen barcw, bideednu xnisdoo reguedx Cilicia näjza xnisdoo reguedx Panfilia, te bidzuñnu ro' guedx Mira xten Licia. ⁶ Ro'c bidxäjl capitán xten resoldaad stee barcw ni siääd guedx Alejandria. Agojl chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzuñnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu nen barcw lo nisdoo nez cuä' yu Creta; si'ctis gujc bidzuñnu te lajt ro' nisdoo ni laa Buenos Puertos cadre guxii sääb bej. Gajxh ro'c tre' guedx Lasea. ⁹ Agujc balti dxej cayacleanu, luxh agudejdza dxej ni rucua'n rexepejn Israel, guxii riäädx chaa ijz. Rebäire di bejn chää nen barcw sa'csi yuduxh riesgw lo nisdoo, ni'c balijdx Pabl rebejn, ¹⁰ räjpni lojreni:

—Rexamigwä, runxgaä bis guejbtu, palga chonnu neñ barcw chanu-unu xnejznu, sajce te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäi nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, räjpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niacaa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlaizni. ¹⁶ Siädgobiu j barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basäl'nu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlaizni. ¹⁸ Che bara yäl caguscuä' beduxh barcw lo nisdoo. Sas basäl'reni che'n cargw lo nisdoo te bicharu barcw. ¹⁹ Ni riojn dxej, lagajc laareni basäl'reni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtneu. ²¹ Xchero rut rlaizdi gau. Dxejc gusuj Pabl galäi rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. ²² Niluxh colcuedxdi lastootu. Niclatej bejn ni siääd lo barcw di guet. Barcwtsi sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴ najni loä: “Na'c guidxejblu Pabl. Nanabpac chääl lo rei César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni canä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadro chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balaṇaa beduxhga barcw nezre, nezrec lo nisdoo ni laa Adria. Pet garol yäl ni bejn reniguii ni ruzaj barcw xhigab abidzujn barcw gajxh lo yuj, ²⁸ ni'c bastejbreni te guib lo duu xhajn nisdoo, te barexhreni ro'c, dxejc gubeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guib con duu xajn nisdoo, dxejc gubeereni ro'c najc nisdoo jäät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlaizreni malai jianijga lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guib lo nisdoo, niluxh rlaizreni guxunreni guidon la sajce guidzujnreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcäl'nabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayani, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejctu di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. ³⁶ Dxejc bibaa-lajzreni, näjza laareni gusloj cayajwreni. ³⁷ Nuunu najcnu tiop gayuu gayonbitzubixho'p bejn ni yu' nen barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlajzreni nusiureni barcw ro'c. ⁴⁰ Dxejcti basläareni guidap guench guiib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balaṇaa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. ⁴² Dxejcti rlajz resoldaad nugu't repres te di guixoobreni lo nis guxunreni. ⁴³ Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

28

Bidzujn Pabl lo yuj ni laa Malta ni re' lo nisdoo

¹ Che bidzujn nu lo yuj ni tre' lo nisdoo, biembeenu yujga najc ni laa Malta. ² Gucnäj rebejn ro'c nuure, gule'creni guiboo bahuiireni nuure sa'csi cayacnaḽduxh, cayajbza nisguij. ³ Ca' Pabl te dääz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. ⁴ Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejn ni gaan lo nisdoo siguijxni xtojlni, sejtni naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶ Dxejc reben ro'c cabäz fiireni la sisiäguij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzn chon dxej. Huenduxh gujc dade'ga, baniidxni guiraa ni biquiinnu. ⁸ Naga' xtd Publio cayacxhuuni, yu'ni xliaa, cayajczani yobrejn. Huihui Pabl ni. Guredx-gunab Pabl lo Dios, dxejc batzuub Pabl naani yejcn, basiacgajcnini. ⁹ Che guchee rebenguejdxga abasiajcn bejn racxhuuga, bidzunnäjreni bejn racxhuu lo Pabl, basiajc Pabl guiraareni. ¹⁰ Ni'c baniidxreni guiralii recos ni biquiinnu nen barcw.

Bidzujn Pabl guedx Roma

¹¹ Agujc choñ bäii yu'nu ro'c che biu'nu neñ te barcw ni siääd Alejandria. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹² Biriinu Malta sonnu neñ barcw nez guedx Siracusa. Ro'c bia'nnu choñ dxej. ¹³ Dxejcti biusacnu neñ barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzunnu guedx Puteoli. ¹⁴ Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che guchee rexpejn Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuui Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladzñaa comandant, niluxh basaanni cualaa Pabl te yu' cadro cuääzni. Tejtis soldaad biannäj Pabl.

Baluii Pabl xtidx Dios lo reben Roma

¹⁷ Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadro yu' Pabl, räjpni lojreni:

—Guejbtu reexamigwä, resa'a, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäuren i narä neñ latzgüiib guedx Jerusalén, dxejcti bateedreni narä ladzñaa reroman. ¹⁸ Che biejn diajgreni xtidxä, rlaiz reguxhtis roman nuslaa narä sa'csi xhet benädi te nugu'treni narä. ¹⁹ Niluxh naaddi rexpejn Israel guslaareni narä, gunabätis lojpac rei César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

²¹ Dxejcti räjpreni lojni:

—Nicla tej guijtj gajd reguxhtis xten reguedx Judea guxhal loonu xcuentlu, gajdza rexpejn nu ni bidzujn ree jiädsä'n diidx xhet laadi bejnlu. ²² Rlaiznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujn dxejga, bidxagsa' xhidalduxh bejn neñ yu' cadro rbäiz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäiz reben Israel jiäd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Gulica naj toIsaías che badeed Sprit Dxan xten Dios rediidxre guniini, räjpni lo rextadgoldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbée xhini'c ruhuiitu.

²⁷ Agucnajd lastoo rebejnre sa'csi di rlaizreni chalilajzreni xtidxä.

Direni cuadiajg xtidxä sa'csi di rlaizreni jiejn diajgreni diidx ni guliipac. Rusäuzareni balojreni te di fiireni, te di laizreni chalii.

Ni'cni direni gusiechlaizreni te gusaan gunreni dojl te gudzucaj Dios xtojlneni.

²⁸ Răjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojłreni. Rniliăpac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijł sa'reni lał ni sääreni.

³⁰ Tiop ijz gulăjz Pabl guejdxga nen yu' ni cualaani. Biuni guiralii rebejn ni biăad rolijzni. ³¹ Lo guiraa rebejnğa basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeñ Roman

Rucuaa Pabl lo rebeñ guidoo neñ guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeñ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprofe'tga.

³ Rediidx ni rusule'ä najc xcuent Jesucrist, Xi'n Dios, ni najc xagdoo toreei David xcuent tiejxhni. ⁴ Xcuent Xsprit Dxan Dad Jesucrist, najcni Xi'npac Dios. Badeed Dios yäl'rnibee lojni, ni'cni gubansacni lo rebengut.

⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeñ ni rej guideb guedxliuj xtiidxni. ⁶ Luxh nadxaagtu loj rebeñ ni guleni te chalilajzreni xtiidxni.

⁷ Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beñdxan. Gacnäy Dios ni najc Xtdnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj ruju beñ diidx xcuent xcäl'rnilajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. ¹⁰ Sanuutis canabä lojni, top sajc jiädhuiä lojtu si'cni rlazä gunä agujc xchejli. ¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustioobnu lajz sa'nu xcäl'rnilajz xtidx Dios xten sa'nu.

¹³ Rebetzä rlazä gacheetu balti huält benä xhigab jiädhuiä lojtu, luxh gajd gacdi jiälä. Rlazä jiädhuiä lojtu te chalilajz xhidajlru beñ xtidx Dios sigajcni salilajzreni guiralajt cadro hua'a loj rebeñ ni di gac xpen Israel.

¹⁴ Nungäjl'pac gusule'ä xtidx Dios loj rebeñ nani rnii garen-garen didxsaj, sigajc loj rebeñ griegw, loj renani nayääl, sigajc loj rebeñ najn. ¹⁵ Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcäl'rnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yäl'rnibee xten Dios te guslaani lo dojl chutis beñ nani rlajz chalilajz xtiidxni, ganidtoo reni najc rexpeñ Israel, dxejcti näjza rebeñ ni di gac xpen Israel. ¹⁷ Sa'csi xtidx Dios rusule' xho nanab chalilajz te beñ te gacni te beñsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beñ xtidx Dios, najcni te beñnaya nez lo Dios, nabañnäjni Dios xcuent xcäl'rnilajzni."

Rextojl beñ

¹⁸ Xcäl'rdxe'ch Dios nani yu' xhaguibaa siajbni yejc rebeñ nani gun dojl, nani rlajz gun cosguijdx, nani di gusaan guisieed sabeñreni didxguli. ¹⁹ Sa'csi anancheereni nani saj gan beñ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fii beñ xcuent Dios, si'c xcäl'rnibeeni ni najc par tejpas, si'c xtujxh xtenni, huenliisi ruzeñreni sa'csi ruluilojreni recos ni ruzeñ nani benchee Dios. Guiraa reni'c ruluiloj najcni Gueb Dios ni

rajp yälrnibee par tejpas, ni'c di gacdi guiniireni loj Dios direni niembee xhini'c rlaiz Dios gunreni. ²¹ Ni'cni, mase biembeereni Dios, direni niliä'p xpala'nni te gañreni Gueb Dios, dizareni nudeed xquixtios lojni. Alga gualajz gujreni, bicäy xcäriejnreni, naareni hueen najc gunreni si'ctis ni jiajb yejreni, si'cni rsia' lajzreni nen lastooreni. ²² Caniireni nanduxhreni, per direni gan, nayäälreni. ²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

²⁴ Ni'cni gulälaz Diosreni, basaanni gunreni si'ctis ni rlaizreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzareni nez loj recos ni benchee Dios, lacuaa guzuxhijbreni loj Dios nani benchee guiraa rexicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäy niguii, lagajc sagunaareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlaizreni jiureni Dios, basaanti Dios suyu' cosguijdx tis xcäriejnreni, te chanuutisreni lo xcällatsiajreni, rujnreni recos ni xhet laadi. ²⁹ Guidxareni dojl, näjza cosguijdx, näy yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniüzareni didxxhii. ³⁰ Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacooob rbäxtiejreni, gualajzreni lo xcuzajnreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjl gacni, dizareni gulaslajz sa'reni. ³² Luxh mase agucbeereni gun Dios yälguxhtis lojreni, najnzareni nungäjl guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

2

Dios rujn yälguxhtis con didxguliipac

¹ Ni'cni, çcanejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälguxhtissa'c loj renani rujn sa' dojlga. ³ Benguedxliuj ni rgubee loj renani rujn dojl, luxh sigajcza rujnlu, çla rujnlu xhigab sidedcaj gun Dios yälguxhtis lojlu xcuent xtojllu, ä? ⁴ O çla rbälazlu ni rujn Dios, najcni huenduxh, lacti guroob najc xcälrlulaslajzni, rapduxhzani pasens? çLa dila gan dee najc ni gacnäjl gusiechlajzlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechlajzlu, cagutajllu yälguxhtis ni gaclu che guidzujn dxej ni gun Dios yälguxhtis loj reben guedxliuj, ⁶ siguijx Dios loj tejpgatu xcuent dzuun nani bejn tejpgatu. ⁷ Loj rebejn nani rlaiztisreni guibaŋsa'c, ni gusoob xtiidxni, sudeed Dios yäl nabajn par tejpas sa'csi gudiilreni xhaniduj näjza go'preni xpala'nreni loj Dios, rlaizreni guibajnreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini,

alga rusoobreni reyällatsiaj, redidxguijdx. ⁹ Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpén Israel, dxejcti näjza reben griegw. ¹⁰ Loj guiraa rebejn nani rujn cos-hueen, sudeed Dios xhaniduj, näjza bala'n, näjza yälrbecdx lastooreni, ganid rexpén Israel, dxejcti näjza reben griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinitlejreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcuént xtojlni. ¹³ Xhet ganaxdi renani rucua diajgtis xleii Moisés najc bejnaya nez loj Dios; rebejn ni rusoobpac rexleii to Moisés, reni'c najc bejnaya loj Dios. ¹⁴ Yu' xhidal bejn ni di gumbee xleii to Moisés, dizareni gac rexpén Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. ¹⁵ Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. ¹⁶ Guiraa recosre sajche guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpén Israel näj xleii to Moisés

¹⁷ Luj ni laalu xpen Israel, ni rniilu sanäpaclu xleii to Moisés, rniiduxhlu najclu xpen Dios, ¹⁸ rniilu nancheezalu xhini'c rlajz Dios gunlu, ana-jnzalu xhini'c najc hueenru sa'csi bisiedsa'cpaclu leii. ¹⁹ Rchalolu sajcguluiilu nezyusa'c lo rebejn nani najc si'c lotiä'p, sajcguzanijlu xcäriejnreni nacäjjy xcäriejnreni. ²⁰ Rchalolu najclu masr lo renani nayääl, najczalu masr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. ²¹ Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlu? ²² Luj nani rniilu na'c guesnäjni te ni di gac chääl'ni, ¿la resnäjlu nani di gac chäällu, ä? Rdx'e'chlu xcuént rebanäjb, ¿xhicuent rbääl'ni xhicos nen xquidoo rebanäjb, ä? ²³ Luj rlajzlu chä'p xpala'nlu sa'csi najnlu leii, ¿la rusanxtujylu Dios sa'csi dilu gusoob xtidx leiiga, ä? ²⁴ Bahuu xho rebejn nani di gac xpen Israel rniyajreni Dios sa'csi la'tu ditu gusoob xtiidxn, rujntu dojl, sigajc ni caj lo xtidx Dios.

²⁵ Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. ²⁶ Ni'cni palga te bejn ni di chu beega, luxh rusoobni guiraliipac xtidx leiiga, ¿la di gacdi guchaagni cuént najcni si'c te nani yu' beega, ä? ²⁷ Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸ Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. ²⁹ Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuént Sprit xtenni, dini gunni sa'csi najctisni costumbr. Dios ni siliä'p xpala'n'ni, xhet bejn'di.

3

¹ ¿Xhini'c sacnäj te bejn najcni te rexpén Israel, ä? O ¿xhi sajchuni beega? ² Empac sacduxhni! Ganidtoo, sa'csi loj rexpén Israel badeed Dios xtiidxn. ³ Mase yu' renani di nililajz diidxga, ¿la ni'cni xhet sajcdi diidx ni

bia'n Dios loj rexpejn̄ni, ä? ⁴ ǃxho gacni si'c! Diostis najc guliipac, guiralii bejn̄ rusguee. Scree caj lo xtidx Dios: Lagajc xtiidxlu suluii laaca rujnlu, te che gaclu yälguxhtis, nicla tej xtojll̄u di guidxäjl̄.

⁵ Palga xcällatsiajnu ruluiiru najc Dios huenduxh, ǃxhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ǃla rujnni latsiaj loonu, ä? (Caniä si'c te bejn̄ guedxliuj naj.) ⁶ ǃxho gacni si'c! Paru najcni si'c, ǃxho mood gun Dios yälguxhtis loj rebejn̄ guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, ǃxhicuent gunni yälguxhtis narä si'c te beñdojl̄? ⁸ Yu'za bejn̄ ni canii didx-xhii, najreni cayäjpnu lo rebejn̄: "Col̄yejn̄ cosguijdx te guiluilojni recoshuen." Per rebejn̄ ni canii si'c sidzuj̄n dxej gacreni yälguxhtis.

Guiraanu najcnu beñdojl̄

⁹ ǃDxejca'? ǃLa najcnu beñhuenduxhru lojreni, ä? Dini gac; tebloj abile'cnu yälquij xten rexpen̄ Israel con rebejn̄ ni di gac xpen̄ Israel, sa'csi guiraareni yu'reni lo dojl̄. ¹⁰ Si'cni caj lo guiitz:

Ruti te beñsa'c, nicla tejni.

¹¹ Ruti te bejn̄ ni racbee, ruti chu tej nani rguil̄ Dios.

¹² Guiragajczeni abirii lo xnejz Dios, teblojsi xhet sajcdireni.

Ruti chu tej ni rujn̄ cossa'c, nicla tejni.

¹³ Ro'reni rii ganax didxguijdx, najcni si'c te baa ni naxal, rusgueereni con lujdxreni, didxlatsiaj rii ro'reni najcni si'c benen̄ ni yu' ro' te bäl̄nialajz.

¹⁴ Ro'reni entis cague, entis canii didxrdxe'ch lo sa'reni.

¹⁵ Ni'reni ruxun̄li saxhe' xtiejn̄ sa'reni.

¹⁶ Cadrotis rijreni rujnreni latsiaj, ruteedreni sa'reni trabajw.

¹⁷ Direni gumbee nezyuj̄ ni ruscuecdxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn̄ ni rnibee leii lojreni, te jiäuu ro' guiralii rebejn̄, te guiraa reben̄ guedxliuj gacbeereni yu' xtoj̄lreni nez loj Dios. ²⁰ Sa'csi mase gusoob bejn̄ guira'ti diidx ni caj lo leii, di leiiga gudzucaj xtoj̄l bejn̄ga, sa'csi leiiga najc nani guluui dojl̄ ni yu' nen̄ lastooni.

Rusl̄aa Dios lo dojl̄ xcuent yäl̄rililajz xtiidxni

²¹ Naj̄ ruluii Dios stee mood guibicaj xtoj̄lnu, nani di gac mood ni caj lo xleii toMoisés. Luxh galooli gusloj canii Dios xcuent nezyuj̄re, cajni lo reguijtz xten leii näjza lo reguijtz ni bejn̄ rebejn̄ nani gunii xtidx Dios galoo. ²² Stee mood najc scree: Chutis ni chalilajz xtidx Jesucrist, saj̄c naya lastooni nez loj Dios; si'c saj̄c garaliiza nani salilajz, sa'csi tebloj najcnu nez lojni. ²³ Sa'csi guiralii rebejn̄ guedxliuj abanijt̄ lo Dios, direni guiga' guidzuj̄nreni lo xnezyuj̄ Dios. ²⁴ Niluxh balaslajz Dios nuunu, banidxxlia'ni loonu yäl̄nabañnaya nez loj Dios sa'csi Jesucristis gudijx yälguxhtis xten dojl̄ che baxhe'ni xtiejn̄ni lo cruzj te badzucajni

xtojlnu. ²⁵ Baxhal Dios xi'nni, Jesucrist, te cuajni lo cruz nez loj rebejn te si'c gudijxni guiraa rextojl chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yalguxhtis rextojlreni, ²⁶ sa'csi acanajn Dios guc gunni yalguxhtis redojlga, te si'c guiluiini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni ¿con yälñaro? ¿Con yälbindaan? ¡Xhet sajcdini! ¿Xhi leii rudzucaj xtojlnu? ¿La leii najc ni rnii jiennu dzunsa'c, ä? ¡Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. ²⁸ Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsa'c ni caj lo leii.

²⁹ ¿La najc Dios Xtiooztis rexpén Israel, ä? ¿La dini gac näjza Dios xten rebejn ni di gac xpen Israel? ¡Xho dini gac! Najcni Dios xten guiroc cuaa bejn. ³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzarení xtiidxni. ³¹ ¿La rudzucajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

4

Xcälirililajz toAbram

¹ ¿Xhini'c sajc guiniinu xcuent toxtadgoldoonu, Abram? ² Paru niajc toAbram beñnaya nez loj Dios por redzuun ni bejnñi, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre: Huililajz toAbram xtidx Dios, ni'c bachaag Dios cuent najcni te beñnaya nez lojni.

⁴ Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnğa najc te beñnaya nez loj Dios, sa'csi huililajzni xtiidxni. ⁶ Sigajcza naj toDavid, chichaa bejn nani ruchaag Dios cuent najcni te beñnaya luxh di niquiin niujnni redzuun ni caj lo leii. Räjpni:

⁷ Chichaa renani abaslaa Dios lo xtojlni, renani abiäuu loj xtojlni.

⁸ Chichaa bejn nani diru Dios gun cuent xtojlni.

⁹ ¿La sajc guiniini chichaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: "ToAbram gujc te beñnaya nez loj Dios sa'csi huililajzni xtidx Dios." ¹⁰ Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yälñaya sa'csi huililajzni xtidx Dios che gajdlini chu bee te gacni xtad guiraa renani rililajz lañ ni xhet beedi yu'reni, te näjza laareni guidxaag cuent najcni beñnaya nez loj Dios, ¹² te gaczani xtad guiraa renani yu' bee ni huililajza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälirililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. ¹⁴ Sa'csi

paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlneni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: "Abenä gaclu xtad xhidal renación." Si'c bia'n Dios diidx loj toAbram, Gueb Dios nani gudeed yäl'nabajn loj rebengut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtad xhidajl nación, te gusojb xtidx Dios ni guniini che räjpni: "Scree gac xhidajl rexagdoolu." ¹⁹ Di toAbram nunijt xcäl'rililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. ²¹ Anajnni rajp Dios yäl'nibee te gunni guiralii nani bia'n diidx gunni. ²² Ni'c bachaag Dios cuent najcni te beñnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: "Bidxaag cuent najcni te beñnaya nez loj Dios sa'csi huililajzni xtidx Dios", ²⁴ näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebengut, sidxaag cuent najcnu beñnaya nez loj Dios. ²⁵ Bacuaareni Jesucrist lo cruiz te gudijxni rextojlnu nez loj Dios, luxh gubañsacni lo rebengut, te gac gacnu beñnaya nez loj Dios.

5

Xhi rsiajc bejn che najcreni beñnaya nez loj Dios

¹ Ni'cni che rililajznu xtidx Dios rudzucaj Jesucrist xtojlnu rajcnu beñnaya nez loj Dios, ni'cni ruscuecdxini lajznu. ² Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl'nabajn, su'pacnu lo xcäl'rdimbicha' Dios. ³ Luxh xhet ni'ctis, sajcza guibalaaznu che tednu trabajw, sa'csi najnnu trabajwga sujn jia'pnu pasens. ⁴ Luxh che rajpnu pasens rajcnu te benguyajlr; che anajczanu benguyajl, rililazsa'crunu. ⁵ Luxh yäl'rililazsa'cnu dini gusanxtujy, sa'csi yäl'sanälajz ni rajp Dios ruchaj lastoonu sa'csi neñ lastoonu rbäjz Xsprit Dxaan xten Dios ni baniidxni loonu.

⁶ Lal ni xhetliidi sajcdi jiennu lagajc xcuentnu te guibicaj xtojlnu, che basa' dxej biääd Jesucrist te gujtni lo cruiz xcuent rebendojl. ⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxälj te bejn ni xcäjb guet lacuaa te beñsa'c. ⁸ Luxh Dios baluiloj xcäl'rinälajzni xcuent nuurnu sa'csi lal ni yugajcnu lo dojl, gujt Jesucrist lo cruiz xcuentnu. ⁹ Aticaxh naj ni najcnu beñnaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcälguxhtis Dios. ¹⁰ Palga lal ni rdxe'chnu lo Dios, basiäjlai lajzni xcuentnu sa'csi gujt Xi'nni lo cruiz, naj ni abiäjl lajzni, suslaani nuure lo dojl sa'csi gubañsac Xi'nni loj rebengut. ¹¹ Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yäl'rbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguui biu' dojl lo guedxliuj, luxh xcuent dojl biäädza yälgujt, gudejdti yälgujt lo guiraa rebejn, sa'csi guiraa rebejn bejnreni dojl. ¹³ Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. ¹⁴ Luxh empac gujt rebejn nen redxej ni gubajn toAdán hasta redxej ni gubajn toMoisés, mase direni niujn lagajc dojl nani bejn toAdán; luxh ruluiloj yu' chu stee bejn nungäjl jääd.

¹⁵ Luxh nani runidx-xlia' Dios dini gac si'c najc xtojł toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz naj sunidx-xlia' Dios yälnabajn par tejpas loonu por xcälrlulaslajz Dios, nägajc por xcälrlulaslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yälrnijt ni biääd loonu xcuent dojl ni bejn toAdán; sa'csi xcuent tejtis dojlga biääd yälguxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruiz, ni'c gujc sa'csi yuduxhtej dojl, te xcuent ni bejn Jesucrist sajc gac bejn bejnaya nez loj Dios. ¹⁷ Palga xcuent dojl ni bejn tejsi bejnga gunibee yälgujt lo guiraa bejn, cuantimaaz lo yälnabajn par tejpas sinibee guiraa reni rca' xcälrlulaslajz Jesucrist näjza renani rcaxlia' lojni yälracnaya nez loj Dios.

¹⁸ Ni'cni sigajc ni biääd yälguxhtis lo guiraa rebejn guedxliuj xcuent dojl ni bejn tejsi niguui, sigajcza sa'csi basoob stee niguui xtidx Dios, xhidaj bejn gujc bejnaya nez loj Dios, cua'reni yälnabajn par tejpas. ¹⁹ Nalajznu sigajc ni banijt xhidalduxh bejn nez loj Dios xcuent tej niguui ni di nusoob xtidx Dios, sigajcza xhidalduxh bejn sajc bejnaya nez loj Dios xcuent tej niguui ni basoob xtiidx Dios. ²⁰ Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcälrlulaslajz Dios, ²¹ te sigajc ni gunibee dojl guyu' yälgujt, sigajcza guinibeeru xcälrlulaslajz Dios te jia'cnu bejnaya nez loj Dios, te xca'nu yälnabajn par tejpas xcuent Xi'nni, Dad Jesucrist.

6

Agujtnu lo dojl per nabaññajnu Jesucrist

¹ ¿Xhini'c guiniinu, naj? ² ¿La sajc guidxunrunu lo dojl te tioobru xcälrlulaslajz Dios, ä? ³ ¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajnrnu lo dojl? ⁴ ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? ⁵ Sa'csi che gurobnisnu bigatznäjñuni si'c lo yälgujt, te sigajcni huäjs Jesucrist lo yälgujt xcuent xcälrnibee Dios, sigajcza näj nuurnu sajc guidxunnu lo te yälnabañcoob.

⁶ Sa'csi palga gujcnu tejsi con laani lo xcälgujtni che birobisnu, sigajcza sajcnu tejsi con laani lo yälnabañsac lo rebengut. ⁷ Ni'cni xcärienbiejwnu cuaj lo cruiz con laani, te badzucajni rextojłnu, te di gacdiru guinibee dojl loonu. ⁸ Sa'csi nani agujt, di gacdiru guinibee dojl lojni. ⁹ Palga nuurnu agujtnu con Jesucrist, rililaañnu sibañsacñanu con laani. ¹⁰ Sa'csi nadonpacnu gubañsac Jesucrist loj rebengut, ni'c diruni guet, diru yälgujt ga'p yälrnibee lojni. ¹¹ Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubañsacni, nabajñni nez loj Dios. ¹² Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabaññajtu Jesucrist.

¹² Ni'cni na'c gusaantu guinibee dojl tiejxhtu te guntu si'ctis ni rlaiz tiejxhtu. ¹³ Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, nájza colgudeed guideb lagaa tiejxhtu te guntu recoshueen si'c ni rlaiz Dios guntu. ¹⁴ Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl_rulaslajz Dios.

La'tu najc si'c remos

¹⁵ ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl_rulaslajz Dios, ä? ¡Xho gacni si'c! ¹⁶ La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu beñnaya nez loj Dios. ¹⁷ Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸ Luxh agulaatu lo dojl, biädjajctu xmos Dios lo dzunsa'c. ¹⁹ Narä cagusule'ä diidx con sa' didx guyasire sa'csi gajdtu gachesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beñnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Naja', ¿xhini'c bejntu gaan che gujctu xmos dojl, bejntu recos ni rtuinäjtü naj? Ni xnezyuj recosga rdzujn loj yälgujttis. ²² Per naj, sa'csi agulaatu lo dojl, abiu'tu najctu xmos Dios, sujntu sajctu beñnaya nez loj Dios, luxh xnezyuj recoscoobre rdzujn lo yäl_nabannäj Dios par tejpas. ²³ Xcäl_rajx xten dojl najc yälgujt, per nani runidx-xlia' Dios najc xcäl_nabannäj Dios par tejpas xcuent ni bejn Jesucrist xtadnu.

7

Yäl_ruluii ni rudeed yälguchnaa

¹ Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? ² Najcni si'c te gunaa nani bachnaa te niguii. Nanabpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. ³ Ni'cni, la_l ni nabajn chääl gunaaga, palga cuäznäj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajc guchnaani stee niguii, xhet dojl di cayujnni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo crujz, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jiennu redzunsa'c ni rlaiz Dios jiennu. ⁵ Sa'csi la_l ni gubajnnu lo yäl_nabanbiejwga, lagajc rediidx nani rnii leiiga di gacdi gun bejn, lagajc recosga rlaiz gun tiejxhnu, luxh si'c sozaatisnu lo xnezyuj yälgujt. ⁶ Naj abiriinu lo leiiga, sa'csi agujtnu lo leiiga nani guinibee loonu galoo. Naj con xpritcoob ni yu' nen lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ĴXhixhni'c guiniinu naj? ĴLa dojl najc leii, ä? ĴXho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguuj lajzlu rehxixten bejn." ⁸ Ni'cni lagajc diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. ¹⁰ Luxh baxhał Dios leiiga loonu te jiuäni, te xca'a yälñabajn, luxh alga bazeñni benä dojl, banitä nez loj Dios, gutäti dxejc. ¹¹ Con leiiga, basguee dojl narä, bejnni narä si'c te beñgut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. ¹³ ĴDxejca'? ĴLa nani najc te coshueen huinä narä lo yälgujt, ä? ĴXho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojl pac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. ¹⁵ Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c ruluii hueenca najc leii. ¹⁷ Naj, diruni gac narä ni cayujn latsiaj, sa'csi yu' dojl neñ lastoä, ni'c ni cayujn runä latsiaj. ¹⁸ Sa'csi narä nanä neñ lastoä, nalajznu lo tiexhä, xhetliidi cossa'cdi yu'; sa'csi rlazä gunä cossa'c, per dina gacdipä te gunäpac recossa'cga. ¹⁹ Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä. ²⁰ Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹ Ni'cni narä, nani rlazä gunä redzunsac, rdxälä leiire: yu'pa dojl tiexhä. ²² Sa'csi neñ lastoä, rlazäpac gusobä diidx xten xleii Dios. ²³ Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladzñaa xleii dojl nani yu' guideb lagaa tiexhä.

²⁴ ĴProobza narä! ĴChuni'c guslaa tiexhä ni nungäjł guet xcuent dojl? ²⁵ ĴXquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlaiz gusoob xtiidx dojl, chuni lo xleii dojl.

8

Yälñabajn ni najc xcuent Sprit Dxan xten Dios

¹ Ni'cni naj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlaiz gun tiejxhreni, alga riuuruni rujnreni ni rnibee Sprit Dxan xten Dios ni rbäjz neñ lastooreni. ² Sa'csi leii xten Sprit Dxan xten Dios ni rudeed yälñabajn xcuent Jesucrist, abaslaani narä lo yälrnibee xten xleii dojl näjza yälgujt. ³ Sa'csi nani di niajcdi niujn leibiejw, sa'csi dini niaj nadip lo rebenguedxliuj te gacreni benñaya nez loj Dios, ni'c bejn Dios che baxhałni Xi'nni Jesucrist, si'c te beñ guedxliujre xcuent dojl, te bejnni yälguxhtis lo dojl ni rnibee tiejxh bejn. ⁴ Te si'c gac xcälguxhtis xten leibiejw lo tiejxh nuurnu, renani dirunu gusoob nani rlaiz gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

⁵ Sa'csi renani rusoobtis nani rlajz gun tiejxhrenei, rujntisreni xhigab xcuent redojlga, luxh renani rusoob xtidx Sprit Dhan xten Dios rujntisreni xhigab xcuent nani rlajz Dios gunreni. ⁶ Sa'csi renani yu'tis yejcreni nani rlajz gun tiejxhrenei, sejtrene, sinijtrene; luxh renani yu'tis yejcreni nani rnii Sprit Dhan Dios, reni'c sibece dxi lajzreni, sica'reni yäl'nabajn lo Dios par tejpas. ⁷ Te xcäriejn nani riutis ni rlajz gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. ⁸ Renani nabajntis te gunreni latsiaj ni rlajz gun tiejxhrenei di Dios guibalaznäjreni.

⁹ Luxh la'tu dirutu gun si'ctis ni rlajz gun tiejxhtu, ni'cni rujntu si'c ni rlajz Sprit Dhan xten Dios guntu, palga rbäjzni neñ lastootu. Palga yu' chu tejtü ni di Sprit Dhan cuääz neñ lastooni, di ni'c gac xpejñni. ¹⁰ Palga rbäjz Jesucrist neñ lastootu, agujt tiejxhtu xcuent dojl, xprittu nabajn sa'csi anajctu beñnaya nez loj Dios. ¹¹ Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajn lo guedxliujre xcuent Xpriti nani yu' neñ lastoonu.

¹² Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlajz gun tiexhnu. ¹³ Sa'csi palga cayujntu si'c ni rlajztis gun tiejxhtu, sejtpactu. Palga nabajntu xcuent Sprit Dhan xten Dios ni rbäjz neñ lastootu, sibälaztu latsiaj ni rlajz gun tiejxhtu, sibannäjtu Dios par tejpas.

¹⁴ Sa'csi guiraa renani rului Sprit Dhan xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä." ¹⁶ Sa'csi lagajc Sprit Dhan xten Dios rului loj xpritu, najcpacnu xi'n Dios. ¹⁷ Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu neñ redxejre, digacdi gun tebloonureni con yälrdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäjzreni, yuduxhrenei gaan fiireni dxej che guluiloj Dios chuni'c najc rexi'nni. ²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlajzdi recosga, per sa'csi si'c bejn Dios, ni cabäjztis ²¹ guslaapacni guiraa recos ni bencheeni lo guedxliujre lo xcäl'rnibee yälgujt, yäl'rnitloj, te dxej sajc jiu'ni lo yäl'rbedxi xten xcäl'rdimbicha' xten rexi'n Dios. ²² Guiraa recos ni gulecxtiej Dios lo guedxliujre entis roonreni, guira dxej rdejdreri trabajw, si'c rdej te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dhan xten Dios neñ lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcäl'rililaaaznu ni rbääznu, ni'c bejn gulaanu luxh yäl'rbäjz ni guyasi rien, di ni'c gac yäl'rbäjz, sa'csi çchu laa ni cuääz xcuent te cos ni ala bahuiini? ²⁵ Palga cabääznu xcuent te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

²⁶ Sigajcza racnäj Sprit Dhan xten Dios nuure cadro xheti yälrutijp laaznu sa'csi nicla guidonnu xho mood riäjł guiniab bejn lo Dios. Luxh lagajc Sprit Dhan ni yu' lastoonu rniabni lo Dios xcuent nuure con yäl'rbedxneñ nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dhan xtenni xcuent

nuurnu, sa'csi rniabni si'cpac ni rlanj Dios guiniabnu xcuent rexpejn pac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuunni rsiajcrenini te gun Dios gac recosga par xcäl'nasa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni beñnaya nez loj Dios; renani bejnini najcreni beñnaya nez loj Dios, gulä'pzani xpala'nreni.

³¹ ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo crujz te gujtni, te gudijxni xcuent xtojlnu, ¿xho dini guniidx loonu xcuent Xi'nni guira'ti nani rquiinnu, ä? ³³ ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rñii najcnu beñnaya nez lojni. ³⁴ ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu. ³⁵ ¿Chuni'c sajc gudzucaj nuurnu lo yäl'sanälajz xten Jesucrist: trabajw, o yäl'xliajs, o yäl'rusacsí, o yäl'rliaan, o yäl'xhabääl, o yäl'rdxejb, o te spaad, ä? Nicla tejni. ³⁶ Si'c ni caj lo guijtz ni caj xtidx Dios: Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnini.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, niclza yäl'nabajn, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl'milaagwr, ³⁹ nicla jiaroduxh, niclaza jiajtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl'sanälajz Dios, yäl'sanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dzan xten Dios caguluii xcärienä laaca rniä; ² cayac-huinduxh lastoä, sanuutis yäl'xliajsga. ³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäjł gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios neñ guidoo. Sica'reni reyäl'nasa'c xten Dios palga jiureni xtiidxni. ⁵ Laareni najc rexagdoo xten toxtadgoldoonu ni gubajn agujc xhero. Jesucrist gujcza xagdoo xten toIsrael che gojłni si'c te beñ guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn pac Israel. ⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: "Rexagdodoolu nani guigab najc reni gac xagdoo Isaac." ⁸ Ni'cni xhet guiraadi rexagdoo toAbram najc rexi'n Dios, xtebtis renani

chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: “Xingangaloolu gac xmos xinhuinlu.” ¹³ Si'cza caj lo guijtз rediidxre: “Sanälazä Jacoob, niluxh bidxehnää Esaú.”

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnää chutis bejn nani rlazä gacnää.” ¹⁶ Ni'cni dini gac xcuent ni rlaiz rebejn gac, dizani gac xcuent nani rujn rebejn. Rajctisni si'c rlaiz Dios nani rulaslajz bejn. ¹⁷ Ni'cni caj lo guijtз xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.” ¹⁸ Rulaslajzni rebejn nani rlaiztisni, runnadipzani lastoo bejn nani rlaiztisni.

¹⁹ Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlaizni gac, ä?” ²⁰ ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” ²¹ Gurniälojlu. Bejn nani runchee guejs, ¿la di gacdi gunni si'ctisni rlaizni con bajnga, ä? ¿La di gacdi guncheeni te guessa'c nägajcza te guesyuj ni xhet sirbdi con lagajc bajnga?

²² ¿Xhiru najc, palga Dios rlaizni guluilojni xho rujnни yälguxhtis, näjza rlaizni guluilojni xcälrnibeeni, gopnäjni pasens renani nungäjl gac yälguxhtis, te nitlojzareni, ä? ²³ Bejnни si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni. ²⁴ Lagajc nuurnu najcnu reni aguleni; xhet xtebtis loj rexpен Israel guleni nuurnu, näjza loj rebejn ni di gac rexpен Israel guleni nuurnu. ²⁵ Cajza lo guijtз ni bacuaa Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

²⁶ Dxejcti lagajc cadro räjpreni lojreni:

“Ditu gac rexpенä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

²⁷ Cajza lo guijtз ni bacuaa Isaías: “Mase najc xhidajl rexpен Israel si'c najc yujxh ni tre' ro' nisdoo, guxi gac reni laa lo dojl. ²⁸ Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.” ²⁹ Guniiza Isaías, xcuent nani churu gac, bacuaani: Palga di Dios ni yu' xhaguibaa nusa'n gaii xagdoo reben tiemp, niajcnu si'c gujc Sodoma näjza Gomorra, reguejdx ni gunitloj.

Xtidx Dios näj rexpен Israel

³⁰ ¿Xhini'c sajc guiniinu naj? Rebejn nani di gac xpen Israel, direni niguiil xho gacreni benmaya nez loj Dios, niluxh agujcreni benmaya nez loj Dios sa'csi huililajzreni xtidx Jesucrist. ³¹ Luxh rexpен Israel, mase sanuutisreni lo xleii Moisés ni ruluii xho gac bejn benmaya nez loj Dios, banijtreni, direni niujn gaan nusoobreni guideb leiiga. ³² ¿Xhicuent gujcn si'c? Sa'csi direni nililajz xtidx Dios, alga rlaizreni guntisreni dzuun xten lei, naareni si'c gacreni benmaya nez lo Dios. Ni'cni gulaj

ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³ Si'cza bacuaa Isaías, rājpni:
 Aguleā te bejn lo guedx Sión ni gac si'c te guij cadre rtiājl ni' bejn,
 te guij ni rusālta' bejn.
 Chutis tej nani chalilajz xtiidxni, dini jianxtujy.

10

¹ Rebetzā, rlazduxhā chalilajz rexpēnā xtidx Dios. Rniabduxhā lo Dios te guslaanireni lo xtojłreni. ² Narā rniāpac nancheā ruzuxhijb rexpēn Israel lo Dios, niluxh direni gumbesa'c xhini'c rļajz Dios gunreni. ³ Sa'csi direni niacbee xcuent xho rajc te bejn te beņnaya nez loj Dios, ni'c rļajzreni gunreni dzuun si'c ni caj lo leiī te gacreni beņnaya nez loj Dios, ni'cza direni nusoob xtidx Dios te gacreni beņnaya nez lojni. ⁴ Abasoob Jesucrist xtidx Leiī, ni'cni che chalilajz bejn xtidx Jesucrist, anajczeni beņnaya nez loj Dios.

⁵ ToMoisés bacuaa rediidxre: “Chutis ni rļajz gac beņnaya nez loj Dios sa'csi rusoobni xtidx leiī, nanab gusobsa'cpacni diidxga guideb nabajņni lo guedxliujre.” ⁶ Xcālñayareni nez loj Dios sa'csi rililajzreni xtidx Jesucrist, rnii scree: “Na'c guiniitu neņ lastootu, ħchuni'c chā'p xhaguibaa?” nalajznu, te jiādnāsacni Jesucrist loj guedxliuj. ⁷ Na'cza gābni: “ħChuni'c jiājt gabijł?” (nalajznu te chaxiini Jesucrist loj rebengut). ⁸ ħXhini'c rniini nāj? Rniini: “Diidxga suga' gajxh ro'tu, neņ lastootu.” Nalajznu, diidx xcuent yālrililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspaņsac Dios Jesucrist loj rebengut, suslaani la'tu lo dojl. ¹⁰ Sa'csi con lastooni rililajz biniet xtiidxni, ni'c rajcni beņnaya nez loj Dios; luxh che rcājpza biniet con ro'ni, Jesucrist rnibee loonu, ruslaa Diosni lo dojl.

¹¹ Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” ¹² Sa'csi guiraa rebejn najc tebloj nez lojni, rexpējn Israel sigajc rebenzijt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: “Chutis ni rbedx-rniab lo Dad, siļiaani lo xtojłni palga rililajzni xtidx Dios.” ¹⁴ ħXho gac guiniabreni lo Dad, palga direni chalilajz xtiidxni? ħXho gacza chalilajzreni xtiidxni, palga gajd diajgreni jiejn xtiidxni? ħLuxh xho jiejn diajgreni xtiidxni palga rut rusule'di diidxga lojreni, ā? ¹⁵ Luxh ħxhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riādnā diidx xcuent cossa'c, yālrbecdxi lajz rebejn.”

¹⁶ Xhet guiraadireni rusoob xtiidxni, sa'csi guniiza toIsaías: “Dad, ħchuni'c chalilajz xtiidxnu?” ¹⁷ Rililajz bejn xtidx Dios che rucuadiajgreni diidxga; rucuadiajgzareni che yu' chu rusule' xtidx Jesucrist.

¹⁸ Nāj arniā: Gajdpac diajgreni jiejn xtiidxni, o ħla babiejn diajgreni, ā? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,
 abidzujņza rextiidxreni lo guiraa reguejdx ni tre' lo guedxliujre.

¹⁹ Rniāza: Dipac rexpēn Israel niacbee, o ħla gucbeerēni, ā? Galooli gunii toMoisés rediidxre:

Sunā gudxoįntu xcuent rebejn ni di gac te guejdx,
 con te guejdx nani di gacbee suche'chā la'tu.

²⁰ Diza toIsaías nidxejb guniini rediidxre:

Renani di niguil narä, bidxäjl narä,
baluiloäza loj renani di niniabdiidx narä.

²¹ Guniiza toIsaias xcuent rexpen Israel:

Desde galooli, dxej-yääl basgaä naä lo rebejnğa te niureni xtidxä,
luxh najcreni bejn ni di gusoob diidx, rutzu'reni didxnaj.

11

Rexpen Israel nani gulaa lo dojl

¹ Arniä: ŁLa agulälaz Dios rexpen Israel, ä? ıXho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín.

² Di Dios nibälaz rexpejni, xpen Israel nani guleni galooli che gajdli guirixtiej guedxliuj. O Łla dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpmi scree: ³ “Dad, abagu'treni guiraa reniguii nani gunii xtiidxlu, abatzujreni rexquidoolu, xtebtis narä bia'nä, luxh naj rlajzreni ju'treni narä.” ⁴ Luxh, Łxhini'c räjpmi Dios lojni? Räjpmi: “Abalucheä gajdz mil bejn nani gajd guzuxhijb nez loj Baal.” ⁵ Si'cza naj, abia'n te chinae' rexpen Israel nani agule Dios xcuent xcälřulaslajzni. ⁶ Dxejc palga ruslaani nuure lo dojl xcuent xcälřulaslajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcälřulaslajz Dios gac yälřulaslajz.

⁷ ŁDxejca'? Di rexpen Israel nidxäl nani caguilreni, luxh rebejn nani agule Dios, ni'c bidxälmi, luxh ste cuaareni, aguyalajzreni. ⁸ Gujcmi si'c caj lo xtidx Dios:

Bascäy Dios xcäriejnreni, näjza balojni di jien,
lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,
te gac guiga'reni,
sugacni si'c guij ni rulani' bejn, te gacreni yälguxhtis.

¹⁰ Suguscäy Dios balojreni te na'c fisa'creni,
sujie't dejtzeni, sutedreni trabajwduxh par tejpas.

Yälřuslaa lo dojl xten bejn ni di gac xpen Israel

¹¹ Naj rniabdidxä: ŁLa biajb rexpen Israel te gunijtreni par tejpas, ä? ıXho gacni si'c! Sa'csi biajb rexpejn Israel, ni'cni gojl biääd yälřuslaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl. ¹² Palga xcuent dojl ni bejn xpen Israel gojp reben guedxliuj xcälřasa'c Dios, palga xcuent yälřunijt xten rexpen Israel guyu' xcälřasa'c Dios par rebejn ni di gac xpen Israel, aticaxh chu xcälřasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'a xtiidxni lojtu, ni'cni caläpä xpala'n xtzunä, ¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵ Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibanřac renani najc si'c beņgut. ¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajnni con xtiejn yajg oliibga. ¹⁸ Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yalnabajn lo xlobaa yajgga, lobaaga ni runiidx yalnabajn lojtu.

¹⁹ Dxejc colguinii: "Batiuugreni naapac yajgre, te gujc biguidä cuä' yajgga." ²⁰ Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu gualajz, colguidxejb, ²¹ sa'csi palga di Dios nutedbia renaa yajgga, diza Dios gutedbia la'tu. ²² Bahuii jlacti hueen najc Dios! Luxh lacti niälajzzani; con renani banijt najcni niälajz, luxh lacti rulaslajz Dios la'tu palga chanuu jiu xtiidxni. Palga ditu jiu xtiidxni, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga. ²⁴ Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguixhga, jaticaxh rexpén Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpén Israel lo dojl

²⁵ Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. ²⁶ Dxejcti siliaapac guiraa rexpén Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajz ben guedx Siön,
luxh sudzucajni xtojł renani najc xagdoo toJacoob.

²⁷ Dee najc diidx ni bia'nä con laareni,
che gudzucaä xtojłreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldoreni. ²⁹ Sa'csi rut rajcdi rudzucaj nicla yalnasa'c ni rudeed Dios, niclaza yälrbajdx xten Dios. ³⁰ La'tu galoo ditu nusoob xtidx Dios. Naj rulaslajz Dios la'tu sa'csi gulälaz rexpén Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balasajzzani la'tu. ³² Dios basaan bialb guiraanu lo dojl, te si'c sajz gulaslajz Dios guiraanu.

³³ jlacti guroob najc yalnasa'c xten xcäl'najn, xcälracbee xten Dios! Nicla tej bejn guedxliuj di gachee guiraa rexcäl'guxhtisni, rudliidiza najn rexnezyujni. ³⁴ Si'c caj lo guitz: "¿Chuni'c gucbee xcäriejn Dios? ¿Chuni'cza abaluini? Rutliidi. ³⁵ O ¿chuni'c badedxgaa te xhi cos lojni, te quixsacnini lojni, ä? Rutliidi." ³⁶ Sa'csi loj Dios siääd guira'ti, luxh laani bencheeni guira'ti par lagajcza laani. Suguiiä'pnu xpala'nni par tejpas. Sugacni si'c.

12

Yalnabajn rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajnntu lo Dios te gac guiba'nsa'ctu si'cni rlazj Dios. Dee najc yälrajnpac Dios si'c ni nungäjl ganntu Dios. ² Na'c rujntu lagajc xhigab ni

rujn reben guedxliuj, colguscoob rehxigabtu te guidxaapac xmoodtu te si'c guluui Dios xhini'c rlanjni guntu, nalajznu xhini'c najc hueen, xhini'c rdxagljajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴ Sa'csi sigajc najc tiejxhnu, yu' xhidäl la'ni, luxh tejgareni rujn xtzuum-xtzuumreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuumnu, tejsi najcnu.

⁶ Luxh sa'csi tejganu rajpnu garen-garen dzuun xcuent yälrlaslaajz ni baniidx Dios loonu, sujiennu rextzuunnu screeza: nani rajc rniä xtidx Jesucrist, suguniinini, si'c ni najc xcälrlilajzni; ⁷ nani rajc racnäjä sa'ni, sugacnäjäni; nani rajc rului xtidx Dios, suguluini; ⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yälradolajz; nani rajc rulaslaajz resa'ni, sugulaslaajzni con yälrbalajz.

Xho nanab guibañnu lo xnezyuj Dios

⁹ Colchanälajzpac resa'tu, na'c gunsitu si'cni rinälajztu. Colcuälaz redzunguijdx, colyejntis redzunsac. ¹⁰ Colchanälajz resa'tu si'c rinälajz bejn rebejtni. Colguiliä'p xpala'nreni.

¹¹ Colyejn dzunsac, na'c cuedxitu. Colyejn xtzuum Jesucrist con guideb xtiijtu, guideb xcäriejntu.

¹² Colguibalajz sa'csi ahuililajztu xtiidxni. Colcuedx lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäjä rebejn nani rililajz xtidx Dios; sacru colnii loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäjä renani rbalajz, colyonnäjä renani roon.

¹⁶ Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu benanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. ¹⁸ Cadrotis sajci, dxitis colguibañnäjä guiraa rebejn. ¹⁹ Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtni scree: "Narä gunä yälguxhtis, narä quixä lojreni si'c naj Dad, Dios." ²⁰ Näjza: "Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtuijnu." ²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. ³ Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rlanjtu guidxajt reguxhtis, bejntis dzunsac, dxejcti guiliä'preni xpala'ntu sa'csi rujntu dzunsac. ⁴ Reguxhtis rujnreni lojtu xtzuum Dios te guibañsa'ctu. Palga guntu dzunguijdx, colguidxheb, xhet xlia'di

ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl. ⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnasa'c, te xcärienaya. ⁶ Ni'cni colquijx lojreni nani riäjl xca'reni sa'csi renani rnibee najc xmos Dios, luxh ni'cpac najc xtzuunreni.

⁷ Colgudeed lo guiraa bejn nani riäjl xca'reni. Colquix loj renani nazääbtu; colquijx impuest loj ni riäjl xca'ni; colchanälajz renani riäjl chanälajztu; colguiliä'p xpala'n renani riäjl chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisiñni, bejnga abasoob xleii Dios. ⁹ Sa'csi lo xleii Dios caj scree: “Na'c guesnäjl bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.” ¹⁰ Nani rajp yäl'sanälajz, dini gun latsiaj lo resa'ni. Ni'cni yäl'sanälajz rusoob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajñnu naj, anajntu alagojl or guibajñnu lo bacal sa'csi abidzungajxhru dxej che laanu nen dojl lo dxej che huililajznu. ¹² Aguxhindhuxh, asiädgajxh bianij. Ni'cni cuääz jiennu redzuun guiidx ni rajc lo xcäy, te jientisnu redzunsac ni rajc rdxee, lo bianij. ¹³ Guibansa'cnu si'c riäjl guibajn rebejn rdxee, na'c guibañnu lo yäl'rä', niclaza lo yäl'biejy, na'c guidiesnäjnu bejn ni di gac chäällu, na'c ga'pnu rebis, na'c guidxagdilñnu resa'nu, na'c chuguij lajznu xhixten resa'nu. ¹⁴ Ni'cni colca' xcälrnibee Jesucrist te na'c guntu redojl ni rlajz gun tiejxhtu.

14

Na'c guiniyajtu rebejztu

¹ Colñii didxdoo lo rebejn nani di gumbesa'c xtidx Dios, na'c tiñnäjturen. ² Sa'csi yu' reni rililajz nani sajz gauren guira'ti xhi cos, niluxh nani gajd sutijp lo yäl'rililajz, ganaxtis berduur rajwni. ³ Nani rajw guira'ti, na'c guidxechñajni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga. ⁴ ÇChuxh luj te guiniyajlu lo xmos te bejn, ä? Sugäb lagajc xlamñi lojni la laaca rujñni o la xhet laadi rujñni. Luxh sujñni laaca sa'csi Dad Jesucrist sujñ sutijp lastooni.

⁵ Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, tejga bejn sugunpac lagajc xhigabni. ⁶ Nani rapda te dxej, rujñnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajn xcuentcanu, nicla tejzanu dinu guet xcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lahtis najcnu rexpen Dad, Jesucrist. ⁹ Ni'cni gujt Jesucrist, ni'cni gubansaczani, te sajz gacni Dad xten rebengut, näjza Dad xten rebejn nani nabajn.

¹⁰ Dxejc luj, çxhicuent cubeelu bejtzlu, ä? O çxhicuent rdxe'chlu rhuilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. ¹¹ Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,
guiraa reben guedxliuj suzuxhijbreni loä,
luxh guiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälänälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcäl'rnibee Dios dini gac xcuent yäl'rajw, niclaza xcuent yäl'rä'; xcäl'rnibee Dios najc xcuent te yäl'nabañnya nez loj Dios, näjza yäl'rbedxilajz con yäl'rbalajz xcuent Sprit Dxan xten Dios. ¹⁸ Sa'csi nani rujn si'c lo xtzuun Jesucrist, bejnga rchaglajz Dios, luxh reben guedxliuj rniiza didxsa'c xcuent sa' bejnga.

¹⁹ Ni'cni chanuutis guidiilnu recos nani rujn chu yäl'rbedxilajz, näjza nani rujn racnäjnu resa'nu te tioobruren loj xnezyuj Dios. ²⁰ Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu nen dojl. ²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rililajz, sa'csi xhitis ni di gac xcuent yäl'rililajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yäl'rililajz nanab gacnäjnu resa'nu nani gajd chalilazsa'c. Di gacdi guibañtisnu xcuentcanu. ² Tejganu nanab chonälaznu resa'nu lo xcäl'nabañsa'cni te gacnäjnu chalilajzruren. ³ Sa'csi nicla Jesucrist dini nibajn xcuentcani, luxh si'cni caj loj xtidx Dios: "Redidxyaj ni guniyajreni lojlu biajbreni yecä." ⁴ Guiraa rediidx ni cuaj lo guijt galooli, cuajreni te guluiireni nuurnu te ga'pnu yälsutijp näjza yäl'rustioblajz te gacza guibääznu lo xtidx Dios. ⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtdad Jesucrist.

Gusule' xtidx Dios loj rebenzajt

⁷ Ni'cni col'ca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸ Sa'csi narä rniä lojtu, biääd Jesucrist te gujcn si'c te mos loj rexpen Israel te baluiini xcuent didxguli xten Dios te gusojb rediidx nani bia'n Dios loj retoxtadgoldoonu, ⁹ näjza par rebenzajt, te guiliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzajt,
soläza dij lojlu.

¹⁰ Dxejcti stee lajt rniini:

La'tu benzajt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzajt, colguiliä'p xpala'n Dad,

suguliä'pza guiralii rebejn xpala'nni.

¹² Stee huält guniiza Isaiäs scree:

Siricaj te xagdoo toIsai,

näjza te ni chäs te guinibeeni loj rebenzajt,

laani cabäjz rebenzajt.

¹³ Naj rniabä lo Dios ni rudeed yälrbäzlajz, te laani gacnäj guibalajztu, cuedxilajztu, sa'csi salilajztu, te tioobru yälrbäzlajz ni rajptu sa'csi Sprit Dxiän xten Dios yu' nen lastootu, luxh laani rajpni yälrnibee.

¹⁴ Luxh xcuent la'tu rebetzä, anancheä naba~~nsa~~'ctu nasinduxhtu, arajczä rulijdxtu sa'tu, ¹⁵ luxh loj guiitzre bacuaä gaii didxnaj xcuent tiopchon cos, te gusnaä lajztu. Runä si'c xcuent yälrulaslajz ni baniidx Dios loä

¹⁶ te gacä xpen Jesucrist ni rusule' diidx loj rebenzajt. Ni'cni cagusulesa'cä xtidx Dios lojreni, te xca' Dios rebenzajt si'c te gojn ni rudedä, sa'csi agujcreni bennaya sa'csi rbäjz Sprit Dxiän nen lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸ Sa'csi dina guiniä diidx xcuent xhi stee cos, ganaxis xcuent xho gucnäj Jesucrist narä, luxh xcuent ni'c basoob rebenzajt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, ¹⁹ con yälmilaagwr xten redzunro, resenro, ni gujc con xcälrnibee Sprit Dxiän xten Dios. Ni'cni lo guedx Jerusalénli, näjza guideb gabi ro'c, lo guedx Ilirico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. ²¹ Te gacni si'cni caj lo guiitz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

²² Ni'cni balti huält badxojn Dios narä jiädhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti iiz rladuxhä jiädhuiä lojtu, ²⁴ naj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtü narä te cha'a España. ²⁵ Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. ²⁶ Sa'csi rebejn Macedonia näjza reben Acaya rlaizpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. ²⁸ Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España. ²⁹ Luxh ananä che jiälä lojtu, li guidxa lastoä xcälnasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcälrinälajz Sprit Dxiän xten Dios, colguidxagsa'tu, te colgacnäj colcuedx-guiniabtu lo Dios xcentä. ³¹ Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te

xca'reni ni chanää lojreni. ³² Te cabaa lazä guidzunä lojtu, sa'csi rlaizpac Dios jäälä lojtu, te la_{ni} yu'ä lojtu siäl_{yuä}, susilazäza con la'tu. ³³ Dios ni rbecdxilajz bejn gacnä j guiraatu. Sugacni si'c.

16

Ruxhal_{ni} xtixtios lojreni

¹ Colgacnä j bisiajn_{nu} Febe. Nane're bejn dzunduxh ne_n guidoo ni tre' Cencrea. ² Colca'ni xcuent Dad, Jesucrist, si'cni riäjl gun bejn gacnä j renani rililajzpac xtidx Dios. Colyacnä jni lo xhitis nani guiquiinni, sa'csi laani gucnädu_{xhni} xhidal rebejn, nägajcza narä gucnä jni.

³ Ruxhalä xtixtios lo Priscila näjza lo Aquila, ni racnä j narä lo xtzuun Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo reben_{zijt}. ⁵ Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazdu_{xh}ä, ni gujc ben_{ganid} ni huililajz xtidx Jesucrist ne_n guedx Acaya. ⁶ Ruxhalä xtixtios lo Marii nani benduxh dzuun lojtu. ⁷ Ruxhalä xtixtios loj reben ladxä ni laa Andrónico näjza Junias; laareni gyunä j narä ne_n latzguiib, najcreni ben_{ro} loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcuent Jesucrist. ⁹ Ruxhalä xtixtios loj Urbano, ni runnä j nuurnu xtzuun Jesucrist. Ruxhaläza xtixtios loj Estaquis, ni sanälazä. ¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. ¹¹ Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist. ¹² Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. ¹³ Ruxhaläza xtixtios lo Rufo nani agule Dios, näjza lo xnanni, sa'csi gujcn_i si'c xnanäza. ¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunä jreni. ¹⁵ Ruxhaläza xtixtios loj Filólogo, näjza lo Julia, näjza lo Nereo con bisiajn_{ni}, näjza lo Olimpas näjza guiraa rexpen Dios nani yunä jreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhal_i xtixtios lojtu.

¹⁷ Rebetzä, rniabdu_{xh}ä lojtu ga'ptu cuidaad xcuent renani rujn biejj te guilia' sa' bejn, nani rlaiz guntu guiraloj nani najc garenca loj yäl_{ruluu}i ni bisieedtu, colguibicaj lojreni, ¹⁸ sa'csi sa' rebejn_{ga} direni gun xtzuun Jesucrist. Laareni rlaiztisreni gunreni si'c rlaiz tiejxhreni; rniireni didxdo, diidx ni rgudxguel diajg bejn te rusgueereni lastoo rebejn nani di susin. ¹⁹ Guiranejz abire'ch diidx xcuent xho rusobsapact_u xtidx Jesucrist, ni'cni rbaa lazä, ni'cni rlažä gactu nasin_{du}xh xcuent recoshueen, luxh si'c bāz xhet ganditu xcuent recosguijdx. ²⁰ Luxh Dios nani rusuecdxilajz bejn sioj_b guta'cwni ben_{dx}ab xhan ni'tu. Gacnä j Dad Jesucrist la'tu.

²¹ Timoteu nani racnä j narä lo dzuun, ruxhal_i xtixtios lojtu. Lucio, Jasón, näjza Sosípater, ben ladxä, ruxhal_{za} xtixtios lojtu.

²² Najrä Tercio, ni cagucuaä guijtze xcuent Pabl, ruxhaläza xtixtios lojtu xcuent Jesucrist.

²³ Ruxhałza Gayo xtixtios lojtu. Rbääžnu rolizjni, luxh rudeedzani rolizjni guidxagsa' reben guidoo. Ruxhałza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajč gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, ²⁶ naj abaluiloj rediidxga lojtu; näjza xcuent ni bacuaa reprofe't galooli; si'c najc diidx ni bia'n Gueb Dios ni nabajn par tejpas loj rexpejnni, agusule'ni loj guiraa reben guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu gui-jtzre lojtu ² ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtdadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yäl'rulaslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶ sigajcza con xcäl'nabansa'ctu baluiitu huililajzpacktu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, la'l ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtennu, te sanäjtuni.

Rlia' sa'reni nen guidoo

¹⁰ Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibanäjtä sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuenttu, betzä ni huililajz xtidx Dios. Tej resä' Cloé biädsä'n diidx loä xcuenttu, yu' yäl'rdujl lojtu. ¹² Rlazä guiniä scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zarenii rnii: "Narä nacä xpejn Crist." ¹³ ¿La rujntu xhigab nala' sa' Crist, ä? ¿La cuaj Pabl lo crujz xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejtä, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resä' Estéfanäs. Di lazä guinaj la yu' chu stee bationnisä. ¹⁷ Di Crist nuxhalä narä te gutiobnisä. Baxhaläni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtäni lo crujz.

Crist najc xcäl'milaagwr näjza xcäl'najn Dios

¹⁸ Rediidx ni rniinu xcuent Jesucrist xcuent xho gujtäni lo crujz te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. ¹⁹ Scree caj loj rexquijtz Dios: Narä sutzulä yäl'nasiñ xten rebenäjn, sudzucaäza xcäl'nadxällajz, xhigab rebejn ni nadxällazduxh.

²⁰ ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayäl'lajz nez loj Dios, ä?

²¹ Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichaglaiz Dios con yäl'rusule' diidx ni rniireni nayäl'lajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel rlaizpacreni fiireni remilaagwr; rebejn griegw rguuil yäl'nduxh. ²³ Niluxh nuurnu rusule'nu diidx xcuent xho cuaj Jesucrist lo crujz, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl'milaagwr najczani yäl'nasiñ xten Dios. ²⁵ Sa'csi xcäl'nayäl xten Dios si'c rchalo rebejn ni'c najc nasinduxhru loj xcäl'nasiñ xten reben guedxliuj; luxh xcäl'niaj xten Dios sacduxhruni loj guiraa xcäl'nadaan reben guedxliuj. ²⁶ Col'huii la'tu, betzä ni ahuililajz xtidx Dios, xho gule Dios la'tu, col'yejn xhigab guxiitu najctu ben nasiñ loj reben guedxliuj, guxiiza rajptu yäl'rnibee, guxiizatu najctu bejn ni agojl guiga'tu bens'a'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxi rniibee te gusanxtujyni rebejn ni rnibeduxh. ²⁸ Agule Dios rebejn ni di guiga' benro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'nni nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yäl'nasiñ xten Dios, te guiba'nsa'cnu nez loj Dios, te gacnaya lastoonu, näjza te quiixni rextojlnu. ³¹ Si'c bejn Dios te soob xtiidxni cadro caj scree:

Ni rlaiz guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo crujz

¹ Ni'cni cheni biädsule'ä xtidxlii Dios lojtu, rebetzä, dina niädniä didx-najn lojtu, niclaza didxnagajn, xhet si'cti basule'ä xtidx Dios xcuent Crist. ² Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo crujz. ³ Bidzunä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yäl'nasiñ xten guedxliuj, alga guniä xtiidx yäl'nasiñ xten Sprit Dxan xten Dios näjza xcäl'rnibee Dios, ⁵ te di gac xcäl'riliilajztu xcuent yäl'nasiñ xten guedxliujre, te gac xcäl'riliilajztu xcuent yäl'rnibee xten Dios.

Rumbee bejn Dios xcuent ni rului Sprit Dxan xten Dios

⁶ Rniizanu lo sa'nu ni aguyajl lo xtidx Dios rediidx xten yäl'nasiñ xten Dios, per te yäl'nasiñ ni di gac xcäl'nasiñdi guedxliuj, niclaza xten reni rnibee lo guedxliujre, sa'csi sidzujñ dxej sinitlojreni. ⁷ Niluxh che rniinu yäl'nasiñ xten Dios, rniinu diidx ni rut racbextebdi, xcuent xho gac guidzunn cadro yu' Dios xhaguibaa. Cheni gajdli gac guedxliuj, rapcheeni yäl'nasiñxhiga'tz xtenni. Baluiinini loonu te guiba'nnäänuni lo xcäl'rdimbicha' xtenni. ⁸ Nicla tej reni rnibee lo guedxliujre gajd gacbee recosse niluxh paru niacbeerreni, direni nucuaa lo crujz Dad Jesucrist nani rajp xcäl'rdimbichaduxh. ⁹ Najcni si'cni caj lo rextidx Dios cadro rni: Recos ni gajdpac baloj bejn fii, nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluu Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios rachesa'c guiraa rexhigab, näjza recos xhiga'tz xten Dios.

¹¹ Loj reben guedxliuj ¿chuni'c racee rexhigab ni rujn bejn? Lagajc sprit xten bejn ni yu' nenni racee xhi xhigab cayujnni. Sigajcza rut raceedi rexhigab xten Dios; Sprit Dxantis xten Dios raceeni. ¹² Luxh nuurnu dinu nica' yälñajn xten guedxliuj, alga cua'nu Sprit Dxan ni siäd lo Dios te gacbeenu rexhicos ni abasalajz Dios loonu. ¹³ Nuurnu rniizanu xcuent recosga, xhet diidxd di ni ruluii xcälñajn guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios nen lastooreni.

¹⁴ Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcälñasin Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn rexhigab xtenni. ¹⁵ Rebejn ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuililajz rutliidi rula'tzdireni. ¹⁶ Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluiini Gueb Dios, ä?” Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racebeenu rextiidxni.

3

Reni rujn dzuun lo Dios

¹ Rebetzä, di niajcdi niniä redidxnagajn lojtu si'c ni rniä loj rebejn ni rajp yälñasin xten Sprit Dxan xten Dios, basule'ä ganaxtis didx guyasi lojtu, sa'csi najctu ben guedxliuj o biuxbäz ni guxi racebeeni xcuent Crist. ² Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bäl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³ sa'csi nabansijctu si'c nabajn reben guedxliuj laltis runembiidtu, rdx-echlajzto lo sa'tu, ¿la ditu gacbee nacsijctu si'c ben guedxliuj, ä? ¿La laltis nabajntu si'c nabajn reben guedxliuj ni di gumbee xtidx Dios, ä? ⁴ Sa'csi cheni rni tejni: “Narä nacä te xpejn Pabl”, dxejcti steeni rni: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

⁵ ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajzto, luxh cade tejnu riennu dzuun ni runiidx Dios jiennu. ⁶ Ganid basule'ä xtidx Dios lojtu, dxejc biäd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷ Ni'cni nicla ni rusulexgaa diidx, niclaza nani racnä raceeru bejn rediidxga xhet sajcdireni; Diostis sajc nani rusanij xcäriejn rebejn. ⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejanu dzuun nani riennu. ⁹ Nuurnu najcnu si'c remos ni runnä Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹⁰ Narä nacä si'c te mastr albañil. Baniidx Dios dzuun lö, gucnäjni narä te casuä reguij lo yujre, te naj ste'ca bejn quixh basuu yejcn. Niluxh teja ni chanuu gun dzuun loja, suga'pni cuidaad xho guiliäsni padeerga. ¹¹ Sa'csi di gacdi gusujreni garenca

cimient loj nani najc-xгаа, ni najc Jesucrist. ¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biqui, ¹³ sidzujñ dxej sien xho najc dzuun ni bejn tejsa bejn. Sa'csi siääd fis guiboo ni guluiløj dzuunga, sa'csi lagajc guibooga guluiløj dzuunga, xho najcni. ¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnğa ni riäjł xca'ni sa'csi bejnni yusa'c. ¹⁵ Niluxh palga chec ni bejnni yejc cimientga xhet xca' dini, xcälñabajñtisni di nit, luxh xtzuunni sejc.

¹⁶ ¿La ditu gan la'tu najctu xquidoo Dios, luxh nen lastootu rbäjz Sprit Dxan xten Dios, ä? ¹⁷ Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸ Nicla tejtı na'c gusgueetu lagajc la'tu. Palga yu' chu rujn xhigab nanduxhni xcuent yälñasin xten guedxliujre, nanabpac gacni si'c te bejn ni xhet najndi te xca'ni yälñasin xten Dios te guliipac gacni te beññajn, te beññasin. ¹⁹ Sa'csi yälñasin xten guedxliuj xhet sajcdi nez loj Dios. Lo rexquijtz Dios caj scree: “Dios rujn rga' reni rajp yälñasin xten guedxliuj lagajc xcuent xcälñaguereni ni rujn lagajc xcälñadxälłajzreni.” ²⁰ Ste'ca lajt caj scree: “Nanchee Dios xho najc xhigab ni rujn rebejn ni rajp xcälñasin guedxliujre, luxh xhetliidi sajcnı nez loj Dios.” ²¹ Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexxicos najc xtengatu, ²² palga najcni Pabl, o Apolos, o Pedr, o guedxliuj, o yälñabajñ, o yälgujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexxiga-bxhiga'tz xten Dios te gusule'nureni lojtu. ² Mbaj pues, te bejn ni cahuii te dzuun nanab gusoobreni diidx, gunreni te dzunsa'c. ³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'cđi sajç guiniä xheti xtolä, Dad Jesucrist najc nani rula'tz narä, rhuiløjni xho nacä. ⁵ Ni'cni la'tu na'c gucuaquijtu bejn che gajd guidzujñ dxej; colcuäjz jiääd Jesucrist dxejç laani sibääni lo bianij guiralii ni naga'tz lo nacäjy, luxh suluiløjzani xhi xhigab yu' nen lastoo tejsa rebejn, dxejç lo tejganu sudeed Dios ni nungäjł xca'nu.

⁶ Rebetzä, xcälñasa'ctu caniä rediidxre lojtu. Caniä xcuent Apolos näjsa narä, si'c te yälñului te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtı lo resa'tu, lał ni cabälaztu steeni. ⁷ Sa'csi ¿chuni'c rnii najclu beñsa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidajł cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcpactu reii te näjsanu guinibenäjnu la'tu. ⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjsa nez loj rexangl Dios najcnu si'c reben ni rdedlojtis bejn lojreni. ¹⁰ Nuurnu najcnu beñnayääl xcuent Crist, niluxh la'tu rchalotu racheduxhtu rextidx Crist. Nuurnu najcnu bejn ni xhet nadipdi, niluxh

la'tu najc bendanduxh. Rliä'p rebejn xpala'ntu, ni'c rbälazreni nuurnu. ¹¹ Cadeednu trabajwduxh naj, rliaannu, riojlnu, xho rnaij xhajnbn, rdilnäj rebejn nuurnu, luxh xheti roliznu. ¹² Rdxaggu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsi rebejn nuurnu, rientisnu huant. ¹³ Che rniyajreni nuurnu, rulidxnäänuren didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu mił bejn ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusoo diidx xcuent Crist. Laani susnajni lajztu xho mood nabañä lo yäl nabajn xten Jesucrist, sigajcni ruluiä neñ reguidoo guiraasi lajt. ¹⁸ Yu'tu ni acayajc gualajz, naatu pet dina guibisacä lojtu. ¹⁹ Cabazä jiädhuiätu, palga si'c rlajz Dios, dxejc sacbeä chuni'c najc rebejn ni cayajc gualajz, fiä xhipacni rujnreni, xhet xtiidxtisreni gacbeä. ²⁰ Sa'csi xcälrnibee Dios xhet ganaxtis xcuent diidx najcni, näjza dzuun ni rujnreni ruluiioj xcälrnibee Sprit Dzan xten Dios ni rajpreni. ²¹ ¿Xho rlajzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunä yäl rinälajz näjza yäl nadolajz te gulidxätu, ä?

5

Xho nanab gunnäjtu te bejn ni rujn falt lo sa'ni

¹ Agucbeä yu' tejtü ni ahuililajz xtidx Dios, cua'ni si'c chääl ni te gunaa ni gujc chääl xtadni. Dee najc te dołduxh nani nicla reni di chalilajz xtidx Dios direni gun. ² Luxh la'tu gujctu gualajz lacuaa niac-huin lastootu; te bejn nani bejn dojlga, riäj nibäätuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dołduxhga, sigajc ni niunä paru suga'ä ro'c. ⁴ Con laj Dad Jesucrist, che abidxagsa'tu, luxh alastoä suganäj la'tu, con xcälrnibee Dad Jesucrist, ⁵ abenä xhigab gutednu bejnğa ladznäa bendxab te ted tiejxhni trabajw, niluxh sprit xtenni laani neñ dxej ni jiädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä? ⁷ Colgudzucaj cobyujxhga, te guibajntu te yäl nabannayacoob si'c te cobyä, sa'ni racchee yätxtiil ni xheti levaduur yejcn par lanij xten pascw. Arajptu yäl nabannaya sa'csi agujt Jesucrist sigajc gujt te xile' lo lanij pascw te badzucajni rextojlnu. ⁸ Si'c nanab jiennu lanij xten pascw con yätxtiil ni xheti levaduur yejcn, nalajznu con yälguliipac neñ lastoonu, xhet yätxtiildi ni yu' cobyujxhga yejcn, nalajznu na'c gunlu latsiaj.

⁹ Lo stee guijt abacuaä lojtu, na'c guchaagtu reben ni runnäj cosguijdx bejn ni di gac chäälreni. ¹⁰ Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijtza lojtu te na'c guchagsa'tu te bejn nani rni ahuililajzni xtidx Dios, luxh rujnrni cosguijdx con bejn ni di gac chäälni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnğa. ¹²⁻¹³ Sa'csi

narä di gacdi gunä yälguxhtis loj rebejn ni gajd chalilajz xtidx Dios. Gunti Dios yälguxhtis lojreni. La'tu nungäjl guntu yälguxhtis loj rebejn ni ahuililajz xtidx Dios. Ni'cni colgudzucaj bendojlga lojtu.

6

Na'c chäätu loj rebendojl te gunreni yälguxhtis lojtu

¹ Palga tejtü ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yälguxhtis lojtu? ¿Xhicuent ditu guiniab yälguxhtis loj rebejn ni ahuililajz xtidx Dios, ä? ² ¿La ditu gan, rebejn ni ahuililajz xtidx Dios sujn yälguxhtis lo reben guedxliuj, ä? Palga la'tu sujntu yälguxhtis lo reben guedxliuj, ¿la di gacdi guntu yälguxhtis lo sa'tu lo recosbäz lacuaa chäätu loj rebendojl te gunreni xcälguxhtisreni lojtu, ä? ³ ¿La ditu gan sienzanu yälguxhtis lo rexangl Dios, ä? ¡Aticaxh jiennu yälguxhtis loj recos baze' xten sa'nu lo yälnabajnre! ⁴ Palga la'tu cadilnäj sa'tu xcuent recos xten guedxliujre, ¿xho mood chäälu loj rebendojl ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujytu. ¿La ruti nicla tej bennasin loj guiraatu ni sajz gun yälguxhtis lo resa'tu, ä? ⁶ ¿Xhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijttu sa'csi yu' yäldrılınäj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O ¿la ditu gan reben dojl dipacreni jiu' lo xcälrnıbee Dios, ä? Na'c gusaantu gusgueereni la'tu; nicla te resa' dee di jiu' lo xcälrnıbee Dios: guiraa reni richagtoo regunaa; guiraa reni rajn rebanäj; reni resnäj bejn ni di gac chäälni; renıguıi ni rungunaa; reni najc biräax; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnıbee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu benıaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dıan xtenıi. La'tu anajctu rexpejnıi.

Tiejxhnu najc xquidoo Dios

¹² Guliini sajz gunä xhitis ni rlazä gunä, niluxh xhet guiraadini najc hueen par narä. Narä sajz gunä si'ctis ni rlazä, niluxh dina gusanä guinıbee nicla tej xhi cos narä. ¹³ Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guıro'preni. Per tiejxhnu di gac par jiennu cosguıjdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebengut, sıliäsıanı nuurnu con xcälrnıbeduxhni.

¹⁵ ¿La ditu gan teıgatu najc si'c te la' tiejxh Crist sa'csi ahuililajztu rextııdnı, ä? Palga tiejxhnu najc xten Crist, ¿la sajz gudeednıi loj te gunadxab, ä? ¡Gurnıälojlu jiennu si'c! ¹⁶ ¿La ditu gan cheni guchaagni te gunadxab rajcni tejtis tiejxh con laanı, ä? Loj rexquıjtz Dios caj: “Guıro'preni sajz si'c tejtis bejn.” ¹⁷ Niluxh nani rıdeed lastooni lo Dios anajczanı tejtis con laanı sa'csi rbäjz Sprit Dıan xten Dios neı lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni. ¹⁹ O ɿla ditu gacbee tiejxhtu najc xquidoo Sprit Dxaan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu. ²⁰ Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpritnu.

7

Yälrlujdx xcuent yälruchnaa

¹ Naj gudzu'ä diidx lojtu xcuent ni gunabdiidxtu cheni bacuaatu guijtjz loä. Guliini hueen najcni na'c guchnaa te niguii. ² Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni. ³ Nanab niguii guchaagni chäälni che rlanj chäälni, sigajcza gunaa nanab guchaagni chäälni che ni si'c rlanj chäälni. ⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtlu lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

⁶ Rniä rediidxre lojtu te ni rlanj guchnaa sajg guchnaani, niluxh dina guiniä lojtu, nanabpac guchnaatu. ⁷ Narä rlazä maläi sajg gac guiraa bejn si'c ni nacä. Dios abadeed loj tejga bejn xho mood guibajnni. Yu'reni sajg guibajn tej mood, yu'zareni sajg guibajn garenca mood.

⁸ Loj reben xteb näjza loj regunabiuud rniä, hueen najc na'c guchnaareni, gacreni si'c narä. ⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjreni guchaagreni te niguii o te gunaa.

¹⁰ Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹ Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹² Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäänäjni niguiiga, na'c guro'n niguiigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjni cuäänäjni gunaaga, na'c guro'n gunaaga chäälni. ¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabañnj sa'reni, hueen najc yälruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabañnja'sa'reni, hueen najc yälruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵ Palga chäälni te gunaa o chäälni te niguii ni di chalilajz xtidx Dios luxh rlanjni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäänäjni chäälni ni di chalilajz xtidx Dios, niluxh gurejdx Dios nuurnu te cuedxini lajznu. ¹⁶ Sa'csi ɿxho najnlu, gunaa, la suslaa Dios chäällu lo dojl xcuentlu, ä? O ɿxho najnlu, niguii, la suslaa Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini neñ guiraa reguidoo. ¹⁸ Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajg gudzu'lu meel lo xlamlu, badzu'zani te gaclu te bejn ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di reniguii guchnaa sa'csi siääd yäl naganduxh lo guedxliujre. ²⁷ ¿La alabachnaalu, ä? Na'c guro'nlü chäällu. ¿La alabaro'nlü chäällu, ä? Na'c chaxiilu chäällu. ²⁸ Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yäl nabajnre. Ni'cni rniä na'c guchnaatu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtentis yäl ruchnaa, te gac gunreni xtzun Dios. ³⁰ Luxh reni cayoon, nanab gunreni si'cni xhet cayoon direni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios. ³³ Renani abachnaa riureni recos guedxliujre te guspaani lajz chäälni, ³⁴ tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälreni.

³⁵ Rniä rediidxre par xcäl nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajg gudeednini guchnaani. ³⁷ Palga steeni dini gun xhigab si'c nanab gunni, sajg gunni si'ctis ni rlajzni palga abejnpacni xhigab neñ lastooni di xindxa'pni guchnaa, hueenza najc si'c. ³⁸ Ni'cni nani rudeed xindxa'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

³⁹ Te gunaa ni abachnaa, rajpni por guibannäjni chäälni guideb nabajn chäälni. Palga guet chäälni, jianxtebni stehuält, dxejc sajg guchnaani chutis niguii ni rlajzni, palga najcni tej ni ahuililajz xtidx Dios. ⁴⁰ Narä

rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäjä Sprit Dxan xten Dios narä.

8

Yälrajw ni ruzujreni lo rebanäjb

¹ Rniä lojtu xcuent reyälrajw ni ruzujreni lo rebanäjb. Guliini guiraanu rajpnu yälñajn xcuent recosga. Niluxh yälñajn rujn rajc bejn guyalajz. Luxh yälñälajz sa'ni, ni'c rujn racnäjnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayäädxxru gacheeni si'c ni nanab gacheeni. ³ Palga yu' chu sanälajz Dios, Dios anumbee bejnga.

⁴ Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajñnu. Rajpnu tejtis Dad ni rnibee loonu, ni'c najc Jesucrist. Xcuent xcälrnibeeni guc-chee guiraa recos loj guedxliuj, luxh nuurnu nabajñnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajpñeni rebanäjb, luxh rajwzarení reyälrajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhinza xcäriejnreni. ⁸ Xhet xcuent xhi rdaudinu sajcdi guibañsa'cruun lo xnejz Dios. Xhet najcdi palga guidaunu o palga dinu guidau. ⁹ Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te beññajn, sa'csi dee gajd gacbesa'c rextidx Dios, ¿la di lajzni gac nadip te näjza laani chatajwni yälrajw ni guzuj lo rebanäjb? ¹¹ Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijñni, luxh najcni bejtzlu sa'csi näjza par laani gujt Dad Jesucrist lo cruzj. ¹² Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

9

Xhi sajcdi gun te apost

¹ ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c rululilajz guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ¿La di riäjl xca'ä guiraa ni runiidxtu gauä näjza ni runiidxtu yä'ä? ⁵ ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶ O ¿la xtebtis Bernabé näjza narä di gacdi cuääz jiennu dzuun te guidaunu lañ rusule'nu xtidx Dios? ⁷ ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä le'ch ni rudeedreni, ä? ⁸ Na'c

guntu xhigab lagajc xcuentä canäa rediidxre lojtu, sa'csi näj loj xleii toMoisés caj diidx xcuent recosre. ⁹ Loj reguijtz xten xleii toMoisés caj rediidxre: "Na'c gusällu guijxh ro' gon che cayo'tni yejc triuu." ¿La guniitis Dios rediidxre sa'csi riuni regon, ä? ¹⁰ ¡Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjl gunlojni xca'ni te yäl'nasa'c ni rajc lo xniaani. ¹¹ La'tu najctu si'c te yuj cadro gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäjlru gacnäjtu nuurnu.

Niluxh gajdnu guinii si'c lojtu sa'csi di rlanjzdinu guidxoonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³ La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵ Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸ ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰ Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlanzä guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. ²¹ Stee lajt cadro rlanzä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³ Runä guira'ti xcuent xtidx Dios ni ruslaa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

²⁴ Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵ Guiraa reni rlanj guxun rapdareni tiejxhrene te ga'p tiejxhrene yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. ²⁶ Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rlanjzni, te gunni nani rlanj Dios te di cheni abasule'ä xtidx Dios loj xhidajl bejn, gusanxtujy tiexhä narä.

10

Yäl'rulijdx lo xcuent rebanäjb

¹ Rebetzä, di rlazä jiallajztu ni gusajc retoxtadgoldoonu. Gusajreni xpalaä te za gudejdzareni galäi nisdoo ni laa Nisdo Xniaa. ² Gudejdreni xpalaä te za näjza gudejdreni galäi nisdoo; ni'c najc si'c te yälrobnis sa'csi sanajlreni toMoisés. ³ Sigajcza guiraareni gudajw tejtis yälrajw ni baxhal Dios xhaguibaali. ⁴ Guiraaareni gu' nis ni badeed Dios, Dios bejn birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcälrnibeeni birii nis loj guilajga, Crist najc si'c guilaj ni huinäreni. ⁵ Dios bidxechnäj xhidajlreni, ni'c xhidajlreni gujt nez lo reyubidzga.

⁶ Guiraa rediidxga najc te yälruljdx loonu, te na'c guichagljaznu jiennu lagajc redojl ni bejn retoxtadgoldoonu. ⁷ Na'cza ganu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisuren i te gusloj caguijtreni." ⁸ Na'c chunäjnu stee bejn di gac chäältu si'c bejnreni, ni'cni gujt galbichon milreni tejtis dxej. ⁹ Na'cza guche'chnu Dios con rextolnu si'c bejn balti rebejnga, ni'cni gujtreni sa'csi gudauya' bälreni. ¹⁰ Na'cza chamojmtu xcuent ni rujn Dios si'c ni bejn rebejnga xcuent ni bejn Dios, ni'cni baxhal Dios angl xten yälgujt bagu't xhidajlreni.

¹¹ Guiraa redee gusajc retoxtadgoldoonu te ruljdxni nuurnu, cuajzaren i lo guijt te gului rediidxga nuurnu xho riäl jiennu, nuurnu ni nabajnnu nen redxej naj. ¹² Ni'cni chutis ni rujn xhigab nabañsa'cni nez loj Dios, sidzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yäl nadip yäl nadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, colbicaj lo yälrajn xten rebanäjb. ¹⁵ Rniä lojtu si'c lo te beñ nasin, te beñ najn: colgulatzsa'c rextidxä don la laaca najcreni. ¹⁶ Che rdaunu xchej xten Dad Jesucrist najcni te seen nabañnänu Jesucrist. Che rdunnu nen co'p, rnaalajznu gudijx Dad Jesucrist xtiejnni xcuent xtojlnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. ¹⁷ Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahui xho rujn rexejñ Israel! Rajwreni xpääl reguidxaa ni rile'ceni lo Dios lo dxan nen guidoo, ni'c najcni tejsi con guiraa rebejn nani rujn sigajc rujnreni. ¹⁹ ¿Xhixhni'c rlazä guiniä, naj? ¿La caniä yu' xhi sajz gojn nani gule'c bejn lo banäjb, ä? O ¿la yu' xhi sajz banäjbga, ä? ²⁰ Xhet sajcdireni. Narä caniä lojtu dee: Recos nani rbe'c rebenzajt lo rebanäjb, lo reben dxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo reben dxab, te di chachunäjzatu reben dxab. ²¹ Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo reben dxab. Digacdiza guidaunu xchej xten Dad Jesucrist nägajcza xchej ni rudeedreni lo reben dxab. ²² O ¿la rlajznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³ Gullican i, sajz jiennu xhitis ni rlajznu jiennu, niluxh xhet guira'ti ni rlajznu jiennu najc hueen par nuurnu. Guira'ti najc laaca, niluxh

yu' reni di gacnäj gustioobnu lo xcälirililajz Dios. ²⁴ Na'c guntu xhigab quuiltistu lagajc xcäl'nasa'ctu; maazru hueen quuilzatu xcäl'nasa'c xpisintu. ²⁵ Coltajw xhitis bääł ni rdo' lo guii, na'c guiniabdiidxtu caro siäädni te di gacnaj xcäriejntu. ²⁶ Lo xtidx Dios caj rediidxre: "Sa'csi guideb guedxliuj najza guiraa ni tre' lo guedxliuj najc xten Dios."

²⁷ Palga jiädgajn te bejn ni di chalilajz xtidx Dios luj jiädtaunäjłuni luxh acuäjblu chäälu, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸ Palga yu' chu naa lojlu: "Dee najc bääł ni bile'cnu lo rebanäj", na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹ Dina guiniä xcäriejnlu, didi gunnajni xcäriejn stee dade'ga; mbaj naj, xhicient riäjł gula'tzreni narä sa'csi rajc runä guira'ti pors racnaj xcäriejn ste'ca bejn, ä? ³⁰ Palga rudedä xquixtios lo Dios nani runiidx xhi rauä, xhicient rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujn guira'ti te chä'p xpala'n Dios. ³² Na'c guche'chtu nicla rexpejn Israel niclaza rebenzajt, niclaza rexpejn xquidoo Dios. ³³ Sigajcza runä narä, runä guira'ti ni ruspaaj lajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujn Jesucrist.

Xho riäjł gun regunaa nen xquidoo Dios

² Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu. ³ Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴ Chutis te niguii ni yu' xhumbreel yejcnı lałni cabedx-canabni lo Dios o lałni caguluuini xtidx Dios, laani rusanxtujyni yejcnı. ⁵ Palga yu' te gunaa ni dini gusäu xpäiini yejcnı che cabedx-canabni loj Dios o che caniini xtidx Dios, rusanxtujyni yejcnı sa'csi najcnı sigajc najc te gunaa ni abigaj yejcnı. ⁶ Palga di te gunaa gusäu xpäiini yejcnı suguigaj yejcnı. Palga najcnı te xtujy guigaj yejcnı, sugusäuni xpäiini yejcnı. ⁷ Di guchaag gusäu te niguii yejcnı sa'csi najcni si'c xtuxh Dios, najza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹ Xhetza xcuent gunaadi guchee niguii; gunaa najc ni guchee xcuent niguii. ¹⁰ Ni'cni nanab jäu yejc gunaa nen guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii niclaza gunaa digacdi guiban xtebreni. ¹² Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

¹³ Colyejn lagajc xhigabtu naj, la laaca najcnı cuedx-guiniab te gunaa lo Dios lał ni xhet niäudi yejcnı, ä? ¹⁴ Loj reben guedxliuj guiraa reniguii rgaj yejcnı, sa'csi najcnı te xtujy guigaduxh xquidxejcnı. ¹⁵ Niluxh regunaa hueen najc rga' xquidxejcnı te rusäuni yejcnı. ¹⁶ Palga yu' chu tildiidx xcuent rediidx nani cania lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

Xho ruxhinreni xchej Dad Jesucrist

¹⁷ Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu. ¹⁸ Rnixgaä dee: Abiejn diagä che re'tu lo xquidoo Dios, rlia'tu lo sa'tu rajtu tiop cuaa; luxh riliica lažä rediidxre. ¹⁹ Pet naatu nanab guntu si'c te gacheetu chureni'c sanälajzpac Dios, chureni'c sajcru lo xtzuum Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejsa bejn rlaiz xcaxgaa xhi gauni, dxejc yu' reni agudxadoo xque'reni, agusojjzareni, lałni yu' stee cuaa bejn calaan, gajdreni gau. ²² ¿Xho mood? ¿La xheti roliztu cadro gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¿Gurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluiä lojtu xcuent xho bejni guxhijn che gudaunäjni rexpejni te xchej xten pascw, guxhijn ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵ Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” ²⁶ Che gautu yätxtiilga, che yätu nen co'pga, ruluilosactu xhi bejn Jesucrist che gudijxni xcuent rextoljnu lo cruzj; si'cza colujyn dxejli ni guibisacni lo guedxliujre.

Xho riäjl gac xchej Dad Jesucrist

²⁷ Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. ²⁸ Niluxh sugula'tz tejsatu lagajc lastooni don la yu' xhi dojl bejnni, dxejcti sajc gauni yätxtiil, yäni co'p xten xchej Dad Jesucrist, sa'csi abaxhobdojlñi. ²⁹ Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälñaj Dios yejcn. ³⁰ Ni'cni lacti resa'tu racxhuu, xhet nadaanreni, luxh yu'zareni agujt. ³¹ Ni'cni nanab fiinu xho najcnu, guiniabnu lo Dios gudzucajni rextoljnu te didi tednu trabajw. ³² Niluxh che rdejdnü trabajw, rdejdnüni te na'c tednu trabajwduxh si'c ted reben guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu. ³⁴ Palga yu' chu tejtü ni calaan, sugauni lagajc rolizni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsacni.

12

Dzuun ni rudeed Sprit Dxan xten Dios lo tejsa ni rililajz

¹ Rebetzä, rlažä gacheetu xcuent dzuun ni rudeed Sprit Dxan xten Dios lo tejsanu.

² La'tu najntu che gajdtu chalilajz xtidx Dios, rajntu chutis banäjb ni di gachee, ni naatis bejn gantü. ³ Ni'cni rlažä gacheetu naj, nicla tejtü ni yu' Xsprit Dxan Dios nen lastooni sajc guinii: “Xhet sajcdi Jesucrist.” Luxh

rut rajcdi rnii: “Jesucrist najc Dadbid baxhuaannu”, palga di Xprit Dhan Dios cuääz nen lastooni.

⁴ Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dhan Dios ni rujn dzuunga nen lastoo guiragajcnu. ⁵ Yu'za balti cuaa dzuun nani riennu, niluxh tejsi najc Xtadbid baxhuaannu. ⁶ Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. ⁷ Tejga bejn ruluiloj garen-garen xtzuum Sprit Dhan xten Dios, niluxh guira'ti redzuunga najc te gacnäjeni guiraanu. ⁸ Lo tej bejn rudeed Sprit Dhan yäl'nasiñ, lo steeni rudeed lagajc Sprit Dxanga yäl'najñ. ⁹ Lagajcza Sprit Dxanga rudeedzani yäl'riliilajzro lo tejñi, dxejc lo steeni rudeedza lagajc Sprit Dxanga yäl'rnibee te rusiajñi yäl'racxhuu. ¹⁰ Loj stee bejn rudeedzani yäl'rnibee te gunni milaagwr, loj stee bejn rudeedni yäl'riembe te sajç guinixgaani xcuent recos ni churu gac; lo steeni rudeedni yäl'nasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl'racbee te rajc rniini loonu xhini'c gunii bejn ni rnii garen-garen redidxsaj. ¹¹ Niluxh tejsi najc Sprit nani rujn guiraa redzuunre, racnäjni rujn tejganu xtzuumni si'ctis ni rlanjñi.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajl la' xtenni, tejgareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexpeljñ Israel o beñ griegw, mase najcnu mos o mastr, gurobnisnu con laj Sprit Dhan che huililajznu xtidx Dios, te gujñu si'c tejsi tiejxh, luxh tejsi Sprit Dhan xten Dios biädläjz nen lastoonu.

¹⁴ Sa'csi tiejxhnu dini gac tejsi la', najcni balti la'. ¹⁵ Paru naa ni'nu: “Sa'csi dina gacä te naa, ni'cni dina gacä te la' tiejxhre.” ¿Xhixh porsì ni'c dini gac tla' tiejxhga, ä? ¡Gurniälojlu! ¹⁶ Palga diajgnu naa: “Dina gacä te baloj, ni'cni dina gacä te la' tiejxhre.” ¿Xhixh porsì ni'c dini gac tla' tiejxhga, ä? ¡Gurniälojlu! ¹⁷ Palga guideb tiejxhni niajc te baloj, ¿xhi cojn niejn diajñi? Palga guideb tiejxhni niajc te diajñi, ¿xhi cojn chuxhi'ni? ¹⁸ Mbaj naj, ni'c basoob Dios guiraa rela' te guc-chee tiejxhnu si'ctis ni rlanjñi gacni. ¹⁹ Paru niajc guidebni si'c tejtis la'ni, ¿xho niajcpacni te tiejxhni dxejc? ²⁰ Niluxh naj ensilaani yu' xhidajl la' te najcni tejsi tiejxhni.

²¹ Te balojnu di gac gäbni lo naanu: “Dina guiquinälu”, niclaza bitiuylenejñi di gac gäbni lo ni'ni: “Dina guiquinälu.” ²² Chucala lapacreni rquiuinu nani ruzen lascanu xhet sajcdireni. ²³ Luxh retla'ga nani rchalonu guxii sajcreni, reni'c maazru sajç. Luxh reni rtuinäanu, niguii sigajc gunaa, reni'c riapdarunu. ²⁴ Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajç. ²⁵ Bejnñi si'c te di chu yäl'rdijl lo retla' tiejxhnu, te guiraa retla'ga gacnäj sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yäl'rnibee lo tejganu lo xquidooni te gunnu xtzuum-xtzuumni. Ganidtoo guleni reapost; ni rojpga guleni rebejn ni rnii xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajç beñracxhuu, reni racnäj, reni rnii garen-garen

redidxsaj. ²⁹ Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusiajc rebenracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. ³¹ Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajç guiniä xtidx Dios xcuent recos ni churu gac, luxh rachesa'cä guiraa recos xhiga'tz xten Dios, näjza guiralii yälñasin xten guedxliujre, palga rapä yälirilazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäzreni, najczareni beŋsa'c, direni säblajz xhi xten sa'reni, direni guschä'p lagajc xpala'nreni, direni gac gualajz. ⁵ Direni gun recos ni di guchaag, dini quüil xcälñasas'ctisni, dini guidxe'ch, dini jiu redojl ni rujn bejn lojni. ⁶ Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäzni, rajc rdejndi xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäz rediidxga. ¿La rajc rnii bejn garen-garen redidxsaj, ä? Sidzujn dxej siacdx redidxsajga. ¿La yu' yälñajn? Sidzujn dxej sinitlojpacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jiädsac Jesucrist ni rajp guiralii yälñajn, sinitloj xcälñandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yälbengol, gunitloj rexhigab biuux ni benä galoo. ¹² Sa'csi naj rhuiinu si'c loj te guihujn ni nacäy, luxh che guibanñänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sachesa'cnu si'cpacni numbee Dios nuure. ¹³ Niluxh naj ria'n yälirililajz näjza yälrbäzlaiz, näjza yälsanälajz. Lo guidxon redee, sajcrü yälrinälajz.

14

Renani rnii rediidx

¹ Ganiddoo colquüil yälrinälajz, colñabza lo Dios te guniidxruni xhi stee dzuun, niluxh colyejnru te xca'tu yälrnibesa'c te gusule'tu xtidx Dios. ² Che rnii te bejn garenca diidx ni di rebejn gachee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluü Sprit Dxan xten Dios guiniini. ³ Niluxh bejn ni rusule' xtidx Dios, rustioobni xcälirililajz bejn ni rulijdxni, ruspaani lajz nani rac-huin lajzni. ⁴ Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobruni lastoo guiraa rebenguidoo.

⁵ Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniiini. ⁶ Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yälñajn, o xcuent te xtidx Dios, o xcuent te yälñruluii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, ¿xho jiennu gacheenu xhi dij cayol'reni, ä? ⁸ Sigajcza lo guerr; palga direni gol cornet dippac, ¿xho gacheereni agojl chatijl'reni, ä? ⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacheereni xhini'c caniiilu, ä? Xlia'si guiniilu, lo bejtis sää xtiidxlu. ¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajc nani caninäj narä. ¹² Ni'cni la'tu ni rlajztu xca'tu yälñabee xten Sprit Dxi te guntu xhi redzuun, colguejs, colñab lojni xhidajl dzuun te gacnäjtu tioobru xcälñrililajz rexpen guidoo.

¹³ Ni'cni palga yu' te bejn ni rnii garenca didxsaj, suguiniabni loj Dios yälñabee te gac gusule'ni diidx ni rniini lo rebejn. ¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. ¹⁵ ¿Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnlu guiliä'pni xpala'n Dios, sa'csi dini gacbee xhini'c rniilu. ¹⁷ Hueencaza calä'plu xpala'n Dios, per stee bejnga dini tioob loj yälñrililajz. ¹⁸ Rudedä xquixtios lo Dios maazru rajc rniä garen-garen diidx loj guiragajctu. ¹⁹ Niluxh neñ guidoo maazru rlazä guiniä con xcärienä gaiitis diidx nani gacheetu, nani guluui la'tu, loj tzuu mil diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹ Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä”, naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälñrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu neñ guidoo dxejcti caniiitu garen-garen diidx ni rut racbeedi, dxejc guidzujñ tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiitu, sacbeeni yu' xtojñni, ²⁵ sienloj rexhigab xhiga'tz ni yu' neñ lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejgatu tebgaj te salm, te xtidx Dios ni guluuiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälñrililajz renani ahuililajz xtidx Dios. ²⁷ Palga yu' renani

rnii con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi säloj ni rnii tejpgareni. ²⁸ Palga rut rajcdi gusule' rediidxga, na'c guiniireni con garenca diidx nen guidoo, suguinixtebreni lo Dios. ²⁹ Si'cza renani rusule' diidx ni rudeed Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadiajg, sucuedxisijcni, dxejcru suguiniini. ³¹ Sa'csi guiraatu sajc gusule'tu tebgajtu didx ni baniidx Dios lojtu te gac guisieedtu, te tioob lastoo guiraatu lo yälirililajz. ³² Rudeed Sprit Dxi xten Dios yälñajn loj reni rusule' diidx ni rudeed Dios lojreni te acanajnreni che riäjil guiniireni o che riäjil cuedxiireni, ³³ sa'csi Dios najc te Dios ni rujn guira'ti xnejz-xnejzni, dini gun biejj, niluxh rbecdxini lastoo bejn nen guiraa reguidoo xten rebejn ni ahuililajzpac xtiidxni. ³⁴ Sucuedxi regunaa nen reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni. ³⁵ Palga rlajzreni gacbeerureni, suguiniabdiidxreni loj chäälñi che guibi'reni rolijzreni, sa'csi sianxtujy gunaaga palga guiniini nen guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biäädni. ³⁷ Palga yu' tejtü ni rchalo rajc rniini diidx ni rudeed Dios lojni, o palga rchaloni abadeed Xpirt Dxi xten Dios te dzunro lojni, sugacheepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. ³⁸ Palga yu' chu tejtü ni di chalilajz rapä xcälñibee Jesucrist, rutza jiudi xtiidxni.

³⁹ Ni'cni, rebetzä, coljejnru te gusule'tu diidx ni runiidx Dios lojtu, na'c gudxojtntu renani rniiza garenca didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

15

Gubañsac Jesucrist lo rebenjut

¹ Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajcrü ni bisiedä, basule'ä xho gujt Jesucrist lo cruiz, bixe' xtiejnñi te badzucajni rextojlñu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni. ⁵ Cheni gubañsacni, baluilojni lo Pedr, dxejctiru loj guitzubito'p rexpejn pacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabañsijc, niluxh yu'za reni agujt. ⁷ Dxejcti baluilojni lo Jacoob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd rululojni lo rexpejnñi dxejc. ⁹ Narä guxiiru sacä loj guiraa reapost, niclaza nungäjil cuälajreni narä apost sa'csi basacsä rexpejn xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcälñulaslajz Dios cayacnäjä narä. ¹¹ Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibañsac rebenjut

¹² Mbaj naj, palga nuurnu cagusule'nu diidx xcuent ni gubaṁsac Crist loj rebengut, ¿xhicuent yu'tu ni rnii, xheti yälrbansac loj rebengut? ¹³ Palga xheti yälrbansac lo rebengut, dxejc nicla Crist di nibansac lo rebengut. ¹⁴ Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'siza najc xcälirililajztu! ¹⁵ Luxh et ni'ctis. Abiga'nu sa'csi rusgueenu rniinu baspaṁsac Dios Jesucrist loj rebengut, luxh dini nuspaṁsacni loj rebengut, palga guliini di bejn guibaṁsac loj rebengut. ¹⁶ Niluxh palga di rebengut chäs, niclaza Crist di nibansa'c lo rebengut. ¹⁷ Luxh palga di Jesucrist nibansac loj rebengut, xhet sajcdi xcälirililajztu, sanuutistu loj xtojltu. ¹⁸ Sigajcza agunijt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäj! jiaduxhtej guiraa reni ruhuii loonu.

²⁰ ¡Per dini gac si'c! Guliipacni gubaṁsac Jesucrist loj rebengut. Laani gac ganiddoo loj guiraa rebengut ni gubaṁsac, luxh laani dini niejt par tejpas. ²¹ Sigajcni biääd yälgujt loonu xcuent tejtis niguii, sigajcza biääd yälrbansac lo rebengut loonu xcuent tejtis niguii. ²² Sigajc xcuent te niguii ni laa Adán biääd yälgujt, sigajcza xcuent Jesucrist biääd yälrbansac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejnni che jiädsacni lo guedxliujre, guiraareni suspaṁsacni. ²⁴ Che agujc ni'c, dxejcti siääd dxe lult che gudedsaṁsacni yälrbabee lo Dios Xtradni, che abadzujlñi guiraa reyälrbabee, guiraa reyälguxhtis, guiraa reyälmilagwr. ²⁵ Nungäjlñi pac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶ Lult ni rdxe'ch lojni ni gunitlojni najc yälgujt. ²⁷ Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali recos, dxejcti sudeedni guideb yälrbabee loj Xtradni Dios, te xtebtis Dios guinibee guira'tipac.

²⁹ Palga rujntu xhigab di bejn guibaṁsac loj rebengut, ¿xhi gun rebejn nani robnis xcuent rebengut? Palga di bejn guibaṁsac lo rebengut, ¿xhicuent rutiobnisreni la'tu xcuent rebengut?

³⁰ ¿Xhicuentza rdxunnu lo casionduhx guira'ti or? ³¹ Rniliäpac lojtu, rebetzä, caläpä xpala'ntu xcuent Jesucrist Xtradnu ni cayun xtzuunni lojtu. Ni'cni guniä lojtu, guira dxej rguiilreni narä te ju'treni narä. ³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibaṁsac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³ Na'c gusaantu gusgueereni la'tu, palga sachaaḡlu lo benguijdx näjza luj sajclu benguijdx. ³⁴ Basaniñ xcäriejnlu si'cni nanab gunlu. Bascuääz dojlñi ni rujnlu sa'csi yu' balti bejn ni dipac gumbee Dios. Te guitujytnu ni'c rniä diidxre lojtu.

Xho guibaṁsac rebengut

³⁵ Naj yu' reni rniabdiidx: “¿Xho rbaṁsac bejn loj rebengut? ¿Xhoza gac tiejxhreni?” ³⁶ ¡Chip nayäällu! Che rbe'clu te binij, di gäj! guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjga si'cni rlaizlu gacni, alga rbe'clu xhob o triuu o ste'ca binij, ³⁸ niluxh Dios rujñ rliejnni, rustioobni gäjga, lo tejga gäj! rudeedni

xpalajgni o tiejxhni, si'ctis ni rlajzni. ³⁹ Xhet guiraadi retiejxhreni najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjl. ⁴⁰ Sigajcza yu' tiejxh rebajl xhaguibaa, tiejxh rexten guedxliujre. Niluxh yälrdimbicha' xten rebajl xhaguibaa najc tej, dxejc yälrdimbicha' guedxliuj najc ste'ca. ⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajnni par tejpas. ⁴³ Che rga'tzni, rujn bejn xhigab xhetru gacnädi tiejxhga, niluxh che guibansacni, lacti sacru, lacti sajz tiejxhga. Che rga'tzni, xhetru sajcdi gunni, luxh che guibansacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: "Nigui galooga ni laa Adán, bejn Dios gujcnı te beñ nabajn." Niluxh Adán ni biääd lult, Jesucrist najc Sprit ni runiidx yälñabancıob loonu. ⁴⁶ Ganid najc yälñabajn xten guedxliujre, dxejctiru yu' te yälñabancıob xhaguibaali. ⁴⁷ Sigajcza niguii galooga najc beñ guedxliujre, niluxh ni rojp niguii ni biääd najc beñ xhaguibaali. ⁴⁸ Benchee Dios Adán con yuj, najcni beñ guedxliuj. Xhaguibaali biääd Jesucrist, najcni beñ xhaguibaa. ⁴⁹ Sigajcni najcnu si'c beñ guedxliujre, sigajcza sajcnı sigajc najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääł näjza rejn xhaguibaa cadro yu' Dios. Tiejxhnure nani sinıtloj di gacdiza xca'ni stee tiejxh ni najc par tejpas. ⁵¹ ¡Colhuıı! Rlazäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵² tera't bälzule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. ⁵³ Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtnı, niluxh tiejxhnu ni najc xten xhaguibaa di gacdi guetni, najcni par tejpas. ⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajz guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcälñayanlu naj, ä?" ⁵⁶ Xcälñayan xten yälgujt najc dojl. Xcälñabee dojl najc leiı. ⁵⁷ Niluxh rdeednu xquixtıos lo Dios, nani runiidx te yälñabee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, colyejnı sigajcni räpä gun reben rexquidoo Galacia. ² Casob dmingw, nalajznu ganid dxej xmaan, tejgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jialä. ³ Te che guidzunä, guxhalä meelga, näjza

tiop-choṇ guijtʒ chanä chutis bejn ni cuetu chasa'nni guedx Jerusalén.
 4 Palga laaca cha'aza, sajca chänäreni narä.

Xhigab ni bejn Pabl chääni biaj

5 Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. 6 Dxejcti pet siannäa la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. 7 Sa'csi di rlazä jiädhuiätu te ladejtʒsi, rlazä jiannäa la'tu xchejpac, palga gusaan Dad Jesucrist gunä si'c. 8 Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. 9 Sa'csi ro'c yu' xhidajl bejn nani rlajz guisieed xtidx Dios, niluxh ro'c yu'za xhidajl reni rdxe'ch loä.

10 Palga guidzujn Timoteu lojtu, saru colhuiini, te na'c chuni yärsia' la' ni yunäjni la'tu, sa'csi cayujnni xtzuum Dios sigajc runä narä. 11 Na'c gusaantu chu tej ni cuälazni, colcuedx lajzni, dxejc colgusunejzni, te jiädhuiini narä ree, sa'csi ree cabäaznu laani con rebejtʒnu.

12 Niluxh xcuent bejtʒnu Apolos, räpäza lojni niäädpacni lojtu con rebejtʒnu, niluxh di rlajzpacni niäädni naj. Per siäädcani dxejtis ni gac jiäädni.

Rextixtios lult ni ruxhalni

13 Colʒusin, colʒsudzu'tz lo yälirilajz xten Dios, colyejn dzuun si'c niguii, colyajc benḁaan. 14 Xhitis ni rujntu colyejnni con yälirinälajz.

15 La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduhxreni rebejtʒnu nani huililajz xtidx Dios ro'c. Naj rniabduxhä lojtu, 16 colgusoob xtidx rebejnga, näjza xtidx guiraa rebejn ni racnäj rexpejn Dios, ni rujnza xtzuum Dios. 17 Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu. 18 Gulecdxireni lazä näjza lajztu, ni'cni, coljiu sa' rebejnga!

19 Reben xquidoo Dios nez reguedx Asia ruxhal xtxitios lojtu. Aquila näjza chäälni Priscila näjza rebejn ni re' rolijzreni ruxhalzareni xtxitios lojtu. 20 Guiraa rebejtʒnu ruxhal xtxitios lojtu. Colguinii tejgatu lo sa'tu: "Xchan, gacnäj Dios la'tu."

21 Narä Pabl, ruxhalä xtxitios lojtu, lagajc narä benä relettre.

22 Palga yu' chu tejtʒu ni di chanälajz Dad Jesucrist, sunitlojni. iDad Jesucrist, gudaal!

23 Gacnäj xcälʒulasajz Jesucrist guiraatu. 24 Yälirinälajz ni rapä xcuent Jesucrist suchunäjni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guijtz ni bacuaa Pabl lo guidoo xten guedx Corinto

¹ Narä Pabl nacä apost xten Jesucrist sa'csi si'c rlaiz Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijszre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtradnu näjza lo Dad Jesucrist, gacnäjreni la'tu, guscuedxireni lajztu.

Trabajw ni gudejd Pabl

³ Guiliä'pnu xpala'n Dios Xtrad Jesucrist, nani rulaslajz nuurnu, nani rustoolajz nuunu. ⁴ Che rdejdnü trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. ⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuedxni Dios lajznu, si'c rujnni te cuedxilajztu te guntu huant che tedtu lagajc trabajw ni cadejdzanu. ⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnü, suscuedxni Dios lajztu sigajcni ruscuedxini laaznu.

⁸ Rebetzä, rlaizä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. ⁹ Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. ¹⁰ Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, ¹¹ sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcäl'rulaslajz Dios ni baniidxni loonu.

Xhicuent di Pabl nij guedx Corinto

¹² Dee najc nani ruspaa laaznu: rbedxi xcäriejnnu, ni'c ruluii loonu laaca nabajnnu, con yäl'nadolajz riennu si'cni rnibee Dios; xhet sa'csi rajpnu xcäl'najn reben guedxliujdi, alga sa'csi racnäj Dios nuure. Si'cpac nabajnnu lo guedxliujre, luxh maazru che yu'nu lojtu. ¹³ Cacuaanu lojtu rediidx ni sajz gojtu, ni sajz gacbeetu, luxh cabäzä sachesa'ctu guiragajc rediidx ni gucuaä, ¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

¹⁵ Ni'cni ganiddoo benä xhigab niädhuiä la'tu te nibalajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu

dini guntio'p lajzni, dini guinii tejsi diidx “sunäni” näj “dina gunäni”, niluxh laani guiraa xtiidxni najc “sunäpacni”. ²⁰ Si'cza guiraa rediidx ni bia'n Dios loonu xcuent Jesucrist najcreni “sunäpacni”; näjza xcuent laani najcreni “sugacni si'c” par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. ²² Abacuaazani xseenni loonu, ni'cni baniidxni Sprit Dxi xtenni te cuääzni neñ lastoonu.

²³ Rbedxä loj Dios gacbeeni xhi yu' lastoä, guliipacni te diruna gotalä xcäl'najtu, ni'c dina niälsacä guedx Corinto. ²⁴ Di rlajznu guinibeenu xho chalilajztu, alga rlajznu gacnäänutu lo dzuun te guibaa lajztu; guliipac agusudzu'tztu lo xcäl'rililajztu.

2

¹ Niluxh lagajc xcuent xcäl'nasa'cä benä xhigab dina jiädhuisacä la'tu che cayac-huin lazä. ² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³ Ni'cni lagajc xcuent ni'c bacuaä lojtu, te che jiälä lojtu, di rebejn gunhuin lazä nani riäj'l guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacheetu yäl'sanälazduxh ni sanälazä la'tu.

Yäl'rusiäj'l lajz ni yu' par nani bejn falt

⁵ Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. ⁶ Alabasacsiduxh xhidajl bejn dade'ga, na'cru gusacsítuni naj. ⁷ Naj col'siäj'l lajztu xcuent xtojlni, col'cuecdxi lajzni didi gac-huinduxhtej lajzni. ⁸ Ni'cni rniabä lojtu, col'chanälajz bejnre si'c ni huinälajztuni galoo. ⁹ Bacuaxgaäza lojtu te gacheä laa susoobtu xtidxä. ¹⁰ Naj renani jiäj'l lajztu xtojlni, näj narä siäj'l lazäni. Sigajcza narä, nani basiäj'l lazä, palga yu' xhi basiäj'l lazä, benäni xcuent xcäl'nasa'ctu, nez loj Jesucrist, ¹¹ te di gun beñdxab gaan nuure, sa'csi anajnnu xho najc latsiaj ni rujn beñdxab.

Guyu' Pabl'yärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä, ¹³ niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

Jesucrist rujn riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios. ¹⁵ Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni. ¹⁶ Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'naban'coob. ¿Chu laa ni racbee sa' recosga? ¹⁷ Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäj Jesucrist nez loj Dios ni cahuii xhini'c riennu.

3

Diidx nacoob ni basa'n Dios loonu

¹ Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rnii najcreni beŋsa'c. ¿La rlajzzatu guiluiinu lojtu sa' guijtzga, o guiniabnu guntu sa' guijtzga xca'nu, ä? ² La'tu najc si'c xquijtznu ni rnii xho najcnu. Lastoopacnu acujatu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. ³ Huenliisi rluijoj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dyan xten Dios ni nabajn bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios. ⁵ Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. ⁶ Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleiini biädnä dojl, dxejc gujtnu. Niluxh didxcoobga ni rusule'nu biädnä Sprit Dyan xten Diosni, luxh runiidxni yäl'nabancoob loonu. ⁷ Leii baluii yu' xtojł bejn, riäjł guetreni. Xhidajł seen guyu' che bacuaa Dios rediidxga lo guij. Luxh di niajcdi nuhuii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yälrdimbicha'ga. ⁸ Palga si'c gujc che biädä leii, aticaxh naj su'ru xcälrdimbicha' xleii Sprit Dyan xten Dios, ni najc redidxcoob nani abasule'nu. ⁹ Palga xleii toMoisés ni baluijoj yälgujt xcuent dojl biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. ¹⁰ Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. ¹¹ Palga yälrdimbicha' nani biuii bianisesduxhni tera't, stee yälrdimbicha're ni najc par tejpas sidimbichasesduxhni.

¹² Luxh ni'c runiidx yälrbecdxı lajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejn Israel cayuii yälrdimbicha' ni guyu' lojni. ¹⁴ Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäuu lastoreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵ Lo dxe najli che rolreni xleii toMoisés, najcni si'cni ruscäjy te lajd xcäriejnreni. ¹⁶ Lo xtidx Dios rnii scree: "Niluxh che gusiechlajz te bejn, gudzurēni nez loj Dad, sibicaj lajdga", nalajznu sacbeeni xtidx Dios. ¹⁷ Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojni, didi guscäjyni xcäriejnmu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi caxaanu cayajcnu si'c najcni nājza caca'nu xcälrdimbicha' Jesucrist, sa'csi si'c cayujn Sprit Dyan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balasla-jzzani nuure, dipacnu jläxhan. ² Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiaapacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, ⁴ sa'csi abascäjy bendxab ni rnibee guedxliujre xcäriejnreni, si'cni rujnni lo rebejn nani di chalilajz

xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶ Che benchee Dios guedxliuj, guniini: "Lo xcäy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembeecäälrdimbicha' Dios nez loj Jesucrist.

Xho guibanu con yälirililajz

⁷ Nuurnu najcnu si'c te guesyuj, xhet sajcdinu, niluxh guidxanu te yälñasacduxh, ni najc xtidx Dios xcuent Jesucrist, te guiluiloj xcälñasac'c xten xcälribee Dios lacuaa xhisi te yälñadipbäz xtenu. ⁸ Rdeednu trabajw guira nejz, niluxh dinu gunijt yälrunloj. Mase di jien xho jiennu, dinu chu yärsia'. ⁹ Rusacsireni nuure, niluxh di Dios cuälaznu, rguijnreni nuure, dizareni ju't nuure. ¹⁰ Cadrotis rionnu rusacsireni nuure si'c basacsireni Jesucrist, te si'c nen tiejxhnu guiluilojzani yälñabansac loj rebengut xten Jesucrist. ¹¹ Cadrotis rionnu rlajzreni ju'treni nuure sa'csi rusule'nu xtidx Jesucrist te si'c za nen tiejxhnu guiluilojzani xcälñabajn Jesucrist loj reben guedxliujre. ¹² Ni'cni rujn yälgujt dzuun loonu, per yälñabajn cayujn dzuun lojtu.

¹³ Sa'csi rajpnu lagajc xsprit xten yälirililajzga, sigajc ni caj lo xtidx Dios: "Huillilazä ni'cni basule'ä diidx." Sigajc za nuure, huillilaaznu xtidx Dios, ni'cni rusule'nuni. ¹⁴ Sa'csi nadonnu lagajc nani baspanñsac Jesucrist loj rebengut, lagajc za laani gun guibanñsacnu con Jesucrist te gunni sunäjnu la'tu nez lojni. ¹⁵ Rsiajcnu guiraa ni rsiajcnu te xcuentsi la'tu gudeedru bejn xquixtios lo Dios, te guiliä'pruzareni xpala'nni xcuent yälñulaslajz ni sanuutis care'ch lo xhidajl bejn.

¹⁶ Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷ Retrabajw ni cadeednu lo yälñabajnre rdedgajczeni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. ¹⁸ Dinu fiitis renani ružen lo guedxliujre sa'csi sinitloj reni'c, alga cayenloonu renani di gužen, sa'csi renani di gužen najczeni par tejpas.

5

¹ Aracheenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Guliicani, lałni dxunnu nen tiejxhre, rbedxnenñu rdeednu trabajw, ni'cni rlajznu maläi agojl guidxaa tiejxh guedxliujre te xca'nu te tiexhcoob ni siääd xhaguibaa. ³ Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. ⁴ Lałni dxunnu nen tiejxhre rbedxnenñu, rdeednu trabajw, sa'csi di rlaaznu suxhabääl xaimnu, rlajznu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. ⁵ Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

⁶ Ni'cni dinu guidxeeb, sa'csi nadonnu lałni nabajnñu lo guedxliujre, di gacdi guibajnñu xhaguibaa loj Dadga. ⁷ Sa'csi nabajnñu xcuent nani rililajznu, xhet xcuentdi nani rajc rhuiinu. ⁸ Ni'cni rniä nabajnñu dinu guidxeeb, rchaloonu hueenru guisa'nnu tiejxhnu lo guedxliujnure, te choläznäänu Jesucrist xhaguibaa. ⁹ Ni'cni tejtis najc xhigabnu, palga

lo guedxliujre o xhaguibaa, rlanjtsnu jiennu renani gun guibaa lajzni. ¹⁰ Sa'csi guiraanu riäjł suunu nez loj yagxhiil cadro gun Jesucrist yälguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yälrbecdxı lajzni

¹¹ Luxh sa'csi rdxejbnu (nalajznu rucuadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajnnu; maläiı näjza lo xcäriejntu guluiloj xho nabajnnu. ¹² Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctı lo rebejn ni rchagłajztis ruhuıı xho rien bejn, direni gacbee xhi yu' nen lastooreni. ¹³ Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnuni par la'tu. ¹⁴ Sa'csi sanälazduxh Jesucrist nuure, ni'c rusoohtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebejn, te renani rililajz xtiidxni, na'cru guibajnneni xcuenttis laareni, alga guibajnpacreni xcuenttis Jesucrist nani gujt, nani gubansac xcuent laareni. ¹⁶ Ni'cni nuure dinu fiı lo bejn si'cni najcreni lo guedxliujre. Galoo biembeenu Jesucrist si'cni gujcnı che gubajnnı lo guedxliuj, niluxh naj et si'cti riembeenuni. ¹⁷ Ni'cni chutis bejn, palga rililajzni xtidx Jesucrist, sujnnini te beıcoob, diruni guichagłajz gunruni nani rajc lo guedxliuj, alga guichagłajzni gunni xtzun Dios.

¹⁸ Guiraa dee siäd lo Dios, nani basiäjł lajzni xcuent Jesucrist, dxejctı baniidxni loonu rediidx xcuent xcälrusiäjł lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunäj Jesucrist, cagusiäjł lajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. ²⁰ Ni'cni si'o'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. ²¹ Di Jesucrist niujn nicla tej dojł, niluxh sa'csi sanälajz Dios nuunu, xcuentnu bejn Dios gujc Jesucrist si'c te beıdojł che gule'cni guiraa rextojł guedxliuj yejc Jesucrist che cuajni lo cruzj. Si'c gujcnı te sajı ga'pnu xcälınaya, xcälınasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäj Dios; palga guntu si'c, xlia'si cua'tuni. ² Sa'csi loj xtidx Dios caj scree: Dxej nani riäjł gunäni, bacuadiagä xtiidxtu, dxej che gubıcaj xtojłtu gucnäă la'tu.

ıColjıejn! Naj najc te tiempsa'c, coljıejnza, naj najc dxej ni guıbicaj xtojłtu.

³ Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. ⁴ Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsıreni nuure; che rdejdnı trabajw; che di jıen xho jiennu; ⁵ che rguijnreni nuure; che rusäureni nuure nen latzguiib; che rdejdnı lo bieiduxh; che rdajł xtzunnu; che re'ch bacal yääl; ⁶ che rucua'nnu; ⁶ guluilojza najcnu xmos Dios xcuent xcälınabaısa'cnu lo Dios; näjza xcälınasa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprıt

Dxan xten Dios nen lastoonu; nājza xcuent yālřinälajzpac bejn; ⁷ nājza xcuent didxguliipac; nājza lo xcālřnibeduxh Dios; ca'zanu si'c te madxed xcālřnaya Dios, ca'nuni guopņaanu, ladbee, nājza ladbājgw. ⁸ Ruluilojzanu najcnu xmos Dios palga chā'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu beņrusguee, mase najcnu bejn ni rnii didxlii. ⁹ Palga rut rļajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijņreni nuure, niluxh dinu guet; ¹⁰ najcnu si'c bejn ni yu' xliajs, niluxh rbalaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹ Lojtu, ben Corinto, aguniliinu lojtu guiragajc rediidx ni yu' nen lastoonu. ¹² Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu. ¹³ Naj narā rulidxā la'tu si'c rulijdx te Dad rexi'nni: iColguinii loonu rediidx ni yu' nen lastootu!

Najcnu si'c xquidoo Dios ni nabajn

¹⁴ Na'c guchaagtu lo rebejn nani di chalilajx xtidx Dios, sa'csi di gacdi gunteblojtu dzuun sa'csi tejni rļajz gun dzunsa'c, steeni rļajz gunni dzunguijdx, xho gac sanāj bajl xcājy, ā? ¹⁵ O xho gac sanāj Jesucrist beņdxab ni laa Satanās, ā? O xho gac sanāj te bejn nani rililajx xtidx Dios te bejn ni di chalilajx xtidx Dios, ā? ¹⁶ xXhixh tebloj najc xquidoo Dios con rebanāj, ā? Ni nuunu najcnu xquidoo Dios ni nabajn, lagajc si'cni gunii Dios galoo:

Cuāzā nen lastooreni, sisianāāzarenī.

Narā sacā Xtiosreni, laareni sajcreni rexpenā.

¹⁷ Ni'cni colřii galāiireni, colguibicaj lojreni, te laad colcuāāz, si'c naj Dios: Te gac xca'ātu, na'c falu recosdxuudx.

¹⁸ Dxejc la'tu sajctu rexinganā, rexindxa'pā, luxh narā gacā xtadtu, si'c naj Gueb Dios ni rajp guiralii yālřnibee.

7

¹ Ni'cni, la'tu ni sanālazā, sa'csi abia'n Dios diidxre loonu, do'o guisia xcāriejnnu, lastoonu nājza tiejxhnu, do'o cuācaj guiraa rexhigabguijdx, guiraa redojl, te gac sanu lo rexnezyudxan Dios con xcālřrdxejb Dios.

Xho basiejch lajz reben Corinto

² iColchanälajz nuunu nen lastootu! Xhet latsiajdi biennu lojtu. Rut baxhĩdinu. Rutza basgueedinu. ³ Dina guiniā rediidxre te cue'cā xquejtu; ni aguniā lojtu galooli, la'tu yu'tu nen lastoonu palga tejsi guetnu, o palga tejsi guibajņrunu. ⁴ La'tu nadip lazā, rniduxhā didxsa'c xcuenttu lo bejn, rbedxi lastoā, rbalazduxhā loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yālřrdijl ni guyu' guideb gabinu, xcuentza yālřrdxejb ni guyu' lastoonu. ⁶ Niluxh Dios ni racnāj rebejn ni rac-huin lajzreni, gucnāj nuure, sa'csi che bidzujņ Tito guredxi lastoā. ⁷ Luxh xhet sa'csi bidzujņtis Tito, nājza sa'csi gulecdxitu lastoo Tito, nājza sa'csi biādnāni diidx xho yu'tu, xho rļajztu fiitu narā, xho yu' xliajs lastootu xcuent xtojłtu, xho rļazduxhtu guntu si'cni guniā lojtu, ni'cni bibalasduxhāru.

⁸ Acananä guc-huin lajztu che biltu guijtzt ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtztga guc-huin lajztu, xhet xchejdi guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlaiz Dios, te di yu' xhi gunijttu xcuent nuunu. ¹⁰ Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejn si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujnni nitloj bejn tejpas. ¹¹ La'tu bejntu huant xliajs ni baxhal Dios si'cni rchaglaiz Dios gac. Naj icolhuui gan! jLacti xhi cossa'c bejn par la'tu! Bejn bahuisa'cpactu xhini'c gujc, te gac gusulegajctu xcuentni; dxejc bejn bidxe'chtu, näjza bejn bidxejbtu, ni'cni basaantu dojlga, dxejcti bejn rlaizpactu nuhuiitu loä, bejnzani guyu'tu yärsia' xcuentä, bejnzani rlaiztu guntu yälguxhtis bejn nani bejn dojlga. Guiraa redee baluiloj et la'ditu bejn dojl. ¹² Ni'cni, che bacuaä guijtztga, dina nucuaäni loj bejn ni bejn dojlga, niluxh bacuaä guijtztga lojtu te guiluiloj xcälrsia'tu ni rajptu xcuent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpriitni xcuent guiraatu. ¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxgulii, sigajcza najc guiraa redidxsa'c xcuenttu ni guniä loj Tito, guliipacni. ¹⁵ Ni'cni maazru sanälajzni la'tu, che rnaj lajzni xho basoobtu diidx, xho bejntu cua'tuni che bidzujnnu, racsejslitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

8

Saru rudeedreni meel

¹ Naj bejtznu, rlaiznu guiniinu lojtu xho badeed Dios xcälrlulasajzni lo reben Macedonia ni huililajz xtidx Dios. ² Mase gudedduxhreni trabajw, bibalajzreni, mase xhetliidi gojpreni, badeedreni meel si'c te bejn ni rajp. ³ Narä caniliä lojtu, badeedreni xmeelreni si'cni gojpreni, luxh badeedreni loj ni naa bejn sajg gudeedreni. ⁴ Gunabduxhazreni loonu guisaannu gudeedreni xmeelreni te gacnäjreni rexpen Dios. ⁵ Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. ⁶ Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yälajn; rchaglaizpactu guntu dzuun; rinälajztu nuunu, ni'cni na'c gusaantu tedcag gunzatu dzunsa'cre, nalajznu, gudeedtu meel.

⁸ Dina guiniä lojtu colyujnpacni; narä rlaiztis gacbeetu xho rbaalajz reni rudeed meel te guiluiloj don la gulii sanälajzpaczatu rexpejn Dios. ⁹ Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuentu gujcni si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

¹⁰ Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlaizpactu guntuni. ¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. ¹² Sa'csi palga rlaizduxh te

bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³ Dina guiniä gudeedtejt te tedtu trabajw te gapduxh stee bejn, alga te gacteblojtistu. ¹⁴ Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc suniidxzareni te gusalojreni nani cayäädxtu te si'c gacni tebloj. ¹⁵ Sa'csi lo xtidx Dios caj scree: "Te bejn nani batopduxh yäl₁nasa'c, xhet bia'ndiru, dxejcti nani guxii batojp yäl₁nasa'c, xhet biäädxd." "

Tito näjza rexcompanieerni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rladuxhpacni gunni xtzuun Dios, naj lagajc laani bejn ni xhigab jädhuiini lojtu te luux dzuunre.

¹⁸ Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäjni narä te gacnäjni narä lo xtzuun Dios nani cayennu te guiliä'pni xpala'n Gueb Dad Jesucrist, te guluilojza lacti rlaizpacni jiennu xtzuunni. ²⁰ Ni'cni rlažä jäpadaduxhnu te di chu tej ni guiniyay nuure xcuent melrore ni chosa'nnu lo rexpejn Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²² Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlaizpacni gunsa'cni xhidajl dzuun, luxh naj rlaizruni gunsa'cni redzuunga sa'csi nadip lajz ni la'tu. ²³ Palga yu' chu guiniabdiidx xcuent Tito, colyejtz lojni laani najc nani cayunnäjä narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴ Ni'c na'c guidxejbte che yu'tu lo rebejn reguidoo guluiipactu loj rebejnğa xho sanälajztu, näjza redzuun ni rujntu ni'c rniinu ganax didxsa'c xcuenttu.

9

Meel par rebejtznu

¹ Ni'cni dina gucuäärü lojtu xcuent dzuunre, nalajznu, yälracnäjä rexpejn Dios, ² sa'csi anancheä rlaizpactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. ³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjlzitu gudeedtu xmeeltu, sigajc ni agunixgää lojtu. ⁴ Didi che jädnää reben Macedonia jiophuiinu la'tu, xhet rajpditu, dxejc jianxtuyä narä, näjza la'tu. ⁵ Ni'cni benä xhigab, nanabpac jädxgaa rebejtznu, jädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlaizpactu gudeedtuni, xhet sa'csi rniinu riäjlpac gudeedtuni.

⁶ Rniliä lojtu, nani guxii rbe'c, guxiiza yäl₁nasa'c guiliäsni, niluxh nani rbe'c xhidajl binij, xhidajlza yäl₁nasa'c guiliäsni. ⁷ Tejgatu colhuii don lacti sajc gudeedni, dxejc si'c sugudeedni si'cti ni rlaizni, na'c gun tiopdi lajz ni, etza sa'csi riäjlpac gudeedni, sa'csi Dios sanälajz bejn ni rbaali lajz ni rudeedni meel lojni. ⁸ Luxh Dios sajc guniidxru xcälracnäjäni lojlu, te

si'c guixe-guixee sajplu xhidajl guiraloj rehxixtenlu, te ga'plu xhitis ni rquiinlu loj guira'ti xtzunsa'clu. ⁹ Sa'csi lo xtidx Dios caj scree:

Abadeduxhni loj reben ni xhet rajpdi luxh redzunsa'c ni rujnni, najcreni par tejpas.

¹⁰ Dios nani ruedeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yäl'nasa'c xten xtzunsa'ctu. ¹¹ Te si'c ga'ptu lacti yäl'nasa'c te gac gudeedzatu xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios. ¹² Sa'csi che racnäjtu rebejtnu, dinu guideed ganaxtis ni rquiinreni, rujnzanu rudeedruene xquixtios lo Dios. ¹³ Che racnäjtu sa'tu si'c, ruluilojtu lacti rusoobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtu, nalajznu xcuent meel ni badeedtu lojreni, näjza loj guiraareni. ¹⁴ Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. ¹⁵ Xquixtiosti Dios sa'csi baniidxni yäl'nasa'cduxhfej loonu!

10

Yäl'nibee ni rajp Pabl sa'csi najcni apost

¹ Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac bennadolajz che biälä lojtu, niluxh che suga'a zijt lojtu, dxejc nacä bennialajz). ² Narä canabä lojtu, colguibansa'c te che jiädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rnii nabanä si'c te benguedxliuj. ³ Guliicani najcnu benguedxliuj, niluxh dinu gucuanäj sa'nu guiib nani rca' benguedxliuj che rcuaareni. ⁴ Sa'csi reguiib ni rca'nu te guidiisa'nu direni gac sa' guiib ni rca' benguedxliuj. Nuunu rucuaanu con xcäl'nibee Dios te riennu gaan loj guiraa rexcäl'nibee guedxliujre. ⁵ Ni'cni cagutzujl'nu guiraa rehxigabguijdxrene, näjza nani rchaloreni najc xhigabro nani rlajzreni guiniyajreni yäl'rumbee Dios, luxh caca'nu guiralii rehxigabnu cagutednureni ladznäa Jesucrist te gusoobnu rextidx Jesucrist. ⁶ Cabäätisnu te gunnu yäl'guxhtis loj chutis bejn ni dini gusoob xtidx Dios, che abasoob guiragajctu xtidx Dios.

⁷ La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacheepacni sigajcni ahuililajzni xtidx Jesucrist, sigajcza nuure ahuililajzanuni. ⁸ Sa'csi mase guiliä'pärü xpala'nä xcuent yäl'nibee ni rapä, ni baniidx Dios te gustiobä xcäl'riliilajztu, et te guxhinädi la'tu, nicla si'c dina guituiä. ⁹ Dina rlazä guchalotu rlazä guchebä la'tu con rexquitzä. ¹⁰ Sa'csi rniireni: "Lo rexquijtni caj didxnagajn, didxnialajz, niluxh che suga'ni laapacni, xheti xcäl'siudzu'tzni, luxh xho rnijä diidx ni rniini." ¹¹ Luxh ni rii si'c, sugacheepacni dee: si'cni najcnu con rextidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹² Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³ Nuure dinu gunnarotej lagajc nuurnu, niluxh riennu si'cni nungäl'jiennu, xcuent yäl'nibee ni baniidx Dios loonu te jiennu dzuun cadro yu'litu. ¹⁴ Ni'cni dinu nidedcaj xcäl'nibeenu che bio'pnu lojtu, sa'csi baniidx Dios yäl'nibee loonu ganiddoo nuunu gusule'nu xtidx Jesucrist lojtu. ¹⁵ Dinu niennaro

lagajc nuurnu xcuent xtzuum ste'ca bejn, ascanu lagajc nuunu biennuni. Cabääznu tioobru xcälrlilajztu, te gac jienrunu dzuun lojtu, si'ctis gal jiennuni. ¹⁶ Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

¹⁷ Sa'csi nani rlaiz gacnaro, suguiliä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

11

Pabl näjza rebejn ni rniisi najcreni apost

¹ Maläii chanunäsijctu narä laļ ni guiniä gaii didxnayäle', niluxh asanunäjtu narä. ² Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladznaa Jesucrist te xca'ni la'tu. Rlazä gactu benmaya chäätu lojni, si'c te dxa'p che ruchnaani te bi'n, rut bahualdini. ³ Niluxh rdxebä didi gusguee bendxab la'tu si'c ni basguee bäl Eva con xcälñadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. ⁴ Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee spirit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵ Narä runä xhigab dina gacä bejn ni guxiiru sajz loj guiraa reapost.

⁶ Mase di gacdi guinisa'cä, xhet yälñajndiza cayädxä; niluxh ni'c huenlisi rlui loj guiraa rediidx ni abaluiä lojtu, guiraa redzuun ni abenä ro'c.

⁷ O ɿla benä te dojl guyu'ä lojtu si'c te beñ nadolajz, te gactu benruru, sa'csi xhetliidi cua'ädi xcuent ni basule'ä xtidx Dios lojtu? ⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuumtu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuumtu, luxh si'c sinuu gunä. ¹⁰ Guideb didxlii xten Jesucrist ni yu' nen lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. ¹¹ ɿXhicuent rniä si'c? ɿLaa sa'csi dina chanälazä la'tu, ä? ɿXho gacni si'c! ɿDios anajn lacti sanälazä la'tu! ¹² Niluxh nani rungacä, lagajc ni'c sinuu gunä, te gudxonä renani rlaiz gacnaro, renani rlaiz naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujsireni si'c ni najcreni apost xten Jesucrist, luxh rut najcdireni. ¹⁴ Luxh xho dini gac si'c, ni lagajc bendxab ni laa Satanäs rululoj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos bendxab riääd, rujsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdejð Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnì te guniäza didxro lagajc xcuentä. ¹⁷ Diidx ni rniä dina guiniäni xcuent xcälñabee Dios, alga rniäni si'c te ni rajc yejcnì, lala redidxro ni rniä xcuent lagajc narä. ¹⁸ Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. ¹⁹ Ni la'tu, sa'csi nasinduxhtu,

sanunäjtu rebejn ni rajc yejcreni. ²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu. ²¹ Mase rtuiyä guniäni, dipac niajcdi niniä diidx lojtu te niacä si'c najc rebejnğa. Niluxh loj xhitis nani runnaroreni, (canisicä si'c te beñnayääl) narä sajrcu gunnaroä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. ²³ ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcn. Abenäru dzuun lojreni, agudijnrurenä narä loj ni gudijnreni laareni, abasäururenä narä neñ latzguiib, nicla gac guigab bal huält gudijnreni narä; baltiza huält ameer nietä. ²⁴ Gaii huält gudijn rexpejn Israel narä, tejga huält batiäjlreni duguijd detzä galbitzubigaa huält. ²⁵ Choñ huält bahuajcwreni narä garo't; stee huält bacuaareni guij yecä; choñ huält biäaz barcw cadro sa'a loj nisdoo; teb dxej, teb yääl guyu'a lo nisdoo. ²⁶ Huaduxhä biał, lacti bixuñ riesgw xcuentä lo gueuu, xcuent regubaan, xcuent rebenlaxhä, xcuentza rebenzajt. Bixunza riesgw neñ reguedxro, nájza nez lo reyubijdz, nájza lo nisdoo, nájza xcuent rebejn ni rusguee, rniisireni najcreni bejtnu lo xtidx Jesucrist. ²⁷ Abenduxhä dzuun, agudedduxhä trabajw, balti yääl dina niesä, balti huält gulanä, biolä, balti huält xheti xhi niauä; agudedäza yälñalduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'a xcuent reben guidoo ni huililajz xtidx Dios. ²⁹ Che rdxajg tejtu, nájza narä rdxagä. Palga tejtu riabj lo dojl, narä ruduxhä yärsia' xcuentni. ³⁰ Palga nanab gunnaroä lagajc narä, sunäni xcuent rediidx nani rululoj xcälrdxagä. ³¹ Dios ni najc Xtađ Jesucrist, nani riäjl guiliä'p xpala'nni par tejpas, ananchee dina gusgueä la'tu. ³² Che guyu'a guedx Damasco, gubernadoor nani guyu' ro'c, najcni xpejn rei Aretas, gunibee gojp rexcuxhtisni guejdxga te niniaazreni narä te nisäurenä narä neñ latzguiib. ³³ Niluxh basiäjtreni narä neñ te dximro nez ro' te padeer ni rdejđ gabi guejdxga, te si'c gulää ladznäareni.

12

Dios baluiloj lo bacal

¹ Mase riäjl guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal nájza xcuent nani baluiloj Dios loä. ² Numbeä te niguii ni ahuililajz xtidx Jesucrist. Gutzu-daj iyz huijni guibaa ni riojnğa, dina ganä laa guideb tiejxhni huijni, o la ganax xspritni huij, Diostis najn. ³ Diostis najn la guideb tiejxhni, o ganax xpritni, niluxh nanä xho huij niguiiga, ⁴ guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajz guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululoj xcälrdxagä. ⁶ Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huäaz tiexhä, ni baxhal beñdxab xten Satanäs te gusacsini narä te di gacä te beñnaro.

⁸ Chon huält agunabä lo Jesucrist xcuent ni'c, te guibicajni. ⁹ Niluxh laani najni loä: "Yälracnä j ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yäl'nadip, yäl'nadaan loä.

Yu' Pabl yärsia' xcuent guidoo ni yu' Corinto

¹¹ Agucä si'c te bejnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcro mase rut nacädi. ¹² Redzuun ni benä lał ni guyu'ä lojtu, benäni si'c te ni najcpac apost, huinuutis benäni guideb nadolajz näjza resean, näjza remilagwr. ¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¡Cölsiäjł lajztu narä dojlre!

¹⁴ Naj cayunä xhigab jiädhuiätu, naj gacni chon huält siälä. Di quilä xhixtentu, alga lagajc la'tu rguilä. Di rlazä gutalä xtzuuntu. Di riäjł cuchee rebiuux meel par xcuzejnreni. Reguzajn ni riäjł cuchee meel par rexi'nreni. ¹⁵ Xhet najcdi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä. ¹⁷ ¿Xhixh naatu cua'ä xhi xtentu sa'csi baxhalä rebejtznu lojtu, ä? ¹⁸ Che baxhalä Tito, räp lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Lałni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnä j Jesucrist te si'c tioobrutu lo xtidx Dios, rebetzä nani rinälazä. ²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rla jztu gacä. Rdxebä andi yu'tu ni cadijl, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza bie j. ²¹ Rdxebä andi che jiädhuiätu stehuält, gusanxtu j Dios narä xcuenttu. Rdxebäza sonduxhä xcuent xhidajltu nani abani j, bejntu dojl galoo, luxh gajdtu gusiechlajztu xcuent xtojltu. Yu'tu ni di guiban naya, resnä jtu bejn ni di gac chäältu, yu'za balti dojl rujntu.

13

Lult yäl'rulijdx xten Pabl

¹ Naj gac chon huält siädhuiä la'tu. Guira'ti quej nanab cue'creni con xtidx tio'p o chon bejn ni najnpac xhi dojl bejn te jgani. ² Mase ruti narä ro'c, arnixgaä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla te jtu, ³ sa'csi rla jztu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni nen lastootu. ⁴ Guliicani che cuajni lo cruz, gucnä si'c te bejn nani casis, niluxh naj nabajnni sa'csi rapduxhni xcälrnibee Dios. Näjza nuure rsia'cnu si'c te bejn nani casisnä j

laani niluxh nabaññajnu laani xcuent xcäl̄rnibee Dios ni baniidxza Dios xcuenttu.

⁵ Col̄ninäj lastootu lagajc la'tu, col̄huii la guliipac ahuililajztu xtidx Dios; col̄huisa'c xho najc lastootu. ¿La ditu gacbee rbäjz Jesucrist neñ lastootu, ä? Palga rutini, rusqueetu lastootu, ditu nililajztu xtidx Dios. ⁶ Narä rlazä gacbeetu, dinu nusguee lastoonu, ahuililajzpacnu xtidx Dios. ⁷ Rniabä loj Dios na'c guntu cosguijdx, xhet te guiniidi beñ didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸ Sa'csi xhetliidi rajcdi riennu te nitloj didxguli, xcäl̄rnibeenu najc te gusule'nu didxlii. ⁹ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcäl̄rililajztu lo xtidx Dios. ¹⁰ Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjl̄ tilnäätu xcuent yäl̄rnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejtznu, col̄guibalajz, col̄huii guisa' xcäl̄rililajztu, col̄cuecdxi lajztu, col̄yennäj sa'tu tejsi xhigab, dxitis gubajñ. Dios xten yäl̄rinälajz näjza yäl̄rbecdxi lajz chunäj la'tu. ¹² Col̄nii: “Xchan” lo resa'tu. ¹³ Guiraa rebejtznu nani ahuililajz ruxhaḷ xtixtios lojtu.

¹⁴ Yäl̄racnäj xten Dad Jesucrist, näjza yäl̄rinälajz xten Dios, näjza yäl̄racnäj xten Sprit Dxan chu neñ lastootu. Sugacni si'c.

Te Guijtz Lo Reben Gálatas

Pabl rucuaa guijtz loj reben guidoo nez región Galacia

¹ Narä, Pabl, nacä apost xten Jesucrist. Xhet rebejn di baxhal narä, xhetza bejn di gule narä. Lagajc Jesucrist näjza Xtadni Dios ni yu' xhaguibaa, nani guläs Jesucrist loj rebengut, laaren i agulereni narä. ² Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia. ³ Xca' guejbtu xcälracnäj Dios con xcälrbexilajz xten Dios xtadnu näjza xten Dad Jesucrist. ⁴ Lagajc laani cuäjbni gujtni te guslaani nuure lo dojl xten guedxliuj guijdxre, si'cni gunibee Xtadnu, Gueb-Dios. ⁵ Chä'p xpala'n Dios par tejpas. Sugacni si'c.

Xhetdi xhi stee didxcoob ni sajc guslaa nuure

⁶ Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. ⁷ Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸ Niluxh palga jiääd chu jiädluii lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejnga agubibdeni, chutis najcnu, mase naräni, mase te xangl Dios ni jiääd xhaguibaali. ⁹ Si'c ni guniä lojtu, si'c rnisacä lojtu naj: Pal yu' chu jiädluii lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejnga agubibdeni.

¹⁰ ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

Xtzun Pabl

¹¹ Colyabee sa'ä, diidx ni ruslaa bejn lo dojl nani abasule'ä lojtu di diidxga gac xhigab ben guedxliuj. ¹² Xhet lojdi ben guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴ Loj reni rusoob xleii toMoisés narä cagusbäru xtiidxni, nanduxhärü loj guiraareni. Loj rebejn nani sadxagä ladxä, maazru sanälazä xcostumbr retoxtadgoldoä. ¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶ Dxejc bibalajz Dios baluilojtni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä. ¹⁷ Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸ Che agudejd si'cti chon ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. ¹⁹ Niluxh dina nuhuiä loj chu stee apost ro'c. Lojtis Jacoob, betzhuin Jesucrist bahuiä. ²⁰ Rniliä nez lo Dios, dina guiniä didx-xhi, rediidx ni cacuaä najc guliipac.

²¹ Dxejcti hua'a reguejdx xten Siria näjza Cilicia. ²² Resa'nu ni yu' nen xquidoo Crist guideb nez reguedx Judea, direni gumbée narä. ²³ Riejntis diajgreni: “Bejn nani basacsíduxh nuure agujc xchej, abejnga caguluiini

xcuent lagajc xcälirililajz nani galoo rlajzni nunitlojni.” ²⁴ Dxejc rliä'preni xpala'n Dios sa'csi huililazäza xtiidxni.

2

Bidxaag Pabl loj reapost

¹ Che agudejd tzudaj ijz, dxejcru hua'a guedx Jerusalén con Bernabé, näjza Tito huinānu. ² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. ³ Sanää Tito, te ben griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. ⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxé'chreni sa'csi nuunu, rexpejn Jesucrist, dinu jienru si'c ni bejn retoxtdagoldoonu. Laareni rlajzreni guxhiidreni nurnu, rlajzreni gusoobnu rextiidxreni. ⁵ Dipacnu nicäjb nucuadijgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni saj, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najcdi mase bensajcreni, sa'csi Dios runtebloj guiraa bejn.) ⁷ Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

⁹ Ni'cni Jacoob, Pedr, näjza Juan nani najc benroru nen guidoo xten Jesucrist, gucbeereni laa Dios ni cayacnäj narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. ¹⁰ Gunabtisreni loonu gacnäjnu rebejn ni xhet rajpdi, luxh ni'cza rlažza gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnääni, sa'csi abejnni dojl xhet laadi cayujnni. ¹² Galoo gudaunäjni rebenzijt, luxh che bidzujn gaii xpejn Israel ni baxhal Jacoob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: “Palga luj najclu te xpejn Israel, luxh nabajnlü si'c rebenzijt ni digac xpejn Israel, xhet si'cdi ni caj loj leii, ¿xhicuent rlajzlu gunibeelu guibajn rebenzijt si'c rexpejn Israel nani rusoob xleii to Moisés?”

Nungäl chalilajz rexpejn Israel, sigajc guiraa bejn, te guibicaj xtojlni

¹⁵ Nuure najcnu rexpejn Israel cheni gojllinu; dinu gac bendojl si'c najc rebenzijt. ¹⁶ Anadonnu rut chu tejt bejn saj guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojlnu sa'csi rililajznu, xhet sa'csi riennu si'cni caj loj leii. Di gacdi jia xtojln bejn xcuent yälrusoob xleii to Moisés.

¹⁷ Palga laḷ ni rlaḷznu jia xtoḷḷnu xcuent xcālḷrililajz xtidx Jesucrist, ruhuiinu cayenrunu doḷḷ, la saḷc guiniinu: Jesucrist rului rienrunu doḷḷ, ḷā? ḷxho gacni si'c! ¹⁸ Palga rlaḷzā gūnsacā redzuun nani abaro'nā, lagajc narā rapā doḷḷ nacā beḷḷ doḷḷ. ¹⁹ Niluxh xcuent leii, anacā si'c beḷḷgut: digacdiru guinibee leii narā sa'csi naj nabanā lo xnejz Dios. Luxh lagajc leii beḷḷn nacā si'c beḷḷgut che gucbeā di gacdi gusobā guiraa ni caj lo leiiga. ²⁰ Najcni si'cni gutnāā Crist lo crujz. Naj xhet narādi ni nabanā, laa Crist ni nabajḷn neḷḷ lastoā. Yālḷnabajḷn ni nabanā naj lo guedxliujre nabanā sa'csi rililazā xtidx Xi'n Dios nani rinālajz narā luxh guḷtni te gudijxni xtoḷḷ. ²¹ Dina cuālazā xcālḷrulaslajz Dios. Paru saḷc gudzucaj leii xtoḷḷ beḷḷn te gacreni beḷḷnaya nez loḷḷ Dios, dxejc xlia'si guḷt Jesucrist.

3

Yālḷrililajz rusia doḷḷ

¹ ḷChipsa nayāāltu beḷḷ Galacia! ḷChu bascājytu te di cuadiajgtu xtidx Jesucrist? Ni nez loḷḷpactu bisule'nu diidx xho cuaj Jesucrist lo crujz. ² Tejtis diidx rlaḷzā guiniitu loā. ḷLa cua'tu Sprit Dxan xten Dios sa'csi beḷḷntu si'cni caj lo leii, ā? o ḷla sa'csi huililajztu diidx ni bieḷḷn diajgtu? ³ Chipsa nayāāltu. Acua'tu Sprit Dxan xten Dios dxejcti naj rlaḷztu guntu ni riajbtis yejctu guntu. ⁴ ḷLa xlia'si gudejdtu trabajw? Chugan la gulii xlia'sini. ⁵ Che runiidx Dios Sprit Dxan xtenni lojtu, che ruḷnni milaagwr nez lojtu, ḷxho ruḷnnini? Dini gunni sa'csi ruḷntu si'cni caj lo leii, ruḷnnini sa'csi rililajztu xtiidxni ni rieḷḷn diajgtu.

⁶ Huililajz toxtadgooloonu Abram xtidx Dios, ni'cni cua' Diosni si'c te beḷḷn nani naya lastooni. ⁷ Ni'cni colyacbee dee: renani rililajz xtiidx Dios najc xi'n toAbram. ⁸ Galooli najn Dios xcuent yālḷrililajz susia Dios lastoo rebeḷḷzajt, ni'c rāḷpni lo Abram: “Guiralii rebeḷḷ guedxliuj sacle' xcuentlu.” Diidxre cuaj lo guijtz ni gujc galooli, cadro caj xtidx Dios. ⁹ Ni'cni reni rililajz naj agucnāḷ Diosreni sigajc gucnāḷni toAbram nani huililajz.

¹⁰ Guiraa reni rlaḷz guibajḷnreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” ¹¹ Niluxh huenliisi rien rut nayadi nez loḷḷ Dios xcuent leii, sa'csi dee najc xtidx Dios: palga rililajz te beḷḷn xtidx Dios, najcni te bennaya nez lo Dios, nabanāḷni Dios xcuent xcālḷrililajzni. ¹² Leii dini naa chalilajz beḷḷn te xca'ni yālḷnabajḷn. Scree caj lo leii: “Nani gunpac si'cni caj loḷḷ reguijtz xten leii, ni'c nanab guibajḷn loḷḷpac leiiga.”

¹³ Jesucrist badzucaj nuure loḷḷ yālḷrbibde xten leii. Laani gubibdeni xcuentnu sa'csi xtidx Dios naj: “Anabibde te beḷḷn ni najḷ loḷḷ te yajg.” ¹⁴ Scree gusajc Jesucrist te gusoḷb diidx ni rāḷp Dios loḷḷ toAbram, sacnāḷni guiraa rebeḷḷzajt; nāḷza te guiraanu ni chalilajznu xtidx Jesucrist xca'nu Sprit Dxan xten Dios.

Leii nāḷ diidx ni bia'n Dios loḷḷ toAbram

¹⁵ Betzā, naj gusā'tā te diidx xcuent beḷḷn guedxliuj. Cheni ruḷn beḷḷn te guijtz te jia'n diidx lo stee beḷḷn, mase beḷḷntis najceni, che abacuaani laḷni lo guijtzga, rut sajcdi gudzucaj guijtzga. Rutza sajcdi gucuaaru diidx loḷḷni che anajcni. ¹⁶ Luxh anajḷnu badeed Dios xtiidxni loḷḷ toAbram nāḷza loḷḷ xagdooni. Dini ninii “rexagdooni” si'c loḷḷ xhidajḷreni, guiniini lo tejtis xagdooni, luxh laani najc Jesucrist. ¹⁷ Diidx ni rlaḷzā guiniā najc scree: Diidx nani bia'npac Dios loḷḷ toAbram gunii Diosni che cayāādx

tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, laltis sajcní. ¹⁸ Paru naquiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'n ni diidx lojni galooli.

¹⁹ ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlneni, laḷ ni jiääd nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjl diidx. ²⁰ Te ni rusiäjl diidx xhet par tejtis bejn di najcni, niluxh Dios tejtis najc.

Xcuent leii

²¹ ¿La garenca najc xleii Moisés lo diidx ni basa'n Dios loj toAbram, ä? ¡Xho gacni si'c! Paru nica'nu te leii ni rajc rudeed yäl nabajn, dxejc sii xcuent leiiga nica' bejn yäl nabañnaya. ²² Niluxh loj reguijtz xten Dios caj diidx ni rnii: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcäl rililajz diidx xcuent Jesucrist si'cni bia'n Dios diidx loj toAbram.

²³ Che gajd xcäl rililajz xcuent Jesucrist jiääd, dxejc basäuu leii nuure nen dojl, cabäjtisnu guiricaj xcäl rililajz xcuent xtidx Dios. ²⁴ Ni'cni anajc leii si'c xmastrnu te guluini nuure nezyuj nez lo Dad Jesucrist te gusiani xtojlnu con yäl rililajz xtiidxni. ²⁵ Niluxh naj sa'csi arajpnu yäl rililajz xcuent xtiidxni, dirunu guiquiin te mastr, nalajznu leii.

²⁶ Guiraatu najctu xi'n Dios xcuent yäl rililajz xtidx Jesucrist, ²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸ Naj rutiru rexpen Israel niclaza rebenzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl nasa'c ni abia'n diidx gudeed Dios loj Abram.

4

¹ Mbaj naj. Nani xca' yäl nasa'c, che najcni biuux, najcni sigajc te mos, mase xtenni gac guiraa xhixten xtadni. ² Yu' chu te bejn ruhuiini, yu'za chu rnibee xhixtenni cheni agurooblíni, cheni guidzujn dxej xca'ni ni gudeed xtadni. ³ Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jiennu lo guedxliuj. ⁴ Niluxh che bisa' dxej ni basoob Dios, baxhal Dios Xi'npacni. Xi'n te gunaa gojlni, loj rexpejn Israelza biädjiäjlíni, basoobni leii xten toMoisés. ⁵ Si'c gujc te xcasacni reni rusoobpac leii, te xca'ni nuure gacnu si'c te xpisiäjbni.

⁶ Luxh sa'csi anajctu xi'nni, ni'c baxhal Dios Sprit xten Xi'nni te cuääzni nen lastoonu. Laani rniini lo Dios xcuentnu: "Guejblu, Xtadnu." ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. ¹⁰ Cayutistu redxej, rebäii, retiemp, reijz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuze' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶ Naj çla rdxe'chtu loä sa'csi caniä didxlii lojtu, ä?

¹⁷ Naj yu' gatii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. ¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjpacli Jesucrist nen lastootu. ²⁰ Maläii gac jialä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rlajz gun si'cni caj lo leii, çla ditu gacbee, la di diajgtu jiejn xhini'c caj lo leii, ä? ²² ¿Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. ²³ Niluxh xi'n xmosni gojl sa'csi lagajc laani bejnni xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴ Diidx xcuent regunaare najc si'c diidx ni ruluui. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpenn Israel con rexi'nreni, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷ Scree caj loj xtidx Dios: Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejd gunaa che rajl xi'nni. Sa'csi su'ru xi'n gunaa nani gulälajz chäälmi quela xi'n gunaa ni gudiesnä j chääl stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yälhasa'c xtenlu si'c ni xca' xi'n gunaa nani najc chäälpaclu.” ³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc chäälpac toAbram.

5

Colguzutijp lajztu lo yälirilajz xtidx Dios

¹ Colguzutijp lajztu lo xtidx Dios nani baniidx Jesucrist loonu sa'csi guli-pac gulää Jesucrist nuure ladznäa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladznäa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlaizpac chu bee, nanab gunni si'cpac ni caj lo leii. ⁴ Palga rlaiztu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcälracnäj Dios. ⁵ Niluxh nuure xcuentpac Sprit Dxan xten Dios rililajznu gudijx Jesucrist xtojlnu lo cruiz, cayenloonu jiädsacni te guniidxni yälbaŋsa'c par tejpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajcdi najc chalilajz bejn xtidx Dios. Yälrlilajzga rujn guibaŋsa'cnu te chonälajznu resa'nu.

⁷ La'tu laaca sasajtu. ¿Chu badxojn gusoobtu xtidxlii Dios? ⁸ Xhet Diosdi ni guletu badxojnditu. ⁹ Anajntu tudxe'nsi cobgulaj rusaguijni yätxtiil; si'c te cobgulaiga najc te niguii ni caguluiitu xtidx leii. ¹⁰ Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojlnu lo cruiz. Luxh si'cpacza rlaizreni. ¹² Rebejn nani cagusgueetu caniireni chutu bee, jmalaiiza gutiugreni tejpas lagajc tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixgaa na'c xca'tistu rediidxga dxejcti guntu si'ctis ni rlaiz tiejxhtu, si'ctis ni riajbza yejcti. Colgacnäj sa'tu con yälrinälajz, tejni sigajc steeni. ¹⁴ Sa'csi guiraa diidx ni caj lo leii con tejtis diidxre rsiojbni: “Chanälajztu sa'tu sigajc rinälajztu lagajc la'tu.” ¹⁵ Palga rdijltu, rauya'tu sa'tu, rajwtu sa'tu, jcolnatiro! Andi lagajc la'tu gunijttu sa'tu.

Nani rchaglaiz rebejn näj yälŋabajn ni rudeed xtidx Dios

¹⁶ Rniä lojtu, colguibajn si'c ruluii xtidx Dios näjza Sprit Dxan xtenni, te si'c na'c guibajntu si'ctis ni rlaiz tiejxhtu, si'c ni najctis xhigabtu. ¹⁷ Sa'csi ni najc xhigab xten bejn rdxe'ch loj xhigab Sprit Dxan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlaiztu guntu. ¹⁸ Luxh palga caguijdx Sprit Dxan la'tu, dxejc dirutu quiquiin guntu si'c ni caj lo leii.

¹⁹ Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰ yälrajn rebanäjb, yälbidxaa ni rujn daan bejn, yälrdxechlajz loj sa'ni, yälrchagdiil sa'ni, yälŋayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuua bejn. Näjza sa' dzunguijdxre rujnreni: ²¹ yälrdxe'ch laiz, yälrugut sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälŋibee Dios xhaguibaa.

²² Niluxh xtzuun Sprit Dxan xten Dios najc yälrinälajz sa'ni, yälrbalajz lastooni, yälrbecdi laizni, yälrbecdi laiz sa'ni, yälŋajc beŋsa'c lo chutis bejn, yälŋagodzlaiz, yälrlilajz, ²³ yälŋadolajz, yälŋibee lastooni lo ni rlaiz gun tiejxhni. Xheti te leii ni rudxojn gun bejn sa' redzuunre. ²⁴ Niluxh renani ahuililajz xtidx Jesucrist, abatío'ŋreni guiraa redolguijdx ni rlaiz

gun tiejxhrenei. ²⁵ Palga rbäjz Sprit Dxañ neñ lastoonu, do'o guibajñ si'c rnibee Sprit Dxañ guibajñnu.

²⁶ Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

6

Colgacñäj sa'tu

¹ Sa'ä, palga chu teytu ni abiajb neñ dojl, lagajc la'tu nani aracheetu xtidx Dios colgulijdx bejnga, colgacñäjni te guiriini neñ dojl. Colñii lojni nadolajz, nasinlajztu lagajc la'tu didi che guidon nägajcza la'tu jiajbtu neñ dojl. ² Colhuii xhi rquiin resa'tu, colgacñäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴ Tejgatu colcube xho najc xtzuuntu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu guiquiin chu stee bejñ guiliä'p xpala'ntu. ⁵ Sa'csi tejga bejñ susule'ni diidx lo Dios xhini'c bejñni.

⁶ Nani casieed xtidx Dios nanab gacñäj bejñ nani ruluiini, gudeedni tudxe'n xhixtenni loj nani ruluiini.

⁷ Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejñ lagajcza ni'c xca' bejñ. ⁸ Paru te bejñ gun dzuun xcuenttis tiejxhni, dxejc che guidzujñ dxej xca'ni yálnasa'c, sinitloj tiejxhni, dizani jiu' loj xcälrnibee Dios. Palga te bejñ gun dzuun xcuent Sprit ni badeed Dios lojni, che gal yálnasa'c, sica'ni yälñabajñ par tejpas. ⁹ Ni'cni na'c guidxajgnu jiennu dzunsa'c te che guidzujñ dxej ni xca'ni yálnasa'c, xca'zanu te yälñasa'cro. ¹⁰ Ni'cni nanab lañ ni sajçni, gacñäjnu chutis bejñ, ganiddoo resa'nu ni ahuililajz.

Yärlulijdx näjza xtixtios

¹¹ Colhuilaa lacti reletrduxh cacuaä lojtu con naäpac. ¹² Guiraa reni rdxaglañ gun ni rlañztis tiejxhni, laa reni'c ni rlañ chutu bee, tedi tedreni trabajw xcuent ni cuaj Jesucrist lo cruñz. ¹³ Lagajc reni ru' bee direni gun si'cni cañ lo leii, niluxh rlañzreni chutu bee te guibaa lañzreni sa'csi bejñreni gaan guyu' beega tiejxhtu. ¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruñz, te gudixñi rextolñu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵ Che ahuililajz te bejñ xtidx Jesucrist, xhetru sajçdi chu bejñ bee, xhetza sajçdi na'c chu bejñ bee. Nani sajçtis najc gacni si'c te bencoob lo xtidx Jesucrist. ¹⁶ Guiraa renani nabajñ si'cni ruluii xtidx Jesucrist sibedxi lañzreni xcuent xcälñulaslañz Dios. Näjza rexpen Israel nani ahuililajz xtidx Jesucrist sibedxi lañzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacñäj Dad Jesucrist guiragajctu con Sprit Dxañ xtenni. Sugacni si'c.

Te Guijtz Lo Rebeñ Efesios

Bacuaa Pabl lo rebeñ guidoo neñ guedx Éfeso

¹ Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebeñ nani huililajz xtiidxni, loj reni rujn si'cpac rniini neñ guedx Éfeso. ² Xca'tu yälracnä, yälrbexi lajz xten Xtadnu Dios, näjza xten Dad Jesucrist.

Rusule' Pabl xtidx Jesucrist

³ Rliä'pnu xpala'n Dios, Dad näj Xtad Jesucrist. Dios racnä, nuure, xcuent Crist runiidxni guiraa reyälracnä xca' lastoonu, astoo yu'lanu xhaguibaa. ⁴ Laani gule nuure, che gajdli guirixtiej guedxliujre, te gacnu xpejñni, te guibañnayanu nez lojni con yälrinälajz. ⁵ Sigajcza anungäl xca'ni nuure te gacnu si'c xi'npacni sa'csi abiääd Jesucrist te guslaani nuure neñ dojl, si'c ni gunibee Dios sa'csi balaslajzni nuure. ⁶ Gucnä, Dios nuure te guiliä'pnu xpala'n Dios, sa'csi lagajc laani acua'ni nuure, abejñni nuure tejsi con xi'nni ni sanälajzni. ⁷ Laani baslaani nuure neñ dojl xcuent xtiejñni, laani badzucajni xtojñnu xcuent xcälruslaslajzni ⁸ nani banidxduxhni loonu. Guideb yälñajn, guideb xcäriejñ ⁹ basule'ni loonu xhigab xhiga'tzni xcuent redzuun ni rlajzni gunni, xhigabza ni bejñni galooli. ¹⁰ Luxh sidzujñ dxej sisiojbpac xhigab ni bejn Dios. Che guidzujñ dxejga sutojp Dios guiraa, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcälñasa'c Jesucrist, sa'csi galooli bejn Dios xhigab guniidxni yälñasa'cga. Lagajc Dios benchee guira'ti ni yu', luxh rujnpacni nani abejñni xhigab najc laaca gunni ¹² te guiliä'p bejn xpala'n xcälñibeeni xcuentnu, nani ganiddoo biolilaaznu xtidx Jesucrist. ¹³ Näjza la'tu, che biejn diajgtu redixd gulii, rediidx ni ruslaa bejn lo dojl, dxej huililajztu xtidx Jesucrist, dxej gujczatu tejsi con laani. Dxej cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dxan xtenni te cuääzni neñ lastoonu, te ni'c najc seen xca'nu yälñasa'c nani guniidx Dios che abaluuxni xtzuunni, nalajznu guslaani guiraa rexpejñni te guiliä'preni xpala'nni lo xcälñibeeni.

Rniab Pabl gudeed Dios yälñajn loj renani ahuililajz

¹⁵ Ni'cni näjza narä, sa'csi abiejñ diagä xho rililajztu xtidx Dad Jesucrist näjza xho sanälajztu guiraa rexpejñ Jesucrist, ¹⁶ dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. ¹⁷ Rniabä lo Xtios Dad Jesucrist, xtadni ni rnibee xhaguibaa, guniidxni lojtu te yälñanduxh, te yälñuluiloj recos xhiga'tz te gacbeduxhrutu xcuent Gueb Dios. ¹⁸ Rniabäza lo Dios jianij xcäriejntu te gacbeetu xhini'c najc speranz xten yälñarejdxtu lo xtiidxni, te gacbeetu lacti saru, lacti sajz yälñasa'c ni gudeed Dios lo Jesucrist näjza loj rexpejñni, ¹⁹ te gacbeezatu lacti gurobduxh najc yälñibe nani rajpni nez loonu nani ahuililajz xtiidxni. Guiraa redee ruluu lacti nadip najc yälñibe xten Dios. ²⁰ Lagajc yälñibeere bejn dzuun par Jesucrist. Con yälñibeere baspajñ Dios Jesucrist lo rebengut, te gurejñ xladbee Dios cadro rnibeeni xhaguibaa. ²¹ Maazru sajñi lo chutis gubier, lo chutis yälñibe, lo xhitis yälñadip, lo chutis ni rnibee; maazru sajñi lo chutis nani abibee te guinibee, sigajc

naj, sigajc neŋ redxej ni churu jiăăd. ²² Niluxh badeed Dios guira'tini ladzŋaa Jesucrist, laazani bejn bibee Jesucrist gunibeeni lo guiraa xhix-ten xquidooni. ²³ Rebeŋ guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejŋ ni najc xquidooni.

2

Ruslaa Dios nurnu sa'csi rinălajzni nurnu

¹ Laani baniidxni yălnabajŋ lojtu che najctu si'c bengut nez loj Dios sa'csi rujntu dojl. ² Galoo gubajntu lo dojl, entis lo xnez guedxliujre guzajtu, biutu xtidx beŋdxab nani rnibee guedxliujre. Sprit xtenni rujn dzuun neŋ lastoo rexi'nni nani di gucuadijg xtidx Dios. ³ Luxh galoo, năj nuure nadxaagŋu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungăjl guidxe'ch Dios loonu, sigajc bidxe'chni loj guiraa rebeŋ guedxliuj. ⁴ Niluxh balaslajz Dios nuure. Con xcălsanălazduxhni huinălajzni nuure. ⁵ Mase anajcnu bengut lo dojl, laani baniidxni yălnabajŋ loonu. Rajpnu yălnabajŋre con Jesucrist. Sa'csi balaslajzni nuure baslaani nuure neŋ dojl. ⁶ Baspaŋsacni nuure con Jesucrist; sigajcza bejnni cuenăjnu Jesucrist xhaguibaa, ⁷ te neŋ redxej ni churu jiăăd, guluiiojŋi lacti sajc xcălnasa'c xten yălrulasajzni, ni'c sanălajzni nuure, najcni huenduxh loonu por Jesucrist. ⁸ Sa'csi rulasajz Dios nuure, ni'c baslaani nuure neŋ dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹ Xhet xcuent xhi dzunsa'cdi ni biennu, te di chu tejtu gac nayedxlaizdi. ¹⁰ Dios najc ni benchee nuure. Sigajcza con Jesucrist bejnni gacnu bejŋ ni rujn dzunsa'c nani galooli agunibee Dios jienpacnu.

Yălrbedxilajz ni rajpnu por Jesucrist

¹¹ Ni'c colŋsaj laiztu xho gujctu galoo. Ditu niajc rexpejŋ Israel. Rniireni la'tu 'benzajt' sa'csi ditu chu bee si'c ru' rexpejŋ Israel. Sa'csi lagajc con ŋaareni rusălreni bee. ¹² Dxejc suga'tu ditu gumbee Jesucrist. Zijt yu'tu loj rexpejŋ Israel, najctu benzajt. Nicla gumbeetu rediidx ni bia'n Dios loj rexpejŋ Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre. ¹³ Niluxh năj ayu'tu lo Jesucrist, la'tu ni guyu' zijt lo Dios galoo. Năj agubigtu lo Dios sa'csi abia xtojltu con xtiejŋ Jesucrist. ¹⁴ Jesucrist najc ni rbecdxi laiznu. Laani bejŋ gujc rexpejŋ Israel tejsi con rebenzajt. Laani badzucajŋi redzuun xten leii te gujc rexpejŋ Israel tejsi con rebenzajt. ¹⁵ Lagajc con tiejxh Jesucrist ni gojl lo cruz banijtni redzuun xten leii nani bejŋ bidxe'ch rexpejŋ Israel lo rebenzajt. Lagajc laani bejnni bidxagsa'reni te gujcreni tejsi che huililajzreni xtiidxni, gujcreni te beŋcoob. Dxejc gulecdxini laizniren. ¹⁶ Con yălgujt ni gujtni lo cruz badzu'ni guiro'preni lo Dios te gujcreni tejsi. Si'c gulăjz rdxechnăj sa'reni.

¹⁷ Cajza lo guijtz rediidxre:

Biăădni te basule'ni xho ga'p rebejŋ yălrbedxi laiz rebejŋ ni suga' zijt lo Dios năjza reni suga' gajxh lo Dios.

¹⁸ Laani bejŋ sajc jiu' guiro'p cuaa bejŋ lo Dios con tejsi xhigab, năjza tejsi Sprit. ¹⁹ Ni'cni dirutu gac benzajt, bejŋ ni rut numbeedi. Anajctu tejsi con rexpejŋni, najczatu sa' rexpejŋ Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost năjza reprobe't najc

si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcrú, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²² Sigajcza la'tu nájza rexpejn Israel ni huililajz najctu tejsi con Jesucrist. Cagustioobtu guidooga te nenñi cuääz Sprit Dxan xten Dios.

3

Pabl nungäjl chanä xtidx Dios lo rebenzijt

¹ Ni'cni yu'ä nen latzguiib, narä, Pabl sa'csi cagusule'ä Jesucrist, te jiädnaä xtiidxni lojtu, najctu benzijt. ² Pet abiejn diajgtu lacti hueen najc Dios baniidxni dzuunre loä, jiädnaä xtiidxni lojtu. ³ Dios baluiini xhigab-xhiga'tzni loä (si'cni bacuaä lojtu galoo). ⁴ Che gołtu guijtza, sacbeetu cati ananä rexhigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost nájza loj reprofe't. ⁶ Dee najc xhigab-xhiga'tzga: por rediidx xcuent Jesucrist ni ruslaa bejn nen dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yálnasa'c si'c bia'n Dios diidx.

⁷ Narä nacä te apost xten dzuun ni baniidxni, por xcälrlulasajz Dios ni cuaxlia'ä. Dios baniidx dzuunre loä con xcälrnibeduxhni. ⁸ Luxh masä guxiiru sacä lo guiraa rexpejnñi, loä baniidxni xcälracnäjni te lo rebenzijt gusule'ä xtiidxni, nalajznu redidxcoob xcuent xcälñasa'c Jesucrist, ⁹ te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te naj jien guiralii yälñanduxh xten Dios. Reni najc xpejn pacni nen xquidooni guluui yälñajnre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcälñasa'ctu.

Xcälñanälajz Jesucrist

¹⁴ Ni'cni ruzuxhibä nez loj Xtad Dad Jesucrist ¹⁵ nani badeed lajni lo guiraa reni yu' xhaguibaa nájza reni yu' lo guedxliuj, ¹⁶ rniabä loj Dad xhaguibaa gutijpni lastootu con yälñibee xcuent Sprit Dxan xtenñi, sa'csi yuduxh xcälñasa'cni lo xcälrdimbicha'ni xhaguibaa. ¹⁷ Rniabäza lo Dios te jiädläjz Jesucrist nen lastootu sa'csi ahuililajztu. Te che agusudzu'tztu, agusutijptu lo yälñinälajz ¹⁸ dxejc sajz gacbeetu sigajc guiraa rexpejn pacni lacti gulajz, lactiza siool, lacti jiät, lactiza jiaa najc yälñanälajz xten Jesucrist. ¹⁹ Te gumbээzatu xcälñanälajz Jesucrist ni najc gurobduxhtej, digacdi guichalonuni. Te chaza lastootu, nájza xcärejntu con guiraa rexcälñasa'c Dios.

²⁰ Dios rnibeduxh. Sajz gunidxduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun nen lastoonu sunidxni reyälñasa'c. ²¹ Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

4

Por Sprit Dxan nadxaag sa'nu

¹ Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu. ² Colguibajn con yälñalasajz, näjza yälñadolajz, colcuedxni lajztu. Colyujn huant resa'tu con yälñälajz sa'ni. ³ Colhuii te guidxaag sa'tu gactu tejsi con Spirit Dxiän ni ruscuedxilajztu. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yälrunloj ni rajptu xcuent diidx nani gurejdxu. ⁵ Rajptu tejsi Dad, tejsi yälñälajz, tejsi yälñobnis, ⁶ tejsi Dios, tejsi Xtað guiraanu nani rnibee guira'ti lo guiraanu.

⁷ Lo tejganu abaniidxni dzuun si'ctis bejn Jesucrist xhigab guniidxni lo tejganu. ⁸ Ni'cni caj lo reguijtz:

Che huä'pni xhaguibaa, cadro rnibeeni,
abejnni gaan loj guiraa yälñibee,
dxejcti badeedni dzuun lo rexpejnni lo guedxliuj.

⁹ ¿Xhi säloj cadro caj, “huä'pni”? Dee säloj ganid biäjtni maazru jäät lo guedxliuj. ¹⁰ Lagajc nani biäjtgä, lagajc laani huä'pni jiaaru lo guiraa rexhaguibaa te sajç guinibeeni guibaa näjza guedxliuj. ¹¹ Lagajc laani badeedni xtzuun tejgareni. Yu'reni badeedni gac apost, yu'reni badeedni gac profe't, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejnni. ¹² Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. ¹³ Nungäj gac dzuunre che guidzujnli dxej ni nadxaag-sa'nu guiraanu loj yälñälajz, che guidzujnli dxej riembesa'cnu Xi'n Dios, dxejç anajcnu benguyaj lo xtiidxni, si'c te ni aguroob loj xcälñibee Jesucrist. ¹⁴ Dirunu gac si'c rebuux ni tera'tsi rusiejch lajzni, rucuaðiajgreni xtidx chutis bejn, mase xhitis diidx ruluiini. Dxejç riabreni lo redidx-xhii xten bejn nani rusguee, nani cabäjztis gusguee bejn. ¹⁵ Maazru hueen chonuunu loj redidxlii xten Jesucrist con yälñälajz te tioobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdzu'tz guiraa rexpejnni, te si'cni nazdzu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedruren i te cayajc xhidajlru rebejn ga con yälñälajz.

Te yälñabañcoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riabj yejcreni. ¹⁸ Nayääl xcäriejnreni, direni ga'p xcälñabajn Dios sa'csi nadduxh lastooreni. ¹⁹ Redee che gucnajd xcäriejnreni gusloj bejnreni guiraloj yälrtuj, guiraa redojl ni di nungäj gunreni. ²⁰ Niluxh la'tu xhet si'cdi bisieedtu loj Jesucrist. ²¹ Palga abiejn diajgtu xtiidxni, niluxh abaluiini lojtu didxlii ni siädnä Jesucrist, ²² colgusaan yälñabanyujxh ni gojptu: Lo yälñabanyujxhga rujn bejn si'ctis ni rlaajzni. Dxejcti si'c runijtni la'tu lo Dios. ²³ Colgusiejch lajztu, colgusia xcäriejntu, ²⁴ te gactu beñcoob nani bejn Dios, colchanuu te yälñabansa'c, te yälñabanya xten xtidxliini.

²⁵ Colguro'n diidx-xhii, colnii didxlii lo resa'tu sa'csi tejsi najcnu guiraanu.

²⁶ Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷ Na'c gusaantu jiu' beñdxab neñ lastootu.

²⁸ Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnājzani rebejn nani xhet rajpdi.

²⁹ Na'c gusaantu guirii nicla tej didxguijdx ro'tu. Colnii ganax didxsa'c te gacnājni guiseed reni rucuadiajg xtiidxtu. ³⁰ Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbājzni nen lastootu che guidzujnli dxej ni chāātu lo Dios.

³¹ Colgu'ro'n yālnabandxuudx xtentu, nāj yālrđxe'ch, nāj yālrđxagdijl sa'ni, nāj yālrbedxa', nāj yālrġue. Colguibicaj lo guiraa redojlga, na'c gactu benguijdx. ³² Nungājł gactu huen loj resa'tu, colgulaslajz resa'tu, colsiājł lajztu con resa'tu ni rujn dojl lojtu si'c rsiājł Dios lajzni rextojłtu xcuent Dad Jesucrist.

5

Xho nanab guibajn rexi'n Dios

¹ Colguibajn si'c nabajn Dios, sa'csi najctu xi'nni nani sanāljzni. ² Colchasanāj yālsanāljz sigajcni huināljz Jesucrist nuure cheni badeedni lagajc laani lo Dios, cuajni lo cruzj, gujtni. Laani gujcnī si'c gojn, gujczani yālrbya'al ni bidxagljaz Dios.

³ Nicla gusa'ttu yālrŭguee chāāl bejn, nicla redoł dxuudx, niclaza yālsanāłztej xhixtentisni. Nicla gusa'ttuni lo sa'tu, sa'csi xhet si'cdi nungājł gun bejn ni naban-naya. ⁴ Sigajcza colcuāłaz diidx ni rujn xtujy, nājza didxnajd, nājza didxnaj nani digac laaca. Colgudeedtis xquixtios lo Dios. ⁵ La'tu anajntu nicla tej ni rŭguee chālbejn, nicla tej bendxuudx, nicla tej ni sanāłztej xhixtentisni, nicla renani rajn rebanājł, nicla tej reni'c di xca' yālnasa'c loj Jesucrist, dizareni jiu' lo xcālŕnibee Jesucrist, xcālŕnibee Dios. ⁶ Na'c gusaantu gusguee bejn la'tu con diidx ni xhet sajcdi sa'csi xcuent redzuunga riāād xcālŕdxe'ch Dios loj rebejn ni di gusoob xtiidxni. ⁷ Na'c guntu sigajc rujnreni.

⁸ Galoo nacājytis xcāriejntu gubajntu, luxh naj abasanij Jesucrist xcāriejntu. Colguibajn si'c nungājł guibajn nani abianij xcāriejnī. ⁹ Sa'csi nani abianij xcāriejnī rujn dzunsa'c, rniini didxguli. ¹⁰ Colguiseed xhini'c rchagljaz Dios. ¹¹ Na'c guntu redzundxuudx nani rujn reni nacājy xcāriejnreni, coltilnāj reni rujn sa' dzunguijdxga. ¹² Sa'csi te xtujyli najc jieinu diidx xcuent xtzuunreni ni runxhiga'tzreni. ¹³ Niluxh guiraa sa' redzuunre ni rdilnājnu, huenliisi sien xhi najcreni, suzenī lo xpianij Jesucrist. Sa'csi guira'ti ni ružen najc nianij. ¹⁴ Ni'cni caj loj reguijtz, rājp Dios:

Gubajn, huistie luj ni rejslu.

ŕHuistie lo dojl, luj ni naga'lu lo dojl si'c bengut,

te gusanij Jesucrist xcāriejnlu!

¹⁵ Colłhuii, colsin, na'c guibajntu si'c te bejn nani di gachee, colguibajn si'c bejn nani yu' xcāriejnī. ¹⁶ Coltedsa'c redxej sa'csi nen redxejre ganax cosguijdx rujn bejn. ¹⁷ Ni'cni na'c guibajntu si'c rebejn nani di gachee, colyacinin, te gacheetu xhini'c najc ni rlajz Dad xhaguibaa guntu. ¹⁸ Lacuaa yātu nejł nani runijł bejn, colgapchee Sprit Dxan xten Dios nen lastootu. ¹⁹ Colnii loj resa'tu rediidx nani gunii rebejn tiemp gulā'preni xpala'n Dios, colyelza redij xten Dios, con reyālriel colguiliā'p xpala'n Dios nen lastootu. ²⁰ Di jiāl lajztu gudeedtu xquixtios lo Dios xtadnu con laj Dad Jesucrist.

Xho guibannäy sa' rexpejn Jesucrist

²¹ Sa'csi rajntu Jesucrist, colgusoob xtidx sa'tu.

²² Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist. ²³ Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guideoni lo redojl, najcreni si'c tiejxhni. ²⁴ Ni'cni, sigajc rusoob reben guideoga nani rnibee Jesucrist gunreni, sigajcza nungäjl gusoob regunaa ni abachnaa nani guinibeetis chäälneni gunreni.

²⁵ Lojtu, reniguii ni abachnaa rniä scree: Colchanälajz chäältu sigajc ni huinälajz Jesucrist rexpem guideoni, badeedni lagajc tiejxhni loj Dios cheni cuajni lo cruuj por laareni ²⁶ te basiani xtoj rexpejn guideoni, te gujcreni te bencoob, abidiib lastooreni con xtiidxni si'c rdiib te cos con nis ²⁷ te che xca'ni rexpem guideoni, najcreni te guidoo ni saj cru, te guidoo nani xheti xtojlni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtojldini. ²⁸ Sigajcza, te niguii nani abachnaa nungäjl chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpem guideoni. ³⁰ Najczanu tejsi loj tiejxh Jesucrist, loj xpäälni, loj rextzujtni. ³¹ "Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn." ³² Dee najc te diidx xhiga'tzduxh; li te "¿chuj?" najcni. Niluxh narä rniä xcuent Jesucrist con rexpem guideoni. ³³ Niluxh nanabpac chanälajz teygatu chäältu sigajc sanälajz tiejxhtu. Dxejcti gunaa ga'pzani xpala'n chäälni.

6

¹ Lojtu biuux, rniä scree: Colgucuaiajg xtidx Jesucrist, colgusoob xtidx xtadtut sa'csi ni'c saj nez loj Dios. ² Colga'p xpala'n xtadtut, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; ³ "Te saruduxh guibajntu xchero lo guedxliujre."

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälnej, colgulijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu nen lastootu. Colyejn xtzuunni si'cni najc xtzuun Jesucrist. ⁶ Colyejn xtzuunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuunpactu; si'cni rlajz Dios. ⁷ Colyujn xtzuunni guideb lastootu si'c xmos Jesucrist, et si'c di xmos ben guedxliuj. ⁸ Anajntu dzunsa'c ni gun teygatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejn Jesucrist lo guerr

¹⁰ Didx lult ni rniä, sa'ä, najc scree: Colsutijp lo xcälracnäy Jesucrist, colsudzu'tz lo xcäl nadip xcälrnibeeni. ¹¹ Colgajcw xhabguiib xten Dios te gac sudzu'tztu lo reyälrusguee xten bendxab. ¹² Sa'csi xhet ben guedxliujtis cadilnäjnu. Cadilnäjzanu reguxhtis xte yälcäy, näjza reyälrnibee, rebejn nani rnibee loj reyälcäy, näjza rexangl bendxab nani rnibee bej xten guedxliujre. ¹³ Ni'cni colca' guideb lad-guiib xten Dios nani runiidxni

loonu te gac sudzu'tznu neñ dxej ni guideednu trabajwduxh, te che agudejdni, laltis sisiudzu'tznu. ¹⁴ Col̄sudzu'tz pues. Xque'tu col̄guliib sindoor-guiib ni najc xtidx Jesucrist, col̄gajcw gamangw-guiib ni najc rextzunsac xten Dios ni rujntu. ¹⁵ Col̄cuaa gurach-guiib ni'tu (ni'c najc xtidx Jesucrist ni ruscuecdxi lajztu). ¹⁶ Col̄ca' escud-guiib ni najc yäl̄rililajz te con yäl̄rililajz xtidx Dios di bendxab gun gaan gusguee la'tu con rextidx-xhiini. ¹⁷ Col̄ca' yäl̄ruslaa xten Dios lo dojl̄ si'c te xhumbrel-guiib chu yejctu; col̄ca'za lans xten Sprit Dxan xten Dios ni najc xtidx Dios. ¹⁸ Col̄nab lo Dios guiraa dxej; col̄nab lojni con Sprit Dxan xtenni; col̄susintis; na'c jieedtu guiniabtu lo Dios xcuent guiraa xpejñni. ¹⁹ Col̄nabza lo Dios por narä te guniidx Dios diidx cheni gal̄ guiniä, te na'c guidxebä guiniä che guluiä didx-xhiga'tz xten yäl̄ruslaa bejn̄ lo dojl̄. ²⁰ Xcuent rediidxga ni yu'ä neñ latzguiib, caduä con caden̄. Ni'cni col̄nab lo Dios te na'c guidxebä guiniä rediidxga si'cpacni säbyäjl̄ guiniäni.

Lult xtixtios

²¹ Niluxh te gacheetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx. ²² Laapacni ruxhalä lojtu, te gacheetu xho yu'nu, te si'c guscuecdxini lajztu.

²³ Rniabä yäl̄rbedxilajz par resa'nu, näjza yäl̄rililajz con yäl̄sanälajz xten Dios Xtadnu näjza xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Reben Filipos

Latzguiib yu' Pabl bacuaani loj rebenguidoo xten guedx Filipos

¹ Pabl nājza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbājz guedx Filipos, loj rebejn nani ruluii xtidx Dios neñ reguidoo nājza loj rediaconos. ² Gacnāj Dios la'tu con yālrbexi-lajz xten Xtradnu nājza xten Dad Jesucrist.

Rniab Pabl lo Dios xcuent rebejn nani rililajz

³ Che rnaj lazä la'tu, rudedä xquixtios lo Dios. ⁴ Che rniabä lo Dios, rbaa lazä rniabä lo Dios xcuent la'tu, ⁵ sa'csi abidxaag sa'nu lo xtidx Jesucrist che guslojli huililajztu hasta najli. ⁶ Anancheä Dios nani gusloj cayunsa'c dzuun neñ lastootu, lagajc laani suluxsa'c dzuunga dxejli ni jiaäd Jesucrist. ⁷ ¿Xhiru xhigab nungäjl gunä? Ni rapä la'tu neñ lastoä sa'csi cayacnäjtu narä neñ latzguiib luxh rsiudzu'tztu riye'tztu lo bejn, guli najc rediidx nani rusule'ä xcuent Jesucrist nājza la'tu rusule'tu rediidxga. ⁸ Dios nanchee xho rbanñäätu, xho sanälazä guiraatu lo xcälñanälajz Jesucrist. ⁹ Rniabä lo Dios te tioobru xcälñanälajztu nāj xcälñajntu nāgajc churu xcäriejn guiraatu, ¹⁰ te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiaäd Jesucrist. ¹¹ Te guidxa lastootu yälñasa'c xten te yälñabañsa'c ni runiidx Jesucrist, te guspaa lajztu Dios, guiliä'ptu xpala'nni.

Jesucrist najc xcälñabañä

¹² Rlazä gacheetu betzä: guiraa nani gusacä ni'c cayacnāj guire'chru xtidx Jesucrist. ¹³ Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist. ¹⁴ Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzareni loä. Yu'za reni rusule' xtidx Jesucrist sa'csi laaca najc xhigabreni. ¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobruren i trabajw nani tedä neñ latzguiib. ¹⁷ Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. ¹⁸ Niluxh ¿xhiru najcni? Palga rujnsireni laaca o palga guliipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcälñacnāj Sprit xten Jesucrist ²⁰ rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. ²¹ Sa'csi palga guibanä, su'ä lo Jesucrist; luxh palga guetä sunäru gaan. ²² Palga guibanäru lo guedxliujre, sajcru gunä xtzun Dad Jesucrist, ni'cni dina gacheä xhinic cueä xca'ä. ²³ Nagajn najcni par narä cueä lo guiro'preni. Te lajt runä xhigab: malaii guetä te cha'ä cadre yu' Jesucrist sa'csi ni'c najc hueenru par narä. ²⁴ Niluxh stee lajt nancheä nungäjl guibanäru lo guedxliujre xcuent la'tu. ²⁵ Niluxh narä racbeäpac siannäaru la'tu, su'äru lojtu te chanuurutu lo

xtidx Jesucrist, te guibalajztu lo yälirililajz, ²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colhuiitis guibajntu si'cpac ni rnii xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadx-aag sa'tu rujntu tejsi dzuun con yälirililajz xten xtidx Jesucrist. ²⁸ Na'c guidxejbditu renani rdxe'ch lojtu. Laareni huenliisi ruseñ agulaatu neñ dojl si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani. ³⁰ Cadejdту lagajc trabajw ni cahuiitu gudedä luxh naj riejn diajgtu cadedsicä trabajwga.

2

Xcälñalasajz näjza xcälguobduxh Jesucrist

¹ ¿La ruspaä Jesucrist lajztu? ¿La racnäy xcälñälajztu la'tu? ¿La yu' Sprit Dxan xtenni con la'tu? ¿La yu' xcälñälajzni näy xcälñulasajzni lastootu? ² Palga yu'ni, colguspaa lazä, colyejn tejsi xhigab con narä, colga'p lagajc yälñälajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtuuntu con yälñalasajz, colhuii loj sa'tu si'c beñroru lojtu. ⁴ Na'c jiu chu tejtү lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist ⁶ nani mase najcni sigajc Dios, dini niniazdzu'tz xcälñibee Dios, ⁷ alga basa'nni te laad yälñibee nani rajpni con Xtradni Dios te gujcni mos cheni gojlni lo guedxliujre. Gujcni si'ctis te bejn. ⁸ Che gujcni si'ctis beñ guedxliuj, gujcni beñ nadolajz, beñ nasobdiidx. Basoobni xtidx Dios, gujtni lo cruzj, luxh yälrejт lo cruzj najc te yälrtuiduxh. ⁹ Ni'cni baspañsac Diosni, gule'cni Crist te lajt ni najc jiaaru, badeedza Dios sajcru lajni lo laj guiraa relaj ni rusä't bejn. ¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez nen yuj. ¹¹ Te guiraaareni gacbeepac, guiniizareni: “Jesucrist najc Dad”, te si'c chä'pduxh xpala'n Xtradnu Dios.

Rexpejn Jesucrist najc si'c bajl ni rusanij lo guedxliuj

¹² Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijт, colhuii tejgatu xho gac laatu neñ dojl, colyajc bejn ni rusoob diidx con yälrdxejb. ¹³ Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

¹⁴ Loj guira'ti ni rujntu, na'c gusmojmту, na'cza gun tiop lajztu, ¹⁵ te rut gucuaqijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' la! ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy, ¹⁶ sa'csi arapdzu'tztu xtidx yälñabajn ni runiidx Crist neñ lastootu te guspaatu lazä dxej cheni jiääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷ Mase lagajc xtiänä guixe' te guiza' te gojn ni xca' Dios xcuent xcälñirililajztu, rbaa lazä, sibalaznääza la'tu. ¹⁸ Sigajcza colguibaa lajztu, colguibalaznäy narä.

Timoteu con Epafrodito

¹⁹ Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebä xho yu'tu nejzga. ²⁰ Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. ²¹ Guiraa rebejnre rujntis xtzuuncareni, direni jiu gunreni xtzuun Jesucrist. ²² Niluxh la'tu anajntu xho rujn Timoteu; si'c racnäj te bi'n xtdäni, si'cza racnäjni narä lo xtidx Jesucrist. ²³ Ni'cni rlazä guxhaläni te jiädhuiini la'tu, fixgaäsi don xho sasaj xcuentä ree. ²⁴ Cabäzäza nez lo Dad Jesucrist don la näjza narä sajl jiädhugacätu.

²⁵ Niluxh rchaloä nanabpac guxhalä bejtznu Epafrodito ni najc sa'a loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä. ²⁶ Laani rladduxhni fiini lojtu, lacti cayu'ni yärsia' sa'csi gubeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yälñahuinlajz ni yu'ä ree. ²⁸ Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Col'ca'ni con yälrbalajz si'c bejtztu lo xtidx Dios, sigajcza colyejn reni najc sigajc laani. ³⁰ Xcuent xtzuun Jesucrist ameer niejtni, dini niu xcälñabajntisni te bejnri redzuun nani di niajcdi niujntu lagajc la'tu xcuentä.

3

Te yälñabañsa'cpac

¹ Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. ² Colnati renani najc si'c bä'cw. Colnatiza rebejn nani rujn dzun guijdx. Colnatiza reni ru' bee tiejxhtisreni luxh xlia'si rujnreni si'c. ³ Renani guliipac yu' bee najc nuure nani ahuililajz xtidx Dios, rienzanu xtzuunni si'cni rlanjz ni sa'csi ayu' Sprit Dxan xtenni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴ Narä sajczä guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtdä najc te beñ hebreo; xcuent leii nacä te farisee. ⁶ Basobduxhä guiralii rextidx Dios ni caj lo leii ni'cni basacsiduxhä rexpen Jesucrist; xcuent yälñabañsa'c xten leii, xhetliidi xtolä yu'; basobduzt'ä xtidx leii. ⁷ Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembe Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujz nez loä te gunä gaan Jesucrist, ⁹ te chu'ä lojni, xhet xcuentdi xcälñabañsa'cä ni najc xcuent leii, alga xcuent yälñabañsa'c ni najc xcuent xcälñirililajz Jesucrist, yälñabañsa'c ni najc xten Dios xcuent yälñirililajz. ¹⁰ Ni'cni rlazä gumbeäru Jesucrist loj yälñibee ni rajpni sa'csi huistie gubañsa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlanjz Dios si'c gucbee Jesucrist, bejnzani ni rlanjz Dios che gujtni. ¹¹ Te gac guidzunä lo yälguibañsac loj rebengut te xca'ä yälñabajñ par tejpas lo Dios.

¹² Dizana guiniä “abenä gaan” o “anacä beñsa'c”, alga sanuätis te gunä gaan yälñabajñ nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgaä

naä si'cni guiniazä nani churu gac. ¹⁴ Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guiban'sijcnu, chanuutis gusoobnu rediidxga; nungäjl guibajnnu loj rediidxre, jiennu tejsi xhigab.

¹⁷ Rebetzä, coltanajl narä, colyejn si'c runä narä, colhuiiza rebejn nani nabajn si'c nabanä. ¹⁸ Xhidajl huält aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyajreni nani bejn Jesucrist che gudijxni xtojlnu lo cruzj. ¹⁹ Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtujy; luxh riutisreni xcäl'nasa'c guedxliujre. ²⁰ Niluxh nuure, xhaguibaali najc laadxnu, luxh ro'cli cabäaznu jääd nani ruslaanu nen dojl, nalaaznu lagajc Dad Jesucrist. ²¹ Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl'rni-beeni. Sujnni dee con yäl'rni-beduxh ni rajpni te rni-beeni loj guirali'ti, guiraa nejz.

4

Colguibalajztis xcuent Dad Jesucrist

¹ Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaä lazä, lojtu ni najc yäl'nasa'c xtenä, col'sudzu'tz loj xtidx Jesucrist.

² Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. ³ Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yäl'nabajn par tejpas.

⁴ Colguibalaznäjtis Dad Jesucrist; stehuält rniä: colguibalajz. ⁵ Sugabee guiraa rebejn xho najc xcäl'nabajntu lo xtidx Dios. Asiäddzungajxh dxej xten Dad Jesucrist.

⁶ Na'c guidxejbtu, colnabtis lo Dad guira'ti, colgudeedza xquixtios lojni la'l ni cabedx-canabtu lojni. ⁷ Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsas'c; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsas'cpac, o palga yu' xhi te diidx ni sajz guiliä'p xpala'nni, xcuent guiraa reni'c colyejn xhigab. ⁹ Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

Gojn xten refilipenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjtü narä. Guliini; galooli rlaajztu niacnäjtü narä, luxh di niajcdini. ¹¹ Dinä

guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹² Sajc guibanä che guxii rapä; sajc guibanä che xhidäl rapä; abisiedä guibanä xhotis: sajc gauduxhä, sajca guilianä; sajc gapä xhidajl xhixtenä, sajca tedä trabajw. ¹³ Guira'tini sajc gunä sa'csi Jesucrist racnäjä narä. ¹⁴ Niluxh xhet najcdi; laaca dzuun bejntu che bejntu xhigab gacnäjtu narä laļ ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäjä narä, la'tistu gucnäjä narä. ¹⁶ Cheni yu'äli guedx Tesalónica, baxhaļtu meel loä tej-tio'p huält. ¹⁷ Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhaļtu meel loä. ¹⁸ Naj acua'ä guiraa ni baxhaļtu, arapä xhidajl, arapduxhä sa'csi acua'ä nani biädnä Epafradito baxhaļtu loä, te gojn ni rlianejxh si'c guxhyaal, te dzunsa'c ni rhaglaļz Dios. ¹⁹ Dios xtenä guniidx lojtu guiraa nani riäädx xca'tu, si'ctisni rajpni reyäl'nasa'cduxh xhaguibaa con Dad Jesucrist. ²⁰ Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Coldeed xtixtios lo guiraa rebejn ni abia lastooni nez loj Dad Jesucrist. Rebejtnu ni yu' ree näjä narä ruxhaļnu xtixtios lojtu. ²² Guiraa rebenree ni abia lastooni nez loj Dad Jesucrist ruxhaļ xtixtios, niluxh ruxhaļru resa' César xtixtios lojtu.

²³ Suga'p xcälracnäjä Dad Jesucrist lastootu. Sugacni si'c.

Te Guijtz Lo Rebeñ Colosas

Bacuaa Pabl loj rebeñ guidoo ni yu' guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu ² cagucuaanu reguijtzre loj rebeñ Colosas nani nabannaya rujnreni si'cpacni rlaiz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtdadnu.

Rniab Pabl gudeed Dios yälñajn xtenni

³ Rdeednu xquixtios lo Dios xtdad Dad Jesucrist rniabnu lojni xcuenttu guixe-guixee. ⁴ Abiejn diajgnu xho rililajztu xtidx Dad Jesucrist, näjza xho sanälajztu rebeñ ni ahuililajz xtidx Jesucrist, ⁵ sa'csi cabäajztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälruslaa lo dojl. ⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeñ ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeezatu guliipac najc xcälñulasajz Dios. ⁷ Sigajcza bisieedtuni lo Epafras, ni sanuutis cayacnäjäni nuure lo dzuun. Laani najc te beñsa'c, yu'ni lojtu cayujnpacni xtzun Jesucrist lacuaa nuure. ⁸ Laani abasule'ni diidx loonu xho sanälajz sa'tu sa'csi nabajñ Sprit Dxan xten Dios neñ lastootu.

⁹ Laa ni'cni dxejli nani biejn diajgnu diidxre xcuenttu, di cuääz cabedxcanabnu lo Dios, canabnu gacheduxhtu xho rlaiz Dios guntu, guniidxni guiraa yälñajn näjza gusanijni xcäriejntu ¹⁰ te guibajntu si'cni nungäl guibajñ beñ ni sanajl Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsac näjza jianijru xcäriejntu xcuent yälñiembee Dios. ¹¹ Tioobrutu loj xcälñadip, xcälñibee Dios te guibaa lajztu gusutiplajztu, cue'cdxilajztu loj xhitis ni sajctu. ¹² Guibalajznu guideednu xquixtios loj xtdadnu Dios nani basudzu'tz nuure te xca'nu yälñabajñ par tejpas sigajc guiraa rebeñ nani ahuililajz xtiidxni yu'reni lo xpianijni. ¹³ Laani abaslaani nuure loj xcälñibee yälñacäjä, abateedni nuure lo xcälñibee xi'nni ni sanälajzni. ¹⁴ Laa xi'nni ni baslaa nuure neñ dojl cheni baxhe'ni xtiejñni, gujtni lo cruzj, dxejc gudijxni rextojlñu.

Gubisacnu loj Dios xcuent xcälgujt Jesucrist

¹⁵ Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujñ lojni. Laani guyu'ni galodoo luxh rñibeeni lo guiralii ni yu' lo guedxliuj. ¹⁶ Por laani benchee Dios guiralii ni yu' xhaguibaa ni yu'za lo guedxliuj, renani ruzeñ sigajc renani di guzeñ: rereii, näjza reni rñibee loj rexangl Dios, näjza reni rñibee loj rexangl beñdxab, nägajcza reyälñibee xten reguixhajg, sigajczani loj regubier, lo reguxhtis ni rajp yälñibee, guiraani guc-chee por laani, näjza par laani. ¹⁷ Alanabajñ Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸ Laani najc nani rñibee guidoo, nalajznu rebeñ nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rñibeeni. Loj guira'ti ni yu' laatisni najc nani sajc guinibee. ¹⁹ Sa'csi bidxaglaiz Dad Dios ga'p Jesucrist guiralii yälñibee nani najc xten Dios, ²⁰ por lagajcza Jesucrist badzu' Dios guira'ti ni yu', guibi'reni lojni, reni

yu' lo guedxliuj sigajc reni yu' xhaguibaa, sa'csi abiäjl-lajzni, aguredxi lajzni sa'csi bixe' xtiejn Jesucrist lo cruju.

²¹ Luxh la'tu gujctu si'c benzijt lo Dios sa'csi galoo rdxe'chtu lo Dios nen lastootu xcuent redzunguijdx nani bejntu. ²² Niluxh naj abiäjl-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruju cheni gujtni. Ni'c bejnne te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu. ²³ Niluxh riäjl chanuu sudzu'tztu, cuedxitu lo yälrlilajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Redidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵ Ni'c nacä te bejn ni rusule' diidx nen guidoo. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, ²⁶ te gacheenu rehxigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexepejni. ²⁷ Lojreni bejn Dios xhigab guluini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yälxhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujnreni nez loj Jesucrist. ²⁹ Xcuent dzuunre guideb xtipä runä dzuun con guiraa yäl'nibee nani runiidx Jesucrist narä.

2

¹ Rlazä gacheetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtdadnu näjza Dad Jesucrist. ³ Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälrlilajz xten Jesucrist. ⁶ Ni'cni sigajc ni huililajztu xtidx Jesucrist, sigajcza colchasanäj Jesucrist. ⁷ Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yälrlilajz xten Jesucrist si'c ni abisieedu. Colgudedduxhru xquixtios lo Dios.

Yäl'nabancoob ni rudeed Jesucrist

⁸ Colhuii, na'c gusaantu guxhiid bejn xcälrlilajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxdx lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyälguxhtis, guiraa reyäl'nibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia

Colquiil recos ni najc xten xhaguibaa

²⁰ La'tu agujttu con Jesucrist, abiriitu lo rehxigab xten guedxliujre. Naj xhiciuent guibajntu sigajctis nabajn rebejn nani di gumbee xtidx Jesucrist, ä? xhiciuent rusoohtu rediidx ni caj lo releii? Loj releii caj sa' diidxre: ²¹ "Di chahuallu dee, di gaulu ni'c, di canlu dec." ²² Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn. ²³ Guluuicani sa' releiiga rien asdoo ruluiireni yälmanduxh, luxh che rusoob bejn releiiga rchaloreni rajnreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxhreni.

3

Yälnabanbiejw con yälnabancoob

⁵ Colcuälaz redzunguijdx xten guedxliuj nani rujntu, yäl¹rusguee gunax-
teb, yälrujn recosdxuudx, recos ni rdxaglazj tiejxhtu, rexhigab-guijdx,
yälrsiäb-lajz xhi xten bejn, guiraa redee rujn runijt bejn lo Dios sigajc rujn
bejn che rajn bejn rebanäjb. ⁶ Guiraa redzuunga rujn riääd xcälrdxe'ch
Dios yejc renani rujn sa' redzuunga. ⁷ Näjza la'tu bejntu sa' redzun-
guijdxga galoo cheni guyu'tu lo sa' yäl¹nabajnga. ⁸ Niluxh naj näjza la'tu
colgusaan recosre; nalajznu yälrdxe'ch, yäl¹ruche'ch sa'ni, yälrujn latzsiaj
sa'ni, yäl¹rniyaj sa'ni, näjza rediidx-dxuudx ni rniitu. ⁹ Na'c gusgueetu

resa'tu, sa'csi nanab gusaantu nani bejntu cheni guyu'tu loj redzun-guijdx. ¹⁰ Colyajc te beŋcoob, ni guixe-guixee cayanijru xcäriejnni, te gumbesa'ctu Dios, te gactu sigajc najc Dios ni benchee beŋgedxliuj. ¹¹ Lo yälŋabaŋcoobre rutiru beŋzjt, ni claza xpeŋ Israel, rutiza rebejn ni ru' bee, ni claza bejn ni di chu bee; rutiza beŋzjt, ni claza bejn ni siäd zitduxh; rutiza mos, ni claza bejn nani di chu lo bejn, sa'csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

¹² Naj agule Dios la'tu te gactu xpejn nani gac naya, nani sanälajzni, colguibajn con yälŋulasajz, na'c guidxe'chtu, colyacnadoo con yälŋadolajz, colŋiiza nadolajz. ¹³ Colyujn huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäjl-lajztu sigajcni basiäjl-lajz Dad Jesucrist lojnu xcuent rextojŋnu. ¹⁴ Che abejntu guiraa recosre, colguilru yälŋanälajz nani rusa' loj guiraa recosre. ¹⁵ Xcälŋbedxilajz Dios guinibee neŋ lastootu, sa'csi parpac ni'c gurejdxni la'tu, te gaczatu tejsi con rexpejn Jesucrist. Colgudeed xquixtios loj Dios.

¹⁶ Xtidx Jesucrist chuduxh neŋ lastootu con guiraa yälŋajn, te guluiitu, te gulijdxu tejsa resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios neŋ lastoonu. ¹⁷ Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtdnu con laj Jesucrist.

Xho nanab guibajn te fami ni najc xpejn Jesucrist

¹⁸ Regunaa nani abachŋaa, colgusoob xtidx chäältu sa'csi si'c rlajz Dad Jesucrist. ¹⁹ Reniguii nani abachŋaa, colchanälajz chäältu, na'c guidxechnäjtireni. ²⁰ Reni najc biuux, colgusoob xtidx xtdtu loj guira'ti, sa'csi si'c rchaglaiz Dad Jesucrist. ²¹ Reni najc Dad, na'c guche'chtu rexi'ntu, didi gac-huin lajzreni. ²² Reni najc mos, colgucuaiajg xtidx xlamtu lo guedxliujre loj guira'ti xtzunni. Na'c guns'a'ctu dzuun che cahuiisireni si'c rujn renani ruspa lajz bejntis. Con yälŋadolajz colyejn dzuun sa'csi sanälajztu Dios. ²³ Guira'ti nani guntu, colyejn guideb lastootu si'c xtzun Dios, et si'c xtzuundi rebejntis. ²⁴ Anajntu lo Dad Jesucrist sica'tu yälŋasa'c ni najc yälŋabajn par tejpas, sa'csi loj Dad Jesucrist rujntu dzuun. ²⁵ Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

4

¹ Renani najc lam, coldeed loj rexmostu nani riäjl xca'reni sa'csi anantu näjza la'tu rajptu xlamtu xhaguibaa.

² Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³ Colnabza lo Dios con nuure te gacnäz Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neŋ latzguiib. ⁴ Colnab lo Dios te guyasi gusule'ä rediidxga si'cni riäjl guiniä.

⁵ Colguibansin loj rebejn nani di gumbree xtidx Jesucrist, colgusule' diidx cheni riäjl guiniitu lojreni. ⁶ Rextiidxtu nanab gacni si'c rchaglaiz Dios, saruduxhza gac xtiidxtu te gacbeetu xho riäjl gudzu'tu diidx loj tejsareni.

⁷ Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸ Ruxhaläni lojtu te gacbeepactu xho yu'ä, te guspaani lajztu. ⁹ Laani jiädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jiädhuiini la'tu, sacru colhuiini). ¹¹ Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaa lazä. ¹² Epafra, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu. ¹³ Narä rniliä xho rdzuun Epafra xcuent la'tu, näjza xcuent rebejn ni yu' guedx Laodicea, näjza guedx Hierápolis. ¹⁴ Lucas, doctoor ni sanälajznu, näjza Demas ruxhalzareni xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolizni. ¹⁶ Cheni agulujx biltu guiitzre, colguxhalni te jielni neñ guidoo xten guedx Laodicea, dxejcti colyelza guiitz nani baxhalä lo reben guedx Laodicea. ¹⁷ Colye'tz loj Arquipo: “Bahuisa'c xtzuun Dad Jesucrist nani cua'lu lojni. Bensa'c dzuunga.”

¹⁸ Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Reben Tesalónica

Bacuaa Pabl con reexamigwni lo guidoo guedx Tesalónica

¹ Narä, Pabl, näjza Silvan, näjza Timoteu cacuaanu guiitzre lojtu, resa'nu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz ben Tesalónica xtidx Dios

² Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³ Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäajztu guibi' Dad Jesucrist lo guedxliuj. ⁴ Bejtznu, racbeenu sanälajz Dios la'tu, laani aguleni la'tu. ⁵ Sa'csi che basule'nu xtidx Dios lojtu, et ganax diidxtis gujcni, niluxh xcäl'rnibee Sprit Dxan xten Dios nen lastootu bejn gucbeepactu diidx ni najc didxlii. Nanchesä'ctu xho gujcnu che guyu'nu lojtu. Si'c baluiinu la'tu te guiban'sa'ctu.

⁶ Sigajcni naban'näjnu Dad Jesucrist sigajcza gusloj cua'tu xmoodnu, basoobzatu diidx guideb xcäl'rbalajz Sprit Dxan xten Dios ni baniidxn lojtu, mase gudejdtu trabajw. ⁷ Si'c gujc te baluiitu loj guiraa reni rililajz nez Macedonia näjza nez Acaya xho nungäjl gac. ⁸ Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. ⁹ Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guli-ipac. ¹⁰ Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo reben'gut, Jesucrist ni rusläa nuurnu lo xcäl'rdxe'ch Dios ni churu siääd.

2

Xhi bejn Pabl nen guedx Tesalónica

¹ Naj lagajc la'tu najntu, bejtznu, et xlia'di bio'pnu lojtu. ² Et najntu xho gudéreni loonu, basacsíreni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh. ³ Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. ⁴ Sa'csi rsoobnu xtidx Dios basannäjni nuurnu xtiidxn, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuu lastoonu. ⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäjl niennu niacheetu rajpnu yäl'rnibee sa'csi baxhal Jesucrist nuurnu. ⁷ Niluxh guc nadolajznu che guyu'nu lojtu, cuanäjnu la'tu si'c rcanäj te nañ repäzni. ⁸ Sa'csi huinälazduxhnu la'tu, biennu xhigab xhet ganaxdi xtidx Dios guiniidxn lojtu, näjza lagajc xaimnu guiniidxn te guseednu la'tu xtidx Dios sa'csi sanälazduxhnu la'tu. ⁹ Bejtznu, la'tu

rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtü nuurnu laḷ ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu beḅxojn, gujcnu beḅsa'c. ¹¹ Anajntu xho baliidxnu la'tu, xho basuecdxinu lajztu si'c runnäj te dad rexingaanni. ¹² Guiraa dee biennu, te guiban'sa'ctu si'c nungäjḷ gun reni najc xi'n Dios, lagajc Dios ni gurejdx la'tu te chunäjntuni lo xcäl'rni beeni näjza lo xcäl'rdimbicha'ni.

¹³ Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beḅ guedxliuj. Niluxh gulii xtidx Diosni, sa'csi rusiani lastoo renani rililajz. ¹⁴ Bejtznu, dxejcti bejntu lagajc si'c rujn rebejn xquidoo Dios nen reguedx Judea reni najc xpen Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajḷ rexpen Israel-reni. ¹⁵ Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenu nuurnu. Direni chanälajz Dios, dizaren gusaan chanajḷ rebejn Jesucrist. ¹⁶ Che rlaiznu gulidxnu reni digac rexpen Israel, te näjza laaren laareni lo dojl, direni gusaan, si'ctis cagutajḷreni xtojḷreni. Niluxh naj abiääd'pac yäl'rdxe'ch xten Dios yejcreni.

Rlajz Pabl nihuisacni ro'c

¹⁷ Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp laiznu jio'pnu ro'c, rladzduxhnu fisacnu lojtu. ¹⁸ Rlaiznu nio'pnu, narä, Pabl xhidal huält rlažä niälä, niluxh beḅdxab di nusaan. ¹⁹ ¿Xhini'c najc xcäl'rbääznu, xcäl'rbalajznu, xcäl'racnaronu? Lagajc la'tu gactuni che suunu nez loj Jesucrist che jiädsac Dad Jesucrist. ²⁰ La'tu najc ni ruspaa laiznu ni rliä'pza xpala'nnu nez lo Dios.

3

¹ Dxejc, che dirunu nutijp laiznu, biennu xhigab bianxtebä guedx Atenas. ² Dxejc baxhalä Timoteu, bejtznu nez loj Jesucrist, te biädhuini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcäl'rililajztu. ³ Te nicla tejtu di guidxejb che jiäd reyäl'huin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhalä chu jiädnä diidx xho najc xcäl'rililajztu, sa'csi cadxebä andi abasguee beḅdxab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlaizatzu fiitu loonu, sigajcza nuurnu rlaiznu finu lojtu. ⁷ Ni'cni, betznu, masä riädäx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraatu näj xcuent yäl'rbalajz ni yu' lastoonu xcuent la'tu nez lo Dios. ¹⁰ Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayääd'x gacbeetu xcuent xcäl'rililajztu.

¹¹ Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yäl'rinälajz loj resa'tu näjza loj guiraa rebejn, si'cni

rinälajznu la'tu, ¹³ te gunni sudzu'tz lastootu, na'c ga'ptu dojl nez lo Xtdnu Dios, che jiääd Jesucrist nájza guiraa rexpejnñi xhaguibaali.

4

Guibajñnu si'c rchaglajz Dios

¹ Naj, rebejtzu, rniabduxhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäjł guibajntu te guspaatu lajz Dios, te si'c chanuutis guibansa'ctu nez lo Dios.

² La'tu, anajntu rediidx ni baluiinu lojtu con xcälñibee Dad Jesucrist. ³ Lagajc Dios rlajz nayatis guibansa'ctu, na'c gun niguui dojl guesnäj gunaa ni di gac chäälñi, sigajcza na'c guesnäj gunaa niguui ni di gac chäälñi. ⁴ Tejgatu gantu xho guibanñajtu chäältu nayatis nájza xpala'nni. ⁵ Xhet si'c ni rujndi regunadxab nájza reniguii, nicla si'c ni rujn rebejn ni di gumbee Dios. ⁶ Rut chutejditu gusguee bejtzni lo redzunguijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. ⁷ Sa'csi Dios gurejdxni nuurnu te guibajñnu lo yälñabannaya xtenni, xhet lo yälñabandxuudxdi. ⁸ Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹ Ditu guiquiin gucuääru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰ Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtzu, chä'pru xcälñinälajztu. ¹¹ Colgutijp lajztu, dxitis colguibajn, coljiu xtzuuncatu, lagajc ñaatu colyejn dzuun si'cni agunibeenu guntu. ¹² Te fii rebejn ni di chalilajz laaca nabañsa'ctu, nágajcza te xhet jiäädxdi xhi rquiintu.

Xho gac che jiädsac Jesucrist lo guedxliuj

¹³ Bejtzu, rlajznu gacheetu xcuent rebengut te di gac-huin lajztu si'c rujn rebejn ni di chalilajz xtidx Dios. ¹⁴ Si'c ni rililajznu gujt Jesucrist, dxejc gubansacni, sigajcza rililajznu suspansac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siädnänireni.

¹⁵ Xcuent xcälñibee Jesucrist rniä lojtu, nuurnu ni nabajñnu che jiädsac Jesucrist, dinu nid loj reni nagayejs neñ baa. ¹⁶ Sa'csi lagajc Dad Jesucrist siäjt lo guedxliujre, sibedxa'ni, siejnza xse' guixhajg ni rnibee, sibedxa'za trompet xten Dios. Dxejc sibanxgaa reni nagayejs neñ baa, reni huililajz xtidx Crist. ¹⁷ Dxejc nuure ni nabañsijcnu sidxaagnureni neñ rebäj te lo bej chachagloonu Dad. Si'c chonnu cholanzñajnuni par tejpas. ¹⁸ Ni'cni rniä lojtu, colcuedcxilajz sa'tu con rediidxre.

5

¹ Niluxh xcuent redxejga, reijzga, xhet riquiinditu gucuääni lojtu, ² sa'csi la'tu anansa'ctu sidzujñ dxej ni jiääd Jesucrist cheni rut cayunlojdini, sigajc che riääd te gubaan yääl. ³ Che canii bejn: “laaca dxunnu, dxunsa'cnu”, chela gacbeerenei acadejdrenei trabajw si'c che rdzujñ yälñayan te gunaa che rajl xi'nni, luxh digacdi guxunreni lojni. ⁴ Niluxh bejtzu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. ⁵ Sa'csi guiraatu najctu beñsa'c nabajntu lo bianij, lo rdxee, dinu gac benguijdx, dinu guibajn lo yääl, lo yälrcäyj. ⁶ Ni'cni di nungäjł guidiesnu si'c rejs stecuaa bejn,

ni'cni nungäjl sunasiñnu na'cza jiennu redojl ni rlajz tiejxhnu. ⁷ Reni rejs, rejsreni yääl, reni rsiojz, rsiojzreni yääl. ⁸ Niluxh nuure nabajñnu lo rdxee, ni'cni nanab na'c jiennu si'c, riäjl xca'nu yälrlililajz näjza yälrlinälajz si'c rca' soldaad gamangw guiib ni rajcwni, ni rusäuu lastooni. Riäjlza guiläzdzu'tznu sa'csi yälrusläa lo dojl najc si'c xhumbrel-guib ni ru' yejc soldaad ni rusäuu yejcn. ⁹ Sa'csi di Dios nibe nuurnu te chonnu gabijl, alga guleni nuurnu te xca'nu yäl nabajñ ni rudeed xi'nni, Jesucrist. ¹⁰ Sa'csi gujt Jesucrist lacuaa nuurnu, te guibanñäjnni masä nabajñnu lo guedxliujre o nagayejsnu neñ baa che guibi'ni. ¹¹ Ni'cni, colguspaa lajz sa'tu, tejtü sigajcza steetu, sigajcni cayujntu naj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjlza chanälazduxhturen xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc beñlatsiaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedxi lajz guiraasi bejn.

¹⁵ Colhuii di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

¹⁶ Colguibalajztis guideb nabajñtu. ¹⁷ Na'c cuääz guiniitu lo Dios. ¹⁸ Mase xhitis rsiajctu, coldeed xquixtios lo Dios, sa'csi si'c rlajz Dios gun reni rililajz Jesucrist.

¹⁹ Di cuälaztu xtidx Sprit Dxan xten Dios ni rniini neñ lastootu. ²⁰ Na'c cuälaztu xtidx reni rnii xtidx Dios xcuent nani churu gac. ²¹ Colquiil guiraa rediidx, coljiannäjtis rediidx ni najc didxsa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjl guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujnza guiraa ni rniini, ni'c sujnzani guiraa redzuunre.

Ruzadiidxnireni

²⁵ Bejtznu, colnab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, goltu guijtze loj guiraa rebejtznu.

²⁸ Gacnäj Dad Jesucrist la'tu. Sugacni si'c.

Guijtz Ni Rojp Lo Reben Tesalónica

Rucuaanu guijtzre lojtu, rexpén Jesucrist ni rbäjz guedx Tesalónica

¹ Narä Pabl, näjza Silvan näjza Timoteu, cacuaanu guijtzre lojtu, rebejtzn ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. ² Gacnäj Dios Xtadnu näj Dad Jesucrist la'tu, guscuecdxizareni lajztu.

Gun Dios yäl̄guxhtis loj rebendoj̄ che guibi' Jesucrist lo guedxliuj

³ Bejtznu, rudeednu xquixtios lo Dios xcuenttu, si'c riäj̄l jiennuni, sa'csi xcäl̄rililajztu siädroobru, näjza yäl̄rinälajz ni rajp tejgatu näjza sa'tu siädroobruni. ⁴ Ni'cni rliä'pnu xpala'ntu nen reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. ⁵ Dee ruluiipac xcäl̄guxhtis Dios najc laaca, ni'c rnii Dios riäj̄l jiu'tu lo xcäl̄rnibeeni sa'csi cadejdtu trabajw xcuent yäl̄rnibeega.

⁶ Sa'csi rujn Dios xhigab riäj̄lza quix reni bateedtu trabajw xtoj̄lreni, ni'c suteedzani reni'c trabajw. ⁷ Niluxh la'tu ni cadejdtu trabajw, sujn Dios gusilaznäjt̄u nuure che guluiioj̄ Jesucrist, siriini xhaguibaa siädñäjni rexanglni ni sajc, ni rnibeduxh. ⁸ Lo te balduxh siädñi, dxejc guisloj̄ susacsíduxhni reni di gañ Dios, dizareni gusoob xtidx Dad Jesucrist nani rudzucaj̄ dojl̄. ⁹ Guiraareni sidejdreni trabajw, par tejpas agunij̄treni, zijt churen̄i lo Dios, lo yäl̄rdimbicha' xten xcäl̄rnibeeni. ¹⁰ Che jiäd̄ Dad guiriini xhaguibaa, dxejga siliä'p rexpej̄nni xpala'nni, sidxeloj̄za renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabaj̄ntu si'c riäj̄l guibaj̄n reni guleni. Rniabzanu guniidx Dios lojtu guntu guiraa redzunsä'c ni rchaglaiz Dios guntu, gacñäzani la'tu con xcäl̄rnibeeni te guntu redzuun ni rujntu sa'csi rililajztu. ¹² Te chä'p xpala'n laj Dad Jesucrist si'cni nabaj̄ntu, te laani guiliä'pzani xpala'ntu, xcuent yäl̄rinälajz xten Dios näjza Dad Jesucrist.

2

Bendolduxh

¹ Naj, rniabduxhnu lojtu bejtznu, xcuent dxej ni jiäd̄ Jesucrist, dxej ni guidopzanu lojni, ² na'c chugajtu yarsia'. Na'cza gusaantu guchejbreni la'tu con diidx ni ruluii te bej̄n ni najc profe't, nicla con diidx ni rnii stee bej̄n lojtu, niclaza con diidx ni naareni lojtu caj loj te guijtz ni naareni baxhañu lojtu, cadre caj “dxej ni guibi' Jesucrist abidzuj̄n”. ³ Na'c gusaantu gusguee bej̄n la'tu xcuent rediidxre. Che gajd dxejga guidzuj̄n, su' bej̄n ni sibälaz xtidx Dios, dxejc suluiioj̄ ben̄latsiaduxh, xi'n nani sinitlej̄ par tejpas. ⁴ Bej̄nre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni raj̄n bej̄n, te cueni nen xquidoo Dios, guluiiojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä rediidxre lojtu, ä? ⁶ Naj la'tu anajntu xhini'c ruscuääzni, te na'c guiricajni ansde guisa' redxex xtenni. ⁷ Te yäl̄xhiga'tz najc dzunlatsiaj̄ ni alacayajc lo

guedxliuj, cayäädxtis guibicaj nani caguscuaäzni galäiini. ⁸ Dxejc suluiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. ⁹ Beñlatsiaduxhre najc si'cpac najc beñdxab. Che guidzujñni, guidzujñni si'c te bejn nani rnibee, sujñni seen, sujñzani milagrw ni rusguee. ¹⁰ Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni nen dojl. ¹¹ Ni'cni susaan Dios jääd te yälrusgueduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxaglazreni yällatsiaj.

Reni gule Dios guirii nen dojl

¹³ Niluxh nuurnu riäjł gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jäällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu. ¹⁶ Lagajc Dad Jesucrist, näj Dios Xtdnu, ni sanälajz nuurnu, ni ruscäjn lajznu par tejpas, ni baniidx xcälrbääznu racnäjni nuunu, ¹⁷ guspaani lajztu, gusudzu'tzni la'tu lo guiraa redidxa'c ni guiniitu näjza redzuunsa'c ni guntu.

3

Colnab lo Dios xcuent nuurnu

¹ Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcn con la'tu. ² Colnabza lo Dios xcanäjni nuurnu te di tednu ladzñaa rebenlatsiaj, rebenguijdx, sa'csi xhet guiraadi bejn rajp yälirilajz. ³ Dios rusoob xtiidxni, susudzu'tzni la'tu, sacnäjzani la'tu te di sactu dolguijdx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacbeerutu xcäl'sanälajz Dios, canabäza colcuedxdi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtd Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajn si'cni baluiinu riäjł guibajntu. ⁷ La'tu anajntu xho riäjł guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejtü; guiraani bidiixnu, biennu dzuun dxej-yääl, te di nutaalnu xtzuun chu tejtü. ⁹ Masä nungäjł niniabnu niacnäjtu nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlajz gun dzuun di riäjł xca'ni xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujn rebejn. ¹² Rulijdxnu rebejnre, rnibeenureni con laj Xtd Jesucristnu: colcuedxi, colyejn dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtü di gucuadiajg xtiidxnu ni caj lo guijtzre, colhuii chuni'cni te na'c guchaagtuni,

te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbexi, guscuecdxi lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con ñääpac si'c runä lo guiraa rexquitzä, scree rucuaä. ¹⁸ Gacnäjä Xtad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. ² Timoteu, luj najclu si'cpac xinganä lo yälirililajz. Xtadnu Dios näjza Xtad Jesucristnu gacnäjlü, gulaslajzreni luj, guscuecdxireni lastoolu.

Pabl rulijdx xcuent reni ruluii diidx-xhii

³ Che sia'ä reguedx Macedonia, gunibea jia'nlu guedx Efeso te gulijdxlu gaii bejn te na'c guluiireni garenca diidx, ⁴ te na'c jiutejreni rexcuent rebentimp, te na'cza jiuduxhrene chu gujc rexpengoldoreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibea si'c chanuu gulijdxlu rebejn.

⁵ Rulijdxnu bejn te ga'preni yälirinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶ Yu'reni abaro'n rediidxre, riejtis ro'reni saniduxhrene diidx ni xhet sajcdi. ⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni. ⁹ Najnnu di leii gac par bensa'c, najcni par reni najc benlatsiaj ni di jiu leii xten Dios, näjza reni di gusoob diidx; par reben guiidx, näjza reben dojl; par reni di jiu Dios, näjza reni rusguee; par reni rugu't xtadni, xnanni, näjza guiraa reni rugu't bejn; ¹⁰ par reni resnä j te gunaa ni digac chäälni, näjza reni resnä j lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹ nalajznu sa' redzunsa'c ni rulijdx xtidx Dios-le', diidx ni rusläa lo dojl. Narä biannää diidxre.

Rudeedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. ¹³ Luxh galoo guniyaäni, birinalä xpejn, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴ Niluxh lacti guroob gujc yälracnä j xte Xtadnu, guideb yälirililajz, nä j yälšanälajz ni rajp Jesucrist.

¹⁵ Diidxre najc guliduxh, nanab chalilajzpacuni: Jesucrist biääd lo guedxliujre te gusläani reben dojl; lo reben dojl narä nacäru ben dojlduxh. ¹⁶ Ni'cni balaslajz Dios narä, mase nacä ben dojlduxh lo guiraareni, te ganid con narä guluiini xho rbä jz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl nabajn par tejpas. ¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yälrulijdx ni runidxä lojlu te gucuasa'clu si'c te soldaad ni abiseed, sigajc ni gunii reprofe't xcuentlu galoo. ¹⁹ Di guinjtlu yälirililajz, bejnza xhigabsa'c, sa'csi yu'reni abaro'n xtidx Dios,

ni'c abanijtreni yälirililajz. ²⁰ Si'c gusajc Himeneo näj Alejandro, luxh abatedäreni ladzn̄aa bendxab te gusieedreni na'c guiniya'reni Dios.

2

Ruluiini xho guiniabreni lo Dios

¹ Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn. ² Guiniabzalu xcuent reŕei näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnnu. ³ Sa' yälrniabga najc laaca, luxh si'c rdxagljaz Dios ni ruslaa nurnu lo dojl guiniabnu lojni. ⁴ Dios rljaz laa guiraa bejn lo dojl, rljazzani gacbeepacreni xtidxliini. ⁵ Yu' tejtis Dios, näjza tejtisza nani rusiäjl diidx lo Dios näjza loj reben guedxliuj. Laani najc Jesucrist ni gujczä niguii. ⁶ Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios. ⁷ Dios gule narä te gacä apost te gusule'ä xtiidxni, yälirililajz näjza didxlii lo reni di gac xpejn Israel. Si'c ni rljaz Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs naaren, gusaanreni yälrdxe'ch, na'c gunreni biey. ⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cdi regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni. ¹⁰ Masru ruchaag gunreni si'cni rchalglajz Dios, si'c riäjl gun guiraa regunaa ni yu' lo Dios. ¹¹ Riäjl dxitis gucuadiajg regunaa xtidx Dios ni rusule' reniguii. ¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuadiajg diidx nani cagusule'ni. ¹³ Sa'csi ganid benchee Dios Adán, dxejctiru bencheeni Eva. ¹⁴ Luxh et Adandi basguee bendxab, bendxab basguee gunaaga, dxejc biajbni nen dojl. ¹⁵ Niluxh siliaa regunaa, palga jiuren xtuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczaren guinasa'c cuedxireni.

3

Xho riäjl gac reni rnibee

¹ Dee najc didx gulii: palga rljaz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rljazni gunni. ² Ni'cni, ni rljaz gac nani rnibee, riäjl guibansa'cni te na'c chu xhicuent guiniyaj rebejn. Riäjl gacni chääl tejtis gunaa, riäjl susinni, gacni te bensä'c, cuedxini, te guibansa'cni. Riäjlza di gudxojnni rolijzni guidzujn bejn, nägajc riäjl gacni te bejn ni nansa'c te guluiini. ³ Na'c gacni te bengü, nicla te ni rdxagdijl bejn, na'cza gacni te nani rsia' lajzni ga'pni xhidajl meel, riäjl cuedxini lajzni, na'c chanälajzni meel. ⁴ Riäjl guinibesa'cni rolijzni, saru gunni te gusoob rexi'nni xtiidxni. ⁵ Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶ Di riäjl guinibee te bencoob nani entis huililajz, te di guschä'pni xpala'nni sas jiajbni lo lagajc xcälñaj Dios ni biajb bendxab. ⁷ Luxh riäjlza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzn̄aa bendxab.

Xho riäjl gac reni rcanäj nen guidoo

⁸ Si'cza rediaconos riäjł gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹ Riäjł gapdzu'tzni rediidx nagajn xten yälrlilajz, ni'c nanab gac naya lastooreni. ¹⁰ Riäjł fixgaatu xho nabajñreni. Palga nabañsa'creni, rutza gacdi gucuaquijdireni, sajç gacreni diacono. ¹¹ Regunaa ni rłajz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹² Riäjł gac rediacono chääl tejtis gunaa. Riäjł guinibesa'cni rexi'nni näj guiraa reni yu' rolizjni. ¹³ Sa'csi rediaconos ni runsa'c xtzuunni, sanälajz bejnreni, dizareni guidxeyb rsiudzu'tz lastooreni lo xcälrlilajz xtidx Jesucrist.

Gurobduxh najç yälxhiga'tz xten Jesucrist

¹⁴ Cacuaä diidxre lojlu, niluxh rłazä jädhuigaä la'tu. ¹⁵ Luxh palga gacłä, anajnlu xho riäjł guibajn bejn roliz Dios, nalajznu xquidoo Gueb Dios ni nabajn par tejpas. Guidoore rniasdzu'tz näjza ruluiiru didxlii xten Dios. ¹⁶ Rdxeloyaduxh guiralii bejn yälxhiga'tz xten xcälñajn Dios: Dios biääd lo guedxliuj si'c te beñguedxliuj, Sprit Dxan xten Dios gunii beñdxanni; bahuui rexangl Dios lojni; basule'reni xtiidxni lo rebejn ni di gac xpejn Israel; guira lajt huililajz bejn xtiidxni; huäjsni lo xcälrdimbicha' Dios xhaguibaa.

4

Reni rbicaj lo xnezyuj Dios

¹ Aguniipac Sprit Dxan siääd redxey che chu reni guro'n yälrlilajz, sucuadijgreni xtidx rebejn ni rusguee näj xtidx rebeñdxab, ² niçla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxujy te guiblaa: xhetru racbeedini. ³ Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rłilajz, ni racbeeza didxlii, te gudeedreni xquixtios lo Dios. ⁴ Guiralii reni benchee Dios najç laaca, di riäjł cuälaznu xhi rca'nu che rudeednu xquixtios loj Dios. ⁵ Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejtznu rediidxre, sajclu te mossac xten Jesucrist, luxh si'c sisieedruzalü diidx xten yälrlilajz, näj yälrluisa'c ni sanuulu. ⁷ Na'c jiulu ni rnii regunaroyei ni xheti xtzuunni. Bisieed sudzu'tz lastoolu lo xtidx Dios. ⁸ Guxii sajç guinibduxh bejn te gusutijpni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yälñabajñre näjza lo yälñabajñ ni najç par tejpas. ⁹ Dee najç didxlii, riäjł chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäjznu Gueb Dios ni nabajn, ni rusłaa bejn lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, näjza guluiilu rediidxre. ¹² Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c. ¹³ Lał ni guidzunä ro'c, bil xtidx Dios lo rebejn, baliidxreni, baluiiza xtidx Dios lojnreni. ¹⁴ Di gusaanlu

reyälñajn ni baniidx Dios lojlu cheni basuj rebengool ñaareni yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶ Gopdzu'tz lagajc luj ñajza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucua diajg xtiidxlu.

5

Xho guibaññajnu reni rlilajz

¹ Na'c quidxa'lu loj te bengool; guninäjni si'c xtdadu, baliidx rebi'n si'c bejtzu, ² baliidx renanbengool si'c xnanlu, baliidx redxap steeb si'c rebisiajnlu con rehxigabsa'c.

³ Gucnäj rebuiud ni guliipac rquiiin chu gacnäjreni te chu xhi gaureni. ⁴ Niluxh palga yu' chu biuud yu' xi'nni o xajgni, suguisiedxgaareni guibañ nayareni lo xnez Dios, te quiixreni di'n ni nasääbreni lo xtdareni, ñaj xnanreni ni baslaareni, sa'csi ni'c najc laaca, rdxaglaizza Diosni. ⁵ Gunaa ni najcpac biuud, abia'n xtebni, ni'c rbäjtisni lo Dios, dxej-yääl rbejdx-rniabni lo Dios. ⁶ Niluxh biuud ni nabajn cadedgustisni najc si'c te ni agujt nen dojl. ⁷ Basule' rediidxre lojreni te rut gucuaquijdireni. ⁸ Palga yu' chutej ni di gacnäj resa'ni, lagajc reni rbäzj rolizjni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

⁹ Di gucuaalu laj rebuiud lo guijt te gacnäjtuni palga gajdni chu gayojn iiz. Riälza gac biuudga te gunaa ni gubannäsa'c chäälni. ¹⁰ Riälza gumbee bejn ni xcuent redzunsä'c ni rujnni; palga baslaani rexi'nni, palga badedlaani rolizjni gues ben zijt, palga gudiibni ni' rexpejn Dios te si'c guzen xcälñadolajzni, palga racnäjni reni rdej trabajw, palgaza riuni rujnni guira'ti redzunsä'c.

¹¹ Niluxh na'c gucuaalu laj biuud ni yu' guxiiru iiz sa'csi che guichaglaizreni te niguii, siälajzreni diidx ni bia'nreni lo Jesucrist, te rlaizni guchnasacreni. ¹² Dxejc siu'reni nen dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. ¹³ Dxejc sia' lojreni xhet gundireni, rijreni rolizj bejn ricuereni. Luxh malaii ni'ctis gunreni. Niluxh rliäszareni didxxhi, richu'reni lo xhitis, rniizareni diidx ni di guchaag guiniireni. ¹⁴ Ni'cni rlažä rebuiud ni najc dxa'pru guchnaareni stehuält, chu xi'nreni, fisa'ceni rolizjreni te na'c guiniya-jreni rebejn ni rdxe'ch lojnu. ¹⁵ Sa'csi yu' gaii biuud ni alagubicaj lo xnez Dios sanajlreni bendxab.

¹⁶ Pal yu' tej resa'nu ni najc sa'ni te biuud, riäl gacnäjnini, na'c gusaanni gutajlni xtzuun guidoo, te si'c guidoo saj c gacnäj rebuiud ni rquiiinpac chu gacnäjreni.

¹⁷ Rebengool ni rnibesa'c guidoo, riäl chanälajzrutureni ñaj gudeedrutu guiraa nani rquiiinreni, si'c najc reni rusulesa'c xtidx Dios, rulidxxa'ceni la'tu con xtidx Dios. ¹⁸ Sa'csi lo xtidx Dios caj scree: "Na'c gusällu guijxh ro' gon che rusiani triuu"; si'cza caj stee diidx: "Riäl gax bejn ni rujn dzuun."

¹⁹ Na'c cucua diajglu xtidx tej ni rucuaquij te bengool palga ruti tio'p, choñ testiigw. ²⁰ Niluxh reni sanuu rujntis dojl, riäl gulijdxlureni nez loj reben guidoo, te ñajza laareni guidxejbreni. ²¹ Nez loj Dios, nez loj Dad Jesucrist, nez lojza reangl ni gule Dios, rulidxduxhälü chanuulu lo

rediidxre, na'c jiurulu tej bejn lo sa'ni. Bejn tebloj loj guiraa rebejn.
²² Na'c gusiojb lajzlu gusuju lu naalu yejc te bejn, te gacni bejn guidoo palga gajdni guisied guibaŋsa'cni lo xnez Dios sa'csi lagajc yejclu jiajb rextojlni. Gubicaj lo guiraa dolgujdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexälracxhuulu.

²⁴ Yu' bejn ruzeŋgajc rextojlni ni'c rajcni castiigw, niluxh yu' bejn ni di xtojlui guzeŋgajc. ²⁵ Sigajcsa redzunsac ni rujn bejn; yu'reni ruzeŋgajc, niluxh mase dini guzeŋgajc, digacdi jianxhiga'tzni, sidzujn dxej suzeŋni.

6

¹ Reni najc mos riälj cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. ² Palga yu' remos ni najc xlamni te nani rilalajz, na'c cuälazreni rextiidxni sa'csi najcni bejtzni lo xcälirililajz Jesucrist. Riälj gunsa'crureni xtzuumni, sa'csi najcni sa'ni lo yälirililajz xten Dios, luxh sanälajzarenini. Rediidxre baluii, basule'.

Yälŋabaŋsa'c näjza te lastoo ni rbedxi

³ Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibaŋsa'c bejn, ⁴ bejnga rlajz guiliä'p lagajc xpala'nni, niluxh xhet najndini. Si'c te yälgujdx yu'tis yejcn yälguiniab diidx, yälrdiidx. Luxh redee rujn rdxe'ch lajzreni, rujnrdxe'ch bejn lo sa'ni, rujnrdni rniyaj bejn, rujnzani di bejn guinisac lo sa'ni. ⁵ Rujnzani rdilnäy bejn sa'ni. Guiraa redee gun bejn ni aguxhijñ xcäriejñni, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. ⁶ Niluxh yälŋabaŋsa'c näjza te lastoo ni rebedxi, redee sa'cduxh. ⁷ Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riälj guibalaaznu. ⁹ Niluxh reni rlajz ga'p xhidalduxh meel, riabreni lo xhigab gujdx, rujnzarenini xhidajl dzuun ni xhet sajcdi, ni rujn daan, ni rusiäaz bejn lo yälruhxin, lo yälrnitloj. ¹⁰ Sa'csi yälrinälajzni meel najc xlobaa guiraa redzungujdx. Yu'za bejn ni rlazduxh ga'pni meel, rusaanreni xcälirililajz Dios, dxejc lagajc laareni rujn rdedduxhreni trabajw.

Dzun-huen xten yälirililajz

¹¹ Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yälŋabaŋsa'clu; te chanajllu yälirililajz näjza yälŋanälajz; te chanuulu lo yälrbecdx lajz näjza yälŋadolajz. ¹² Benduxh dzuun xcuent yälirililajz Jesucrist, gunazdu'tz yälŋabajñ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. ¹³ Naj rulidxälu nez loj Dios ni rudeed yälŋabajñ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴ rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jääd Xtað Jesucristnu. ¹⁵ Sidzujñ dxejga nani agunii Dios guidzujñni. Dios ni najc le' sujn scree sa'csi laatisni najc Dios, najcni rei xten rerei, rnibeezani reni rnibee. ¹⁶ Laatiski dini guet, nabajñni lo bianij cadro rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riälj ga'p rebejn xpala'nni. Laani rajp yälŋrnibee par tejpas. Sugacni si'c.

¹⁷ Balijdx reni rajp xhidajl xhixtenni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajñ, ni runiidx loonu guiralii xhixtennu ni rquiinnu te guibalajznu. ¹⁸ Balijdxreni gunreni dzunsa'c, gundajnreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yälñasa'c ni guzudzu'tzreni che jiääd Jesucrist, te guiniatzu'tzreni yälñabajñ par tejpas.

Rulijdxni Timoteu

²⁰ Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yälñajn'. ²¹ Sa'csi yu' reni sanuu yälñajnre ni'c banijtreni lo Dios xcuent yälñirilajz. Gacnäj Dios luj. Sugacni si'c.

Guijtz Ni Rojp Lo Timoteu

Stee guijtz ni baxhał Pabl loj Timoteu

¹ Narä Pabl, nacä apost xten Jesucrist. Dios gule narä, xcuent yälnabajn ni gudeed Dios loj reni yunäj Jesucrist, si'c ni bia'n diidx. ² Cacuaä guijtze lojlu, Timoteu, xi'nä lo yärlililajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuumni si'c bejnza rextadgoldoä. ⁴ Rnaj lazä xho biinlu, najrlazä fiä lojlu te guibalazä. ⁵ Rnaj lazäza yu'pac yärlililajz lastoolu si'cni guyu'ni galoo lastoo xmañlu Loida dxejcru lastoo xnanlu Eunice si'cza yu' yärlililajzga lastoolu naj.

⁶ Ni'cni rniä lojlu naj, si'cni rcanäj bejn rodäj te di juini, si'cza cuanäduh reyälñajn ni baniidx Dios lojlu cheni basuä naä yejclu. ⁷ Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu. ⁸ Na'c guitujylu guiniilu rediidx xten Xtađ Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yälrusule' xtiidx Dios si'ctis gacnäj Dios luj. ⁹ Dios ni guläa nurnu neñ dojl, gurejdx nurnu te guibañsa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlajzni laani, sa'csi balasla-jzni nuurnu xcuent Jesucrist galooli che gajdli guncheeni guedxliuj. ¹⁰ Niluxh cheni biääd Jesucrist ni badzucaj rextojñnu lo guedxliujre, baluiloj yälrulaslajzga. Jesucrist banitloj yälrnabee xten yälgujt. Xtiidxni, ni rusule' xho rbicañ dojl, baluii yälnabajn, näjza yälnabajn par tejpas.

¹¹ Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. ¹² Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani saj gapdzu'tzni dzuun ni baniidxni loä dxejli cheni guibi'ni.

¹³ Chanuu guluiilu redidxsa'c ni banidxä lojlu. Gubajnza lo yärlililajz näj lo yälsanälajz ni rajpnu sa'csi yu'nu lo Jesucrist. ¹⁴ Cuanädzut'z reyälñajn ni baniidx Dios lojlu näj Sprit Dxan xtenni ni rbäjz neñ lastoonu.

¹⁵ Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. ¹⁶ Dad Jesucrist gacnäj reni yu' rolijz Onesíforo sa'csi balti huält biäds paani lazä, dini nitujy sa'csi yu'ä neñ latzguiib. ¹⁷ Che bidzujñni guedx Roma, gudiilpacni narä te bidxälñi narä. ¹⁸ Dad Jesucrist gulaslajz laani che guidzujñ dxej ni guibi' Jesucrist. Luj anajnlu balti dzunsa'c bejnñi che guyu'ni guedx Éfeso.

2

Te ni runsa'c xtzuum Jesucrist

¹ Ni'cni xi'nä, guzutijp sa'csi rulaslajz Jesucrist luj, racnäjnlu. ² Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajz guluiiza diidxga lo stecuaa bejn.

³ Batijp lajzlu tednäjlu narä trabajw si'c te soldadsa'c xten Jesucrist. ⁴ Di te soldaad gun dzuun ni bejn ni che gajdni gac soldaad. Rujnni xtzuum bejn ni guleni gacni soldaad, te si'c guspaani lajz bejn ga. ⁵ Sigajcza, ni rguijt digacdi xca'ni yäl'nasa'c palga dini quitsa'c si'c riäjł quitni. ⁶ Bejn ni rujn dzuun loniaa nanab xca'ni xcäl'nasa'cni ganidoo. ⁷ Bejn xhigab xcuent ni rniä lojlu, dxejc sujn Dios gacbeelu guiraani.

⁸ Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. ⁹ Ni'cni cagutipä lazä cadedä trabajw, caduä caden si'c te bejn ni bagu't sabejn ni. Niluxh digacdi xcadu xtidx Dios. ¹⁰ Ni'cni cadedä trabajwre te gacnä reni agule Dios te näjza reni'c chalilajz xtiidxni te guibajjn reni lo bianij xten Jesucrist par tejpas.

¹¹ Guliiduxh najc diidxre;

palga agujtnu con laani, sibannäjzanu laani.

¹² Palga rdejdn trabajw, sinibenäjzanu laani.

Palga dinu guicä'p numbeenuni, dizani guicäjp numbeeni nuurnu loj Xta dni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

Te bejn nani abia xtzuumni

¹⁴ Basnaj lajz rebejn xcuent rediidxre, gunibee lojreni nez lo Dad Jesucrist na'c til diidxreni sa'csi sa' diidxga xhet sajcdini, ruxhñtisni reniriendiajgni. ¹⁵ Batijp lajzlu te guidzujnlu lo Dios si'c te bejn ni runsa'c dzuun, xheti xhicuent guitujylu, sa'csi ruluisa'cpaclu xtidxliitis Dios. ¹⁶ Gulälaz yäl'riñay näjza xhidalduxh diidx ni xhet sajcdi, sa'csi renani rucudiajg rediidxga riajbrureni lo redolguijdx. ¹⁷ Luxh diidx ni ruiireni suxhingajcni lastoo bejn si'c rxhinłajz tiejxh bejn. Ni'c casiajc Himeneo näj Fileto. ¹⁸ Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rilajz. ¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: “Dad guibaa anumbee guiraa reni najc xpejn ni”; näjza “Nanab guibicajreni lo redolguijdx, guiraa reni ahuililajz xtidx Jesucrist.”

²⁰ Nen te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixeguixee. ²¹ Sigajcza te bejn ni rlajz gun dzuunro xten Dios, riäjł guibicajni loj redolguijdx ni xhet sajcdi. Dxejcti Dad Jesucrist sacnäjn te gunni redzunro xtenni.

²² Gubicaj lo redzunguijdx ni rujn rebejn, huinuu yäl'nabansa'c, yäl'rililajz, yäl'sanälajz, gulecdxiza lajzlu näj reni rujn xtzuum Dios, naya lastooreni rbedx-rniabreni lo Dios. ²³ Na'c jiulu rediidx ni ruluii rebejn guedxliuj. Anajnlu rediidxga rujn rdilnäj rebejn sa'ni. ²⁴ Niluxh te xmos Dad guibaa di riäjł guchaagni reni rdijł; riäjł gacni bensa'c loj guiraatis bejn. Riäjłza guluisa'cni; riäjłza gutip lajzni che xhet laadi rujn bejn lojni. ²⁵ Guideb yäl'nadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacbeereni didxgulii, ²⁶ te jianij xcäriejnreni te guiriireni ladznäa bendxab, te gunreni ni rlajztis Dios.

3

Xho gac rebejn nen redxelult

¹ Nanab gacbeelu neñ redxelult sidzujñ dxej tedtu trabajw. ² Sa'csi su' bejñ ni chanälajz lagajctis laani, ni rinälajz xmeeltisni, bejñ ni rniyaduxhtis, bejñ ni rchagljaz chä'p xpala'ntisni, bejñ ni rniyaj Dios; su' bejñ ni di gusoob xtidx xtradreni, su' bejñ ni di gudeed xquixtios lo Dios, su' bejñ ni najc benguijdx. ³ Neñ redxelultga su'za bejñ ni di chanälajz sa'ni, bejñ ni di lajzni jiäjł, bejñ ni rusgueduxh; bejñ ni digacdi guscuääz dolguijdx ni rujnreni; bejñ ni gualazduxh; bejñ nani ruro'n guira'ti dzunsa'c. ⁴ Neñ redxelultga su' bejñ ni ruto' sa'reni; bejñ ni di guidxejb gunreni ni riajbtis yejcreni, bejñ ni rchalosi najcreni bensacduxh; bejñ ni rchagljazru gun nani rchagljaz tiejxhreni lacuaa chanälajzreni Dios. ⁵ Neñ redxelult su' bejñ ni najc si'c benguidoo, ascanu rusoobreni xtidx Dios, niluxh naadireni xca'reni yälñadip näj yälñabee xten Jesucrist ni ruchaa lastoo bejñ.

Na'c guchaaglu rebejñga, ⁶ sa'csi loj sa' bejñre yu' reni richu' rolijz bejñ, sasgueereni regunanayääl ni rujñ dojl. Regunaare rinuu rujreni ni rlanjctis tiejxhreni, rujnreni guiraloj. ⁷ Rebejñre rsiedduxh didxcoob, niluxh di didxlii xten Jesucrist jiu' yejcreni. ⁸ Sigajcni gujc Janes näjza Jambres ni bidxe'ch loj Moisés, sigajcza najc rebejñre, cadxehnäjreni didxlii xten Jesucrist, najcreni bejñ ni aguxhijñ xcäriejñreni, luxh direni gacbee xtidx Dios, direni ga'p yälñililajz. ⁹ Niluxh direni chanuu xchej, sa'csi huenliisi suhuii guiraa rebejñ najcreni benguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰ Luj sanuutislu lo nani rusule'ä, näj xho nabanä, näj xhicuent runä dzuunre, lo xcälñililazä, lo xcälñadolazä, lo xcälñanälazä, näjza xho batip lazä. ¹¹ Najnlu xho basacsireni narä gudedäza trabajw ladznäa rebejñ neñ reguejdx xten Antioquia, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga. ¹² Guliduxh guiraa reni rlanjz chutis loj Jesucrist sidejdpacreni trabajw. ¹³ Niluxh rebenguijdx näj reni rusguee, sinuutisreni redolguijdx, sinuuru gusgueereni bejñ, luxh susgueeza bejñ laareni.

¹⁴ Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluiini lojlu. ¹⁵ Cheni biuuxlilu racbeelu xtidx Dios, ni ruluiilu xho guiriilu neñ dojl te xca'lu yälñabajñ par tejpas sa'csi rililajzlu xtidx Jesucrist.

¹⁶ Guiraa rediidx xten Dios ni caj lo guijt, lagajc Dios baniidxni te xcajni lo guijt.

Guiralii xtidx Dios najc laaca te guluu nuurnu xhini'c najc didxlii, te gacbeenu xhi najc didx-xhii, te gacbeezanu xho riäjł guiban'sa'cnu.

¹⁷ Te susiñ niguii ni najc xpejñ Dios, te gag gunni guiraa redzunsa'c ni riäjł gunni.

4

¹ Rulidxälu nez lo Dios näjza nez lo Dad Jesucrist ni jiääd si'c reii te gunni yälguxhtis loj reni nabajñ näjza loj reni agujt; rniäza dee lojlu: ² basule' xtidx Dios, gususiñ lo Dios mase xhitis or. Baluii reben dojl, gudilñäj reni di rlanjz guzobdiidx xtidx Dios, balidxnäj resa'tu xtidx Dios. ³ Sa'csi sidzujñ dxej di rebejñ guidxagljaz gucuadiajg yälñluisa'c; alga diidx ni najc lagajc si'c najc xhigabreni rlanjreni jiendiajgreni, ni'cni siguiilreni

xhidajl bejn ni ruluu te guisiedreni ganax ni rlaizreni gucuadiajgreni. ⁴ Susäuureni diajgreni te di jiendiajgreni xtidxlii Dios; alga xhitis diidx gucuadiajgreni. ⁵ Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextoljreni, beŋsa'c xtzunlu.

⁶ Sa'csi narä suga'ä ree te ju'treni narä, asiäddzungenjxh dxej ni guetä. ⁷ Aguluix bacuaä si'c te soldaad ni huicuasa'c lo guer, aguluix xnezyuä, gopdzutzä yälirilajz. ⁸ Naj cabäzä xca'a yälŋasa'c ni guniidx Dad xh-aguibaa, suniidxni yälŋabaŋsa'c. Dad najc juejz ni runsa'c yälguxhtis. Niluxh xhet loätis guniidxni yälŋabaŋsa'c. Sudeednini loj guiraa rebejn ni catiplajz cabäzreni dxej cheni guibisac Jesucrist.

Rediidx ni räjpni lojtis Timoteu

⁹ Basaaga lajzlu jiädhuigajlu narä; ¹⁰ sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Cresent säa lo reguejdx ni re' nez Galacia. Baxhalä Tito säa guedx Dalmacia. ¹¹ Xtebtis Lucas suganäj narä. Gudiil Marcw te jiädnäluni sa'csi sajz gacnäjni narä lo xtzun Dios. ¹² Tíquico baxhalä säa guedx Éfeso. ¹³ Cheni jiäädlu, jiädnälu ca'p ni basa'nä guedx Troas roliz Carpo, näj rexlibrä; di jiälza lajzlu rexquitzä. ¹⁴ Alejandro, ni najc gubetzguiib, basacsíduxhni narä. Dios quiixni sigajcni bejnni. ¹⁵ Luj bahuu te di gunni xhi gunni luj sa'csi rdxechduxhni lo xtidx Dios ni rusule'nu.

¹⁶ Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. ¹⁷ Niluxh Dad ni yu' xhaguibaa gucnäj narä, baniidxni yälŋadip te gujz guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä guläani narä ladzŋaareni, si'c ro' te beedz. ¹⁸ Suslaani narä loj guiraa redolguijdx, saptzu'tzni narä, sigucheezani narä te chunäani lo xcälŋnibeeni xhaguibaa. Lojni coldeed xquixtios, colganduxhni par tejpas. Sugacni si'c.

Rudeedni xtixtios lo rexamigwni

¹⁹ Badeed xtixtios lo Prisca näjza lo Aquila näjza loj resa' Onesíforo. ²⁰ Erasto bia'n guedx Corinto, niluxh basa'nä Tróximo guedx Mileto sa'csi cayacxhuuni. ²¹ Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtzn ni yu' lo Jesucrist ree, ruxhalreni xtixtios lojlu.

²² Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnää guiroobru xcärlirilajz reni agule Dios, te gacbeezareni didxlii ni rusia xcälnabajn nu. ² Cayunlojzanu yälnabajn par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³ Niluxh che bidzujn dxej ni agulexgaa Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu nen dojl. ⁴ Cacuaä guijtzre lojlu, Tito, xi'nä lo yärlirilajz ni ria'pnu xcuent Jesucrist. Rniabä lo Dios Xtradnu näj lo Dad Jesucrist ni rbää nuurnu nen dojl, gacnäjreni luj, gulaslajzreni luj, guscuedxizareni lajzlu.

Dzuun ni rujn Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuclu dzuun ni di niajldi nuluxä ro'c, näjza te cuclu rebengool loj reguidoo nen tejsa reguejdx si'cni gunibeä gunlu. ⁶ Gule bengool ni nabansa'c, te na'c guiniyaj bejnreni, nanab gacni chääl tejtis gunaa, riäjlza chalilajz rexi'nni, na'c guibajnreni si'ctisni rlajz tiejxhreni, jiuren xtid xtradreni. ⁷ Niguii ni rnibee guidoo rcanäj rexhixten Dios, ni'cni riäjl ga'pni te yälnabanya. Na'c gacni te bennajd, na'c gacni te bennadxecha', na'c gacni bengu, na'c gacni te bejn ni rdxagdijl bejn, na'cza xca'ni meel ni dini nuinsa'c gaan. ⁸ Nanab gacni te bejn ni rudedlaa rolijzni jia'n ben biooz, riäjlza chanälajzni dzunsa'c, gac nasinni, chu xcäriejnne; guibansa'cni nez lo Dios, sigajcza nez lo rebejn, guibanayani nez lo Dios, na'c gunni nani rlajztis tiejxhni. ⁹ Riäjl chanuutisni lo didxlii ni bisieedni te gac gulidxnäjzani bejn xtid xDios, te guzejcni diidx lo rebejn ni rniyaj xtid xDios.

¹⁰ Yu' xhidajl benguijdx, bejn ni rnii diidx ni xhet sajcdi, näjza xhidajl bejn ni rnii didx-xhii ni rusguee. Näjza lo rexpen Israel ni riuduxh leii yu'sa' bejnre. ¹¹ Sa' redee ni nanab jääu ro'ni, sa'csi rusgueereni xhidalo sa'reni, ruluiireni ni di riäjl guluiireni te gunreni gaan meel.

¹² Te niguii ni siääd lagajc lajdxreni guniini xcuent lagajc reben lajdxni: "Rebejn ni najc cretenses rniduxhreni didx-xhii, niälajzaren. Rlajzreni gausa'creni niluxh di rlajzreni gunreni dzuun." ¹³ Niluxh gulinini, ni'cni gudilnäjreni, te chalilazsa'creni xtid xJesucrist, ¹⁴ te na'cruza gucuadijgreni rediidx ni rdxällajz rexpen Israel, niclaza rediidx ni rnibee bejn ni gulälaz didxlii.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdXuudx, xcäriejnliireni nacdXuudx. ¹⁶ Naj rujsireni si'cni numbeereni Dios, niluxh ni rujnreni huenliisi ruzen direni nililajz, najcreni benguijdx, direni jiu xtid xDios, digacdi gunreni nicla tej dzunsa'c.

2

Rulijdx Pabl Tito guluisa'cni rebejn

¹ Niluxh luj guniitis rediidx ni ruluisa'c. ² Baluii rebengool gac benya, bejn ni yu' xcäriejnne, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yärlirilajz, yälsanälajz, näjza ni rbecdxi lajzni.

³ Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxa'c ⁴ te guluiireni regunaa dxa'p chu xcäriejnreni, chanälajzreni chäälreni näj rexi'nreni. ⁵ Gacreni nasin, guibannayareni, xcanäsa'creni rolizjreni, gacreni beñsa'c gusoobreni xtidx chäälreni, te rut guiniyajdi xtidx Dios.

⁶ Sigajcza gojz lo rebi'n riäjł chu xcäriejnreni. ⁷ Luj guzuj te fiireni xho riäjł gun bejn dzunsa'c. Che guluiilureni, saru baluii guiraa reni riäjł guluiilu. ⁸ Didxa'c gunii te rut gacdi guiniyaj diidxga, te si'c guitujy chutis ni rlajz guidxe'ch lojtu te xhet xhi didxguijdxdi gac guiniireni xcuentlu.

⁹ Balijdx remos te gusoobreni xtidx xlamreni, te gunsa'creni dzuun, na'c guzejcreni diidx lo rexlamreni. ¹⁰ Na'c cuanreni alga guibañsa'creni te guluii xcälñabajñreni lacti sacduxh xtidx Dios ni basłaa nuurnu neñ dojl.

¹¹ Sa'csi abiääd xcälracnäj Dios, abiädnäni yälrusłaa neñ dojl lo guiraa rebejn. ¹² La xcälracnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibañsa'cnu, te chonälajznu Dios lo guedxliujre. ¹³ Ruluiizani nuurnu cuääznu guidzujñ dxej ni soob xtiidxni ni basa'nni loonu xcuent dxej che jiääd Gueb Dios näj Xtađ Jesucristnu ni rusłaa nuurnu lo dojl. ¹⁴ Laani gujtni te gusłaa ni nuurnu lo guiraa redolguijdx, te basiani nuurnu te gacnu xpejnñi, gaczanu te bejn ni rdxagłajz rujn dzunsa'c.

¹⁵ Diidxre gunii, balijdx, basule' si'c te beñnajñ. Di gusaanlu cuälazreni luj.

3

Ni riäjł gun reni rlilajz

¹ Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenı gunreni xhitis dzunsa'c. ² Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnñu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagłajztis rujn tiejxhnu, nabajntisnu lo dolguijdx, rudxonłajznu, rdxe'ch bejn loonu, rdxe'chzanu lo sa'nu. ⁴ Niluxh che baluiiloj xcälřulasłajz näjza xcälřinälajz Dios ni rusłaa nuurnu näjza reben guedxliuj lo dojl, ⁵ dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balasłajzni nuurnu. Basłaa Dios nuurnu lo dojl sa'csi bidiib lastoonu, te biäjt xtojłnu te najcnu beñcoob, sa'csi bascoobza Xsprit Dxañ xten Dios xcäriejnñu. ⁶ Baniidx Dios cuääzpac Xsprit Dxanni neñ lastoonu xcuent ni bejn Jesucrist ni basłaa nuurnu, ⁷ te sa'csi rujn Dios cuent najcnu beñsa'c sa'csi abadzucajni xtojłnu, naj sica'nu xcälřnasa'cnu ni cabääznu, nalaaznu yälñabajñ par tejpas.

⁸ Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. ⁹ Naj basaan rediidx ni najc xlia'si, rediidx ni gunii reben galoo, yälřdiłdiidx xcuent xleii toMoisés sa'csi guiraa rebiejyga xhet sajdini, xhetza huendi rujnreni.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu. ¹¹ Sa'csi anajntu sa' bejn̄ga abaro'nni, agulälazni didxlii, lagajc xtojlni sujn nitni.

Diidx ni bacuaani lojtis Tito

¹² Che guxhaḷä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinaḷ. ¹³ Gucnäduhx licenciaad Zenas näjza Apolos, badeed guiraa ni rquiinreni te chanuureni xpia-jreni, te xhet jiäädxdireni. ¹⁴ Suguisieedza resa'nu gunreni dzunsa'c te gacnäjreni che guiquiinnureni, te na'c guibajnreni xlia'si.

Ruxhaḷni xtixtios

¹⁵ Guiraa reni yunäj narä ruxhaḷ xtixtios lojlu. Badeedza xtixtios loj resa'nu lo yälirililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ² Rucuaazanu guijtzre lo Apia, bisiajnnu lo yärlililajz, näj lo Arquipo ni racnäjä nuurnu lo dzuunre, näjza loj rebenguidoo ni rchagsa' rolijzlu. ³ Dios Xtadnu näj Dad Jesucrist gacnäjä la'tu, guscuedxireni lajztu.

Xcälsanälajz näj xcärlililajz Filemón

⁴ Rudedä xquixtios lo Dios xcuent luj che rniä lo Dios. ⁵ Abiejn diagä xcuent yärlinälajz näj yärlililajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tioobru xcärlililajzlu laj ni rusule'luni, te gachesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcärlinibee Jesucrist sajc guiniä gunlu xhitis ni riäj l gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. ¹⁰ Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

¹¹ Galoo, dini niajc bensa'c lojlu, niluxh naj sacnäduxhni guiro'pnu. ¹² Ruxhal'sacäni lojlu, te xcasacuni stehuält si'c ni najräni xca'lu, sa'csi siädnäni lojlu ascanu lagajc lastoä. ¹³ Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. ¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpac lu narä si'c gojn. Narä rlazä gunluni sa'csi rlaizpac lu gacni si'c. ¹⁵ Pet gubicaaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas. ¹⁶ Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj l chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajc narä. ¹⁸ Palga yu' xhi bejnuni lojlu o palga yu' xhi nazäabni lojlu, basa'nni lo xcuentä. ¹⁹ Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazäabzalu lagajc luj loä.) ²⁰ Betzä, benlaa hueenre narä si'c te ni sanälajz Dios te guspaalu lazä nez loj Dad Jesucrist.

²¹ Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²² Sigajcza basuchee te lajt cadre jia'nä, sa'csi cabazä gudzu' Dios ni gunabtu lojni, gusaan Dios jiädhuiä la'tu.

Ruxhalni xtixtios lojni

²³ Epafra ruxhal xtixtios lojlu. Laani yunäjni narä latzguiib, sa'csi guniizani xtidx Jesucrist. ²⁴ Marcw, Aristarco, Demas, näj Lucas, ni racnäjä narä lo dzuunre, ruxhalzareni xtixtios lojlu.

²⁵ Dad Jesucrist gacnäjä la'tu. Sugacni si'c.

Te Guijtz Nani Biääd Loj Rebeņ Hebreē

Agunii Xi'n Dios xtidx Xtadni

¹ Neņ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. ² Neņ redxe-jre aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni. ³ Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bej̄n ni riannäj xhixten Xtadni. Lajzani sajcru lo relaj rexangl Dios. ⁵ Sa'csi Dios di niäjb loj nicla tej rexangl̄ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl̄ni:

Narä gacä xtadni, laani gacni xi'nä.

⁶ Niluxh che biädnäni Xi'n xtebni lo guedxliuj, guniini:

Guiraa rexangl xten Dios, j̄Colgan Xi'nä!

⁷ Che gunii Dios xcuent rexangl̄ni räjpni:

Rujnni ruxhuñ rexangl̄ni si'c bej, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabajn̄lu par tejpas;

xcäl̄rnibeelu par tejpas najc te yäl̄rnibesa'c.

⁹ Ahuinälajzlu xhigabsa'c, dipaclu nichagljaz xhigabguijdx, ni'cni Dios ni najc Xtioslu, baniidxru yäl̄rbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti,

bencheelu cad soob guedxliuj, naazalu bencheelu reguibaa.

¹¹ Laareni sinitlojreni, niluxh luj nabajn̄lu par tejpas.

Guiraareni siujx si'c riujx te lajd.

¹² Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajn̄lu, di rexijzlu ted.

¹³ ¿Gucxa räjp Dios lo te xangl̄ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu la dz ni'lu.

¹⁴ Guiraa rexangl Dios najc sprit, ruxhał Diosreni te chayacnäjreni rebejn ni xca' yäl̄nabajn̄ par tejpas.

2

Na'c gusaanni diidx ni ruslaani lo dojl

¹ Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. ² Anajntu aguzojb diidx ni gunii rexangl Dios neņ redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³ ¿Xho gac guibicaj xcäl̄naj Dios yejcnu palga dinu jiu rextidx Dios xcuent yäl̄ruslaa lo dojl, ä? Ni Dad, Jesucrist basa'n diidxga lo

rexpejn¹pacni, dxejc laareni basule'reni rediidxre loonu. ⁴ Niluxh Dios baluii najc diidxga guliipac sa'csi bejn²ni reseen, nájza yälrdxeloduxh, nájza xhidajl remilagrw. Badeedzani Sprit Dxan xten³ni loj renani ahuililajz xtiidxni te gun tejgareni garen-garen xtzunreni si'ctis ni rla⁴jz Dios gunreni.

Nani guläxtiej yälruslaa bejn lo dojl

⁵ Di Dios gudeed yäl⁵rnibee lo rexanglni te guinibeereni guedxliucoob ni cagusä'tnu naj. ⁶ Guyu' tej ni bacuaa xtidx Dios lo guijt⁶z, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

⁷ Nagabsi dxej guxiiru saj⁷cni lo reangl xhaguibaa,

dxej⁸ti badesaclu xcäl⁸nasa'cni,

badesaclu xpala'nni,

badeedzalu yäl⁹rnibee lojni te guinibeeni guira'ti ni bencheelu.

⁸ Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. ⁹ Alga rhuiinu Jesucrist, ni bejn Dios guxiiru saj¹⁰cni lo reangl xten Dios che guyu'ni lo guedxliuj balsa dxej. Che baluux Jesucrist xtzunni lo guedxliuj, badeed Dios yälrdimbicha' nájza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujt¹¹ni lacuaa niejtnu.

¹⁰ Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rla¹²jz chanäni xhidajl xi'nni xhaguibaa, ni'cni baxha¹³l Dios xi'npacni Jesucrist te guläxtiejni yälruslaa bejn lo dojl che gudejdni trabajwduxh lo crujz. ¹¹ Sa'csi Jesucrist, ni rujn chasanäj bejn te yäl¹⁴nabanya, nájza reni risanäj yäl¹⁵nabanya, tejtis najc xtadreni. Ni'cni di Xi'n Dios guitujy guiniini lojreni: “betzä”. ¹² Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

¹³ Räjpzani:

Sibäzä gacnä¹⁶j Dios narä.

Ste lajt guniini:

Bahuii loä nájza rexi'nä ni baniidx Dios loä.

¹⁴ Te fami¹⁷l najc tejsi bää¹⁸l, tejsiza rejn; ni'cni che biääd Jesucrist lo guedxliuj guyu' tiejxhni náj xtiejnni si'c be¹⁹nguedxliuj, gujtzani te gujc bejn²⁰ni gunijt nani rnibee yälgujt, nalajznu, be²¹ndxab. ¹⁵ Te si'c baslaani guiraa reni rdxejb yälgujt, najcreni si'c reni yu'tis loj xlam²²ni guideb nabaj²³nni, lacti rdxejbreni yälgujt. ¹⁶ Guliini dini niääd te gacnä²⁴jni reangl xten Dios, biäädni te gacnä²⁵jni guiralii rexajg toAbram. ¹⁷ Ni'cni gujcni si'cpac te bejtznu, te gac gacni te bixhojz xten Dios ni rulasla²⁶jz, te bixhozsa'cza xten Dios, si'cni rla²⁷jz Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquuilza be²⁸ndxabni niujnni dojl, ni'c naj saj²⁹c gacnä³⁰jni renani ruquuil be³¹ndxab gun dojl.

3

Jesucrist saj³²cru loj Moisés

¹ Ni'cni bejtznu, reni anaba³³sa'c, sa'csi najctu reni gurejdx Dios gac xi'nni, colyembee Jesucrist ni baxha³⁴l Dios loonu. Laani najc bixhojz ni saj³⁵cru, rusule'zani xtidx Dios xcuent nani ahuililajznu. ² Laani huinuutis

guyu'ni lo Dios ni guleni te gunni dzuunre. Sigajc ni bensa'c toMoisés xtuun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. ³ Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. ⁴ Yu' xtað guiraa refamil lo guedxliuj, niluxh gule'c Dios guirali bejn, bencheezani guedxliuj. ⁵ Basoob Moisés diidx si'c te mos, cuanäjni rexpen Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga. ⁶ Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajtisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rnii Sprit Dxan xten Dios:

Naj, palga jiendiajgtu xse'ni,

⁸ na'c gun-najdttu lastootu si'c bejn rebejn ni bidxechnäj Dios che cuansajreni lo reyubijdz.

⁹ Ro'c bidxechnäj retoxtadgoldootu Dios sa'csi direni nililajz Dios siädnäreni,

niluxh bahuiireni redzunduxh ni bejn Dios nez lojreni tiuu ijz.

¹⁰ Ni'cni lał ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,
dina gusanä jiu'reni xcälrusilazä.

¹¹ Ni'cni bidxe'ch Dios lojreni,

bejn Dios te xhigabduxh,

di rebejnğa jiu' te gusilaznäjni.

¹² Bejtznu, colnatiro andi chu tejtu rujn xhigabguijdx, rlaiz guibicaj lo Dios, ni nabajn par tejpas, sa'csi dini chalilajz xtiidxni. ¹³ Ni'cni colgulijdx resa'tu guixe-guixee, laga najcni nadxej; te di chu tejtu gacnajd lastooni xcuent reyälrusguee xten redojl. ¹⁴ Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. ¹⁵ Si'c caj lo guijt:

Nadxej, palga jiendiajgtu xse' Dios,

na'c gunnajdttu lastootu si'c bejn rebejn ni bidxechnäj Dios lo reyubijdz.

¹⁶ ¿Chu reni'cni bidxechnäj Dios che biendiajgreni xtiidxni? ¿La et laadi guiraa rebejn ni guläa Moisés guedx Egipto, ä? ¹⁷ ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? ¹⁸ ¿Chu loj räjpni dipacreni jiu' lo xcälrusilajzni? Loj reni di nusoob xtiidxni. ¹⁹ Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

4

¹ Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. ² Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxga sa'csi bacuadiajgrenini niluxh direni nililajzni. ³ Luxh nuure ni ahuililaznu siu'nu lo yälrusilajzga; caj lo guijt gunii Dios rediidxre:

Ni'cni bidxe'chä lojreni, benä te xhigabduxh,
di rebejnğa jiu' te gusilaznäjreni narä.

Mase abaluuxni xtzuumni cheni birixtiejli guedxliuj. ⁴ Sa'csi loj stee guijtjz caj diidx ni guniini xcuent dxej ni rusilajz bejn: Xho'p dxej bejn Dios xtzuumni, dxejcti basilajzni tebdxej. Xhet bejndini dxejga.

⁵ Stehuält guniini:

Di rebejnga jiu' te gusilaznäjreni narä.

⁶ Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. ⁷ Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdtu lastootu.

⁸ Paru nudeed Josué yälrusilajzga loj rexpen Israel, diru Dios ninisac xcuent stee dxejre. ⁹ Naj ria'nza te yälrusilajz par rexpejn Dios, ¹⁰ sa'csi nani riu' lo xcälrusilaznäj Dios, rusilajzzani lo xtzuumni sigajc basilajz Dios lo xtzuumni. ¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

¹² Sa'csi nasesduxh xtidx Dios, yuduxhza xcälrmibee xtidx Dios. Najcni si'c te guchiil ni caduxh ro'ni, räazni nez nen redzujt näj yojb. Sigajcza xtidx Dios räaz nez cadro rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlajz lastoo bejn gun.

¹³ Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴ Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaunu xtidx Dios. ¹⁵ Xpixhojznu ni sajcru sajz gulasajzni nuure te di jiajbnu lo dojl, sa'csi laani sigajcza gudejdni trabajw, baquii benxabni te niujnni dojl, niluxh dini niujn dojl. ¹⁶ Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulasajzni nuure, guideb xcälracnäjni gacnäjzani nuure.

5

¹ Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlni nez lo Dios. ² Rdejdz bixhojz trabajw sigajc benguedxliuj, ni'c sajz ga'pni yälnadolajz loj rebejn nani nayääl näjza reni abanijt lo Dios. ³ Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

⁴ Rut sajcdi gac bixhojz xcuentcani. Dios najc ni rbejdxni te gacni bixhojz, dxejz rudeedni xpala'nni lojni si'c badeednini lo Aarón. ⁵ Si'cza di Jesucrist niajz bixhojz ni sajcru xcuentcani. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt:

Luj najclu bixhojz par tejpas sigajz gujz te niguii ni laa Melquisedec.

⁷ Cheni gubajn Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadi-ajz xtiidxni sa'csi huinälaiz Jesucrist Dios. ⁸ Ni'cni Jesucrist mase najcni

Xi'n Dios bisieedni basoobni diidx luxh näj ni'c gudejdni trabajw. ⁹ Che bidzujn dxej baluuxni guiraa redzuun ni rlajz Dios gunni, laani gujcn nani rudeed laa bejn nani rusoob xtiidxni lo dojl par tejpas ¹⁰ sa'csi Dios gulälajni bixhojz ni sajcru, gujcn bixhojz sigajc gujc Melquisedec.

Rxhunjriezgw gusa'nni xcärlililajzni

¹¹ Rlajznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee. ¹² Agujc xchej huililajztu rediidx xcuent Jesucrist. Ariäjl gusule'tu rediidxre naj, niluxh alga rquuinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rlajztu yäsactu le'ch lacuaa gautu yäjt, bää; nalajznu, redidxnagajn xten Dios. ¹³ Reni najc si'c báz, rä' le'chtis, direni gumbesa'c redidxa'c xten Dios. ¹⁴ Niluxh reben guyajl rajw yäjt. Sigajca redidxnagajn xten Dios najc par rebejn ni aguyajl lo xtidx Dios, renani ayu' xcäriejnni, arumbeereni nani najc dzunsa'c, nani najcza dzunguijdx.

6

¹ Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechlajz, xcuent redzuun ni rujn rejt bejn, näj yärlililajz xtidx Dios. ² Na'c guluiitisnu xcuent yälrobnis, näj yälrudzubnaa yejc bejn, näj xcuent yälrabajnsac rebengut, näj xcuent yälguxhtis par tejpas. ³ Alga do'o guisieedru xtidx Dios te churu xcäriejnnu, palga si'c guniidx Dios jiennu.

⁴ Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäz Spirit Dxan xten Dios neñ lastooreni, ⁵ luxh bidxaglazreni xtidx Dios näj yälrbiee xten Dios ni churu jiääd. ⁶ Palga laareni guibisacreni lo sa' yäl'nabajn ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucasacreni Xi'n Dios lo crujz, nalajznu susanxtujyreni Jesucrist nez loj rebejn. ⁷ Ben guedxliuj ni biejn diajgni najc si'c najc yuj ni rä' nis che riajbtis nisguij. Palga yujga gudeed yäl'nasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl. ¹⁰ Sa'csi Dios najc ni rujn yälguxhtissa'c, diza lajzni jiäl ni rujntu la'tu näj yäl'sanälajz ni rajptu par laani che racnäitu rebejtzn lo yärlililajz, luxh guixe-guixee si'c rujntu. ¹¹ Naj rlajznu tejgatu chanuu ga'p lagajc yälrbalajzre dxe lultli, te gac guiraa ni cabäjtzu. ¹² Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yärlililajz ni batipduxh lajzreni, guläzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. ¹⁴ Scree gunii Dios: "Guliä sacnää luj, sunidxäza xhidajl xi'nlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni rniliipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnğa xhetru yu'di xhi gunreni biey. ¹⁷ Rlajz Dios

gacheepac rexagdoo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. ¹⁸ Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yälrbexilajz loj renani gubig-guxun lojni, loj reni sanuu loj yälrlilajz xtiidxni nani abaniidxni loonu por lagajc lajni. ¹⁹ Laa ni'cni cabääznu ni rusudzu'tz lajznu si'c duu-guiib con ancl ni rniazdzu'tz te barcw. Si'c rusudzu'tzni lastoonu te jionnu cadro yu'ni detz ladró. ²⁰ Lagajc ro'c biu' Jesucrist xcuent nuure, te galooli baxhalni xnez Dios loonu, te gujcní bixhojzro par tejpas si'c gujcza bixhojz nani laa Melquisedec.

7

Jesucrist najc bixhojzro si'c najc Melquisedec

¹ Galoo che gujc Melquisedec rei xten guedx Salem, gujcní bixhojzro xten Gueb Dios. Che gubi' Abram che gulujx guer cadro bagu'tni reiei ni bidxe'ch lojni, huichagloj Melquisedecni, sas gunabni lo Dios te gacnäru Dios Abram. ² Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj “rei ni runsa'c yälguxhtis”, dxejctiru rei xten guedx Salem sälojzani “rei xten yälrbexilajz”. ³ Baluiilojni lojreni, niluxh dinu gan chu najc xtdni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcní si'c najc Xi'n Dios. Najctiszani bixhojzro par tejpas.

⁴ Naj colhuui, lacti te beñsa'c, te beñro najc Melquisedec. Lojni badeed toxtadgoldoonu Abram tejga ni sajcrú lo tejga tzuu ni bejnni gaan. Luxh Abram najc bejn ni sajcrú lo rexpejn. ⁵ Leii xten Moisés, rnibee xca' rebixhojz ni najc xfamíl Leví te cuaa lo sa'reni si'c ni badeed toAbram loj Melquisedec, mase najcreni rexagdoo Abram. ⁶ Niluxh di Melquisedec gac xfamíl Leví. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios. ⁷ Naj rut sajcdi guinii garenca, sa'csi nani sajcrú runle' yejc nani guxiiru saj. ⁸ Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. ⁹ Ni'cni saj guiniinu xcuent Leví nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec. ¹⁰ Sa'csi mase gajd xi'n toAbram chu che huichagloj Melquisedecni, batiipni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab näjza leiiga guidxaa. ¹³ Niluxh rnii xtidx Dios, Dad Jesucrist najc bejn xten garenca famíl. Luxh nicla tej bixhojz gajd gac bejn xten famílga. ¹⁴ Huenliisi najnnu najc Dad Jesucrist te bejn xten xfamíl toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini niajc bixhojz si'c rnii releii ni guyu' dxejc.

Laani gujcní bixhojz xcuént yǎlníbee ní najc par tejpas, ní rut gacdí gutzujl. ¹⁷ Scree najc díidx ní guníi Díos xcuéntní:

Luj najclu bixhojz par tejpas sí'c gujc te níguíi ní laa Melquisedec.

¹⁸ Dxejcti guníjt leíi sa'csi xliá'si gujcní, dí níajcdí níujn bejn sí'cni rniíni.

¹⁹ Dí xleíi to Moisés níujn gaan níbaṇsa'c bejn. Naj lacuaa leíiga rajpnu te xcǎlrililazsa'c; ní'c rujn rbígnu lo Díos.

²⁰ Díos bejn gacní bixhojz con xtídxliíni, ní guníini con lagajc lajni.

²¹ Stecuaa rebixhojz gujcreni bixhojz níluxh et con dídxliídíre, con laj te beṇro, níluxh bixhojzre guc bixhojz con dídxlií, con laj nani rájp:

Agunilíi Díos díidx con lagajc lajni,

níluxh díni gusíech lajzni, rájpni:

“Luj najclu te bixhojzro par tejpas,

lagajc sí'c gujc Melquisedec.”

²² Ní'cni, Jesucrist najc ní rujn ríle' redíídxre, luxh díídxre sajcruní

loj xleíi Moisés. ²³ Guyu' xhídalduxh stecuaa rebixhojz, sa'csi rejtrení,

dígcdí chanuureni gacrení bixhojz. ²⁴ Níluxh Jesucrist rajpni yǎlnabajn

par tejpas, naj najczaní bixhojz par tejpas. ²⁵ Ní'c rajcza ruslaani bejn

lo dojl par tejpas. Ruslaani guíraa renaní rbíg lo Díos por laaní, sa'csi

anabajní par tejpas te canabní lo Díos xcuént laareni.

²⁶ Jesucrist najc bixhojzro nani rquíinnu. Laaní najc dxan, díni níujn

dojl, agubícajni lo rebeṇ-dojl, huǎjszani jáaru xhaguíbaa. ²⁷ Díni gac sí'c

stecuaa rebixhojz ní nanab ju't man guíxe-guíxee te guze'c bixhojzroní

lo Díos te ganíd jáa lagajc xtojlní. Dxejcti sajc guíbí'ni guze'cníni lo

Díos xcuént xtojl rebejn. Níluxh Jesucrist tejtís huált gudejdni trabajw,

bejnníni chení cuajní lo crujz, baxhe'ní xtíejnní xcuént nuure, gujtní. Sí'c

gudíjxni xtojlnu par tejpas. ²⁸ Leíi xten Moisés rusaan gac bixhojzro te

bejn nani rejt, níluxh dídxlií ní guníi Díos con lagajc lajni gulení tejní gac

bixhojzro lagajc Xí'nní nani naya, nani nábaṇsa'c par tejpas.

8

Jesucrist najc nani rusíajl díídx

¹ Díídx ní sajcrú loj redíídx ní caníinu najc scree: bixhojz ní najc xpíx-

hojzronu agurej xladbee Díos lo xcǎlrdimbícha'ní xhaguíbaa. ² Neṇ yu' ní

najc dxan, neṇ guídoo ní benchee Díos yu' bixhojzre, xhet neṇdí guídoo

ní runchee rebeṇ lo guedxliuj. ³ Guíraa rebixhojz rajc rudeedrení gojṇ lo

Díos, rajcza ju'trení guídxaa te gusejcreni lo Díos xcuént xtojlní, ní'cni

nanab ga'p Jesucrist xhí gudeední lo Díos. ⁴ Paru suga'ní lo guedxliujre,

nícla bixhojz díni níajc, sa'csi yu' bixhojz ní rudeed regojṇ sí'c ní rníbee

xleíi Moisés. ⁵ Níluxh redzuun ní rujn rebixhojzga najc sí'c te balaa

xten guíra'tí ní yu' xhaguíbaa. Najnnu najcrení balaa sa'csi balíjdx Díos

Moisés chení agojl gunní xquídoo Díos, rájp Díos lojní: “Bahuíi te gunlu

guíra'tí sí'cpac ní baluíä lojlu lo dan Sinaí.” ⁶ Níluxh xpíxhojznu Jesucrist

rujn dzuun ní sajcrú, sa'csi najcni nani suga' galäíi xneyzuj Díos loj

rebeṇ guedxliuj, gusule'ní díídx ní guníi Díos chení bejnní xhígabcoob,

basa'nní dídxcoob loj rebeṇ guedxliuj. Luxh dídxcoobre sacduxhruní.

⁷ Paru níajc nusíejch leíi ní badeed Díos galoolí lo Moisés lajz rebejn, dí

níquíinní níujn Díos ste xhígabcoob. ⁸ Níluxh bahuíi Díos xhet cayunsa'cdí

rebeṇ guedxliuj, dxejc rájpni:

Naj nríliä sídzujṇ redxej che gunä stee xhígab,

jia'n stee diidx loj rexpejn Israel nájza loj rexpejn Judá te xca'reni didxcoob.

⁹ Xhet si'c'di xhigab ni benä che bia'nä diidx loj retoxtadgoldooreni nen redxej ni gunazä naareni te gulää'reni lajdx reben Egipto.

Laareni direni nusoob xtidxä ni'c basa'nä'reni, diruna niuä'reni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel nen redxejre gac scree, räjp Dad:

Sunä chu rexleä lo xcäriejnreni, sucuaäza xtidxä nen lastooreni.

Dxejcti narä gacä Xtiosreni, laareni gac rexpenä.

¹¹ Rut chu tejdi guluii sa'ni,

nicla bejtzni, nicla chu stee bejn gäbreni, "colyembee Dad",

sa'csi alanumbee guiraareni narä, rebäz sigajc rebengool.

¹² Narä sulaslazä'reni susiaä redzundxuudx ni bejnreni, diru lazä guizaj rextojlreni, nicla latzsiaj ni bejnreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

9

Xquidoo guedxliujre nájza guidoo xhaguibaa

¹ Laaca naj. Diidx ni bia'n galoo badeed leii xho gunreni che rajnreni Dios, nájza xho gac guidoo lo guidxliujre. ² Guc-chee guidoo dxejcti gojl te ladro galäini te gujcní tio'p yu'. Yu' ni najc ganid laani yudxan. Ro'c suga' candilieer, nájza mex cadro naga' yätxtiil ni aguc le' ³ Ni rojp yu'ga najc dejtz ladro, ro'c najc yudxanduxh. ⁴ Ro'c suga' te guiib cadro ru' yaal. Najcni ganax oor. Ro'c yu'za te guijn ni laa "arco de pacto", najcwni ganax oor, sigajc dejtzní, sigajcza nenñi. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, nájza guij cadro bacuaa Dios xleii toMoisés. ⁵ Yejc guijnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtojł rebejn. Ro'cti di gacdiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. ⁷ Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb iyz, te chanäni xtiejn reguidxaa ni gudeedni te jia xtojłni nájza te jia xtojł rebejn ni najc xpejn Israel. ⁸ Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. ⁹ Guiraa ni gujc galoo najc si'c te balaa, baluiini xho gacni naj. Regon nájza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtojł rebejn. ¹⁰ Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhreni che guidzujnł dxej cheni guchaa Dios guira'ti.

¹¹ Niluxh abiäad Jesucrist, naj laani najc bixhojzro xcuent redidxcoob ni sajcru naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejnni ca'ni biu'ni yudxanduxh tejtis huält, te si'c

baslaani nuure lo dojl par tejpas. ¹³ Reni basia xtojł bejn galoo najc redee: xtiejn regon nájza redxib, náj cobdáj xten reguidxaa ni rejč nen guidodxanga; bastiojbni guiro'preni yejč reni yu' xtojłni. ¹⁴ Palga basia redee xtojł bejn, aticaxh xtiejn Jesucrist sajč gusia dojl, sa'csi rajpni yálnabajn par tejpas. Lagajč laani badeedni xtiejnni lo Dios. Niluxh najcni renya sa'csi dini niujn dojl, rusiazani xcäriejnnu xcuent retzuun ni xhet sajcdi, te chunu loj Dios ni nabajn par tejpas.

¹⁵ Ni'cni Jesucrist najc nani suga' galäii: nez lo Dios nájza nez loj reben guedxliuj xcuent didxcoob. Yälgujt xten Jesucrist najc te gudzucajni xtojł reben nájza xtojł renani bejn si'cni caj lo leii, te xca' guiraa reni agurejdx Dios yálnabajn par tejpas, si'c bia'n diidx galooli. ¹⁶ Didxcoobre najc si'c che rıajz tej bejn guinibee xho guidis xhixtenni che agojl guetni, nanab gucuaa bejnga lo te guijtž xho guidisni, dxejcti gucuaani lajni. Niluxh xhet sajcdi guijtžga che gajd bejnga guet. ¹⁷ Xhet sajcdi guijtžga che nabansijc nani bejnni. Sajcni che agujt bejnga. ¹⁸ Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹ Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga nájza nis, bahuajdxni guid-xiil xniaa nájza te la' yajg balagbáz, hysopo, dxejcti bastiojbni rejn yejč guijtž cadro caj leii, nájza yejč rebejn. ²⁰ Dxejč guniini lojreni: "Rejnre najc seen sile'pac diidx ni abaxhał Dios lojtu."

²¹ Sigajcza bastiojb Moisés rejn guidoo náj guiraa renani rquiin rebixhojz che rajnreni Dios. ²² Leii xten Moisés rnibee jia giralii con rejn, palga di rejn guixe', di xtojł bejn jia.

Xtiejn Jesucrist rudzucaj dojl

²³ Ni'cni biquiinpac gujt remanre, bixe' xtiejnni te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajczu. ²⁴ Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajč xhaguibaa, te laani suga'ni nez lojpac Dios te caniini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajč xtiejnni. Di guiquiin jiu'runi balti huält. ²⁶ Palga nanab gunni si'cni rujn rebixhojz, sajpnı por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajč laani badeedzani xtiejnni lo Dios cheni gujtni, cuajni lo cruz te si'c badzucajni par tejpas xtojł rebejn. ²⁷ Guiraa bejn nanabpac guetreni tejtis huält, dxejctiru sidejdreni yälguxhtis xten Dios. ²⁸ Sigajcza tejtis huält badeed Jesucrist xtiejnni ni bixe' lo cruz te badzucajni xtojł xhidalduxh bejn. Luxh loj renani cabájzni suluilojni stehuält, xhet te gudzucajdiruni dojl, alga te gusa'ni xcälruslaa renani cabájzni.

10

¹ Sa'csi leii xten to Moisés najctis si'c te balaa xten nani siäd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextojłreni. ² Paru nıajc nibicajpac xtojł reni rudeed xtiejn guidxaa, agulájz rudeedreni xtiejn guidxaa, sa'csi che gubicaj xtojłreni, diru xcäriejnreni gumbree dojl. ³ Niluxh yälrejč man náj yälrudeedreni rejn

casob ijz rusnajtisreni lajzreni xcuent dojl. ⁴ Sa'csi digacdi gudzucajpac regon nájza xtiejn redxib xtojł bejn.

⁵ Ni'cni che biääd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

⁶ Dilu nichagljaz yälrejce xten guidxaa niclaza yälrudeed rejn, niclaza gojn ni rudeed rebejn te gusiani xtojłreni.

⁷ Dxejc räpä: "Narä basiälä te gunä si'cni rlajzlu Dad, Dios, (si'cni caj nen reguijtz xcuent ni sacä)."

⁸ Che gulujx gunii Jesucrist diidxga: "Di rlajzlu, dizalu guidxagljaz xcälrejč guidxaa nájza regon niclaza xcälrejč guidxaa, niclaza yälrudeed rejn xcuent xtojł bejn si'cni caj lo leii gun bejn." ⁹ Dxejcti räjpni: "Narä siälä, te gunä si'cpac ni rlajzlu, Dad Dios." Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰ Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn ni lo cruiz tejtis huält par tejpas.

¹¹ Guiraa rexpixhojz Israel rujnreni dzuun guixe-guixee te rudeedreni lagajctis guidxaa, nájza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹² Niluxh Jesucrist tejtis huält baxhe' xtiejn ni lo cruiz te badzucajni xtojł rebejn par tejpas. Naj agurejni xladbee Dios cadro rnibeeni. ¹³ Ro'c cabäjzni guiraa ni rdxe'ch lojni te cuereni ladzni'ni. ¹⁴ Ni'cni tejtis huält cuajni lo cruiz te basiani par tejpas guiraa renani ahuililajz xtiidxni. ¹⁵ Sigajcza rnił Sprit Dxan xten Dios loonu; najni:

¹⁶ Diidx nani jiannääreni nen redxejre gac scree,

naj Dad Dios: sucuaä rextidxä lo xcäriejnreni,

susäläza xtidxä nen lastooreni.

Dxejcti räjpni:

¹⁷ Diru lazä guizaj rextojłreni nicla rextolguijdxreni.

¹⁸ Ni'cni, cheni abia xtojł bejn, diru quiquiin gudeedreni guidxaa te jia rextojłreni.

Nanab guibignu lo Dios

¹⁹ Ni'cni resa'nu, na'c guidxejbtu, sajč jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiu-coob, nezyuj xten xcäl'nabanc'oobnu ni baxhalni che badzucajni ladroga. Ni'c säloj cheni biu'ni nen yudxanduxh, badeedni lagajč xtiejn ni lo Dios.

²¹ Jesucrist najč xpixhojzronu nani rnibee rexpejn Dios. ²² Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitu-jydinu. Con yälirilajzpac abia lastoonu xcuent rehxigabgujdx, abidiibza tiejxhnu lo nis-ya. ²³ Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj do'o guihuii xho jiennu te gacnäj sa'nu te si'c chonälajznu sa'nu nägajcza te jiennu ganax dzunsa'c. ²⁵ Na'c jiennu si'c rujn rebejn nani diru jlääd che rdxagsa'nu. Nanab guiliidxnu resa'nu sa'csi naj asiäddzungejxh dxej ni giibi' Dad Jesucrist.

²⁶ Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc. ²⁷ Dxejcsii guidxeebtisnu guilääznu yälguhxhtisduxh xten Dios näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn si'c caj lo xleii Moisés, niluxh bidxaag

xtidx tio'p o choŋ ni nancheepac, räjpreni dini nusoob leii, gujt bejn̄ga, rut balaslajzdini. ²⁹ Maazru yälrusacsíduh nanab ted renani rulāj yejc Xi'n Dios cheni direni gusobdiajg xtiidxni. Alga ruŋo'nreni xtiejnni ni baxhe'ni lo crujz te basianini. Rusanxtujyzani Sprit Dxaŋ xten Dios nani badeed didxcoob lojni. ³⁰ Anancheenu gunii Dios: "Narā susquixā bejn; loā siguijx bejn", räjp Dios. Stehuält guniini: "Dad sujn yälguhxhtis rexpejn̄ni." ³¹ ꞑCosduh gac bejn ni jiajb ladzŋaa Dios nani nabajn par tejpas!

³² Niluxh cołsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw. ³⁴ La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucheetu xhaguibaa rajptu reyälŋasa'c ni sajcru, niluxh yu'ni par tejpas. ³⁵ Na'c gunijttu xcälrlilajz xtidx Jesucrist, sa'csi yälrlilajzga gun xca'tu yälŋabajn par tejpas. ³⁶ La'tu nanab cuedxitu te che abejntu ni rlaiz Dios, dxejc xca'tu nani aguniini guniidxni. ³⁷ Sa'csi xtidx Dios ni bia'n nrii:

Asiäddzungajxhpac dxej ni jiääd nani siääd, dipacni gaclaa.

³⁸ Renani nabansa'c sibannāj yälrlilajz, niluxh palga yu' chutej ni guidxejb chalilajz, dini'c gun guibaa lazä.

³⁹ Niluxh nuure dinu gac si'c reni rusaan yälrlilajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

11

Yälrlilajz

¹ ꞑXhini'c najc yälrlilajz? Yälrlilajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni. ² Dios huinälajz retoxtadgoldoonu sa'csi huililajzreni xtiidxni.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihuii.

⁴ Gojpza toAbel yälrlilajz badzubyaalni rexquidxaani lo Dios. Yälrbijbyaal xtenni sajcru loj yälrbibyaal xten toCaín. Ni'cni gunii Dios najc toAbel beŋsa'c. Naj mase agujt Abel, sanuutis racbeenu xcuent yälrlilajz ni gojpn̄i.

⁵ Sigajcza gojp Enoc yälrlilajz, ni'c sinä Dios Enoc xhaguibaa, guideb nabajn̄ni, te na'c niejtni. Diru rebejn nidxäl̄ni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaŋsa'cni, baspaani laiz Dios. ⁶ Rut chu tejdi sajg guspaa laiz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzani sudeed Dios xcälŋasa'cni loj renani rguilni, nalajznu renani rlaiz gumbeepac Dios.

⁷ Gojpza toNoé yälrlilajz. Che räjp Dios lojni siajbpac nisguij ni gajdreni fii, huililajzni. Bejn̄ni si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpn̄i yälrlilajzga, bejn̄ni gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yälŋabaŋsa'c ni siääd xcuent yälrlilajz.

⁸ Sa'csi gojp toAbram yälirililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹ Gojp toAbram yälirililajz, ni'c huiläjzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni nen reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. ¹⁰ Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp toSara yälirililajz te mase anajcni bengool niluxh agudejd chu xi'nni, cua'ni yälrmibee xten Dios te gujcn ni nan, guyu' te xi'nni, sa'csi huililajzni susoob Dios xtiidxi. ¹² Ni'cni mase siäddzungajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³ Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälirililajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. ¹⁴ Reni rnii si'c, rniliireni caguilsijcreni cadro gac lajdxreni. ¹⁵ Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶ Niluxh laareni rlajzreni te lajdxreni ni saj cru, nalajznu lajdx Dios xhaguibaa, ni'c rguilreni. Ni'cni di Dios guituuj gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷ Gojpza toAbram yälirililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: ¹⁸ "Isaac guniidx chu xhidajl xajglu, xagdoolu." ¹⁹ Sa'csi nanchee toAbram rajp Dios yälrmibee te guspajnni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰ Näjza toIsaac gojp yälirililajz benle'ni toJacoob näjza toEsaú, räjpni xhini'c gun tejegareni. ²¹ Gojpza toJacoob yälirililajz, che agojl guetni, benle'ni guiro'p rexi'n toJosé. Dxejcti huistiäni guzucajni yejc baston xtenni te si'c gojnni Dios. ²² ToJosé gojp yälirililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzuajt.

²³ Gojp rexuczajn Moisés yälirililajz, ni'c cheni gojl Moisés, bacua'tzrenini chon bäii, sa'csi bahuiireni bäzdaanni. Direni niu xtidx rei ni gunibeeni, räjpni ju'treni báz niguii. ²⁴ ToMoisés gojp yälirililajz, ni'cni che aguroobni di rlajzni nirilajni xi'n xindxa'p rei xten Egipto. ²⁵ Bejn ni xhigab tednäjni trabajw rexpejn Dios lacuaa niujnni redzuun ni rchaglajz rujn reben Egipto, sa'csi najc reni'c dojl, luxh tera'tsi ruspaareni lajz bejn. ²⁶ Par laani maazru saj tedni lagajc trabajw ni gudejd Jesucrist lacuaa niajpni reyäl'nasa'c xten Egipto sa'csi laani cabäjtisni reyäl'nasa'c nani churu gudeed Dios lojni. ²⁷ Gojp toMoisés yälirililajz biriini lajdx reEgipto, dini nidxejb yälrdxe'ch xten rei, huinuutis gusudzu'tzni si'cni najc xhigabni, ruhuini loj nani di guzen, nalajznu Dios.

²⁸ Gojp Moisés yälirililajz bejn ni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹ Gojp rexpejn Israel yälirililajz gudejdreni galäi nisdoo ni laa nisdoxniaa luxh asdoo loj yubijdz rsiajreni

si'c gudejdreni. Niluxh che rlajz rebejn Egipto nidejd, gubi' nis, dxejc gulo'reni nen nis.

³⁰ Xcuent yälrlilajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. ³¹ ToRahab, te gunaguijdx, gojpszani yälrlilajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di galdi guiniä xcuent toGedeón, xcuent toBarac, xcuent toSansón, xcuent toJefte, xcuent toDavid, xcuent toSamuel, nájza xcuent retoprofe't. ³³ Guiraareni gojp yälrlilajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz. ³⁴ Guyu'reni nen te balduxh luxh xhet gujcdireni, gojl baxunreni te di niejtreni con espaad. Reni gujc benrdxajg, guzutzu'tzreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. ³⁵ Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nuslaa bejnreni sa'csi rlajzreni xca'reni stee yälñabajn ni sajcrú. ³⁶ Sgaiireni gudejd trabajw guniyaj bejnreni, gudinnäj bejnreni chiir, cuaduuzarení caden, guyu'zarení latzguiib. ³⁷ Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yälrlilajz. Guyu'za reni gujt con spaad. Guyu' reni cuanzaj nezree nezrec, gojtrene guid-xiil nájza guid-dxib, sa'csi xhet rajpdireni luxh entis rdejdreni trabajw rusacsí bejnreni. ³⁸ Sa' rebejnnga di nungäjl reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaureni nicla nis te yäreni; cuanzajreni nez nen redajn, nez nen rebiliää náj nez nen guedduxh ni yu' nen yuj. ³⁹ Guiraa rebejnnga gojp yälrlilajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yälñasa'c loonu, naj tejsi guica'nu con laareni nani bia'n diidx guniidx Dios.

12

Guihuiitisnu lo Jesucrist

¹ Ni'c najcni si'cni suga'nu galäi guiraa rebejnre luxh cahuiireni xcälrlilaaaznu. Ni'c do'o guisa'n te laad guiraa reni rusäu lo xnejznu, nájza redojl ni ruxhiid nuure lo xcälñabajnnu, te di jieednu chosaanu nez lo nezuyuj ni sasanäänu nez cadro chonnu. ² Do'o guihuidzu'tz nez loj Dad Jesucrist nani guläxtiej, nani guluuxza xcälrlilajznu. Jesucrist gudejd trabajw lo crujz, dini nitujy gujtni lo sa' yälgujtga, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

³ Coluyuj xhigab la'tu xho gudejd Jesucrist ladznäa reben dojl, te na'c guidxajgtu, na'cza jieedtu laj ni cabäjztuni. ⁴ La'tu gajd xtiejntu guixe' lo yälrucuanäj dojl. ⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcälñaj Dad niclaza jieedlu che tilñajni luj.

⁶ Sa'csi si'c runnaj Dad renani sanälajzni, rujnni riaa guiraa renani rca'ni si'c xi'nni.

⁷ Palga gatijp lajzlu lo xcälñaj Dios, sica'ni luj si'c xi'nni, sa'csi ¿chu dad di gunnaj xi'nni? ⁸ Niluxh palga di Dios gunnaj la'tu si'cni runnajni guiraa

rexi'n'ni, ditu gac xi'npacni, najctu xi'n redołguijdx. ⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rłajzni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yālnabajn, ā? ¹⁰ Xtdadnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yālnabanya, te gac nayazanu sigajc najcni laani. ¹¹ Guliini xhet xhi yālnajdi ni rchalonu najc laaca che rsiajcunni, racnaj tiejxhnu niluxh ria'nnu et laadi. Niluxh guiraa renani agudejd loj yālnajga rusoob xtiidxni, rca'reni te yālnabanya ni rbecdxilajzreni.

Riez guze'ni xtidx Dios

¹² Ni'cni col̄sudzu'tz reñaatu ni abadxajg, col̄sudzu'tz yecxhijbtu ni abadxajg, ¹³ te col̄quiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Col̄quiil xho cuedxinājtū guiraa rebejn. Col̄chanā te yālnabanya, sa'csi renani di guibanyadi, digacdi fiireni loj Dad Jesucrist. ¹⁵ Col̄huisa'c te di gunijt chutejtu lo xcāl̄racnāj Dios, col̄natiro gac chu tejtū si'c te cuanlaa ni rujn daan, sa'csi sa' bejnga suxhiñni guiraa renani ahuililajz. ¹⁶ Nicla tejtū na'c ga'p stee gunaa te laad, nungāj̄l cuāznāj̄ni chāāltisni. Na'cza gactu bejn ni di jiu xtidx Dios, si'c gujc toEsaú cheni bato'ni xcāl̄nasa'cni ni najc xtenni sa'csi najcni xingan galoo xtadni. Bato'nini te cua'ni yālr̄ajwtis. ¹⁷ Anajntu, cheni rłajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Col̄natiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacājy, nacāiboo, cayajcza bedonduxh. ¹⁹ Diza diajgtu niejn xse' trompet, xse' Dios si'c biendiajg rexpelj̄n Israel agujc xchero. Luxh che biejn diajgreni rediidxga, direni nutiplajz, gunabduxhrenei na'cru guiniini lojreni. ²⁰ (Sa'csi direni nutiplajz diidx ni caniiini, rājpni: “Palga ted te mantis gulāj̄ xhuj dajnga, col̄ju'tni con guij.”) ²¹ Te yālnadxebduxh najc nani guzen ro'c, lagajc toMoisés rājp: “Cayacditā yālr̄dxejb.”

²² Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³ cadro re' reni calā'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, nājza loj respit xten rebejn nani abasia Dios te anajcreni beñnasa'c. ²⁴ Agubigzanu loj Jesucrist nani suga' galāii nez loj Dios nāj̄ benguedxliuj xcuent didxcoob ni bia'n Dios, nājza lo xtiejn Jesucrist ni badeedni lo Dios xcuent nuure. Jesucrist rniab jiāj̄l lajz Dios, luxh ni'c sajcrū loj nani rniab xtiejn toAbel. Xtiejn toAbel rniab quix nani bagu'tni.

²⁵ Ni'c col̄natiro te di cuāl̄aztu nani canii lojtu rextiidxni. Palga di rebejn nidedbia sa'csi gulāl̄az nani baluii bejn ni siāād guedxliujre, ¿xho jiennu tedbianu palga guilāl̄aznu nani ruluii nani siāād xhaguibaali? ²⁶ Xse' Dios basniib guedxliuj galooli, niluxh naj̄ rnisacni: “Ste huālt susnibā xhet ganaxdi guedxliuj, susnibā nājza xhaguibaa.” ²⁷ Che gunii “ste huālt”, ni'c sāloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonālaaznuni

guideb yälrdxejb näjza yälñadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yälrinälajz sa'ni. ² Di gusaantu gudeedtu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najcreni.

³ Colšnjaj lajztu reni yu' neñ latzguiib, ascanu la la'tu ni yunäreni latzguiib. Colšnjajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu benguedxliuj si'c najcreni.

⁴ Colga'p xpala'n yälguchnaa te guiban-nayatu con chäältu sa'csi sujn Dios yälguxhtis rebejn ni resnäjä chäääl bejn näjza reni rusguee rebenxteb.

⁵ Na'c chanälajztu meel, colguibalaznäj ni rajptu, sa'csi Dios agunii: "Dipacna gusanälu, dizana cuälazälu." ⁶ Ni'c dinu guidxeeb guiniinu: Dad ni yu' xhaguibaa najc ni rcanäj narä; dina guidxebä xhitis ni gunnäjä bejn narä.

⁷ Colšnjaj lajztu renani baluui guiban'sa'ctu, ni basule'za xtidx Dios lojtu; colhuui xho nabajñreni te sigajcza colchanä xcälirililajzreni.

⁸ Sigajc gujc Jesucrist naii, sigajcza najcni nadxej, sigajcza sajcnii par tejpas. ⁹ Na'c gusaantu gusiechreni lajztu xcuent ste'ca yälrluui ni digac si'c najc xtidx Jesucrist. Sacduxh sudzu'tz lastoonu lo yälracnäjä ni ruuii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni neñ guidoguijd galoo. ¹¹ Sa'csi xpixhojzro xpejn Israel rinä xtiejn reman neñ yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtojl rebejn xcuent lagajc xtiejnii. ¹³ Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguilnu laadxnu ni chu jiäädrü, te ro'c guidxunnu par tejpas. ¹⁵ Guideb xcälracnäjä Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nii näj jielnu redij. ¹⁶ Na'cza jiälälajztu guntu huen, gacnäjä sa'tu, sa'csi reni'cni najc redzuun ni rdxaglaajz Dios.

¹⁷ Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzuunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colñab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbexilajz ni baspajñ Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. ²¹ Dios gun gactu beñsa'c, beñdxojn loj xhitis te guntu ni rlajzni, näj gunni loj guiraa nuure si'c ni rlajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

²² Resa'nu, rniabä lojtu, colcuedxī lajztu, colcuadiajg rediidx ni ruli-jdxre, sa'csi riojbga cacuaä te labäz guiijtze lojtu. ²³ Colyabee abirii bejtznu Timoteu latzguiib. Palga guidzūngajni ree, siädnääni jiädhuiä la'tu.

²⁴ Colgudeed xtixtios loj guiraa renani rului la'tu näj loj guiraa rebe-jtznu ni rililajz. Rebeñ Italia ruxhaḷ xtixtios lojtu.

²⁵ Gacnäj Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

¹ Narä Santiaag, xmos Dios näjza xten Dad Jesucrist, ruxhalä xtixtios loj guitzubio'p cuaa rexpejn Israel ni nare'ch lo guedxliujre.

Yälñajn nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruqui-iltu cuälaztu xnezyuj Dios, ³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdx lajz. ⁴ Dxejcti yälrbecdxilajz saj gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd xcalñajnni.

⁵ Palga yu' tejtü ni cayäädxd xcalñajnni, suguniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. ⁶ Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bāj ni sanā bej, nezree-nezre'c sääbni. ⁷ Nani najc si'c, na'c gunni xhigab yu' xhi xca'ni lo Dad Jesucrist. ⁸ Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹ Te sa'nu ni najc nadolajz, suguibalajzni sa'csi najcni beñro sa'csi guläs Diosni, ¹⁰ sigajcza bejtznu ni yu' xhixtenni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. ¹¹ Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreni, dxejcti agunijt xcalñajnni. Si'cza sinitloj te bejn ni yuduxh xhixtenni lal ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz lal ni cadejdni trabajw, sa'csi che agunii Dios didxsa'c xcuent nani bejnni sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios. ¹³ Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquiil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴ Niluxh tejgatu runijt che rcäy xcariejntu sa'csi riajb yejctu guntu cosguijdx. ¹⁵ Che riajb yejctu guntu cosguijdx, runijttu rujntu dojl, luxh dojl che abejntuni, riädñani yälgujt.

¹⁶ Sa'ä ni sanälazä, na'c gusaantu gusgueereni la'tu. ¹⁷ Guiraa recoshueen, guiraa recossa'c xhaguibaali siäädreni loonu; Dios ruxhaläreni, lagajc Dios ni benchée rebajl xhaguibaa, Dios nani di guchaa, sigajctis najcni. ¹⁸ Lagajc xcuentni bejn Dios gacnu xpejnni sa'csi huililajznu xtidxliipacni, te gacnu reben galoo loj rexpejnni.

Xho nanab jiennu

¹⁹ Acanajntu recosre, sa'ä ni sanälazä. Niluxh tejgatu nanab gusquejnni te gucuadijgni, per gaclaani te guiniini, gaclaazani te guidxe'chni, ²⁰ sa'csi xcälrdxe'ch bejn dini gun xcalñasa'c Dios. ²¹ Ni'cni colcuälaz guiraa recosguijdx, guiraa recoslatsiaj ni ria'n. Guideb yälñadolajz colchalilajz

xtidx Dios ni basule'nu, ni yu'pac lastootu, sa'csi ni'c najc ni sajc guslaa xaimtu lo dojl.

²² Niluxh baluii lo guira'ti bejn najctu bejn ni rusoobpactu xtidx Dios, xhet bejndi ni rucua diajgtis xtiidxni, ni rusgueeni lagajc laani. ²³ Sa'csi palga najc te bejn te nani rucua diajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihujn. ²⁴ Sa'csi che ruhuii xho najcni, sagajcni, riallazgajcni xho najcni. ²⁵ Niluxh nani ruhuidzu'tz lo leisa'c, nalajznu leii nani ruslaa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni sajp yälrbalajzpac lo xhitis ni rujnni.

²⁶ Palga yu' tejtü ni rujn xhigab najcni te bejn ni randuxh Dios, niluxh di gacdi gusauni ro'ni, guiraloj rniini, bejnga rusguee lagajc laani, luxh xhet sajcdi yälrajn Dios xtenni. ²⁷ Yälrajn Dios ni najc guliipac, ni xhet nu'chdi lojni najc scree: chahuini rebisiäjb, näjza regunaa ni agujt chäälni che yu' xhi rquinnreni, näjza na'c säblajztu guntu nani rujn reben guedxliuj ni di chalilajz xtidx Dios.

2

Nanab tebloj jiennäanu guira'ti bejn

¹ Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcrü tej bejn lo sabejnni. ² Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³ dxejcti la'tu jiuurutu nani najcw ladsa'cga, naatu: “Ree gurej lo yagxhilsa'cre”, dxejcti gäblu lo bejn ni xhet rajpdi: “Rec gusulii o gurej lo yujre”, ⁴ la xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

⁵ Colgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yälirilazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. Xhixh xhet laadi rebejn ni rajp ni rusacsitu, li rgobxhaxhrehni la'tu, rinäreni la'tu loj reguxhtis, ä? ⁷ La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreiinu Dios, si'cni caj lo xquijtz Dios scree: “Colchanälajz sa'tu sigajc rinälajztu lagajc la'tu”, laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu ben dojl, bejn ni rbälaz leii. ¹⁰ Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoo nicla tej diidx lo guideb leiiga. ¹¹ Sa'csi lagajc Dios ni gunii: “Na'c guesnäjlü bejn ni di gac chäällu”, lagajc laani guniizani: “Na'c ju'tlu.” Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii. ¹² La'tu colguinii, colguibajn si'c rebejn ni gun Dios yälguxhtis con xtiidxni ni ruslaa bejn lo dojl. ¹³ Sa'csi renani di gulasajz bejn, che gun Dios yälguxhtisreni, dizani gulasajz laareni. Sajcrü yälrulasajz lo yälguxhtis.

Yälirilajz näj dzuun ni rujn bejn

¹⁴ Resa'ä, xhi sajc palga guinii te bejn: “Ahuililazä xtidx Dios”, niluxh dini gun dzuun ni riäj gunni, ä? Sa' yälirilajzre, la suslaanini lo dojl, ä?

¹⁵ Palga yu' te bejtznu o te bisiajnnu ni dini ga'p xhajnbi, luxh xhetiza xhi gauni, xhi yäni, ¹⁶ luxh gäb tejt lojni: "Sucuedxi lajzlu jiilu, suguidxa' lajzlu, suguidxaj xque'lu", niluxh dini gudeed nani caquiinni, xhi sajc rediidx ni räjpni lojni, ä? ¹⁷ Sigajcza yälirililajz nani di guquuil bejn gunreni xtznuun Dios najc si'c te ni agujt, sa'csi dini guquuil bejn gunreni dzuun.

¹⁸ Yu'za reni naa: "Luj rajplu yälirililajz, narä runä xtznuun Dios; baluii narä xcälirililajzlu xhet näjdi xtznuun Dios, dxejcti narä suluiä xcälirililazä xcuent rextzuun Dios ni runä." ¹⁹ La'tu rililajztu yu' tejtis Dios. Laaca rujnlu, niluxh näjza rebenxax rililajz yu' tejtis Dios, radijtlireni, rdexbeduxhreni. ²⁰ La di rlajztu gacheetu, benayääl? La ditu gan, yälirililajz ni di guichagnäx xtznuun Dios najc te yälirililazgut? ²¹ Dios badzucaj xtojł toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piäan, nugu'tnini nez lo Dios. ²² Colhuii xho tejsi junt sadxaag xcälirililajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcälirililajz ni sa' yälirililajz nani rlajz Dios ga'p rexejpn ni. ²³ Dxejcti huile' xtidx Dios cadro caj scree: "Abram huililajz ni räjp Dios lojni, ni'cni badzucaj Dios xtojł ni, cua' Dios Abram si'c te benaya." Birilajzani "xamiigw Dios."

²⁴ Ni'cni ruhuiitu rca' Dios te bejn si'c benaya nez lojni xcuent xtznuun Dios ni rujnzani, xhet ganaxtis xcuent xcälirililajz bejnga. ²⁵ Sigajcza gusajc toRahab, ni gujc te gunadxab. Dios badzucaj xtojł ni, bejn Dios xhigab najcni te benaya sa'csi bejn ni xtznuun Dios che badeedni rolijzni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälirililajz palga dini gun dzuun ni rnibee Dios gunni.

3

Rediidx nani rnii luudxnu

¹ Resa'ä, na'c gac xhidajltu bejn ni ruluii xtidx Dios, sa'csi anajnnu rac yälguxhtisoru rebejn nani ruluii xtiidxni. ² Sa'csi guiragajcnu riennu xhidajł cuaa dojl. Palga yu' te bejn ni di gunijt lo diidx ni rniini, laani najcni te bena'c, rajcza rnibeeni guideb tiejxhni. ³ Palga rusälnu guib ni ru' ro' cabaii te chääni cadro rlajznu jiini, rnibeezanu guideb xtiejxhni. ⁴ Colhuii rebarcwro, mase siolduxhreni, luxh rebeduxh rulanaareni, niluxh capitán ni rusaj barcw lo nisdoo, te guibbäz ni caj xhajñ barcw nen nis, con ni'ctis rinänini cadrotis rlajzni. ⁵ Sigajcza najc luudxnu, najcni te labäz tiejxhnu, luxh colhuii lacti didxro rniini. Najcni si'c te balbäz ni rajc ruze'c guiragajc reyaig ni yu' dajn. ⁶ Luxh luudxnu najc si'c te bajł. Rnii luudxnu guiraa redidxdxuudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijł. ⁷ Rebejn sajc gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnreni, ⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, xhet si'c di nungäjłdi gacni! ¹¹ La rbää bejn nisnejxh näjza nisrop lo tejsi bisie, ä? ¹² Betzä, la

caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh nájza nisrop lo tejsi bisie.

Yálnajn ni siääd xhaguibaa

¹³ ¿Chuni'c lo guiraatu yu' xcäriejnni, nanduxhni, ä? Suguluiini xho najcni xcuent xcäl'nabansa'cni, sugunni xtzuunni guideb yäl'nadolajz ni rudeed xcäriejnni. ¹⁴ Niluxh palga yu' yäl'rdxe'ch lo sa'lu ni runnanlaa lastoolu, nájza rujnlu guira'ti parsi xcäl'nasa'c lagajc luj, na'c gaclu guyalajz, sa'csi ni'c najc si'c ni caniilu didxrusguee xcuent xtidxlii Dios. ¹⁵ Sa'csi sa' yálnajnre, xhet xhaguibaadi siäädni, alga najcni yálnajn xten guedxliujre, xten reben guedxliuj, xtenza reben_{nd}xab. ¹⁶ Sa'csi cadro yu' yäl'rdxe'ch lo sa'ni, náj cadro rujn bejn guira'ti parsi xcäl'nasa'c lagajc laani, ro'c yu' bieje, yu' guiraloj latsiaj. ¹⁷ Niluxh yálnajn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnáj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸ Renani rguuil yäl'rbedxi, yäl'rbedxi rbe'creni te xca'reni te yäl'nabannaya nez loj Dios si'c xcäl'nasa'creni.

4

Ni nabanñaj guedxliuj

¹ ¿Casiääd rebieje, reyäl'rdxe'ch lo sa'ni ni casiajctu? ¿La direni jiääd xcuent lagajc xhigab ni yu' lastootu, ä? Lagajc rexhigabga rujn bieje nen lastootu, ruscäyreni xcäriejntu. ² La'tu rlaiztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilñajtu sa'tu. Ditu ga'p nani rlaiztu sa'csi ditu guiniabni loj Dios. ³ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlaiztu gunijttuni si'cni rlaiztu. ⁴ ¡Aii! Bejn ni di gandzu' Diostis. ¿La ditu gan bejn nani rlaiz gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu tejtuni ni rlaiz chanuu lo ni rajc lo guedxliujre, bejnga rdxe'ch lo Dios. ⁵ O ¿la rchalotu xlia'si caj lo xtidx Dios rediidxre: "Sprit ni baxhal Dios te cuääzni nen lastoonu, randzu'ni nuurnu sa'csi rlaizni guinibeeni nuurnu"? ⁶ Niluxh runiidxru Dios xcäl'racnäjni loonu. Ni'cni rnii xtiidxni scree: "Dios rdxechnäj renani runnaro lagajc laareni, niluxh rudeedruni xcäl'racnäjni lo reben_{nd}nadolajz." ⁷ Coljiu'pac lo xnezyuj Dios. Col_{sud}zu'tzpac te di guntu ni rlaiz ben_{nd}xab, te guxunni lojtu. ⁸ Colguibigru lo Dios te guibigzani lojtu. Ben_{doj}l, colquiib naatu, nalajznu na'cru guntu latsiaj; colgusia lastootu, la'tu ni runtio'p laiztu. ⁹ Sugacnaj laiztu, suchuti xliajs, colyonduxh. Colguchaa xcäl'ruxijstu, colca' yäl'huin, colguchaa xcäl'rbalajztu, colca' yäl'roon. ¹⁰ Colyajc si'c bejn ni xhetliidi sajc nez loj Dad Jesucrist, te laani guiliäsni la'tu gunni la'tu ben_{ro}.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yäl'guxhtis sa'ni, reni'c rniyaj xleii Dios, rujnreni yäl'guxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajcza gunitloj bejn. La'tu, ¿chuxh najctu te guntu yäl'guxhtis lo sa'tu, ä?

Dinu gan xhi gac guixee

¹³ Naj colcuadiag dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴ Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tbäz, dxejcti rnitlojni. ¹⁵ Hueenru guiniitu scree: "Palga rlanj Dios sibaannu, te jiennu dee o dec." ¹⁶ Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl. ¹⁷ Ni'cni ni najn xho riäjl gunni, palga dini gun si'c, rujnni dojl.

5

Ruljidxni rebejn ni yu' xhidajl xhixtenni

¹ Colgucadiag xtidxä, bejn ni yu' xhidajl xhixtentu. Colyoon, colcuedxa' xcuent recasionduxh ni sactu. ² Guiraa rexhixtentu nani rajptu aguxhijn, luxh rexhajbtu agudajw rebaguiidni. ³ Oor näjza pla't xtentu agubibtiejn, aguxhijn. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojt. jXlia'si batiedajntu xhixtentu nen redxej lultga! ⁴ jColhuii! Ditu niguixsa'c loj reni bejn xtzuuntu, ni'cni laareni cayujnreni yälquij lo Dios xcuenttu. Luxh xhadiaglj Dios xten reangl ni yu' xhaguibaa abidzujn yälquij xtentu ni cabe'c renani batie' xcäl'nasa'ctu. ⁵ Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu nen redxej xten yälrugut. ⁶ Gudiiltu xho bagu'ttu rebejnsa'c luxh laareni dxiitis gusuajreni, xhet bejndireni te na'c nugu'ttureni.

Colcuääz jiädxhii Diostu

⁷ Resa'ä, dxitis colcuääz guidzujn dxej cheni jiääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni la'l ni riajb nisguigaloo näjza nisguij ni riajb lult. ⁸ Si'cza la'tu colcuäzdx, colgustioob lastootu sa'csi asiäddzungajxh dxej ni jiääd Dad Jesucrist. ⁹ Resa'ä, na'c chale'ctu xquej sa'tu, didi gun Dios yälguixhtis la'tu, sa'csi asiäddzungajxh dxej che guidzujn Dios ni najc Juejz. ¹⁰ Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjjzareni. ¹¹ Colhuii xho rniinu chicbaa renani guläzdx lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälrulasajz.

¹² Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguixhtis la'tu.

¹³ jLa yu' tejtü ni cadejd trabajw, ä? Suguiniabni lo Dios. jLa yu' chu tejtü ni cabalajz, ä? Sugolni dij te guiliä'pni xpala'n Dios. ¹⁴ jLa yu' chu tejtü ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni la'l ni cagusälzareni se't lo cuajni con laj Jesucrist. ¹⁵ Luxh palga rililajzpacreni che canabreni, siajc benracxhuuga, siliäs Jesucrist bejnga. Luxh palga bejnni dojl, sibicaj xtojlni. ¹⁶ Ni'cni colguxhobdojl lo sa'tu, colnab lo Dios xcuent sa'tu te jiajctu. Che rniabduxh te ben naya lo Dios, dzunroza rujn Dios. ¹⁷ Elías, te bejn ni gunii xtidx Dios agujc xchero, gujca te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj chon ijz garol. ¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyäl'nasa'c xtenreni lo guedxliuj.

¹⁹ Rebetzä, palga yu' chu tejtu ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejn nani racnäj guirii ben_{doj}l lo xnezyuguijdxni te guibisacni lo Dios, bejnga agucnäjni te gulaa xaimni lo yälgujt, te gubicajza guiraa xtojlni, mase xhidalduxh najc xtojlni.

Guijtz Ganid Nani Bacuaa Pedr

Pedr cacuaa guijtz loj reni rililajz ni nare'ch

¹ Narä Pedr, te apost xten Jesucrist, cacuaä guijtzre loj renani agule Dios gac rexpeljnni nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ² Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuunni nen lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuedxini lastootu lo guiraliiti.

Te yäl nabajn ni cabäaznu

³ Colguiliä'p xpala'n Dios ni najc Xtað Jesucrist, Dios nani xcuent xcälru laszduxhni bejnni gojpnu te yäl nabajnc oob sa'csi baspañsacni Jesucrist loj rebengut. Sa'csi rajpnu yäl nabajnc oob, ni'c nadippac lajznu. ⁴ Ni'cni laani suniidxni te yäl rusalajz ni di nitloj, ni di xhin, ni di jiuii si'c riuii rebalajc. Yäl rusalajzga aguluchedzu'tzni xhaguibaa par la'tu, ⁵ nani cayapdu'tz xcäl milaagwr xten Dios sa'csi rililajztu xtiidxni, te guluui Dios guira'ti ni rajpni par la'tu, ni arapcheeni te guluuinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷ te guzeñ xho rililajztu. Xcäl rililajztu saj cru lo oor nani rnitloj, niluxh xcäl rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl milaagwrni, näjza xcäl rdimbicha'ni.

⁸ Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl rbalajz ni rut rajcdi rusule', sa'ni yu' xhaguibaatis, ⁹ sa'csi xcäl rililajztu susläa xaimtu lo dojl, sica'tu yäl nabajn par tejpas.

¹⁰ Luxh xcuent yäl rusläa dojlre, rebejn nani gunii xtidx Dios agujc xchero, laareni abasulexgaareni xcuent xcäl racnäj Diosre nani siääd lojtu. Luxh bisiedduxhreni, gunabdiidxzareni, ¹¹ te rlajzreni gacbeereni chu bejn o gucpac gac nani cagusä't Sprit xten Crist ni yu' nen lastooreni che gunixgaani xho nungäj ted Jesucrist trabajw, dxejcru xcasacni yäl rni bee. ¹² Baluii Dios lojreni, di rediidxga soob nen redxej ni nabajreni, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhañ Dios Sprit Dxan xtenni te cuäazni nen lastooreni. Näjza rexangl Dios ni rbäjz xhaguibaa rlajz gacbeerureni rediidxga.

Xcäl nabajn nayanu nez loj Dios

¹³ Ni'cni, colsanij xcäriejntu, colgusudzu'tz lastootu, guideb lastootu colyenloj yäl racnäj xten Dios ni abia'n diidx xca'nu che guibisac Jesucrist lo guedxliuj. ¹⁴ Gactu si'c biuux nani rusoob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵ Dios ni gule la'tu najc dxan. Sigajcza la'tu, loj guiralii ni rujntu colyajc beñdxan. ¹⁶ Sa'csi lo xtidx Dios caj scree: "Sajctu beñdxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yäl guxhtis loj guiraa bejn xcuent dzuun ni bejn, la'tu riäjñ guidxejbtuni guiraa dxej ni

nabansijctu lo guedxliujre. ¹⁸ Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtagoldootu. Recostumbrga xhet sa'cdireni. Di Dios nudeed oor nicla pla't te baslaani la'tu, ¹⁹ badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰ Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj, biädluilojni par xcäl'nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspan'sac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu. ²³ Sa'csi acua'tu xcäl'nabancoobtu xcuent xtidx Dios ni najc par tejpas, et xcuentdi xtidx ben guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴ Galooli gunii Dios scree:

Guiraa reben guedxliuj najc si'c recuaan,
guiraa xcäl'nasa'creni najc si'c reguii ni rcaj lo cuaan,
recuaan rgoj, lirtejbza reguii xtenni,
²⁵ niluxh xtidx xtda Jesucristnu rsiudzu'tzni tejpas.
Luxh diidxre najc diidx ni basule'reni lojtu.

2

¹ Ni'cni colgusaan guiraa redzunguijdx ni yu' lo guedxliuj, na'c gusueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. ² Si'c riojl rebäznite' le'ch, si'cza colquiiil xtidx Dios par sprittu. Coljiojl xtidx Dios te gustioobruni la'tu lo yäl'ruslaa lo dojl, ³ palga agucbeetu lacti hueen najc xcäl'racnäj Jesucrist.

Crist najc si'c te guij ni nabajn

⁴ Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebejn badzucaj guijga, niluxh Dios gulenini sa'csi sacduxhni. ⁵ Sigajcza tejpgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xprit xtentu. Dee najc nani rchaglaiz Dios. ⁶ Sa'csi galooli gunii Dios scree:

Agule'cä te bejn nen guedx Siön, nalajznu Jerusalén,
ni gac si'c te guisa'c, te guiro ni rsiuj squiin te yuro.

Chutis bejn ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',
lagajc guijga gujc guijpac ni baliib squiin xten yu'ga

⁸ näjza:

Te guij ni rliaj ni' bejn, ni ruzäl'ta'reni,
laareni riajbreni sa'csi direni gusoob xtidx Dios,
luxh agunibexgaa Dios nitlojreni.

Renani gule Dios

⁹ La'tu najctu te cuaa bejn ni agule Dios, tejgatu najctu rebixhojz ni najc si'c reii xten Dios. La'tu najctu te beɲnaya, te beɲsa'c, rexpejnɲacni. Aguleni la'tu te gusule'tu reyālɲasacduɲh ni bejn Dios ni gurejdxu che guyu'tu lo nezyunacāy xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh ɲaj najctu rexpejnɲac Dios. Galoo gajd Dios gulaslajztu, luxh ɲaj abalaslajz Dios la'tu.

Colguibajn lo xnezyuj Dios

¹¹ Rebetzā ni sanālazā, nabajntu lo guedxliujre si'c benzijt, ni rbājz te laad, ni'c rniabduɲhā lojtu, na'c guntu recosguijdx xten guedxliujre, ni rutijl neɲ lastoo bejn te cuālazreni xnezyuj Dios. ¹² Colguibaɲsa'c laɭ ni yu'tu loj rebenzijt ni di gac xpejn Israel te palga guiniyajreni la'tu gābreni najctu beɲlatsiaj, che fiireni redzunsac ni rujntu, siliā'ppacreni xpala'n Dios che jiādsac Jesucrist te gunni yālguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, ¹⁴ regubernadoor nani ruxhaɲni te rujnreni yālguxhtis rebendojɭ nājza te guiliā'pni xpala'n reben nani laaca rujnreni. ¹⁵ Sa'csi Dios rlajz guntu recossa'c te cuecdxitu rextidxnayāal ni rni reni di rlajz gumbec didxlii xcuent Jesucrist.

¹⁶ Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. ¹⁷ Ga'ptu yāɲnadolajz loj guiraa si bejn. Colchanāljaz sa'tu ni rililajz. Colguidxejb Dios, colguiliā'p xpala'n presidentro.

Gudejd Jesucrist trabajw te baluiini xho jiennu

¹⁸ La'tu ni najc mos, guideb yāɲnadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, nājza relam ni najc benguijdx. ¹⁹ Sa'csi rchaglajz ruhui Dios te bejn palga sa'csi rililajz te bejn xtidx Dios rujn bejn huant che rdejdn trabajw luxh xhet bejndini. ²⁰ Palga la'tu rujntu latsiaj ni'cni rusacsini la'tu, ɭxhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejdz Jesucrist trabajw xcuenttu te guluiini xho guntu che chanuutu lo xnezyujni. ²² Laani dini niujn nicla tej dojɭ, laani dini nusguee nicla tej bejn con didx-xhii. ²³ Che guniyajreni lojni, dini nudzu' yāɲrniyajga. Che cadejdn trabajw, dini nudzu' diidx niluxh bateedni lagajc laani ladzɲaa Dios ni rujn yālguxhtissa'c. ²⁴ Gudeed Jesucrist trabajw si'c te beɲdoɭduɲh, bacuaarenini lo cruiz te ro'c gusacsiduɲh tiejxhni xcuent xtojɭnu, te na'c gunrunu dojɭ, te guibaɲsa'cnu lo xnezyuj Dios. Gudilguijdxreni tiejxhni te basiajcn la'tu. ²⁵ Sa'csi galoo gujctu si'c rexiil ni rut rajpdi, rijreni nezree-nezrec. Niluxh ɲaj agubisactu lo xpaxtoortu nājza nani randzu' xaimtu, Jesucrist.

3

Xho nanab guibaɲnājtu chāāltu

¹ Sigajcza la'tu, regunaa ni abachɲaa, colgusoob xtidx chāāltu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxni nājza xho rniilu nadolajz lojni, nājza xho nabaɲnāsa'cluni. ³ Na'c gusucheetu ganax lo jiaatis, si'c najc guichniil yejctu, nājza biaoor ni rcaj diajgtu, guejntu, ɲaatu, nājza ladsa'c ni najc sacru. ⁴ Colgusuchenāj lastootu yāɲnadolajz,

yälrbecdxi lajz, näjza yälšanälajz, sa'csi direni nitloj, luxh sacduxhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basoobreni xtidx chäälreni. ⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, näjza na'c guidxejbdu.

⁷ Sigajcza la'tu, niguii ni abachnaa, colguibannäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yäl nabajn par tejpas. Colyejn si'c, te gucuadiajg Dios che cuedx-guiniabtu lojni.

Renani rdej trabajw che laaca rujnreni

⁸ Dee najc ni cania loj guiraatu, saru colguibannäj sa'tu. Colgulaslajz sa'tu, colchanälajz sa'tu si'c rinälajz te niguii bejtzni. Gactu bensa'c, bennadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl'nasa'c ni guniidxni lojtu. ¹⁰ Sa'csi scree caj lo xtidx Dios:

Nani rchaglajz guibajjni,
luxh rlaizzani saru tedni redxej lo guedxliujre,
sugudxojnni guinii ro'ni didxnaj näjza didx-xhii.

¹¹ Guibicajni loj redzunguijdx, sugunni redzunsac'tis.

Suquuilni yälrbedxi te ni'c chanuuni.

¹² Sa'csi ruhuii Dios rebejn ni rujn dzunsac,
rucuadiajgzani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsac?

¹⁴ Palga caxäjsi tedtu trabajw che guntu redzunsac. ¡Chicbaatu! Na'c guntu xhigab, niclaza guidxejbdu xcäl'ruchejbreni. ¹⁵ Colgusaan guinibee Dad Jesucrist nen lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yäl'nadolajz saru gudzu'tu diidx. ¹⁶ Colguibansa'c te cuedxi xcäl'riejntu te che guiniyajreni la'tu sa'csi nabaansa'ctu loj Crist, jianxtujy reni rniyaj la'tu. ¹⁷ Sa'csi hueenru tedtu trabajw che cayuntu te dzunsac, palga si'c rlaiz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuént rextojlnu. Xhetliidi xtojlni guyu' nez loj Dios, niluxh gudejdni trabajwduxh xcuént rebendojl. Bejn ni si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubansacni. ¹⁹ Che gajd xpritni guibisac lo tiejxhni, huij spritni basule'ni diidx loj resprit ni yu' latzguiib. ²⁰ Respritga najc renani di nusoob xtidx Noé che basule'ni xtidx Dios lojreni. Guläz Dios rebejnga guiraa redxej ni cayujn Noé barcwro agujc xchero. Baslaa Dios xcäl'nabajn xhujntis bejn, xhet gujcdireni gudejdreni lo nisguiro ni biajb guideb guedxliujre. ²¹ Che robnisnu naj, rusnaalajznu rebejnga; yälrobnisga rululoj xho ruslaa Diosnu lo dojl. Et sa'csi riäjt beed lo tiejxhnu nen niska, alga sa'csi dxejc rniabnu lo Dios guniidxni te xcäriensa'c, sa'csi saj cxa'nuni xcuént ni gubansac Jesucrist lo rebengut. ²² Che birii Jesucrist loj rebengut, biu'ni xhaguibaa cadro gurejni xladbee Dios te ro'c rnibeen loj rexangl Dios, näjza loj guiraa resprit ni rajc rnibee, ni yu' lo guedxliuj näjza xhaguibaa.

4

Colyejn xtzuum Dios

¹ Ni'cni sa'csi agudejd Jesucrist trabajw cuajni lo crujz xcuentnu, sigajcza la'tu riäjł guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajñni lo guedxliuj, guibajñni si'c rlaiz Dios, diruni guibajñ te gunni redzunguijdx xten guedxliujre. ³ Sa'csi bejntu si'ctis ni rlaiztu galoo, bejntu si'c rujn rebejn ni di gumbee Dios, bejntu si'cni rlaiz tiejxhtu, bejntu latsiaj, gusoiztu, bejntu relaniro, gudedcaj gusoiztu, luxh bejntu cosxtuiduxh bazuxhijbzatu loj rebanäbdxab. ⁴ Dxejcti rebejn ni rujn recosga naj, rdxelorejreni sa'csi dirutu gun ni rlaizreni, ni'c rniyajreni la'tu. ⁵ Niluxh laareni suurenı nez loj Jesucrist ni agojl gun yälguxhtis loj guiraa rebejn, rebejn ni nabajñ näzja renani agujt, te gusule'reni xcuent nani bejnreni. ⁶ Ni'cni basule' Jesucrist xtidx Dios loj reni agujt, te mase che gubajñreni lo guedxliuj gujcreni yälguxhtis si'ctis ni rajc bejn, dxejc gujtreni, naj spirit xtenreni sinuu guibajñ si'c ni rlaiz Dios.

⁷ Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiñ xcäriejntu te saru cuedx-guiniabtu lo Dios. ⁸ Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojl sa'tu. ⁹ Saru gurenäj bejn ni rdzujn rolizlu, na'c jiejytu. ¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtu najc xtzuumni guluiini xtidx Dios, suguinini ascanu najcni xtiidxpac Dios. Palga tejtu najc xtzuumni gacnäjni sa'ni, sugunnini, guideb yälnadip yälnadaan ni ruedeđ Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctu. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpřit Dxan xten Dios guideb xcälrdimbicha'ni neñ lastootu. ¹⁵ Gunatiro, andi gusaantu ted tejtu trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjłdi gacbeeni. ¹⁶ Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguliä'pni xpala'n Dios xcuent Jesucrist.

¹⁷ Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaznu xtiidxni, jxhocha gun rebejn nani di chalilajz xtidx Dios xcuent Jesucrist! ¹⁸ Lo xtidx Dios caj scree:

Lacti naganlajz rliaa rebenñaya lo dojl,

jxhocha gunäjni rebejn nani di chalilajz xtidx Dios näzja rebenđojł?

¹⁹ Ni'cni, guiraatu nani cadejd trabajw xcuent xtidx Dios si'cni rlaiz Dios, colguedeđ xpřittu lo Dios ni di gusguee, ni benchheetu, te chanuutis guntu ni riäjł guntu.

5

Yälřulijdx loj renani ahuililajz xtidx Dios

¹ Narä nacä te bengool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool, ² colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios. ³ Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcäl'nabansa'clu. ⁴ Che guibisac Jesucrist, ni rajp nuure, laani suniidxni xcuentnu, te yäl'nasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebengool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni, niluxh racnäjni rebejn ni najc nadolajz.

⁶ Ni'cni guideb yäl'nadolajz coljiu lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni. ⁷ Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansax-higa'tzni si'c te beedz nialajz, caguiilni chu guxhinni. ⁹ Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajn lo guedxliujre. ¹⁰ Che agudejdtu trabajw tiop-choñ dxej, Dios nani rajp guiraa yäl'racnäj, nani gurejdx la'tu te näjza la'tu xca'tu xcälrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb. ¹¹ Laani rajpni yäl'rnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcäl'racnäjpac Dios. Colsudzu'tz xcuent yäl'racnäjre.

¹³ Rexpejn Dios ni re' lo guedx Babilonia ruxhal xtixtios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtixtios lojtu. ¹⁴ Colguinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Guijtz Ni Rojp Ni Bacuaa Pedr

Pedr rucuaa te guijtz loj reni ahuililajz

¹ Narä nacä Simón Pedr, ni rujn xtzun Jesucrist, te apost xtenni. Rucuaa guiijtze lojtu nani rililajz xtidx Dios sigajc ni rililajznu, sa'csi bahuii Dios loonu si'c beñnaya xcuent Xtiosnu Jesucrist nani baslaa nuurnu lo dojl. ² Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

Xho riäjl gac rexpejn Crist

³ Sa'csi xcälrnibee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcälñansa'cni. ⁴ Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejn, sajcnu beñsa'c si'c najcni sa'csi abiriinu loj redzunguijdx ni chagljajz rujn rebejn ni ruxhiñ guedxliujre. ⁵ Ni'cni nanab gacbeenu xho nabañnu lo guedxliujre. Siroobru xcälrrililajztu sacnäjni la'tu te guibañsa'cnu lo Dios; luxh sa'csi nabañsa'ctu, siroobru xcälñajntu xcuent dzunsa'c näjza dzunguijdx. ⁶ Luxh palga guroob xcälñajntu xcuent dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbexilajz, sajctu beñsa'c, beñdxan. ⁷ Che anajctu beñsa'c, beñdxan, sinälajztu resa'tu; che asanälajztu sa'tu, arajptu yälñanälajz sa'tu xten Jesucrist.

⁸ Palga la'tu rusoobtu guiraa rediidxre, luxh chanuutis caroobreni neñ lastootu, ditu guibañxlia'; sujnpacktu xtzun Dios, luxh rediidxre sacnäjrutu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälñajzni xho basia Dios rextojlñi nani bejnñi galoo. ¹⁰ Ni'cni rniä lojtu rebetzä, colsejs, colguiseed xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi lañ ni chanuu gucuadiajgtu rediidxga, dipactu gunijt lo Dios. ¹¹ Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

¹² Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yälrrililajz xten didxlii ni yu' neñ lastootu.

¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre. ¹⁴ Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä.

¹⁵ Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yälñasa'c xten Crist

¹⁶ Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisni, dizanu nusguee la'tu, sa'csi abahuiloonu xcälrdimbicha'ni. ¹⁷ Sa'csi che badeed Dios xtadnu yälrnibee, yälrdimbicha' lojni, dxejc biejn diajgnu gunii Dios, birii xse'ni neñ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹ Ni'cni naj guliiru rediidx ni gunii reprove't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäj, susanijreni xcäriejntu dxejl ni jiääd bajl xhaguibaa. Dxejc lagajc laani susanij lastoonu. ²⁰ Niluxh ganiddoo nanab gacheetu dee: nicla tej bejn sajc guinii laatisni sajc guinii xhi säloj xtidx Dios, ²¹ sa'csi nicla tej diidx ni bacuaa reprove't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpirt Dxan Dios lojreni gucuaareni.

2

Rebejn nani rusguee (Judas 4-13)

¹ Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälirililajzreni, sibälazreni lagajc Dad Jesucrist nani gudijx xcuent xtojreni. Niluxh renani rusguee, siojb nitlojreni par tejpas. ² Xhidajlza bejn sinajlreni lo xcäl'nabangujdxreni, dxejcti ni'c gun siniyax xhidajl bejn xnezyuj xtidxlii Dios. ³ Sa'csi ruguila-jzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcälgujxhtisreni nani gun Dios, näjza xcäl'rnitlojreni cabäzgjajceni agujc xchero.

⁴ Najcni si'c sa'csi di Dios niäl'lajz rextolj rexanglni nani bejn dojl, niluxh baxhal'nireni gabijl, basäunireni nen reguednacäj cadro cabäjzreni dxej ni gun Dios xcälgujxhtisni. ⁵ Sigajcza rebejn ni guyu' galoo, banitloj Diosreni, baslaa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhal'ni nisguiro te biädnitlojni guiraa rebejn nani di nucuadiajg xtidx Dios. ⁶ Bejn Dios yälgujxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gachee bejn xho runnäj Dios rebejn ni di gusoob xtidx Dios. ⁷ Gulää Dios Lo't ni gujc te bens'a'c lo reguejdxga, sa'csi guc-huin lajzni xcuent relatsiaj ni bejn rebendojlga. ⁸ Guideb ni guläjs Lo't, te bens'a'c, lo guejdxga, dxej, yääl guc-huin lastooni xcuent nani bahuini, nani biejn diajgni, xcuentza latsiaj ni bejnreni, sa'csi bens'a'cni. ⁹ Anajn Dios xho racnäjni rebens'a'c te rbäänireni lo retrabajw ni cadejdreni, anajnza Dios xho gusacsini rebendojl cheni guidzujnli dxej ni gunni xcälgujxhtisreni.

¹⁰ Guliduxhni, sujnrus Dios yälgujxhtis loj rebejn nani rlaiz gun si'ctisni rlaiz tiejxhreni, näjza renani rbälaz xcäl'rnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. ¹¹ Niluxh nicla tej rexangl Dios ni rajpru yäl'rnibee lo rebejnre, direni guiniyaj, cue'creni xquejreni lo Dios.

¹² Luxh, rebejnga najc si'c reguidxaa nani xheti xcäriejnreni, cabäjztisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yälrusacsiduxh xcuent rextoljreni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcay lo te ladnol, rbaali lajzreni rusgueereni la'tu la' ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzareni dojl, ruluiireni lastooreni te säblajzreni meel, najcreni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani

huichagljazru nani rquijx yällatsiaj. ¹⁶ Niluxh gudilñaj Diosni xcuent xtojłni, bejn Dios gunii te mandip si'c xse' bejn, te bascuääzni profe'tga, dini nusaan niujnni nani cayujnni, cayujnni si'c te bejn ni rajc yejcnj.

¹⁷ Reben latsiajre najc si'c te bisie cadro xheti nis, najczareni si'c rexčäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yälguxhtis. ¹⁸ Sa'csi rniduxhrene didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhrene, con yällatsiaj rusgueerene rebejn nani entis birii loj reni rujn sa' dzunguijdxga. ¹⁹ Rusgueerene, rniireni rut gudxojndini palga jiädnajlnireni, niluxh lagajc laareni najcreni mos, sa'csi rnibee latsiajrene. Xhitis ni rnibee te bejn, ni'c rusäuni nen latzguiib. ²⁰ Sa'csi palga agubica'j te bejn loj redzunguijdx xten guedxliuj sa'csi huililajzrene xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojłni, abixhidsacreni lo xtojłreni, nalajz najcreni si'c che gajdrene gumbee xtidx Dios. ²¹ Huenru direni niembee xnezyuj Dios, quela che abiembeerene nezyujga, cuälazrene didx dxan, xtidx Dios ni basule'reni lojreni. ²² Dxejcsii rsiojb diidx ni najc scree: "Rbisac te bä'cw loj xcäłrdzujbni. Cuch ni entis gojz richusacni lo xpajnni."

3

Xho gac che guibisac Jesucrist

¹ Rebetzä, dee najc ni rojp guijt'z ni caguxhalä lojtu; lo guiro'p guijt're cagusnibä la'tu xcuent reyäl'rulijdx ni gusnaj lajztu. ² Colgusnaj lajztu redidx ni gunii reprofe't agujc xchero, näjza rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnrene si'ctis ni rlajz tiejxhrene. ⁴ Siniabdiidxrene: "¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcnj cheni guc-cheeli guedxliujre." ⁵ Niluxh che rniireni si'c, rlajzpac jiällajzene agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj nisga. ⁶ Dxejcti gunitloj guira'ti ni yu' lo guedxliujga che biajb te nisguiro, gunitlojni. ⁷ Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni rebendojl.

⁸ Rebetzä, na'c jiällajztu, Jesucrist ruhuii tebdxej si'c te tzugayuu ijz, rhuizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäzjni gusiejch lajztu, sa'csi di rlajzni nitloj nicla tejtü.

¹⁰ Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacheedi siäädni. Dxejcti sibica'j xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

¹¹ Sa'csi sinitloj guiraa redee, ni'c nanab guibanñayatu lo guedxliujre, na'c guntu dojl. ¹² Colcuäjz dxejtis ni jiääd Dios lo guedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro. ¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru dojl.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabanayatu, xhetiru xtojltu. ¹⁵ Colhuii xhi dzuun bejn Dad Jesucrist ni'c rajpnu yälruslaa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yäl'najn lojni. ¹⁶ Nen guiraa rexquijtzni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgueetu, te na'c gunijttu xcälrsiudzu'tztu lo xtidx Dios. ¹⁸ Colgustioob xcäriejntu con yälracnäjä näjza yäl'najn xten Dad Jesucrist nani ruslaa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yälñabajñ par tejpas loonu

¹ Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejñ diagä rediidx ni guniini loä, gunazä naani. Laani najc diidx ni runiidx yälñabajñ par tejpas loonu. ² Baluilojñi loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rñiliäpac nabaññaj Jesucrist Dios. Baluii Dios Jesucrist loonu. ³ Caniä stehuält lojtu, bahuiinu lojni. Biejñ diajgnu rediidx ni guniini loonu. Xhigab xtennu najc tejtis con Dios, nãja Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäñu resa'nu. ⁴ Cagucuaä rediidxre lojtu te guibalazduxhtu.

Dios najc Bajl

⁵ Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yälñacäjydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rñiinu didx-xhii, runijtnu dinu chasanäj xtidx Dios. ⁷ Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiäza xtiejn Jesucrist Xi'n Dios lastoonu che riennu dojl.

⁸ Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. ⁹ Palga guicäjpnu lo Dios guiraa redojl ni cayennu, siälñajñi xtojñnu, sudzucajni rextojñnu, sa'csi laaca rujñni luxh guliï najc rextiidxni. ¹⁰ Palga guinuunu dinu niujñ dojl, rñiinu najc Dios si'c te bejn ni rnii didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

2

Racñaj Jesucrist nuunu nez loj Dios

¹ Guejbtu, resa'ä nani huililajz xtidx Dios, cagucuaä rediidxre lojtu lo guiitz te na'c guntu dojl. Niluxh palga jiennu dojl, racñaj Jesucrist nuunu, rñiini xcuentnu lo Dios, sa'csi xheti xtojñni. ² Gujt Jesucrist xcuentnu lo crujz. Gudijxni rextojñnu lo crujz. Luxh et rextojñtisnu gudijxni. Gudijxni rextojñ guiraa rebejn ni re' lo guideb guedxliuj.

³ Palga rusoobnu rextidx Dios, huenliisi rluii riembeenu Dios. ⁴ Cheni rnii te bejn, "narä rumbeäni", niluxh dini gusoob rextiidxni, rusgueeni resabejnñi. Di lajzñi nilii xtidx Dios. ⁵ Palga rusoobnu xtidx Dios, guliipac rinälaaznu Dios, ni'c najñnu nabaññajñuni. ⁶ Cheni rñiinu nabaññajñu Jesucrist, nanabpac guibañsa'cnu si'c gubajñ Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejñ diajgtu galooli. ⁸ Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yälñacäjy. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäjy.

⁹ Palga chutis tejnu rnii, “nabañä lo nianij xten Dios”, niluxh rdxe'chni lo resa'ni, lo yälñacäy yu'ni. ¹⁰ Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljajz gunni dojl. ¹¹ Niluxh palga rdxe'chnu lo resa'nu, nabajñnu lo yälñacäy sa'csi riennu dojl, sasaanu lo yälñacäy. Nicla gacheenu canejz chonnu, sa'csi ruscäy beñdxab balojnu.

¹² Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo cruzj gudijx Jesucrist rextojñnu. ¹³ Cagucuaä rediidxre lo guejbtu, redad bengool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beñdxab.

Cagucuaä rediidxre lojtu rexi'nä, sa'csi rumbeetu Dios. ¹⁴ Abacuaä rediidxre lo guejbtu, redad bengool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx beñdxab.

¹⁵ Na'c guichagljajztu guntu renani rujñ rebejñ nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rexhixtentu ni ra'pnu lo guedxliuj, dxejc dinu chanälajz Dios. ¹⁶ Rebeñ guedxliuj ni di chalilajz xtidx Dios rchagljajzreni rujñreni redzunguijdxre: rujñreni dzunguijdx nani rchagljajz tiejxhrene; rujñreni dzunguijdx nani rchagljajz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷ Luxh rnitlojpac guedxliuj. Sinitlojza guiraa reni rchagljajz rujñ rebeñ guedxliuj ni di chalilajz xtidx Dios. Niluxh palga gusoobtisnu xtidx Xtañnu Dios, sibaññajñni par tejpas.

Didx guliü näjza didx-xhii

¹⁸ Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejñ diajgtu siääñ niguiiga. Naj yu' xhidajl reniguii nani rdxe'chloj lo Crist. Ni'c alaracheenu asiäddzungajxh dxejga che guluiloj niguiiga. ¹⁹ Yu' xhidajl rebejñ ni rdxe'chloj lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejñ Jesucrist.

²⁰ Gule Dios Jesucrist. Jesucristre baniidx Sprit Dxan xten Dios loonu te gacheenu xhini'c najc redidxliipac. ²¹ Et sa'csi ditu gan xhi diidx najc didx guliü bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guliü, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet guliüdi rextiidxni. Renani rnii di Jesucrist gac Xi'n Dios rdxe'chlojzni lo Jesucrist. Di reni'c nililajz xtidx Dios. ²³ Chutis reni rnii di Jesucrist gac Xi'n Dios, di reni'c gumbee xtañnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni bejñ diajgtu galooli che huililajztu rextidx Dios. Palga rusoobtu rediidxga, nabaññajtu Dios näj xi'nni Jesucrist. ²⁵ Abia'n Jesucrist diidx guniidxni yälñabañcoob loonu. Naj ara'pnu yälñabajñre, ra'pnuni par tejpas.

²⁶ Abacuaä rediidxre lojtu xcuent rebejn ni rlaiz chalilajztu rediidx ni xhet guliidi. ²⁷ Baxhal Jesucrist Sprit Dxan xten Dios loonu. Rbäjzni neñ lastoonu. Dinu guiquini chu stee bejn guluii loonu xhi diidx najc gulii, sa'csi lagajc Sprit Dxan xten Dios ruluui xtiidxni loonu. Naj ruluuii la'tu guiraa ni najc gulii, dini gusguee la'tu. Colguibannäj Jesucrist; colgusoob xtidx Jesucrist si'cni ruluui Sprit Dxan xten Dios lojtu.

²⁸ Naj guejbtu resa'ä, colguibannäj Jesucrist, te che jiädsacni lo guedxliuj sisiutzu'tznu nejz lojni, dinu guitujy nejz lojni. ²⁹ Anajntu laaca najc Dios. Anajntu renani rusoob xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinälazduhx Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios. Rebeñ guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtdadnu. ² Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³ Che rnaj laaznu sidzujñ dxej gac tejganu si'c ni najc Jesucrist, dxejc rbañsa'cnu si'c ni gubajñ Jesucrist lo guedxliuj.

⁴ Di rebejn ni rujñ dojl gusoob leii xten Dios. Che riennu dojl, runijtnu lo leii xten Dios. ⁵ Racbeenu Jesucrist biääd lo guedxliuj, gujñni niguii te gujñ badzucajni rextojñnu. Laani dini niujñ dojl. ⁶ Che sasanäjnu Jesucrist, dinu gac benguijdx. Di bejn nani rujñ dojl chalilajz xtidx Jesucrist, dizani gumbeeni. ⁷ Resa'ä, na'c chalilajztu didx-xhii ni rñii bejn lojtu, che rñiireni cayujntu dojl. Rebejn ni rujñ laaca, najczareni si'c najc Jesucrist. ⁸ Rebejn nani rujñ dojl najc xi'n bendxab. Galodooli rujñ bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujñ bejn xcuent bendxab.

⁹ Rebejn nani najc xi'n Dios direni guichaglaiz gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios. ¹⁰ Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjl chanälajznu resa'nu

¹¹ Lagajc rediidxre bieñ diajgtu galooli che huililajztu rextidx Dios: colchanälajz resa'tu. ¹² Xhet si'cdi toCain nani gujñ xi'n bendxab. Bejnñi dojl, bagu'tni bejtni. ¿Xhicuent bagu'tnini? Bagu'tnini sa'csi bejn bejtni ganax dzunsa'c, luxh toCain bejn dzunguijdx. ¹³ Na'c guidxelojtu che guidxechlajz rebejn lojtu. ¹⁴ Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yälñabajñ par tejpas sa'csi rionälaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. ¹⁵ Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yälñabajñ par tejpas. ¹⁶ Racbeenu rinälajz Jesucrist nuunu, sa'csi gujñni lacuaa nuunu lo cruiz. Sigajcza nungäjl gacnäjn resa'nu, mase guetnu lacuaa guetreni. ¹⁷ Chutis tejnu ni rajp xhidajl xhixtenni, luxh dini gacnäñ nicla tejnu ni xhet rajpdi, di bejnğa chanälajz Dios. ¹⁸ Guejbtu resa'ä, na'c chanälaznu resa'nu con rextiidxtisnu, na'c

guiniitisnu rionālaaznu resa'nu. Palga rionālaazpacnu resa'nu, sacnājnu resa'nu.

Sisiutzu'tznu nez loj Dios

¹⁹⁻²⁰ Palga rionālaaznu resa'nu, nancheenu najcnu rexi'n Dios. Palga jiajbnu xhigab dinu gac beŋsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinālaaz resa'reni, reni'c najc rexi'nni. ²¹ Rniā lo guejbtu nani rinālazā, palga lagajc lastoonu rnii loonu, “cagusooblu xtidx Dios”, sisiutjip lastoonu che rbedx-rniabnu lo Dios. ²² Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaalajz Dios. ²³ Dee najc rediidx ni gunibee Dios gusoobnu: chalilaaznu xtidx Dios, diidx ni rnii xho gujt Jesucrist lacuaa nuunu, chonālaazzanu resa'nu si'cni gunibee Dios. ²⁴ Palga rusoobnu guiraa nani gunibeeni, nabaññajni, si'cza nabaññajni nuunu. Nancheenu nabaññaj Dios nuunu, sa'csi baniidxni Sprit Dxan xtenni te cuāāz neñ lastoonu.

4

Scree gacheenu xhi didx najc guliipac

¹ Guejbtu renani rinālazā, na'c chalilajztu rextidx chutis bejñ nani naa, “rniā rextidx Dios lojtu”. Ganiddoo colgula'tz rextiidxni te gacheetu don chu xtidx caniini, sa'csi xhidajl bejñ sinii lojtu, “nuunu rniinu rextidx Dios”, niluxh caniisireni si'c. ² Scree gacheenu xhi diidx najc guliipac. Guiraa rebejñ nani guinii “Jesucrist, Xi'n Dios, ni biāād lo guedxliuj si'c niguii”, reni'c cayacnāj Sprit Dxan xten Dios, reni'c canii xtidx Dios. ³ Guiraa rebejñ nani di guinii biāād Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejñ diajgtu siāād te niguii ni rdxechduxh loj Jesucrist, luxh naj abidzujñ rextzuun niguiiga lo guedxliuj.

⁴ Guejbtu resa'ā, najcnu rexi'n Dios. Naj abiennu gaan lo rebejñ ni rdxe'ch lo Jesucrist sa'csi Dios ni rbājz neñ lastoonu abejñni gaan lo beñdxab ni nabajñ lo guedxliuj. ⁵ Rebejñ ni rnii xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejñ ni re' lo guedxliuj riu rediidx ni xhet guliidi. ⁶ Nuunu najcnu xi'n Dios. Rebejñ nani riembee Dios riu xtiidxnu. Rebejñ nani di gac xi'n Dios direni jiu xtiidxnu. Scree gacheenu chu rebejñ rnii didxliipac. Scree gacheezanu chu rebejñ rnii diidx ni xhet guliidi.

Rinālaz Dios rebejñ

⁷ Rniā lo guejbtu nani rinālazā, nanab chanālaaznu resa'nu, renani huililajz xtidx Dios, sa'csi Dios racnāj nuunu te chanālaaznu resa'nu. Palga rinālaaznu resa'nu, dxejc najcnu rexi'n Dios, luxh gulii riembeenu Dios. ⁸ Palga chutis tejnu di chanālaz resa'ni, dizani gumbee Dios, sa'csi lagajc Dios racnāj chanālaaznu Dios, racnājzani chanālaaznu resa'nu. ⁹ Abasule' Dios loonu lacti rinālazni nuunu. Yu' tejtis Xi'n Dios. Abaxhañni Xi'nni lo guedxliuj te gudijxni rextojlñu lo cruzj te si'c guibaññajni par tejpas. ¹⁰ Si'c racbeenu rinālazpac Dios nuunu. Galoo dinu ninālaz Dios. Niluxh Dios huinālaz nuunu, ni'c baxhañni Xi'nni lo guedxliuj te gudijxni xtojñu lo cruzj.

¹¹ Rniā lo guejbtu nani rinālazā, si'cni rinālaz Dios nuunu, sigajcza rlajzni chanālaaznu resa'nu. ¹² Nicla tej bejñ gajd fii lo Dios. Niluxh palga

chanālaaznu resa'nu, Dios nabajñ neñ lastoonu, dxejc guli rinālaazpacnu Dios. ¹³ Nancheenu nabaññajnu Dios, sigajcza nabaññajpac Dios nuunu, sa'csi abaxhañi Sprit Dxan xtenni cuāāz neñ lastoonu. ¹⁴ Narā nājza reapost abahuiinu loj Jesucrist. Caniā lojtu abaxhañ Xtaḁnu Dios Xi'nñi lo guedxliuj te guslaani rebejñ lo xtojñreni. ¹⁵ Chutis tejnu ni rnii "Jesucrist najc Xi'n Dios", nabaññajni Dios, nabaññajza Dios bejnga.

¹⁶ Racbeenu, rililaazzanu rinālazj Dios nuure. Guliduxh rinālazj Dios nuunu. Palga rinālaaznu Dios, nabaññajnu Dios, nabaññajza Dios nuunu. ¹⁷ Naj sanālaaznu Dios si'cni rlaizni luxh palga chanālaaznuni guidebtis ni guibajñnu, dinu guidxejb che guidzujñ dxej ni gun Jesucrist yālguxhtis lo guedxliuj. Dinu guidxejb sa'csi guideb nabajñnu lo guedxliuj, nabaññajnu Dios si'c nabaññaj Jesucrist Dios. ¹⁸ Palga rinālazsa'cnu Dios, dinu guidxejb, palga rinālazjpacnu di gacdi guidxeebnu. Palga guliipacnu rinālaaznu Dios, xhetliidi rdxejbḁdinu. Nani rdxejb, rdejḁni trabajw, gajḁ bejnga chanālazsa'c Dios.

¹⁹ Rinālaaznu Dios sa'csi ganiddoo Dios huinālazj nuunu. ²⁰ Palga chutis tejnu naa "rinālazā Dios" niluxh rdxechlajzni lo resa'nu, xhet guliidi xtiidxni. Palga dinu chanālazj sa'nu nani cahuiinu, xhixh sajc chanālaazzanu Dios nani gajḁnu fii. ²¹ Agunibee Dios, nani rinālazj Dios chanālazjni resa'ni sigajc rinālazjni Dios.

5

Riennu gaan lo guiraa redolgujdx lo guedxliuj

¹ Chutis ni rililajz Jesús najc Crist nani baxhañ Dios, ni'c najc Xi'n Dios. Palga rinālaaznu Xtaḁnu Dios, sigajcza sinālaaznu renani najc Xi'n Dios. ² Palga rinālaaznu Dios, palga rusoobzanu xtiidxni, dxejc najñnu rinālaaznu resa'nu nani najc Xi'n Dios. ³ Ni'cni, palga rinālaaznu Dios, suoobnu xtiidxni. Luxh dinu guichalo nagajñ gusoobnu xtiidxni. ⁴ Chutis tejnu ni najc xi'n Dios, riennu gaan lo redojl̄ ni re' lo guedxliuj. Riennu gaan lo redojl̄ lo guedxliujre sa'csi huililaaznu xtidx Jesucrist. ⁵ ¿Chuni'c cayujñ gaan lo redojl̄ lo guedxliuj, ä? Renani rililajz najc Jesucrist, Xi'n Dios, reni'c rujñ gaan lo redojl̄ lo guedxliujre.

Rediidx ni baluii Dios loonu xcuent Jesucrist

⁶ Biāād Jesucrist lo guedxliujre. Birobnis Jesucrist, baxhe'zani xtiejñni lo crujz. Xhet ganaxdi te guirobnisni biāādni, nājza te guxhe'ni xtiejñni lo crujz che biāādni. Sprit Dxan xten Dios canii rediidxre. Guliipac rextiidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejñi najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejñi najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejñni lo crujz che gujtni. ⁹ Palga rililaaznu xtidx rebejñ ni rbājz lo guedxliuj, nungājñ chalilaazrunu xtidx Dios. Rediidx nani rnii jioñ reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujñni najc Dios si'c tejñi ni rusguee sa'csi dini chalilajz xtidx Dios ni rniini xcuent Jesucrist. ¹¹ Scree najc rediidx ni rnii Dios. Abaniidx Dios loonu yālnabajñ par tejpas. Yālnabajnga biāḁnā

Xi'nni, Jesucrist. ¹² Palga nabaññäjnu Xi'nni, rajpnu yälñabajñ par tejpas. Palga dinu guibaññäj Xi'nni, dinu ga'p yälñabajñ par tejpas.

Xtixtios con diidx ni ruliidx

¹³ Abacuaä rediidxre lojtu ni rililajz rextidx Jesucrist te gacbeepactu rajptu yälñabajñ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujñ dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajñ lojni. Niluxh yu' te dolroduxh. Chutis te bejñ ni gun dojlga, di Dios gudeed lo bejnga yälñabajñ par tejpas. Dizana guiniä guiniabtu lo Dios xcuent bejñ ni rujñ dolroga. ¹⁷ Guiraa redzunguijdx nani rujñ rebejñ najc dojl. Niluxh yu' redojl nani di gun gunijt bejñ lo Dios par tejpas palga jiu bejñ xtidx Dios.

¹⁸ Racbeenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di beñdxab gun gaan nuunu, te dizanu gusoob xtidx beñdxab.

¹⁹ Nancheenu nuure najcnu xi'n Dios, niluxh guiraa rebejñ nani riutis rextzun guedxliuj cagusoobreni xtidx beñdxab.

²⁰ Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios guli. Nabaññäjnu Dios ni najc guli, sa'csi nabaññäjnu Jesucrist. Laani najc Dios ni najc guli. Caguniidxni loonu yälñabajñ par tejpas. ²¹ Resa'ä, na'c guzuxhijbtu lo rebañäjb ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gulii nājza yālrinālaaznu resa'nu

¹ Narā nacā bengool. Cagucuaā guijtzre lojlu nane' nani agule Dios, nājza loj rexi'nlu. Rinālazāpac la'tu luxh xhet xtebādi; nājza guiraa reni rililajz xtidx Dios sanāljaztu. ² Nuure rinālaaznu la'tu sa'csi yuchee nen lastoonu rediidx nani najc gulii, luxh dilajznu jiāl rediidxre. ³ Xtdnu Dios, nājza Jesucrist Xi'nni, gacnāj nuunu, jiarenī nuunu, guscuecdxi lajznu con xcāl'najn didxlii nājza yālrināljaz.

⁴ Bibalazduxhā che gucebeā yu' rexi'nlu ni rusoob xtidx Dios si'c gunibee Dios loonu gusoobnuni. ⁵ Nane' ni gule Dios, diidx nani rniabā gusoob guejblu naj dīni gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungājlpac chanālaaznu resa'nu. ⁶ Sinālaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanālaaznu resa'nu.

Rebejn ni rnii garenca diidx ni xhet guliidi

⁷ Balti bejn birii loonu, naj cagusgueerēni xhidajl bejn ni re' lo guedxliuj. Caniireni di Jesucrist nājc niguii che biāādni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlajz gugu'ch xtiidxpacni lo xtidx Jesucrist, di bejnga gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jiāād te bejn rolijztu ni di chasanāj xtidx Jesucrist, na'c xcājbtu jiu'ni rolijztu, na'cza guiniitu lojni, "Xchan. Biu'." ¹¹ Sa'csi chutis bejn ni guinii "xchan" loj te bejn ni di chasanāj xtidx Jesucrist, cayacnājzani redzunguijdx ni rujn bejnga.

Rudeedni xtixtios

¹² Xhidalduxhru diidx rlazā guiniā lojtu, niluxh di rlazā gucuaāreni lo guijtz. Cabāzā jiādhuīā lojtu ro'c te guiniā rediidxre lojpactu, te guibaalajztu. ¹³ Rexi'n bājllu, nani aguleza Dios, ruxhaļ xtixtios lojlu. Ni'tis najc ni rucuaā lojtu. Sugacni si'c.

Guijtz Ni Riojn Ni Bacuaa Juan

Cagucuaani didxsa'c lo Gayo

¹ Narä nacä te bengool. Caguxhalä guiitzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yälñadaanlu. ³ Bibalazduxhä che gubi' gaii resä'nu, guniliireni löä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaa lazä si'c rbaa lazä che racbeä rusoob resä'nu redidxlii xten Jesucrist.

⁵ Dad Gayo, laaca cayujnlu che racnäjlü renani rililajz xtidx Jesucrist, mase dilu gumbeereni che riäädreni lojlu. ⁶ Aräjpreni lo resä'nu ni rdx-agsa' ree xho huinälajzlureni näjza xho gucnäjlureni. Laaca bejnlu gucnäjlü resä'nu, badeedlu xhi biquiireni lo nejz che biriireni rolijzlu. Si'cza nanab jiennu lo guiraa resä'nu, nalajznu rebejn ni ruluii xtidx Dios. ⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸ Si'cza nanab gacnäjnu rebejn ni riluii xtidx Jesucrist neñ garen-garen guejdx, te si'c jiennänu xtuun Dios guiraa renani ruluii xtidx Dios.

Di Diótfefes niujn redzunsä'c

⁹ Abaxhalä te guiitz lo rexpejn Jesucrist ro'c. Niluxh Diótfefes rlajz guinibeeni lo resä'nu ro'c. Dini jiu xtidxä. ¹⁰ Ni'cni che guidzunä ro'c, narä siniä rediidxre lo resä'nu ro'c, che guidxaag sa'nu ro'c. Diótfefes rniyaj narä lo resä'nu ro'c. Dizani jiu resä'nu che rdzujnreni ro'c. Dizani gusaan fiitu resä'nu ni riääd ro'c, mase rlajz chu tejtü fiireni. Luxh rlajzni gudxojnni guidxagnäjtü rebejn nani ruhuii resä'nu ni ruluii xtidx Jesucrist.

¹¹ Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxsa'c xcuent Demetrio

¹² Guiraa rebejn ganax didxsa'c rniireni xcuent Demetrio, luxh huenlisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuaä rediidxga lo guiitzre. ¹⁴ Runä xhigab di gaclaa jiädhuiä lojlu, dxejcti jieinu diidx.

¹⁵ Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga reexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹ Narä nacä Judas, ni rujn xtzuun Jesucrist. Narä nacäza betz Jacoboob. Cagucuaä guijtze loj renani agule xtdnu Dios, renani sanälazduxhni, nani cayapcheeni par Jesucrist. ² Rniabä lo Dios, gulaslazduxhruni la'tu, guscuecdxiduxhruni lastootu, gacnäjni la'tu, guniidxruni yälsanälajz.

Renani ruluii yälrusguee (2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yälruslaa lo rextoljnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yälirililajz ni basule'reni par tejpas loj rexpejn Dios. ⁴ Sa'csi abiuxhiga'tz gaii bejn, renani galooli gunii Dios siäädreni, niluxh sinitlojreni. Najcreni bejn ni di chalilajz xtidx Dios, najcreni benguidxduxh, rutzuréreni xcälracnäj Dios, rujnreni xtujy, sanäreni te yäl'nabandxuudx. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. ⁶ Rexangl Dios nani di nucuadiajg diidx, ni birii cadro rlajz Dios chureni, reni'c basäu Diosreni cadro nacäiboo te cabäyzreni gun Dios xcälguxhtisni lojreni. ⁷ Si'c bejnii guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii birääch, regunaa guyunäjzareni regunabirääch. Dxejc gudejdreni trabawduxh huejcreni neñ guiboo par tejpas xcuent xtojlni, ni'c najc te yäl'rulijdx loonu.

⁸ Rebejn ni riu' lojtu naj najc si'c reben galoo ni bejn dojl. Nabajnreni si'c ni bisieedreni lo guiraa nani ruluii yäl'rnixcal, ruxhinreni tiejxhneni, rbälazreni xcäl'rnibee Dios, rniyajzaren i rexangl Dios. ⁹ Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yälguxhtis lojlu." ¹⁰ Niluxh rebejnga rniyajreni nicla ganreni xhini'c rniireni. Niluxh nani racbeepac rebejnga najc yäl'najn nani nicla niquiin nisieedreni, lala sa' nani rujnza reguidxaa, ni xheti xcäriejnii, reni'c sujn nitlojreni.

¹¹ ¡Aii! ¡Riazanureni! Sanajlni xnezyuj Caín, luxh te gunreni gaan meel ruxhunlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni. ¹² Laaren i najcreni te xtuiduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riuren i. Najcreni si'c te xcäy ni xhet nisguij siädnäni, nani sanä bej nezree nezrec; najczaren i si'c te yagbigool nani di ninejxh xcaj lojni, tio'p huält agujtren i, najcreni si'c te yajg ni abiliääch. ¹³ Laaren i najc si'c nis ni räjs lo nisdoo, che cayajc te bidonduxh, sää, siädäni, carii xtujyren i si'c räjs nis lo nisdoo. Najcreni si'c bale' ni rtejb xhaguibaa, rijren i lo te yäl'nacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xanglni ¹⁵ te gunni yälguxhtis loj guiraa

bejn te gusacsíduxhni guiraa rebejn ni di gumbée Dios xcuent redolduxh ni bejnreni, xcuentza redidxnaj ni guniyaj rebendolduxhre Dios.”
¹⁶ Rebejnre laa reni rmojm, runduxhreni quej, rujnreni si'ctis ni rlajz tiejxhreni, rniireni guiraloj didxnaj, rniisireni didxsa'c loj rebejn te gun rebejnğa si'c ni rlajzreni gunreni.

Rulijdxni rebejn nani ahuililajz xtidx Dios

¹⁷ La'tu, betzä ni sanälazä, riäjl guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: “Neñ redxelult che guibisac Jesucrist, su' bejn ni suxhiznäjreni rextidx Dios, sujnreni si'ctis guisia' lajzreni.” ¹⁹ Redee najc renani run rlia' rexpejn Dios lo sa'reni; rinuuzarenini ni yu' lo guedxliuj, diza Xprit Dxan xten Dios cuääz nen lastooreni.

²⁰ Niluxh la'tu rebetzä nani sanälazä, coltioob loj xcälirililajztu ni siääd lo Diostis, colnab lo Dios xcuent yälrnibee xten Xprit Dxan xtenni.
²¹ Colguibajntis lo yälšanälajz xten Dios, colsusintis la' ni cayunlojtu yälrulaslajz xten Dad Jesucrist ni guniidx yäl'nabajn par tejpas.

²² Colgacnäj renani di chalilazsa'c te chalilajzpacreni xtidx Dios.
²³ Colyacnäj sgaii te guibicajreni lo dojl, gudobxhaxreni, colyejn xhigab lo guiboo cayejcreni. Colyacnäj sgaii bejn, colgulaslajzreni con yälrdxejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhinreni.

Redidx lult

²⁴ Colguiliä'p xpala'n Dios nani racnäj la'tu didi jiajbtu lo dojl, nani rujn sajz suutu lo xcälrdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yäl'najn te guslaani nuurnu lo dojl xcuent ni bejn xtadnu Jesucrist. Colguiliä'p xpala'nni, rajpni guiralii yälrnibee, yälrdimbicha', galooli, näj naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluiloj Jesucrist lo Juan

¹ Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gac laa gac. Jesucrist baxhaḷ xanglni lo Juan, te baluiini guiraa recosga lojni. ² Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roḷ guijtze xcuent recos ni churu gac, renani riuza rediidxga, renani rguchee rediidxga neḅ lastooni sa'csi siäddzungajxh redxej che soob rediidxga.

Juan cagucuaa guijtze lo gajdz guidoo

⁴ Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspalaḷ la'tu, guscuedxini lajtzu, lagajc Dios ni sigajc najc nadxej, sigajcza gujcnii naii, sigajcza sajcnii par tejpas. Xca'zatu xcälruspalajz näj xcälrbexilajz guigajdz respit ni suga' guideb gabi cadro rnibeeni, ⁵ näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. ⁶ Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrbibee par tejpas. Sugacni si'c.

⁷ ¡Colgacbee! Laani sibisacni lo rexcajy, luxh guiragajc rebejn suhuii lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc relettr A con Z —rnii Dad Dios—. Nabanä nadxej, sigajcza gubanä naii, sigajcza sibanä par tejpas, dipacna gacä ste'ca. Rapä yälrbibeduxhru lo chutis.

Bahuiä loj Jesucrist lo xcälrdimbicha'ni

⁹ Narä, Juan, bejtztu, näja ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaḷreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. ¹⁰ Te dmingw, laḷ ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhaḷ guijtze loj guigajdz guidoo ni yu' nez Asia, neḅ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejc gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäi guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujn lo ni'lini, lastoozani naliib te cinturon gulajz ni najc ganaxduj oor. ¹⁴ Yejcni näjza xquidxejcnii najczareni nolibä si'c xquichlajd xiil, nolibä si'c yejg. Dxejcru rbebajl lojni. ¹⁵ Ni'ni rdimbicha' si'c guib ni laa bronz che cayejcnii lo guiboo. Xse'ni riejn nadipduxh astoo che riäjt nisro neḅ regueuu. ¹⁶ Ladbee ca'

naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejblu, narä nacä ni gubajn galooli, narä nacäza ni guibajn lult. ¹⁸ Narä nacä ni nabajnpac; gutä, niluxh naj nabanä par tejpas. Rapä yälrnibee lo yälgujt näjza lo gabijl. ¹⁹ Ni'cni bacuaa recos ni abahuiilu, nani cayajc naj, näjza nani churu gac. ²⁰ Dee najc laa yälxhiga'tz xten regajdz balxhaguibaa ni bahuiilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejn guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäi guigajdz gandilier oor, rnii rediidxre lojtu: ² Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagus-gueereni bejn. ³ Rsiudzu'tztu, rujntu huant xcuent xtidxä, gajdtu guidx-ajg. ⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijttu, colgusiech lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechlaajztu, sudzucaä xcandilieertu cadre suga'ni. ⁶ Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni. ⁷ Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl'nabajn, ni yu' xhaguibaa cadre yu' Dios.”

Rediidx ni rniini loj rexpejn guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: ⁹ Narä nanä xho cadejdlu trabajw, nanäza guxilli rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab. ¹⁰ Na'c guidxejblu trabajw nani agojl tedlu. Aree bendxab gusäl gaii sa'tu nen latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl'nabajn. ¹¹ Nani rajz cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojppa lojni.”

Rediidx ni rniini loj rexpejn guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: ¹³ Narä nanä caro rbäjztu, rbäjztu lo guejdx cadre rnibee Bendxab. Rsiudzu'tztu

xcuent xtidxä. Laltis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudutzpac nez loä, nani bagu'treni neñ guejdx cadro rnibee Bēdxab. ¹⁴ Niluxh yu' tiopchoñ xtojltu. Lojtu nadxaag gaii bejn ni ruñ si'c bejn toBalaam agujc xchero. Laani baseedni Balac xho gunni te jiajb rexpejn Israel neñ dojl, baseednireni gaureni recos ni gurej lo dxan nez loj rebanäjb, baseedzani rexpejn Israel guesnäjreni chutis gunaa. ¹⁵ Sigajcza nadxaag lojtu gaii bejn ni riu rediidx ni rusule' reni laa nicolaítas. ¹⁶ Colgusiechxgaa lajztu, te di jialgacä lojtu te gucuanääreni spaad ni yu' ro'ä. ¹⁷ Nani rlaiz cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sutedäza lojni te guibäz ni najc nol, lojni caj te lajni ni nacoob, nani rutru racheedi, xtebtis nani xca'ni."

Rediidx nani rniini lo rexpejn guidoo ni yu' Tiatira

¹⁸ Dxejcti najni loä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹ Ananä xtzuuntu, sanälajztu sa'tu, nanä xho rililajztu xtidxä, xho racnäjtü resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰ Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcäl'ruseedni cagusgueeni rexpenä nani ahuililajz xtidxä, te naj rujnreni cosguijdx, si'c yälresnäjä ni di gac chääl'ni, rajwzareni nani gurej lo dxan xten rebanäjb. ²¹ Aguläzä xchej te gusiechlaizni, gusaanni gunni dojl, luxh naaddini gusiechlaizni xcuent redzunguijdx ni rujnni. ²² Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiech lajzreni, palga direni guchaa xmoodreni. ²³ Sugutxhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rililajz ni yu' neñ lastooreni. Te gacbeezareni narä sunidxä lo tejgatu ni riäj'l xca'tu xcuent redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten bēdxab, xhetru rniädi lojtu, dirunä gutalä xtzuuntu. ²⁵ Colyapdzu'tz rextidxä nani arajptu dxejli ni guibisacä lojtu. ²⁶ Nani gun gaan lo dojl, näjza nani cagusoob xtidxä dxe lultli, lojni sutedä yäl'rnibee lojni, te guinibeeni guiraa reben guedxliuj, gunnäjni yäl'guxhtis lojreni te barguiib si'c rujn ni runchee guesbajn, rlia'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibanäjnü Dios). ²⁹ Nani rlaiz cuadiajg sucuadiajgni diidx ni rnii Sprit Dxan xten Dios loj reguidoo."

3

Rediidx nani rniini lo rexpejn guidoo ni yu' Sardis

¹ Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebal xhaguibaa:

Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä. ² Colguibajn, colgula'tzru nani rapsijctu xcuent rextidxä nani ameer nitloj nen lastootu. Narä ruhuiä ditu niunsa'c dzuun xtenä nez loj Dios. ³ Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. ⁴ Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjreni. ⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadro caj laj renani sibajnnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejnga najc rexpenä. ⁶ Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹ Suhuiitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibeä sutijptu, na'c jieedtu, ni'cni narä sacnäzatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj. ¹¹ Narä di gac laa jäälä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcnj te bejn nani gac guinibee cadro yu' Dios. Sibajnni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. ¹³ Nani rlajz cuadiajg diidx, sucuadiajgni ni rnii Sprit Dxan xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxtej guedxliujre näj guirali ni benchee Dios, laani rniini scree: ¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläi guntu tejni o steeni! ¹⁶ Ni'cni, sa'csi najctu si'c nistiib, ditu gac si'c nisanajl, niclaza gactu si'c nislää, sibäro'ä la'tu. ¹⁷ Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäalu nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusi loä ladnol gacwlu, te di guitujy lu suulu xhabäalu; gusiiza ungüent loä te chää balojlu, te jien lojlu. ¹⁹ Rebejn nani sanälazä, reni'c rulidxä, runäza riareni che et laadi

rujnreni. Ni'cni colsäblajz; colgusiejch lajztu. ²⁰ Colhuii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibaṇsa'czani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtaä cadro rnibeeni xhaguibaa. ²² Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo.”

4

Calä'preni xpala'n Dios xhaguibaa

¹ Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganiddoo, nani riejn si'c xse' te trompet, najni loä:

—Hua'p, gudaä ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagxhilga, rienṇi si'c te guisa'c ni rebalsejs, si'c reguisa'c ni laa jasje, näj cornalina. Guideb gabi yagxhil cadro rnibeeni dejd te xquitgubijdx ni rebalsejs si'c guisa'c ni laa esmeralda.

⁴ Guideb gabi cadro rnibeeni suga' sgälbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejgareni.

⁵ Nez lo yagxhilro cadro rnibeeni riṇi reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dxan xten Dios.

⁶ Nez loj cadro rnibeeni yu' astoocanu te nisdoo ni rienṇi si'c te guihuanro, rdimbichasejsni.

Galäiṇi yagxhilroga näjza guideb gabini suga' tajp man, guideb nez lojreni näjza nez dejtzenṇi yu' balojni. ⁷ Manganidga najc si'c te lionṇ; man ni rojpga najc si'c te gonbäz; man ni riojṇga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa. ⁸ Niluxh guidap remanga tejgareni yu' xho'p xhigareni, guideb gabireni, näj nez nenṇeni liguidxa balojreni, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yälṇribeduxh,

nani yu' galooli, nani yu' ṇaj, nani churu jiääd.

⁹ Guidap remanga rliä'preni xpala'n Dios, rusuxhijbreni rajṇrenini, rdeedzarenṇi xquixtios loj nani rnibee par tejpas. ¹⁰ Dxejc guigälbitap rebengool, suzuxhijbzarenṇi loj nani rbej lo yagxhilro, te gaṇrenṇi nani nabajṇ par tejpas. Sucuaarenṇi xcoronrenṇi nez loj xyagxhiloni, siniireni lojni, säjpreni:

¹¹ Dad Dios baxhuaannu, Guejbpaclu riäjl xca' guiraa rebala'n, guiraa reyälruzuxhijb, guiraa reyälṇribee,

sa'csi Guejblu guläxtiej guira'ti nani yu' ṇaj,

yu'reni sa'csi rlajz Guejblu churenṇi,

ni'cni benchee Guejblu guiraarenṇi.

5

Te guijtz näj te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te biliu guijtz. Caj diidx nez lojni caj diidx nez

dejtzni, nadxe'ni, caj gajdz seii lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäjł guxhal guiitzre? ¿Chuni'c riäjł gutiäjs reseiere?

³ Niluxh nicla tej bejn di nidxäjł ni riäjł gutiäjs reseiiga te guxhalni guiitzga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäjł chu niajc nuhuii lo guiitzga. ⁴ Narä ronduxhä sa'csi nicla tej rut riäjłdi gutiäjs reseiiga, niclaza ni riäjł gol guiitzga, niclaza ni riäjł fiitis lo guiitzga. ⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejnni gaan lo yälgujt ni'c naj riäjł guxhalni guiitzga, gutiäjszani guigajdz reseiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guiitzga, guläänini naa ladbee xten nani sobga' lo yagxhilroga canibee. ⁸ Che cua'ni guiitzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zaren i taz oor guidxa te ni najc si'c yaal. Yaalga najc guiraa reyälrbexdx, yälrniab xten rexpejn Dios. ⁹ Cayolzaren i te dicoob ni najc scree:

Guejblu sacduxh,
riäjłpac xca' Guejblu guiitzga,
gutiäjs Guejblu reseiiga, sa'csi bagu't rebejnlu,
näjza xtiejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni rnii garen-garen didxsaj,
ni siääd garen-garen guejdx lo garen-garen ladxbejn.

¹⁰ Badeedlu gacreni rei näjza bixhojz lo Dios.

Laaren i sinibeereni reben guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon najcreni. ¹² Dipduxh najc xse'reni, caniireni scree:

Sacduxh Xiil nani bagu'treni,
ni'c riäjł xca'ni yälrbiduxh, yälrapduxh, yälranduxh, yälmilagwr.
Riäjłza guiliä'pnu xpala'nni, guzuxhijbnu lojni ganunni, gudeednu xquix-tios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez nen guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni,
näjza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni ganunni,
gäbzanu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojñrenini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

² Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälrbidee gudzucajni yälrbadoo, yälrbexilajz, lo guedxliujre, te ju't sa' rebejn. Badeedreni te spadro cua'ni.

⁵ Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäi guidap remanga, birii xse' te ni canii scree:

—Tej kil xob xca'lu gunlu dzuun tebdxej; chon kil salbaad xca'lu gunlu dzuun tebdxej. Niluxh na'c guhua^ullu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzn siädna^lgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejn^{ga} con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tejgareni. Dxejc räjpreni lojreni cuäzsjcreni, gusilajzreni, la^l ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäi gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴ Dxejcti gunitloj guibaa si'cni rnitloj te guijtz che re'ni, rajcni te biliu. Guiraa redajn näjza reyuj ni re' galäi lo nisdoo biniibreni, bidxaa xlajdreni. ¹⁵ Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatzlojreni nen rebiliäa nen redajn. ¹⁶ Dxejc räjpreni loj redajn, loj reguilajz:

—Colguitejb yejcnu, colgucua'tz nuure loj nani rbej lo yagxhilo xh-aguibaa nájza loj yälguxhtis xten nani najc Xiil xten Dios. ¹⁷ Sa'csi abidzujn dxero xten xcälguxhtisni, ¿chuni'c sajc suu nez lojni?

7

Tegayuu tiubitajp mıl rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscüääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyaj. ² Bahuiä lo stee xangl Dios, ni siääd nez cadro rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, nájza lo nisdoo. ³ Räjzni lojreni:

—Guläzsijctero, la! ni guicuaanu te seen lo cuaj reni najc xpejn Dios, te dxejcru sajc guntu daan lo yuj, náj loj nisdoo, náj loj reyaj.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mıl bejn ni bibee loj rexpejn Israel. ⁵ Loj rexpejn Judä bibee tzubitio'p mıl; loj rexpejn Rubén bibee tzubitio'p mıl; loj rexpejn Gad bibee tzubitio'p mıl; ⁶ loj rexpejn Aser bibee tzubitio'p mıl; loj rexpejn Neftalí bibee tzubitio'p mıl; loj rexpejn Manasés bibee tzubitio'p mıl; ⁷ loj rexpejn Simeón bibee tzubitio'p mıl; loj rexpejn Leví bibee tzubitio'p mıl; loj rexpejn Isacar bibee tzubitio'p mıl; ⁸ loj rexpejn Zabulón bibee tzubitio'p mıl; loj rexpejn José bibee tzubitio'p mıl; loj rexpejn Benjamín bibee tzubitio'p mıl.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, náj raz xtenreni, náj xtiidxreni. Suga'reni nez loj yagxhilo xten ni rnibee, nájza nez lojni ni najc Xiil xten Dios. Najcwreni ladnolbäj, ca'zarení zıjn. ¹⁰ Dipduxh rniireni, räjpreni:

Dios ni rnibee lo yagxhilo, nájza nani najc Xiilre, baslaareni nuure lo xtojlnu.

¹¹ Suga'za guiraa rexangl Dios guideb gabi yagxhilo cadro rnibeeni, nájza guideb gabi rebengool nájza guidap remanga, dxejcti bazuxhi-jbreni, basajbreni lojreni nez lo Dios, ¹² räjpreni:

Sugacni si'c. Loj Xtistisnu colye'tz sacduxhni;
colguiliä'p xpala'nni;
laatisni rajpni yälrajn;
lojtisni colgudeed xquixhtios, laatisni colgan,
colsxhıjb lojni; laatisni rajpni yälrnibee nájza yälmilagwr.
Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiäädreni?

¹⁴ Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwduxh, renani abia rextojlni sa'csi xtiejn Xiil xten Dios agudıx xtojlni. ¹⁵ Ni'cni suga'reni nez loj yagxhilo xten Dios dxej-yääl cayujnreni xtuunni neñ xquidooni. Ni'cni sacnä j nani sobga' lo yagxhilroga guiraa renani suga' nez lojni, sunäjtisni

laareni. ¹⁶Dirureni guiliaan, niclaza jiojłreni, diza gubijdx guze'c lojreni, dizareni gacnanlaa. ¹⁷Sa'csi nani najc Xiil xten Dios ni sobga' galäii loj yagxhilo xten Dios, laani cayajpnireni si'c xilbäz, sinänireni cadro yu' nisyä ni rudeed yälñabajñ par tejpas. Suspijdz Dios nisbee balojreni, dirureni goon par tejpas.

8

Ni rajc gajdz seiiga

¹Che batiäjsni ni rajc gajdz seiiga, gucdxi xhaguibaa si'cti med or. ²Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejñ Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴Dxejcti gujxhga nägajc rextidx rexpejñ Dios, birii ladsnaa xangl Dios ni ca' bacue, huä'preni nez loj Dios. ⁵Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

Retrompe't

⁶Dxejcti guigajdz rexangl Dios ni ca' guigajdz retrompe't, guzusinreni te guisloj gołreni retrompe'tga.

⁷Che bil trompetganid, guixob näj guiboo nu'chreni rejn gusloj caya-jbreni loj guedxliuj. Dxejcti huejc ni riojñ la' guedxliuj, huejcza ni riojñ la' reyajg näjza guiralii recuaan.

⁸Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojñ la' nisdoo si'c rejn. ⁹Dxejcti gujt ni riojñ la' rebäjl näj guiraa reman ni yu' loj nisdoo. Gunitlojza ni riojñ la' rebarcw ni sazaj lo nisdoo.

¹⁰Che bil ni riojñ xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojñ la' regueuu, näjza cadro rliejn nis. ¹¹Laj bajlga najc Ajenjo, ni säloj te cos ni nanladuxh. Ni riojñ la' nis gujc nis nanladuxh. Dxejcti gujt xhidalduxh bejñ xcuent nisanlaaga.

¹²Che bil ni rdajp xangl Dios trompe't ni ca'ni, guxhijn ni riojñ la' gubijdx, näjza ni riojñ la' bäii, näjza ni riojñ la' rebal xhaguibaa, bicäyreni. Dxejcti dirureni guzanij ni riojñ la' dxej, näj ni riojñ la' yääl.

¹³Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aiil! ¡Aiil! ¡Aiil! Riaduxhä reben guedxliuj che guisloj goł schon rexangl Dios retrompe't ni ca'reni. Sidejd reben guedxliuj trabajwduxhru.

9

¹Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni liäii ni ruxhal ro' gabijl.

²Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³Dxejcti lo gujxhga birii betzsu gusujreni guideb lo guedxliuj. Cua'reni yälñibee gacreni nialajz si'c nialajz renaxejb. ⁴Cua' remanga yälñibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsireni. ⁵Cua'reni yälñibee na'c ju'tni bejñ, gaii bäii gusacsireni xcälñayanreni bejñ. Luxh xcälñayanreni

najc si'c yäl'nayan cadro rauya' te naxejb te bejn. ⁶ Neñ redxejga, siguiil rebejn yälgujt, luxh direni guidxälni. Luxh mase rlajzreni guetreni, sibicaj yälgujt lojreni.

⁷ Rebetzsure najc si'c recabaii ni suchee te chääreni lo guer. Yejcreni yu' te ni najc si'c te corõn oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläjyreni najc si'c läjy lion. ⁹ Luxh guideb tiejxhreni caj si'c guiib ni rusäudzu'tzreni. Rubeduxh rexhigaareni, si'c rubej che ruxun xhidalduxh cabaii näj xcarreni che agojl chääreni guer. ¹⁰ Xhibaanreni najc si'c xhibaan naxejb, xcuchreni yu' yäl'nayan te gusacsireni reben guedxliuj gaii bäii. ¹¹ Yu'za ni rnibee lojreni, xangl benḏxab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siädäni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴ Luxh xse' bejnga canii loj ni najc rxho'p xangl Diosga, ni ca' trompe't:

—Basläa guidap reangl nani caduu nez rogueuu ni laa Eufates.

¹⁵ Dxejcti basläani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. ¹⁶ Biejn diagä bal najc guiraa resoldaad ni rbijb cabaii: najcreni tio'p gayuu miyon.

¹⁷ Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guiib, najcni xniaa näj zul näj gojtz. Dxejcu yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn cuua bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebenḏxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi saren. ²¹ Diza rebejnga nusiejch lajzreni xcuent xcälrugut'reni, xcälrujnreni yälbidxaa, xcälresnäjreni bejn ni di gac chäälni, niclaza xcälgubaanreni.

10

Te angl ni ca' te guijtz

¹ Bahuiä stee xangl Dios ni rajp yälrnibeduxh, siädjiäjtnei xhaguibaa, li yu'ni neñ bāj, yejcn dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ² Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³ dxejc guredxaduxh anglga si'c rbedxa' beedz. Dxejcu gunii guigajdz guzii sigajcsa. ⁴ Che gulujx gunii guziiga, narä rlazä nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuualuni.

⁵ Angl nani suj ni'ni loj nisdoo näjza loj yuj, guläs naani ladbee nez xhaguibaa. ⁶ Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjpmi:

—Diru redxejre gac^{laa}. ⁷ Che guidzujntis dxej ni agojl goł ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladz^{naa} angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nan^{laani} xque'lu, niluxh ro'lu sajcnj nejxh si'c dzujn.

¹⁰ Dxejcti cua'ä libre'ga lo ^{naa} anglga, dxejc gudauäni. Ro'ä guyu'ni nejxh si'c dzujn, luxh che gudä^{mäni}, lacti guc nan^{laani} xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rereii.

11

Tio'p niguii ni rusule' xtidx Dios

¹ Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb nenga. ² Na'c gutiexhlu gabi lole' guidooga, sa'csi ni'c acua' rebenzjiztni te tiubitio'p bäii chaläjsreni guedxdxan si'ctis ni rlajzreni. ³ Narä sudedä yäl^{rnibee} lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mıl tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlajz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjl guet chutis ni rlajz gun latsiajreni. ⁶ Guiro'p redade'ga rajp yäl^{rnibee} te gusäuren xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yäl^{rnibee} te guchaareni nis te gacni rejn, rajpzareni yäl^{rnibee} te jiädgusacsı xhitis plaag lo guedxliuj, si'ctis huält ni rlajzreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijlⁿⁱ guiro'preni. Sujnni gaanreni, sugu'tniren. ⁸ Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruiz. Guejdxroga rbälajzareni Sodoma näjza Egipto. ⁹ Choñ dxej garol guiraa rebejn ni siääd guedxbäz, ni siääd guedxro, ni najc garen-garen ^{raz}, ni rnii garen-garen xtidx guiraa rebejn guedxliuj, suhuii loj guiro'p rebengutga, direni gusaan guiga'tzreni neñ baa. ¹⁰ Guiraa renani nabajn lo guedxliujre sibalazduxhreni sa'csi gujtreni. Luxh sa'csi rbalajzduxhreni, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹ Che gudejd choñ dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhreni. ¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhzeni, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujn ni riojnğa.

Ni rajc gajdz xangl Dios goł trompe't

¹⁵ Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni: Xcälrnibee guedxliuj agudejd ladzña Dad Dios nājza Jesucrist; luxh laani sinibeeni par tejpas.

¹⁶ Gałbitajp rebengool nani sobga' lo tron xtenreni cadro rnibee Dios, biabrlorjreni nez loj Dios te calä'preni xpala'n Dios. ¹⁷ Räjpreni: Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

¹⁸ Bidxe'ch reben guedxliuj lojlu, luxh abidzujn dxej guidxe'chlu lojreni, gunlu yälguxhtis rebengut, te gudeedlu cossa'c loj rexpejnlu, lo renani gunii xtidx Dios, lo renani huililajz xtiidxlu, lo renani rusuxhi-jbni nez lojlu;

rebenproob sigajc rebenro.

Abidzujnza dxej che cuäcajlu renani bejn daan guedxliujre, te nitlojreni par tejpas.

¹⁹ Dxejc bixal xquidoo Dios ni yu' xhaguibaa, nen guidooga bien te guijn cadro yu' guij cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc białb te guixobroduxh.

12

Te gunaa nāj te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnı yu' te coron ni nac-chee tzubitio'p balxhaguibaa.

² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³ Dxejcti bahuiä stee seen xhaguibaa: te manxniaa ni rujn lojnı si'c loj te gutiatzro, manduxhni. Yu' gajdz bitiujejni, sojb tzuu xca'chni. Tejga yejcnı yu' te coron, najcreni gajdz coron. ⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga, najcnı te niguii, luxh te bar guuib nungäjl guinibenäjni lo guiraa reben guedxliuj. Guläsgajcreni bāzga te sanärenini xhaguibaa cadro rnibee Dios. ⁶ Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

⁷ Dxejc guyu' guer xhaguibaa, xangl Dios nani laa Miguejl nāj resa'ni bacuanājreni gutiatzro. Gutiatzroga nājza rexanglnı gudılduxhzeni, ⁸ niluxh direni niujn gaan, luxh di niajcdıru nia'n manga nājza resa'ni xhaguibaa. ⁹ Dxejcti bacuaareni manroga nājza resa'ni lo guedxliujre.

Laani najc ni gujc bäl galoroga, ni najc gueb Beṇḍxab, ni laaza Satanás, ni rusguee guideb guedxliujre.

¹⁰ Dxejcti beijn diagä xse' te ni canii dipduxh xhaguibaali, räjpni:

—Abidzujñ yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl. ¹¹ Laareni gujc bejnreni gaan loj beṇḍxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹² Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt beṇḍxab lo guedxliuj, luxh cadxecheduxhni sa'csi anajñni guxii dxej räjpni.

¹³ Che guchee gutiatzroga abacuaarenini lo guedxliuj, birinajlñi gunaa nani guyu' xi'ngaanni te gusacsínini. ¹⁴ Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Choñ ijz garol guyu'ni ro'c, nacuatxlojni lo bälga. ¹⁵ Dxejcti ro' gutiatzrore birii nis si'c te gueuu te nuslo'ni gunaaga. ¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷ Dxejc bidxecheduxh gutiatzroga loj gunaaga, ni'c sääni te gucuanäjñi sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

13

Tio'p manduxh

¹ Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejsa xca'chni yu' te coron. Yu' gajdz bitiuycjni cadro caj diidx ni rniyaj Dios. ² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnibeduxhni. ³ Dxejcti bahuiä te yejcnì najc ascanu yu' chu batiuugni con madxed, ameer guetni, luxh biajc cadro gurujg yejcnì. Ni'cni rdxeloduxh guiralli rebejn guedxliuj, sanajlreni manduxhga. ⁴ Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlñi, gucuanäjñini?

⁵ Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiu-bitio'p bäii, gunni si'ctis ni rlajzni. ⁶ Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷ Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. ⁸ Dxejcti guiraa reben guedxliuj sazuxhijbreni, sagajñreni manroga, guiraa rebejn nani di lajreni nicaj lo libr xten yälñabajñ xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹ Palga yu' chu rlajz cuadiajñni, sugucuadiagsa'cni. ¹⁰ Palga yu' chu nungäjñ jiäuu neñ latzguiib, siäupacni. Chutis ni ju't te bejn con te madxed, con madxeda guetni. Ni'cni renani anumbee Dios, riäjñ gunreni huant, chanuutis chalilazsa'creni xtidx Dios.

¹¹ Dxejcti bahuiä loj stee manro, cariini neñ yuj. Sojb tio'p xca'chni si'c xca'ch te xiil, rniini si'c rnii te gutiatz. ¹² Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcti, luxh bjaic yejcti. ¹³ Manroga ni birii neñ yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. ¹⁴ Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcti, luxh bjaicza yejcti. ¹⁵ Dxejcti man ni rojpga baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini. ¹⁶ Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbáz. ¹⁷ Gunibeezani digacdi sii, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga. ¹⁸ Dee rquiin yálnajn. Renani rajp yálnajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

14

Dij ni roļ te gayuu tiubitajp miļ

¹ Che bahuiä stee, bahuiä suga' Xiil xten Dios yejc dajn ni laa Sión. Suganäjni te gayuu tiubitajp miļ bejn nani caj lo cuajreni laj Xiil nāj laj Xtadni. ² Biejn diagā rubej xhaguibaali, rubeduxh, riejnni si'c rubej xhidajl gueuro, nāj te guziro; riejnzani si'cni riejn che cayol xhidajl bejn ni roļ arp. ³ Cayolreni te dicoob nez loj tron cadro rbej nani rnibee, nājza nez loj guidap reni najc si'c man ni nabajnpac, nājza nez loj rebengool. Rutliidi gujc bisieeddi dijga, xtebtis tegayuu tiubitajp miļ bejn nani gulaa lo reben guedxliuj. ⁴ Reniguiire najc renani gajd xhin con gunaa; nicla tejreni di niesnāj te gunaa, najcreni ben dxan. Laaren i rinajlreni Xiil xten Dios cadrotis sääni. Redee gulaa lo reben guedxliuj si'c te gojn lo Dios nājza lo Xiil xten Dios. Gojnre najc si'c gonganid ni rudeed bejn xten te cose'ch. ⁵ Nicla tej didx-xhi di guirii ro'reni, sa'csi xhetliidi xtojłreni, nayaren i suga'reni nez loj tron cadro rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galäi xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbáz, loj reben ni najc garen-garen raz, nani rnii garen-garen xtiidreni. ⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, nājza guedxliuj, nājza nisdoo, nājza cadro rliejn nis.

⁸ Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcäl-latsiajni, xcuent dojl ni bejn i guideb lagaa; najcni si'c reni rä' nejp.

⁹ Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani,

¹⁰ sidxechduxh Dios lojni, di xcälgu^xhtisduxh Dios tedcaj lojni. Sidejd-pacni trabajwduxh neñ balro nájza azufr nez loj rexangl Dios nájza nez loj Xiil xten Dios. ¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojñ manroga nájza reni gojñ banäjb ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälⁿasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcn, dxejcti naani ca'ni te guiboz ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bājga, räjpni:

—Basäl xquibozlu, batiuug, te batie' yälⁿasa'c, sa'csi agojl or guire' yälⁿasa'c, guideb guedxliuj aguyajlni.

¹⁶ Dxejcti nani sobga' lo bājga basniibni xquibozni, batiuugni yälⁿasa'c ni caj lo guedxliujre.

¹⁷ Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. ¹⁸ Dxejcti birii stee xangl Dios nez loj piändxan xten Dios. Laani räjpni yälⁿribee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlni.

¹⁹ Dxejc batiuug angla guiraa reresim uub ni yu' lo guedxliujre nalajznu rebenguijdx, basälⁿireni neñ tanc cadro guläjreni yejcn sa'csi rdxechduxh Dios lojreni. ²⁰ Dxejcti baläjreni yejc reuub nez orii te guejdx. Biriiduxh rejn yejcreni, gutiäs rejnga, bidzujñ rejnga ro'li recabaii, gujcn si'c che riu' nistro gueuu, biäjtni si'cti chon gayuu mil metr guideb gabi cadro baläjreni yejc reuub.

15

Guigajdz xangl Dios nāj lult xcälgu^xhtis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejpgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yälⁿrdxe'ch xten Dios.

² Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäi nisdooğa suga' renani bejn gaan loj manroga nájza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. ³ Cayolreni dij xten toMoisés ni gujc xpejn Dios, cayolzareni dij xten Xiil xten Dios. Scree najc dijga:

Sacduxh, ruscheloj guiraa redzuun ni rujn Guejblu, Dad Dios, ni räjp guiraa yälⁿribee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

⁴ Bahuii, Dad, ħchu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni, siädgajñreni Guejblu, sa'csi abaluiloj guiraa rextzunsacpac Guejblu.

⁵ Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guij cadro caj xleii toMoisés. ⁶ Ro' yudxanroga birii gajdz xangl Dios ni ca' plaag te gusacsireni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor. ⁷ Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rexhijgga xcälguxhtisro Dios nani nabajñ par tejpas. ⁸ Gudxaj guidoo ni najc yudxanroruga gujxh ni siääd xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

¹ Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

² Anglgaloo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

³ Dxejc ni rojp anglga baslojni ni yu' neñ xhijg ni ca'ni loj nisdoo, te bejnni gubixhloj nisdooa gujcn si'c rejn xten te beñgut. Dxejcti gujt guiralii reman ni yu' lo nisdoo.

⁴ Ni riojn anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujcreni rejn. ⁵ Dxejcti biejn diagä gunii angl ni rajp yälñabee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujñ Guejblu yälguxhtis redzunguijdx.

⁶ Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjl gacreni.

⁷ Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälñabee, xcälguxhtis Guejblu najc laaca, si'c riäjl gacni.

⁸ Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñabee guze'cnäjni rebejn guiboo.

⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälñabee loj recosga. Niluxh direni nusiechljazreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäy guideb cadro rnibee manduxhga, luxh rebejn rauya'tisreni lujdxreni sa'csi cayajcreni yälñayanduxh. ¹¹ Guniyajreni Guejb Dios ni yu' xhaguibaa sa'csi rajcreni yälñayanduxh, xcuentza rexquedxnayanreni. Luxh direni nusiechljazreni xcuent xtojñreni.

¹² Dxejcti ni rajc xho'p anglga cua'ni xhijgni, baslojni ni yu' neŋ xhijgga loj gueuro ni laa Eufates. Gueuga gubidzlii nisni te guc-chee te nezyuj xten rereŋi ni jiaäd nez cadro rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii choŋ spritguyjdx ni najc si'c bedz, ¹⁴ sa'csi najcreni resprit xten bendxab, rujnreni milagwr, senro. Rijreni loj guiraa rereŋi loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälŋnibee che guidzujŋni lo guedxliuj. ¹⁵ “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajnbi, te na'c guiga'ni xhabäälŋni, jianxtujyni che guibi'ä.” ¹⁶ Dxejc gutie'reni guiraa rebejnre te lajt ni laa lo didx hebre “Armagedón”.

¹⁷ Dxejcti ni najc rgajdz anglga cua'ni xhijgni baslojni ni yu' neŋ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yälrdinya' näj guziro. Gujcza te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcnj chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnj.

17

Gun Dios yälguxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijl nis. ² Guiraa rereŋi lo guedxliujre bennäjreni gunaaga dojl, sigajcza guiraa reben guedxliuj bennäjreni gunaaga dojl. Gusosnäjäreni gunaaga bejnreni si'ctis ni rlajzreni.

³ Dxejcti huiinäni narä si'c lo te bacal nez lo reyubijdz. Bahuiä loj te gunaa, bijbni dejt te manro ni najc xniaa, luxh guidebni caj diidx ni rniyaj Dios. Gajdz najc bitiuuejcnj, sojbza tzuu xca'chni. ⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguyjdx, recosdxab ni bennäjni reben guedxliuj. ⁵ Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.” ⁶ Bahuiä agusojs gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuuejcnj näj tzuu xca'chni. ⁸ Manroga ni bahuiilu gubajŋni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijt xten yälŋnabajn xten Dios, guijt ni guc-chee che birixtiejli guedxliuj, rebejnğa sidxeloduxhreni che fireni loj manroga nani gubajn galoo, ni gunitloj, niluxh naj agubaŋsacni.

⁹ 'Ree nanab ga'pni yäl'najn. Gajdz rebitiuyejcní sáloj gajdz dajn cadro sobga' gunaaga, ¹⁰ sálojzareni gajdz reií. Agujc gaií reiíga ni cayajb. Tej rereiíga canibee naj. Stee reiíga churu jiáád. Luxh che jiáád lult reiíga, guxii dxej guinibeení. ¹¹ Manro ni gubajn galoo, ni agunitloj naj, ni'c rac xhujn reií, najczani tej loj guigajdz rereií, luxh sinítlojni, sejtñi par tejpas.

¹² 'Guidzuu rexca'chní ni bahuiilu sáloj tzuu reií. Gajdreni guisloj guinibee naj. Laareni nájza manroga xca'reni yäl'rnibee teb or, nala-jznu guxii dxej. ¹³ Tejtis xhigab gun rereiíga, gudeedreni xcäl'nadipreni, xcäl'rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reií ni rnibee lo guiraa rereií. Luxh renani siädñajlñi najc reni agurejdxñi, reni aguleni, sisiudzu'tznäjreni.

¹⁵ Dxejcti najza anglga loä:

—Reni ni bahuiilu cadro sobga' gunadxabga sáloj guiraa guejdx, guiraa beñ guedxliuj, guiraa beñ ni rnii garen-garenca xtiidxreni, ni siáád garen-garen reguejdx. ¹⁶ Guitzuu reca'chga nájza manroga ni bahuiilu, sidxe'chreni loj gunadxabga, suró'nreni gunadxabga, susa'nreni gunadxabga xhabäälni, sawreni bältiejxhni, suze'creni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcäl'rnibeereni lo manroga che guidzujñli dxej ni chale' guira'ti ni gunii Dios gac. ¹⁸ Gunadxabga ni bahuiilu sáloj guedxro ni rnibee loj guiraa rereií loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyäjt xhaguibaa. Siädñani yäl'rnibeduxh, xcäl'rdimbicha'ni bazanij loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäjz rebendxab, ro'c rcanzaj guiralií cuaa spritdxab, najczani xpitiaáz guiraa reman xhaguibaa ni najc mandxab, mandxuudx. ³ Sa'csi guiraa reben guedxliuj agusoizreni xcuent dojl ni bennäjreni gunadxabga, guiraa rereií loj guedxliuj bejn dojl guläsnäjreni gunadxabga, luxh guiraa reben guedxliuj ni ruto' abejnreni ganduxh, agujcreni ri'cw xcuent recosdxab ni rujñ gunabdxabga.

⁴ Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xtenni. ⁵ Sa'csi yuduxh rextolñi, abidzujñreni xhaguibaali, luxh abanajza lajz Dios rextolñi. ⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnñi laani. Neñ co'p cadro badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nñi, gubajññi si'ctis ni rlajzñi lo guedxliuj. Naj colguteed gunaaga trabajw, si'cti mediid ni gulä'pni xpala'nñi; si'cti mediidza ni bibalaznäjñi mood ni gubajññi, sigajcza gac-huin lastooni sa'csi bejnñi xhigab neñ lastooni: “Narä sobga'ä ree si'c te reiñ, te benroduxh, dina gacä biuud, niclaza gac-huin lazá.” ⁸ Ni'cni tejsi dxej siajb yejcní guiraa replaag xten Dios: yäl'gujt, yäl'huin lajz, näj yäl'rliaan, luxh sejczeni lo balguiboo, sa'csi rnibeduxh Dad Dios ni gun xcäl'guxhtisni.

⁹ Guiraa rereii lo guedxliujre ni bennäj gunaadxabga cosguijdx, reni cuansanäjnni, sonduxhreni, siaduxhreni che fiireni gujxh ni carii cadro cayejcnj. ¹⁰ Zijtru sisiujreni sa'csi rdxejbreni replaag xten gunadxabga, dxejc siniizareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucheenu, ala bidzujñ yälguxhtis yejclu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, nājza guiraloj baräjd yagdoo, nāj guiraloj cos saru, ni nacchee läi elefant, nāj cos saru ni nacchee bronz, nāj guuib, nāj márm, ¹³ nājza caneel, guiraloj laj comiid, nājza yalnejh, nāj perfum, nājza yaal, nājza bin, nājza se't oliib, nājza arinsa'c, nājza triuu, nājza gon, nājza rexiil, nājza cabaii, nājza gare't, nājza bejn ni ruto'reni tiejxhreni, xaimreni. Guiraa reni'c ruto'reni. ¹⁴ Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recos-saruduxh agubicajreni lojtu, luxh di gacdiru guidxäl bejn reni'c.

¹⁵ Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, ¹⁶ säjbreni:

—Aii, aii, riaduxhnu guedxrore, nait gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijnreni.

Guiraa recapitán xte barcw, nājza guiraa remarineer, nājza rebejn ni rij biaj lo rebarcw nājza guiraa reni rujn dzuun lo nisdoo, gusujreni zijt, ¹⁸ nājza laareni cahuiireni cayäjs gujxh guejdxga, cabedxa'reni, caniiireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujci ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejnni lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par teppas, dirutu fii lojni. ²² Diru guibi' jiejn cayel nez xladcailu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jien xcälrdimbicha' te bajl ni cagusanij; diruza guibi' jiejn xse' bi'n nāj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

²⁴ Neñ guejdxga bidxälza xtiejn renani gunii xtidx Dios, nājza xtiejn rexpejn Dios, nājza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidalro bejn ni canii xhaguibaa, cayäjpreni:

¡Colguiliä'p xpala'n Dios!

Xtendis Dios, xtenni najc yälruslaa lo dojl,

näj yälrdimbicha', näj yälmilagwr.

² Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadxabga nani caguxhin reben guedxliuj xcuent xcäl'nadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanbajnga bazuxhi-jbreni, biabrojreni gojnreni Dios ni rbej lo tron cadro rnibeeni, canii-ireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuun Dios,

guira'tu ni rajntu Dios, rebenro sigajc reben'nadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniiireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujn dxejguchnaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglä loä:

—Bacuaa diidxre: “Chicbaa renani bidon jiaäd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu ni rusule' xtidx Jesucrist. Bazuxhib lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguli. Entis laaca rujnni yälguxhtis, entis laaca rucuaani che rujnni guer. ¹² Rebalojni rbebajl, yejcn yu' xhidalduxh coron, luxh caj te laj lojni nani rutliidi racee, luxh laatisni raceeni xhi sälojni. ¹³ Najcwni te lajd ni nadiini rejn; lajni najcza Xtidx Dios. ¹⁴ Guiraa resoldaad guibaa xten Dios siädnajlni najcwni ladnol, ladnaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo

guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnz Dios ni rajp guiralii yälrbibee. ¹⁶ Lo xhajbni nájza cuä' cujdni caj lajni: "Reii xten rereii, Dad xten redad."

¹⁷ Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, nájza xpääl recapitän, nájza xpääl rebenro, nájza xpääl recabaii, nájza xpääl renani rbijb recabaii, nájza xpääl guiraa si bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbáz sigajc rebenro.

¹⁹ Dxejcti bahuiä loj manro nájza loj rereii guedxliuj, abire'reni te gucuanäjreni nani rbijb cabainol nájza guiraa resoldaad xtenni. ²⁰ Biga' manroga nájza profetxhii ni bejn senro nez loj manroga te basgueeni guiraa renani cua' seen xten manroga, nájza renani bazuxhijb lo banäjb xten manroga. Guiro'p redee bacuaareni guideb nabajñreni nen te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mił ijz

¹ Dxejcti bahuiä loj te xangl Dios ni siädjiäjt xhaguibaa, siädñäni liäii ni ruxhal guedro ni laa gabijl. Ca'zani te cadenro. ² Anglre gunaaz gutiatzroga, ni gujc bäl galooli, ni najcza benđxab, ni laaza Satanás. Bacuaduunini te mił ijz. ³ Basälñini nen gabijl, te ro'c basäunini, bacuaani liäii te na'cru gusgueeni reben guedxliuj lañ ni guiza' te mił ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrbibee te gunreni yälguxhtis. Dxejcti bahuiä xaim rebejn nani biru' yecni sa'csi huililajzreni xtidx Jesucrist nájza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubañsacreni loj rebengut, gurenäjreni Jesucrist te laani gunibenäjreni te mił ijz. ⁵ Dee najc yälrbansac galoo lo rebengut. Niluxh stecuaa rebengut, direni guibañsac che guisa'li te mił ijz. ⁶ Chichaa rebejn nani guibañsac ganiddoo, najcreni benđxan ni agubicaj xtojñreni. Ni rojp yälgujt di guidzujñ lojreni. Laareni sajcreni xpixhojz Dios nájza Jesucrist, sibenäjreni Jesucrist, sinibenäjreni Jesucrist te mił ijz.

⁷ Che guiza' te mił ijzga, suslasacni Satanás nen gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog nájza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huä'preni lo te camp cadro gulagduxh. Gudäyreni guideb gabig cadro rnibee rexpejn Dios nen guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni benđxab nani biädgusguee rebejn lo bal guiboo ni cayecnäj sufr, lagajc cadro yu' manro, nájza profetxhii nani basguee; lo bal guibooga susacsirenini sidejdreni trabawduxh dxej-yääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjl par laareni. ¹² Bahuiä lo rebengut, beñro sigajc beñnadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejnni yälgutxhtis rebengut xcuent ni bejnreni, xcuenta rediidx nani caj loj reguijtzga. ¹³ Guiranejz biääd rebengut: nisdoo batzuug rebengut ni yu' lojni, gabijl näjza yälgujt batzuugza rebengut ni yu' lojreni. Dxejcti bejn Dios yälguxhtis tejgareni xcuent ni bejnreni. ¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. ¹⁵ Guiraa bejn ni di lajni nidxäjl lo xlibr yälñabajn bacuaazani reni'c lo bajlga.

21

Xhaguibacoob näjza guedxliucoob

¹ Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzä nisdoo. ² Narä Juan, bahuiä lo guedx Jerusaléncoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. ³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniiini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejn. Sibannäj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajch chailajz bejn rediidxre.

⁶ Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälñabajn par tejpas.

⁷ Chutis nani gun gaan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. ⁸ Niluxh renani rdxejb, renani di chailajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejch guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhiig ni guidxa guigajdz reyälguxhtis xten Dios, birii tejni, najni loä:

—Gudaa, te guliä lojlu dxa'p nani guchnaa Xiil xten Dios.

¹⁰ Dxejcti bejnni gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtni nez lo Dios. ¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' teja portonga. Loj teja portonga, caj laj tej retzubitio'p cuaa xten rexpejn Israel. ¹³ Chon portonga caj nez cadro rliejn gubijdx, yu'za chon portonga nez ladbee,

yu'za choṇ portonga nez ladbäw, yu'za choṇ portonga cadro räáz gubijdx. ¹⁴ Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵ Angl ni caninäṇ narä ca' si'c te biquii ni najc ganaxduj oor te gurejxhni guejdxga, näṇ reportonga, näṇ padeerga. ¹⁶ Guejdxga najc cuadraad: sigajc ni siolnī, sigajcza ni gulajgni. Dxejcti cua'ni biquii barejxni guejdxga, barejxni tio'p mīl tio'p gayuu kilómetros tejga laad. Sigajc siolnī, sigajcza gulajgni, sigajcza jiaani. ¹⁷ Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäṇ angla.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuaṇ. ¹⁹ Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäi guejdxga najc ganaxduj oor, rienṇi si'c te guihuaṇ.

²² Dina nuhuiä nicla tej guidoo nen guejdxga, sa'csi suga' Gueb Dios ni rajp guiralni yälrbibeduxh, näṇza Xiil xten Dios. Laani najc xquidoo guejdxga. ²³ Guejdxga dini guiquiṇ gusanij nicla gubijdx niclaza bäi, sa'csi lagajc xcälrdimbicha' Dios näṇza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajc sareni lo bianijga, luxh rereii ni siäd lo guedxliujre siädnäzareni xcälrbibeereni, näṇ xpala'nreni ro'c. ²⁵ Di ro' reportanga jiäuu rdxej, luxh ro'c xhettiza yääl. ²⁶ Ro'c chanäzareni yäl'nasa'c näṇ xpala'n reguejdxro ni yu' lo guedxliuj. ²⁷ Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näṇ yälrusguee. Ro'c siu' ganaxduj renani caj lajni lo libr xten yäl'nabajṇ par tejpas nani ca' Xiil xten Dios.

22

¹ Dxejc baluii anglga te gueuro loä, cadro yu' nisya xten yäl'nabajṇ. Rdimbicha'ni si'c te guihuaṇ, luxh cariini lo tron cadro rnibee Dios näṇza Xiil xten Dios, ² rdejdnī loj nezyujro ni rdejd galäi guejdxga. Guiro'p laad gueuga sojb reyajx xten yäl'nabajṇ, lojreni rcaj tzubitio'p cuaa ninejxh nen tebijz, tejga cuaani tejga bäi; luxh rebalajg ni rcaj lo reyajgga najc te gusiajcnī reben guedxliuj. ³ Dxejcti ro'c xhettiru yälrdzubde, sa'csi ro'c yu' tron cadro rnibee Dios näṇza Xiil xten Dios, ruzuxhijbza rexpejṇni, rajṇreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu. Luxh reni rbäṇz ro'c di guiquiṇ nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjreni par tejpas.

Siäddzungajxh dxej ni guibisac Jesucrist

⁶ Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni guni xtiidxni agujc xchero, lagajc laani baxhalni xanglni te baluilojṇi loj rexpejṇni guira'ti nani agojl gac.

⁷ —Sajngalu gan, siojb jiälä. ¡Chicbaa nani riu rediidx ni caj lo librré!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo librrre. Bazuxhijb loj Diostis.

¹⁰ Dxejc najni loä:

—Na'c gusäuuu guijtz cadre caj rediidxre xcuent nani churu gac, sa'csi asiäddzungajxh redxej ni chale'reni. ¹¹ Luxh laļ ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza beņnaya, si'cza chanuu gacni beņnaya.

¹² Gunajtiro:

—Siojb jialä, luxh siädnää xhi gunidxä loj tejgatu si'c ni riäjl xca'tu xcuent dzuun ni bejntu. ¹³ Narä Jesucrist nacä si'c najcza A nājza Z, ni säloj nani rbäxtiej nājza nani ruluux.

¹⁴ 'Chicbaa renani riu xtidx Dios, najcreni si'c ni rguib xhajbreni te sajz jiu'reni nez porton xten guejdxga, sajza gauni ninejxh ni caj lo yajg xten yalñabajn par tejpas. ¹⁵ Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, nājza ni rchaglaiz rnii didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neņ reguidoo loj rexpenä. Narä nacä te xajg toreei David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxan xten Dios nājza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädza chutis ni cayojl, sujiädäxlia'ni nis yalñabajn par tejpas.

¹⁸ Sa'csi narä rniliä'ppac lojtu, guiraatu ni riejn diajgtu rediidx ni caj lo guijtzre xcuent recos ni churu gac, palga yu' chu tejtū gutajlru diidx ni caj guijtzre, suteedru Dios bejnga replaag yejcnii loj ni caj lo guijtzre. ¹⁹ Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yalñabajn par tejpas, nājza lo guedx Dxan, ni caj xcuentreni lo guijtzre.

²⁰ Nani cagusule' diidx xcuent guiraa redee guniini, najni:

—Guliipacni siojb jialä.

Sugacni si'c. Gudaa Dad Jesucrist.

²¹ Sujiääd xcälracnäj Dad Jesucrist lo guiraatu. Sugacni si'c.